

SC.12.P1.7.





MAG 91



JOSEPHI MARIANI PARTHENII

S. J.

ACTIONES.



ROMAE
EXCUDEBAT GENEROSUS SALOMONI
AN. clō. lō. cc. lxxii.
SUPERIORUM PERMISSU.

1111111111

1111111111

1111111111



1111111111





JESU CHRISTO

ÆTERNI PATRIS FILIO HUMANI GENERIS REPARATORI

DIVINÆ EJUS MATRI VIRGINI MARIÆ

SINE MACULA PECCATI ORIGINALIS CONCEPTÆ

SANCTO PETRO APOSTOLORUM PRINCIPI

SANCTO PAULO GENTIUM APOSTOLO

NEC NON RELIQUIS GENERATIM MARTYRIBUS

CATHOLICÆ APOSTOLICÆ ROMANÆ FIDEI

ASSERTORIBUS

AC NOMINATIM IIS

QUI URBEM ET LATIUM

FUSO TRIUMPHALI SANGUINE HONESTARUNT

JOSEPHUS MARIANUS PARTHENIUS

SOC. JESU

HOC QUIDQUID EST OPERIS

DAT DONAT DICAT

CONSECRATQUE.



**NON PLUS SAPERE QUAM OPORTET SAPERE;
SED SAPERE AD SOBRIETATEM. Ad Rom. 12. 3.**

PAULUS ANTONIUS RAFFAGNI⁵

SOCIETATIS JESU

In Provincia Romana Præpositus Provincialis .

CUM Opus , cui titulus : *Josephi Mariani Parthenii S. J. Actiones* , ab uno ex nostræ Societatis Sacerdotibus conscriptum , aliquot ejusdem Societatis Theologi recognoverint , & in lucem edi posse probaverint , potestate nobis a R. P. Laurentio Ricci , Præposito Generali , ad id tradita , facultatem concedimus , ut typis mandetur , si ita iis , ad quos pertinet , videbitur . In quorum fidem has litteras manu nostra subscriptas , & sigillo nostro munitas dedimus
Romæ 21. Novembris 1771.

Paulus Antonius Raffagni .

I M P R I M A T U R .

Si videbitur Reverendis. P. Magistro Sacri Palatii Apostolici .

D. Jordani Patr. Antioch. Vicegerent .

Quod videmus quamplurimos conari , paucos vero assequi , ut difficultatem , maximeque impeditam , quam susceperunt tractare provinciam , eam feliciter absolvant , id contigisse Mariano Parthenio S. J. intellexi , viro bonis artibus ac studiis excolitissimo , editisque operibus claro , cum obsecuturus Reverendis. P. S. P. A. Magistro , diligentissime perlegerem illius librum , cui titulus ; *Josephi Mariani Parthenii S. J. Actiones* . His enim , quas olim habuit Florentiæ , cum ibi eloquentiam doceret , ad formam , & similitudinem illarum , quas scripsit Cicero in Verrem , summam Artis Criticæ difficultatem exponit , præcipuos illius canones accurate perpendit , & de recto , pravoque ejusdem usu fuse , docte , solide , & luculenter differit . Stylum autem , quo hæc omnia persequitur Auctor , antiquum illud Latium sapere legentibus palam est . Quare cum nihil in Opere occurrat , quod Catholicæ Religioni , bonisque moribus adversetur , Reipublicæ Christianæ splendori , necnon Eloquentiæ cultoribus utilitati futurum arbitror , si prælo committatur . Dabam Romæ xiv. Kal. Decem. A. MDCCLXXI.

*Joannes Baptista Gautier Lingue , & Humanitatis græcæ
in Archigymnasio Romano Professor Emeritus .*

UT Reverendissimi Patris Sacri Palatii Apostolici Magistri iussa facerem , doctissimas , & elegantissimas *Josephi Mariani Parthenii S. J. Actiones* accurate , diligenterque perlegi : Qua in re nihil reperi , quod vel Christianæ Religionis sanctitatem , vel bonos mores læderet ; verum omnia , summa animi mei incunditate , percepi Romanam majestatem redolere . Quare in publicam lucem edita multo usui studiosis bonarum artium , & eruditis viris voluptati fore censeo . Datum Romæ in Monasterio S. Prædixis iv. Idus Januarii . An. MDCCLXXII.

D. Rodolphus Androssa Abbas Congregationis Vallis-Umbrosæ , in Archigymnasio Romano Rector , & Historiæ Professor .

I M P R I M A T U R .

F. Thomas Augustinus Ricchini Ord. Præd. S. P. A. Mag.

EDI.

EDITOR OPERIS

LECTORI BENEVOLO.

E Dito jam a Parthenio nostro illo suo Electricorum opere , tum ego , tum alii ejus amici , illi auctores fuimus , ut orationes suas , quas multas & habuit , & conscripsit , limaret ac perpoliret , easque in publicam lucem edi pateretur . Ego quidem illum minus in hoc pugnacem sensi , quam tum , cum de edendis Electricorum libris agebatur , fueram expertus . Itaque , si non libenter , minus certe repugnanter mea & amicorum obsecutus est voluntati , deditque operam , ut quæ scripta a se prosa oratione fuerant , multa cura diligentiaque recognosceret , & , quantum quidem assequi potuit , perficere conaretur . Quo in conatu quid tandem præstiterit , Lectorum judicium erit . Certe unum Ciceronem Latinæ eloquentiæ parentem sibi ad imitandum proposuit , in eo uno mentis aciem obtutumque defixit ; unum sic combibere penitus animo studuit , ut eum unum exprimere , & quantum potuit , Lectoribus exhibere adnissus sit ; qua in re si non exitus , voluntas certe ejus laudari omnino debet . In magnis enim voluisse fat est . Hoc vero quid operis sit , quod nunc editur , Auctor ipse satis indicat in primo suarum Actionum exordio , in quo & operis finem , quem maxime spectavit , aperte enunciat , & operis totius divisionem

distincte proponit . Præterea styli ac dictionis genus
 ab arrogantia reprehensione vindicat ; quin & inscrip-
 tionis ipsius , quæ operi præfixa est , probabilem sa-
 ne rationem reddit . Jam , si quod opus unquam adno-
 tationum copia ornari potuit , hoc certa est , in quod
 totius propemodum Ecclesiasticæ Historiæ notitiam con-
 gessere facile admodum fuit . Sed in hoc ita reluctan-
 tem Auctorem habui , ut expugnare me illum posse de-
 sperarim . Aiebat enim , opus esse huiusmodi , quod
 non adnotationibus ornaretur , sed potius oneraretur ;
 se studuisse perspicuitati , quæ lumine adnotationum il-
 lustrari minime indigeret ; non captasse se in his Actio-
 nibus sive conscribendis , sive habendis eruditionis fa-
 mam ; obvia quæque , & nota cuique vel mediocriter
 erudito , persecutum esse , eaque tantum expolienda cu-
 rasse ; se nonnullorum , quos coarguit , Auctorum nomi-
 na non ideo reticuisse , quia ab Editore enuncianda puta-
 verit , sed quia suppressa omnino voluerit , ne cuiquam
 ulla offensionis occasio præberetur . Hæc , aliæque hu-
 jusmodi multa addidit , quibus mihi quoque persuasit ,
 fuisse consultius ab adnotationibus abstinere . Acquiievi
 igitur ejus consilio ac voluntati , & præter pauculas ,
 quas non tam necessitati , quam receptæ ætate hac nostra
 consuetudini serviens addam , non committam , ut hac in
 re Auctori molestus sim . Illud vero Lectorem hoc loco
 præmonendum omnino duxi , Parthenium nostrum , quæ
 ejus modestia est , & ingenium ab omni contentione ab-
 hor-

horrens , neminem ulla in hujus operis parte designasse , & illud unum habuisse toto hoc in opere propositum , non ut artem criticam , eosque , qui illam cum laude exercent , criminaretur , quod pravi & insipientis hominis esset ; sed unum ejus perversum usum , quod omni reprehensione vacat , redargueret . Neque vero Pärthenius ipse , censuram omnem , quodam superbientis animi fastidio , abnuit ; immo autem se Lëctorum suorum judicio & censuræ libenter subicere non renuit . Opto redargui me Cicero inquit de Nat. Deor. lib. 111. cap. XL. & idem Tusculanar. Quæst. lib. 11. cap. 11. Tantum abest , ut scribi contra nos nolimus , ut id etiam maxime optemus . Jam , cum tantus vir tanta utatur modestia , quis tam arrogans erit , qui omnem reprehensionem detrectet ? Quin ea justæ reprehensionis natura est , ut ex illa , præter quam quod admissæ culpæ merito animadversio debetur , ex illa , inquam , non parum , qui sapiat , proficere possit ; & ita se gerere , ut vel omnem in posterum reprehensionem effugiat , vel saltem non in eam , ad quam semel offendit , iterum ignarus incurrat . Eo etiam illud accedit commodi , ut , cum aliqua reprehenduntur , quæ censura præterit , ea recte scripta esse intelligantur . Quapropter , qui e genere quorundam delicatiorum non erit , qui vulnus in latere , quod acu punctum videatur , pro ictu gladiatoris putant , is illa Plinii Epistolar. lib. 111. ad Vocenium Romanum , cui Panegyri-

ricum Trajano Augusto a se dictum miserat , scriben-
tis usurpabit ; Cætera tibi placuisse magis credam , si
quædam tibi displicuisse cognovero . Parthenius autem
noster sollicitus quidem est , utrum doctis & eruditis
viris placeat nec ne , quorum judicium atque sapien-
tiam veretur quam maxime , sed multo sollicitior est ,
ne cuiquam , justæ offensionis oblata causa , displiceat .
Ad ei præcipue cordi esse nemo dubitabit , qui ejus
indolem atque ingenium noverit . Cæterum , ne lon-
gius , quam par est , nostra Præfatio excurret , omnes ,
quos has Actiones legere contigerit , præmonitos vo-
lo , obtestorque , ut illud pro certo habeant , Auctorem
in iis partim habendis , partim conscribendis id unum
habuisse propositum , ut reipublicæ , cui operam suam
in erudiendis ad pietatem atque doctrinam adolescenti-
bus , tot annis navavit , hoc etiam edendo opere , ali-
qua ratione prodesset , & Catholicæ præsertim Reli-
gioni , quam , immoderata opinandi licentia , in ma-
gnum certe discrimen adduci omnes boni nunc affirmant
ac lamentantur , pro sua parte consuleret .





DE SUMMA
ARTIS CRITICÆ
 DIFFICULTATE
 AD FLORENTINOS

ACTIONIS I. LIBER I.



UM mihi primum, Florentini, meorum Moderatorum auctoritate prorogatam tradendæ apud vos Rhetoricæ provinciam intellexi, vidissemque, veteri more institutoque majorum, mihi singulis annis ex hoc loco, non tam ad eos, qui mihi in disciplinam traditi sunt, quam, & multo verius, ad hunc lectissimum sapientissimumque conventum verba esse facienda; statim in eam curam animo & cogitatione incubui, ut id potissimum argumenti ad tractandum eligerem, quod & institutæ a me vitæ rationibus maxime congrueret, atque huic tantæ frequentiæ & rerum copiæ, & præstantiæ, & utilitate respon-

ponderet. Animadverteram jam pridem, Artem Criticam, si unquam alias, hoc certe tempore, impensius exultam; hanc vulgo ab omnibus, qui aliquam litteris impendunt operam, summo studio celebratam. Gaudebam equidem, & lætabar vehementer, hunc honorem haberi meritissimæ arti, quæ reliquis fere artibus dignitate præstat, necessitate vero longe multumque antecellit. Quid enim non solum ad totius litterariæ reipublicæ, sed ad Religionis etiam ipsius commodum atque utilitatem conducibilius esse, aut optari poterat, quam doctissimos existere viros, qui in facultates omnes acrius inquirerent, qui, quos in iisdem deprehenderint, errores corrigerent atque emendarent, qui falsas & superstitiosas persuasiones de hominum animis penitus evellerent, qui suum cuique jus tribuerent, qui denique veritatis patrocinium susciperent, eamque in veterem possessionem, unde diuturnitate temporis deturbata existimari potuisset, omni ope, industria diligentiaque restituendam curarent. Verum, cum hanc ipsam artem ad nonnullos homines adductam viderem, qui eadem per summam intemperantiam abutentes, omnia labefacerent ac perderent; quantum ex artis ipsius incrementis lætitiæ ceperam ac voluptatis, tantum ex perverso ejusdem usu capiebam doloris atque ægritudinis. Dolorem porro augebat meum illa cogitatio; Non hac intemperantia solum innoxia per se arti summam constari invidiam, quod aliquo modo ferri poterat; sed, quod nullo

Id modo ferendum erat, id agi & comparari, ut immoderata opinandi licentia, Religionis sensum fundamenta subruerentur, & Religio ipsa in apertum certissimumque discrimen adduceretur. Hoc me angebat quam maxime, & hoc tantum malum, instans jam atque ingruens, esse prohibendum, atque omnino avertendum arbitrabar. Quapropter illud vehementer optabam, ut ea mihi opportunitas daretur, qua & nobilissimam artem ab invidia levarem, &, quantum quidem assequi dicendo possem, tanto, tamque exitiali ac pestifero imminenti malo occurrerem. Cupiebam posse me de tota artis critica ratione, quæ vellem, quæque sentirem, apud æquos Judices ac Disceptatores, paullo liberius dicere, & intima animi mei sensa hac super re cum iisdem communicare. Hæc ego cogitabam, & animo imminebam in tempus, quo tempore expetita jamdiu opportunitas mihi offerretur. Hanc autem mihi oblatam esse nunc arbitror, Florentini. Dicendum enim apud vos, quorum benevolentiam cum anno superiore erga me summam expertus sim, non dubito, quin eandem, quoties in hunc locum verba factururus ascendam, mihi sitis exhibituri. Dicendum apud doctissimos & æquissimos viros, quorum, quantum sapientia deterreor, tantum æquitate erigor & confirmor. Dicendum sæpe, ut propterea prolixa oratione uti possim, sententiamque meam de tota arte critica apertius expromere, & enucleatius explicare. Dicendum denique de rebus gravissimis & maximis

ximis, neque omnino a Religione disjunctis, quæ merito suo excitare vos debent, & attentos tenere, & me ad dicendum vehementius concitare. Ego vero, quantum potero, hac mea facultatis mediocritate, enitar, ut & mihi, & argumento, quod cæteris præoptavi, ne defim. Non enim in eo orationis genere versari placuit, quod aut ad inanem eloquentiæ ostentationem, aut ad vanam eruditionis pompam referretur. Algeat Orator necesse est, qui non a rebus, quæ tractantur, subiectis quibusdam veluti facibus, inflammetur; dormitent vero auditores, quorum animi, nulla objecta utilitate, quasi aliquo præsentis lucri, & magni cujusdam quæstus irritamento pellecti, ad audiendum erigantur. Hoc mihi necessario præcavendum existimavi, & omnino providendum, ne materiæ inopia infantia mea premeretur, & exilitate animi vestri debilitarentur. Verum, ut in summa rerum dicendarum copia aliquis & modus & ordo adsit, tripartita erit totius propositi argumenti tractatio. Dicam primum de summa Artis Criticæ difficultate; deinde de pravo Artis Criticæ usu; postremo denique de recto Artis ipsius usu; & hæc a me separatim pluribus Actionibus tractabuntur. Si quis autem futurus est, qui tractandi rationem forte reprehendendam, aut arrogantia tribuendum putet, quod veterem illam Latini fori contentionem, apud Oratores jam defuetam, longo intervallo revocare conatus sim; sciat is, me ad hujusmodi dicendi genus ab ipsa materia;

quæ

quæ tractari sine contentione atque inflammatione animorum non potuit, fuisse compulsum. Itaque oratio rebus subjectis accomodari omnino debuit, & necessario rerum ipsarum amplitudini, ac gravitati attemperari. Quæ quidem præcipua causa fuit, cur hæc, quas habiturus sum, Orationes, Actiones inscriberem, ut eas sic inscribi non tam placuerit, quam oportuerit. Quid vero in hoc dictionis genere effecerim, vestrum judicium erit. Ego certe nihil mihi sumo, & ne in ea quidem ipsa arte, quam profiteor, quidquam arrego. Habetis jam argumentum, Florentini, aut omnibus, quæ tractari fere ab Oratoribus solent, anteferendum, aut certe cum paucis, ubertate rerum, dignitate, utilitate conferendum. Habetis consilium meum, quod Religionem potissimum spectat, quæ me præcipue ad hanc causam suscipiendam attraxit; cui pro viribus, si quid potero, hac mea ingenii tenuitate, opitulari consabor. Reliquum est, ut & vos me attente audiat, & ego ab eo, quod primum in partitione posui, exordiar.

II. Suis omnia momentis expendere, falsa a veris secernere, certum de gravissimis ac difficillimis rebus judicium interponere, aliorum scripta cognoscere, & quid quisque peccarit deprehendere, castigare, corrigere, uno verbo, Critici munus exercere, operosa res est, Florentini, ingens provincia, onus denique majus, quam ut vulgo recipi ac sustineri posse videatur. Et sane, si quotquot ad hanc artem, omnium
lon-

longe difficillimam , accedunt , Horatianum illud nunquam satis inculcandum ; *Quid ferre recusent , Quid valeant humeri* , attento animo reputarent ; nec prius ullum sibi onus suscipiendum arbitrarentur , quam suas probe vires explorassent , mihi credite , Florentini , aut Criticos requireremus omnino , aut , si secus eveniret , ii profecto tales essent , quorum ingenio , labore , consilio , industria , diligentiaque maximopere juvaremur . Atque hi quidem non admodum multi esse possent ; ut enim quæque ars cæteris dignitate præstat , ita in ea nonnisi perpaucos excellentes evadere comperitum est .

III. Quæ cum hujusmodi sint , quid causæ esse existimabimus ? cur ætate hac nostra Criticorum natio succrescat in dies , & magis magisque propagetur , ut prope neminem invenire sit , qui non sibi Critici munus provinciamque deponat . Non equidem aberrare me a vero arbitror , si dicam ; Criticorum numerum nunc quasi in immensum excrevisse , propterea quia , uti inconsultis hominibus nulla unquam tempora non abundarunt , ita hæc nostra , supra reliquas ætates , istiusmodi hominum genere frequentiaque maxime redundant . Hæc nempe , hæc una , eaque verissima causa est , Florentini ; nolite scrutari aliam , atque inani disquisitione animos mentesque vestras defatigare .

IV. Audiunt belli homines , & ad omnem elegantiam , non tam corporis , quam litterarum , ut sibi videntur

dentur, effecti, Criticæ artem ab eruditiss & sapientibus viris celebrari, hanc mirifice extolli, hanc unam reliquis artibus anteponi; hanc maxime utilem, hanc omnino necessariam prædicari. Non contradico; immo vero libenter assentior. Quid ergo? Eamne idcirco statim ac temere arripias? illine tete confestim tradas, ac totum addicas? nullumne prius virium periculum faciendum, ingenii, doctrinæ, memoriæ? Et vero hæc ars ita præstans, utilis ac necessaria est, ut acerrimum ingenium postulet, exquisitum iudicium flagitet, memoriæ requirat firmam in primis atque tenacem, pectus denique plurimarum maximarumque rerum copia & varietate completum atque oneratum. Verum hæc frustra proponas iis, quos *insanabile* (1) hanc exercendi artem jam *cacoethes* invasit; frustra rationibus aggrediaris, frustra persuadere contendas, ut illam, siquidem sine ea vitam insuavem putent, sibi habeant, sibi solis excolant, vel cum amicis, si ita libet, communicent, domi se teneant; a publico autem caveant omnino, & prorsus abstineant. Nihil in hoc esse periculi, nihil, quod reprehendi possit; contra vero prodire foras rem esse plenam discriminis, & maxime periculosa. Hæc, quæ cujuscvis animum commovere vehementer deberent, istos ne vel levissime quidem perstringunt, quibus certum

Tom. I.

B

tum

(1) Juvenalis Satyr. 7. v. 50.

. laqueo tenet ambitiosi

Consuetudo mali; tenet insanabile multos

Scribendi cacoethes; & ægro in corda senescis.

rum deliberatumque jam est, quodvis potius subire discrimen, quam temere susceptum munus abjicere.

V. Et vero, nulla interposita mora, ore ad severitatem composito, censoriam virgam distringunt, & nescio qua amentia, sive potius furore correpti, Andabatarum more, quos clausis oculis digladiari consueſſe accepimus, in quoscumque, nullo discrimine, sive illos fors objecerit, sive ipsi sese obtulerint, invadunt, impetum faciunt, tundunt, cædunt, nullus pulsandi finis, nullus plagarum modus, donec eos male acceptos mulctatosque dimittant. Hunc cene spiritum? hanc cene insolentiam atque intemperantiam? Efficiam profecto, si modo isti paulisper triste illud horridumque supercilium deponere, & se mihi nunc dociles ac morigeros præbere velint, ut spiritus illi immoderati, quibus insolentius efferuntur, si non ex toto residant, aliqua saltem ex parte detumescant. Discant ex me, quandoquidem hanc discendi opportunitatem nacti sunt, cujusmodi ars illa sit, quam profitentur; quam plena negotii, plena laboris, plena molestiarum, plena periculorum; quo explicatio, satis facile cuique erit conjicere, quibus ingenii, doctrinæ, judicii, moderationis adjumentis instructus is esse debeat, qui sibi Critici munus arroget; quorum si unum aliquod isti in se prehenderint, non repugnabo, quo minus isthuc ipsum, quod tantopere expetunt, sibi habeant; si vero his ipsis adjumentis, omnino spoliatos se nudatosque cognorint,

rint , reliquum erit , ut aut , quod stulte susceperunt , abjiciant , aut si id recusabunt , assuescant saltem & de se moderatius sentire , & alios in posterum honorificentius appellare .

VI. Quam in omnibus artibus libero homine dignis summam inesse difficultatem vel experti novimus , vel expertis credamus necesse est ; hanc certe in arte critica longe gravissimam reperiemus , si ad ejus naturam proprius inspiciendam contemplandamque accedamus . Etenim , quid aliud Criticus (1) est , nisi Judex ? quid aliud ars critica , nisi ars quædam caste integreque judicandi ? ut proinde , quod in bene constituta civitate Judex est , id in litteraria republica Criticus sit . Diversis quidem vocabulis Criticum , & Judicem appellamus ; sed unam eandemque significationem , diversa vocum usurpatione , complectimur . Quapropter Judicis , & Critici dignitas omnino par , idem omnino munus , idem officium ; maxima in utroque obeundo , & munere , & officio , difficultas . Quæ quidem cum ex pluribus capitibus repeti potest , tum ex eo præcipue , quod , sicuti a Judice legum perfectam absolutamque notitiam quaerimus ; ita a Critico rerum , quæ sciri possunt , plenam cumulatamque cognitionem postulamus , quam de-

B 2

ni-

(1) Greca vox κριτικός, deducta quales Aristarchus , & Aristophanes est a voce κριτής, quæ nihil aliud Grammatici fuerunt ; dicti ἀπὸ τῶν quam judicem significat . Et κριτικῶν, id est iudicibus , qui must- κριτῶν, id est iudicibus , qui must- αἰών, poematum iudices ac censores cis agonibus , id est , scenicis præ- aliorum operum olim dicti sunt , erant .

nique , labore plurimo maximisque contentionibus , cum uterque fuerit affectus , poterit ille , cognita causa , sententiam ferre , iste , oblata occasione , censorem agere .

VII. Videtis opinor , Florentini , me , jam inde ab ipso aditu ac vestibulo hujus primæ actionis meæ , paucis oppido verbis , immensum quiddam comprehendisse , qui a Critico rerum , quæ sciri possunt , non circumforaneam quandam , atque a triviis arreptam , sed eximiam , atque a propriis , unde emanat , fontibus hauritam scientiam requisiverim . Ita plane est , nec sane video unde major , non hujus solum , qua de nunc agimus , verum etiam omnium liberalium artium repeti difficultas possit . Quid enim laboriosius ? quam tot ac tanta , tam longe lateque dispersa , quæ sapientissimi viri in omni doctrinarum genere scriptis prodiderunt suis , ingenio pervestigare , cognitione assequi , memoria sepius . Quid operiosius ? quam recondita illa ac retrusa sive Philosophorum , sive Mathematicorum adyta penetrare , scrutari arcana , atque inde latentem veritatem eruere , in lucemque proferre . Quid impeditius ? quam totam antiquitatem , multiplicibus annalium monumentis consignatam , evolvere atque explicare . Quid denique , ne singulas artes percurrat oratio , tam arduum tamque difficile , quam vel unam tantum facultatem ita scientia tenere , ut de ea non callide solum sciteque disputare ; sed etiam , cum opus fuerit , in sapientissimo

morum virorum confesso, tanquam arbiter ac iudex, federe possis ?

VIII. Et sane, si rem a vero rectoque sensu æstimare velimus, aliud est, animi ergo, & suavissimæ illius voluptatis percipiendæ causâ, quam secum bonarum artium studia afferre solent, alicui facultati operam dare; aliud eo consilio ad eandem incumbere, ut aliorum non magister solum & doctor, verum etiam censor & iudex evadas. Alio scilicet modo gladium distringere, versare corpus, ictus infligere, petitiones declinare ad discitis, qui otii ac pacis amans nunquam fortasse cum inimico, nedum cum hoste concertabit; alio, qui umbræ & quietis impatiens in solem, in pulverem, in aciem prodire velit. Ille id unum ferme propositum habet, ut, si quando sit ei ad pompam educendus e vagina gladius, illum non inconcinne tractare existimetur; hic vero non concinnitatem solum in tractando gladio ac venustatem quærit; sed, qui sibi de vita dimicandum esse intelligat; eo artis potissimum cognitionem dirigit, illud contendit, ut certum ictum infligat, & se provocantem sternat atque conficiat.

IX. Quamobrem, si qui sunt, qui eo consilio litteris vacent, ut ex illis aut in vita ornamentum, aut in otio dignitatem, aut in senectute perfugium quærant, fruantur sane, per me licet, liberalissima illa occupatione, quam sibi præ cæteris propriam esse voluerunt, suis sese litterulis totos abant, eas impensius



excolant , diligant , ament ; me nunquam certe interpellatorum habebunt . Sinam eos , remotis arbitris ; liquidissimo illo dulcissimæ voluptatis sensu perfundi , qui ex vera germanaque sapientia , tanquam gratissimus aliquis succus , exprimitur . Quin potius , videte quæso , quam minime gravis & molestus iis futurus sim ; tantum aberit , ut illis quidquam negotii creem , si non omnia , quæ ejus artis sunt , cui se potissimum dediderunt , sibi discenda arbitrentur , ut etiam eos illa ipsa in arte non pauca ignorare æquo animo patiar ; siqua in re offenderint , ignoscam , si quid erraverint , non irascar . Iis satis erit , in ea facultate , quam cæteris præoptarunt , multa nosse , quæ sunt præcipua non nescire ; reliqua vero , ut etiam ulterius progrediar , facile permittam , si ita velint , ut negligent , & inertix largiantur suæ ; laudandi propterea , quod multa sciant , neque tamen idcirco vituperandi , quod aliqua nesciant . His hominibus tantum denuncio , rem hanc ipsam esse difficilem ; multum iis , ut , quos quærunt , jucundissimos illos suavissimæ voluptatis fructus percipere possint , contendendum , sudandum multum , non laboribus , vigiliisque parcendum ; hac una in re ipsis fortasse molestus ero , cætera condonabo .

X. At vero cum de cenfore , cum de Critico agitur , alia res est , Florentini , alia ratio , & plane diversa . Cum his acriter , dure ac severe plerunque agi solet ; nihil ex more communi , nihil propemodum ex
hu-

humanitatis jure , nihil benigne , nihil liberaliter . Corriguntur , reprehenduntur , gravissime castigantur , si quid forte peccant , propterea quia sibi illud , contra jus fasque omne , arrogarunt , ut alios corrigerent , reprehenderent , castigaret . Quid ? tute tibi illud sumas , ut pro tuo libito , atque adeo libidine , hunc falsitatis arguas , illum mendacii insimules , qui , quid falsitas , quid mendacium sit , quid differant inter se , turpiter ignores , & unum pro altero indiscriminatim usurpes ? Distinguenda sunt ista , nec temere , uti facis , confundenda . In falsitate error ; in mendacio improbitas deprehenditur . Errare humanæ infirmitatis est ; quæ propter neque mirum , neque inusitatum videri debet , si homines , docti cæteroquin ac graves , aliquid interdum humani patientur , & vel nolentes aliquando alios in errorem inducant . Contra vero mentiri , improbi veteratoris habetur , pravi subdolique ingenii est , aliter ac sentit aliquid enunciantis , & aliorum vel ignorantione , vel credulitate per summam impudentiam nequitiamque abutentis . Quin loquacissimis hisce rabulis obstruimus ? linguam præcidimus ? itaque importunam loquacitatem funditus tollimus , ac radicitus extirpamus ? Quin eos saltem ad Pithagoreum gymnasium amandamus ? ubi cum tacere didicerint , tum demum recte loqui incipiant .

XI. Hic plerunque de his sermo est ; hæc hominum querela , ista expostulatio ; dura quidem & vehemens ;

veruntamen , ut mihi videtur , æquissima . Quid enim magis iniquum excogitari potest , quam ab altero rationem eorum , quæ forte in aliqua facultate quispiam peccarit , repetere illum , qui hanc ipsam facultatem penitus non cognoscat , in eoque persæpe erret , in quo alterum corrigere vult ? Eum certe accusatorem , nemo æquo animo ferre potest , qui , cum ipse aut ambitiosus , aut rapax , aut maleficus sit , alterius ambitum , furta ac maleficia in iudicio persequatur . Quid ? nonne vel privato objurgatori irasci solemus , & vehementer stomachari ; si , quibus ipse implicetur , ea in nobis vitia perstringat ac notet ? Qui sibi hoc concedi volunt , non a crimine solum , sed vel ab ipsa suspitione criminis quam longissime absint , necesse est .

XII. Jam vero , quid de Iudice dicendum putabimus ? qui , quo majori dignitate præstat , & cæteris antecellit , eo etiam acriora de se , si quid ab officii religione deflexerit , hominum iudicia experitur . Atqui Criticum Iudicem esse , ut jam inde ab initio constituimus , meminisse debetis . Conficitur ergo , summam in Critico illius facultatis , ut minimum requiramus , in qua sibi met correctoris munus arrogat , scientiam esse oportere ; summam dico , non vulgarem , non usitatam , non in medio positam , non a quoquam facili negotio parabilem ; sed eam , quam homini vigilanti , diligenti , industrio , laborioso , experrecta mens , ingenium acre , memoria tenax , diuturna exercitatio , usus denique
non

non intermissus afferre solet . At hoc est difficile ? immo vero difficillimum . Etenim , si , ut plurimum alicui facultati operam dederis , vix post summos labores , & assiduam multorum annorum contentionem , id demum fueris affecutus , ut in ea tolerabilis invenire ; quantæ illud difficultatis erit ? quam magnæ ! quam incredibilis ! ita præstare ingenio , excellere sapientia , eruditione censerî , ut in litteraria republica tete immenso hoc , ac prope infinito dominationis genere jactare possis .

XIII. Quid vero , si non unius tantum , vel alterius facultatis cognitionem , quod quidem magnum est , sed omnium præterea facultatum scientiam in Critico esse oporteat ? quantum hæc ipsa augebitur difficultas , de qua loquimur , ac prope in immensum exaggerabitur ? Verum , cum id Critici munus atque professio , quæ nullis fere terminis circumscribitur , requirere videatur ; non utique faciam Critico injuriam , si tantum illi onus imponam , & tanta facultatum pene omnium , quarum ab eo cognitionem flagito , accessione prægravem . Multa enim Criticus , ut dignitatem tueatur suam , sciat , multa teneat , multa cognoscat necesse est ; nihil pene illi ad perfectam & numeris omnibus absolutam scientiam deesse debet ; nihil propemodum ab ipso impune nesciri potest ; nihil , sine gravi quodam , ut ita dicam , piaculo , ignorari . Omnino hæc ars , si ejus naturam spectes , magnum quiddam , extra-

traordinarium , exaggeratum , inmensum proficitur , ut , quod ab eo postulatur , non ex ingenio cujusquam atque arbitrio , sed ex ipsius artis natura atque indole postulari existimandum sit .

XIV. Jam in hunc litterarium quasi censum tam amplum , tam copiosum tam locupletem venire , quam arduum ! quam difficile ! quam laboriosum erit ! Quotus enim quisque reperietur , qui , ætate omni in litteris exacta , tantam doctrinæ vim , tantam eruditionis copiam collegerit , & ita in promptu habeat , ut , cum res , & usus poscant , eam non ad inanem pompam , sed ad certum judicium expromere possit atque explicare ? Ego quidem nunquam adducar , ut talem ac tantum plurimarum ac reconditarum rerum instructum atque apparatus , aut in adolescente inconsulto , aut in juvene imberbi , aut vulgo in omnibus , qui Critici nomen sibi & munus vindicant , reperiri putem posse . Quare videant isti quo progrediantur ; quid suscipiant etiam atque etiam considerent . Doctrinam probe explorent suam , proprii quodammodo census a se rationem exquirant ; & cum se tantas , quantas hæc a suis cultoribus ars quærit , opes congeffisseprehenderint , tum demum de hoc munere cogitent , & ad hanc tantam provinciam administrandam accedant .

XV. Quod si hoc , quod posui , nimium quiddam atque inmensum videtur , ut re ipsa est , & ego quoque non diffiteor , facile isthuc ipsum illis a me remitti posset

set & condonari, si ipsi minus sibi fumerent atque arrogarent. Cum vero quidquam in ulla facultate ignorare turpe ducant, cum nullis non de rebus disputare, cum de omnibus ferre sententiam audeant, cum per omnes artes liberius licentiusque vagentur, & non tam per illas vagari, quam grassari velint; quis mihi tandem poterit succensere, si plus, quam ratio ferat, & modus patiat, ab iisdem ego in præsentia requiram? Ego vero, si recte volunt attendere, non aliud ab ipsis postulo, quam quod suscipiunt ultro ac profitentur. Discant ipsi primum moderationem in suis studiis adhibere, tum ego quoque ipsis moderabor, & postulata ipse mea, si eis videntur iniqua, contraham, & intra æquitatis terminos cohibebo. Si vero in proposito perstare volunt, perstabo & ego, nec erit cur me condemnent, si ego minime iis temperem, qui sibi temperare non didicerunt. Ferant igitur onus, quod, nullo cogente, humeris ipsi suis imposuerunt, aut si ferre non possunt, illud abjiciant; vel si nolunt, & in hoc estimationem agi putant suam, eo, ut meriti sunt, operiantur.

XVI. Sed, quo tandem cumque modo, quem ego nunc non definio, circumscribenda in Critico scientia sit, certum est hanc ipsam scientiam summam esse oportere, sine qua, cum dignitate, tanta sustineri provincia non potest. Ex summa autem scientia summam esse artis criticæ difficultatem, efficitur necessario, & legitima
con-

consecutione descendit. Nec vero, mea quidem sententia, minus necessario illud deberet effici, hanc ipsam difficultatem esse ei omnino declinandam, cui pares illi superandæ vires non sufficiant. Quid? summa, quod demonstravimus, artis criticæ difficultas est; hæc vitari omnino non potest ab eo, qui hanc artem exerceat; vires infirmæ sunt atque imbecilles; nemo te adigit, nemo compellit; tu vero non commovebere? sponte tua progredieris? ultro accedes? & quam superare non vales, difficultatem temere subire non dubitabis? Rursus; onus grave est, iniquum, improbum, intolerandum; nonne, si forte illud inconsulto sustuleris, & sustineri a te non posse expertus sis, confestim humeris, sanius amplexus consilium, excutias, cum præsertim id in tua potestate sit, & quandocumque velis, sublatum supra vires pondus abjicere posse atque deponere? Ego vero nescio an quidquam, non dicam inconsideratius, sed stultius non modo fieri, sed ne excogitari quidem possit, quam diverso, atque indicavi, modo se gerere, & sanioribus consiliis omnem penitus aditum intercludere. Hæc clara sunt, atque perspicua, quæ videre vos arbitror, Florentini; utinam æque, atque vos, isti videant, quos res ista maxime spectat, & quorum gratia hæc actio est a me potissimum instituta.

XVII. Verum nolite putare mihi adhuc cum his hominibus rem esse. Nondum enim conferuimus manus, nondum animi calent, nondum fervet oratio. Proluso
quæ-

quædam ista fuit, atque umbratilis pugna, in qua, si illi prope nulli repeti sunt, capite quæso conjecturam, quid de iis in ipso certamine futurum existimetis. Ea quidem dixi, quæ cujusvis animum commovere debent; sed istos mihi vehementius excutiendos esse video, & rei difficultatem ita exponendam, ut non tam animo percipi possit, quam oculis quodammodo cerni; manibusque contrectari. Quod quidem facilius assequar, si istos eo deducam, quo minime volunt, & memet ita circumscribam, ut in una tantum, vel altera facultate consistam, & hujus ipsius facultatis ab istis specimen aliquod edendum curem. Sic enim certius explorantur ingenia, & intempestiva loquacitas aut acribus verbis castigatur, aut crebris interrogationibus irretitur. Vos interea, Florentini, quibus arbitris ac disceptatoribus in hac causâ uti placet, ad ea, quæ dicturus sum, uti hætenus fecistis, diligenter attendite; & cum me, vel paullo familiarius cum uno aliquo ex hisce Græculis (neque enim gravissimum Critici nomen merentur) agentem, vel paullo acrius disputantem audietis, cum tota Græculorum gente loqui putatote.

XVIII. Heus tu, qui tantum tibi sumis, ut de doctissimis sæpe viris judicium feras, ecquid tandem de arte critica sentis, quam profiteris? facilemne, an difficilem esse putas? Facilem enim vero eam existimes necesse est, qui ad illam, vix ab adolescentiæ finibus egressus, tam mature accedere non dubitaveris. Rursus quæ-
ro;

ro ; eamne tibi videris comparasse scientiam , quam , ad tantum munus cum laude obeundum , Critico necessariam esse demonstravimus ? Hic quoque non est , cur mihi percontanti respondeas , qui ex nitida cute ista tua , vibrato capillo , fracto incessu , toto corporis habitu molli ac delicato , quæ certissima sunt otii signa atque desidii , non laboris indicia & vigiliarum , quantum videlicet in ea tibi comparanda contenderis , satis certo mihi collegisse videor . Facilem igitur hanc artem putas ; ego contra valde difficilem . Age vero , quandoquidem non satis convenit inter nos , incipiamus de tanta re , amico sane animo ac perbenevolo experiri . In Historia si placet , in qua præcipue te jactare soles , ac propemodum dominari , hujus ipsius difficultatis , de qua ambigitur , periculum faciamus . Sacrane vis ? an profana ? an utraque ? Exordiamur a sacra , (1) quandoquidem , quo eruditior ab æqualibus tuis habere , eam præ cæteris adamasti , & ubi vix illam nominavi , hanc potissimum velle te , annuere mihi ac significare visus es .

XIX. At vix sacra Biblia in manus sumo , quot & quanta occurrunt ! quam recondita ! quam implexa !
quan-

(1) Si cui forte videbitur alienum ab adolescentis persona , quæ , vitandæ offensionis causa , hic inducitur , eruditionis & ingenii specimen in sacra Scriptura capi , is legat , quæ ad Paulinum S. Hieronymus scribit . „ Quod medicorum est , promittunt medici , tractant fabrilia fabri ; sola ars Scripturarum est , quam omnes passim sibi vindicant , hanc garrula anus ; hanc delirus senex , hanc sophista verbosus , hanc universi præsumunt , lacerant , docent .

quam impedita ! (1) Cave primum ex his libris quidquam contemnendum putes . Nihil illis vetustius , nihil sanctius , nihil majori religione consecratum . Nihil in iis temere scriptum , quod emendare cogites , nihil redundans , quod circumcidere , nihil minus utile , quod amputare , nihil , quod addere (2) mediteris . Si doctissimos & eruditissimos viros audias , litteræ , apices , puncta , omnia divinorum plena sacramentorum (3) . Verba quidem latina sunt , Hieronymo sanctissimo ac do-

(1) S. Augustinus Ep. 3. „ Publi-
ce , *inquit* , profiteor tantam esse
Christianarum *profunditatem* lit-
terarum , ut in iis quotidie pro-
ficerem , si eas solas ab ineunte
ætate usque ad decrepitam sene-
ctutem , maximo otio , summo
studio , meliore ingenio conarer
addiscere . „ Idem lib. 12. Confess.
c. 14. „ Mira , *inquit* , eloquiorum
tuorum *profunditas* est . . . Hor-
ror est intendere in eam ; horror
honoris , & tremor amoris . „
S. Gregor. Magnus hom. 5. in Ezech.
& in Proem. in lib. Reg. sacram Scrip-
turam cum mari , & valla quadam
sylvâ comparat .

(2) Si quis locus est in novo Te-
stamento , qui maxime torserit om-
nes Enarratores , is profecto est , qui
occurrit Mar. cap. 16. ver. 2. *Et val-
de mane , una sabbatorum , veniunt
ad monumentum , orto jam sole* . In-
credibile dictum est , quot & quanta ,
jrrito fortasse conatu , Interpretes

excogitarint in hunc locum , quem
una tantum expuncta vocula , *jam* ,
& substituta voce *nondum* , feliciter
explicare potuissent . Hoc tamen a
nemine fieri decuit , ne , hoc semel
aditu recluso , via ad similia auden-
da in sacris codicibus patefieret . Le-
gatur Maldonatus in cap. 28. Matth.
ubi accuratissime hunc locum ex-
pendit , & inter alia , quæ eruditif-
sime persequitur , hæc habet . „ Sunt ,
qui Marci locum corrigant addita
negatione . Esset quidem aptissima
sententia , si ut isti Auctores vo-
lunt , legeretur ; sed , ut sæpe ad-
monemus , non est tam obscuris
indiciis Scriptura , quæ nobis *san-
ctissima* esse debet , corrigenda .

(3) Possévinus Bib. select. lib. 2. tot
esse in hebraica Scriptura sacramen-
ta , quot sunt litteræ ; tot mysteria ,
quot puncta ; tot arcana , quot api-
ces , affirmat . Idem alii sentiunt ,
quorum asserre auctoritatem super-
sedeo .

doctissimo viro, partim interprete, partim recognitore; sed quorum bene multa, quod necesse fuit, idiotismis ad hebraicam linguam accedant (1), quam ignoras omnino, multa etiam eadem de causa ad græcam, quam vix ac ne vix quidem intelligis. Ad harum autem linguarum originem, & quasi fontem, ut certum sententiarum sensum assequaris, quam sæpe deveniendum erit? Examinanda vocabulorum proprietates, expendenda vis, potestas investiganda, & vera inde rerum significatio subtiliter elicienda.

XX. Tu vero noli hæc contemnere, perinde quasi minima sint, & quæ tibi nullum facessere negotium possint. Contemnenda, mihi crede; ista non sunt, neque minimi a quoquam facienda, quæ magnas sæpe, inter doctissimos viros, super obscurioris alicujus sacræ Scripturæ loci intelligentia, controversias excitarunt. Hæc certe Heterodoxi facienda plurimi semper duxerunt; in his magnum inesse momentum ad suas opiniones confirmandas existimarunt, qui gravissimas sæpe lites de una vocula Catholicis intulerunt. Neque vero erit, cur ad Vulgatam, quam appellant, confugas, in illamque, tanquam in arcem aliquam, te recipere medite-

(1) S. Augustinus de vera Relig. cap. 50. „ Habet, inquit, omnis lin- „ gua propria genera locutionum, „ quæ cum in aliam linguam trans- „ feruntur, videntur absurda. S. Hieronymus adversus Rufinum. „ Ni- „ si, inquit, prolixum esset, & re- „ duceret gloriam, jam nunc tibi „ ostenderem, quid utilitatis habeat „ magistrorum limina terere, & ar- „ tem ab artificibus discere, & vide- „ deres quanta sylva sit apud He- „ bræos ambiguum nominum at- „ que verborum.

diteris. Te illic acerrimi adversarii adorientur, illincque deicient, qui receptam ab Ecclesia versionem repudiare non dubitant, & te ad primigeniam linguarum originem certissime provocabunt. Tu vero quid ages? cum te huc illi vel invitum pertrahent, & certamen recusare honeste non poteris. Clamabunt illi, & quantum poterunt, voce contendent, corruptos esse sacros codices, male expressas latine sententias; perverfam, ut ipsis videtur, multorum locorum interpretationem objicient, linguarum ignorantiam exprobrabunt, implorabunt hominum fidem, cælum ipsum, superos omnes obtestabuntur. Quomodo tot clamores, vociferationes, convicia ferre poteris ac sustinere? quomodo homines, non ineruditos illos quidem & indoctos, convinces? quomodo linguarum peritia insolescentes tacere coges atque obmutescere? Nonne tu contra, ignorantie linguarum, os iis tacitum præbere cogeris?

XXI. Auctor sacrorum codicum omnium Deus est; hominum in iis excipiendis librarii (a) partes tantummodo. Hoc nos Catholici fatemur & credimus; & idcirco nullum eorum, quos Vulgata nobis exhibet editio, & Tridentini Concilii commendat auctoritas, repudiamus, omnes recipimus, omnes amplectimur, omnes, uti par

Tom.I.

C

est,

(a) Melchior Canus de Loc.Theol. lib.2. cap.1. Libros sacros & canonicos appellamus, quos Spiritu Sancto dictante sacri auctores exceperunt ... *Deus est. Dominus enim narrabit in scripturis populorum & principum horum, qui fuerunt in ea.* Dominus itaque hujus loci auctoritatem tuetur, tuentur & principes.

est, tanquam *digito Dei vivi* (a) conscriptos debita veneratione prosequimur. At ii, qui diversam a nostra religionem sequuntur, multo aliter opinantur; hoc ipsum pertinacissime negant; alii alios admittunt, nemo omnes. Exspecto, dum horum rationes invictæ refellas, argumenta confutes, homines convincas & adigas, nullum ut respuant, omnes recipiant,

XXII. Sed propius accedam, & magis ac magis intrabo. Quid ages? cum facta factis adversantia, sententiæ sententiis contrariæ, haud raro occurrent; non re quidem ipsa, cum veritas veritati non contradicat; sed ita tamen oppositæ secum in speciem ac pugnantes, ut cuique vel ingeniosissimo facessere negotium possint. Abraham, ut habetur Genesis cap. 11, a septuagenario patre susceptus est; sic enim fert communis opinio; qui fieri potuit, ut annos solum septuaginta quinque natus esset, cum patre ducentessimum quintum annum agente orbatus est? Exsolve nodum, valde, uti vides, complicatum, & qui multo adstrictior est, quam tenacissimus ille Gordij nodus perhibetur. Ochosias lib. 14, Regum, cum duos supra viginti annos haberet, regnum eî auspiciatus; Paralipomenon vero lib. 11, ejus regni exordium ab anno ipsius quadragesimo secundo ducitur (b). Unde tam subito duæ istæ annorum solidæ de-

ca-

(a) S. Gregorius Magnus Epist. 84, ad Theodorum lib. 4. „ Quid est autem Scriptura sacra, nisi *quedam* *epistola* omnipotentis Dei ad crea-

„ turam suam? Stude ergo, „ quæso, & quotidie creatoris tui „ *verba* medicare.

(b) Multo aliter, ac supra Maldox

eades ejus imperio accreverunt ? Tu videris . Interim ego plane illud video , tibi diu multumque deliberandum ante ac concoquendum , quam quidquam rati hac super re constituas atque definias . Joramus Ochosis pater duos & triginta natus erat annos , cum regnare cœpit ; octo vero annos imperitavit ; porro , ut dixi , Ochosis ejus filius , cum alterum supra quadagesimum annum ageret , regno est admotus ; biennio igitur , cum nusquam interregni vestigium appareat , senior erat pater filius . Hæc quoque valde implexa res est , & difficiles admodum habet explicatus ; sed quo implexior ac difficilior , eo sapiente & erudito Critico dignior estimari debet .

XXIII. Pergamus ulterius . Quid dices ? cum in libro Esther leges , cap. i. ver. x. & cap. xvi. ver. x. Amanem Amalecitam , & simul gente Macedonem ad Macedones imperium transferre voluisse . Hoc loco offensi Hæretici additamenta libri Esther audacius rejicere non dubitarunt . Nonnulli vero Catholici Interpretes historiam Ester ad ultima Persici imperii tempora distulerunt . Quid ? cum occurret Machabæorum lib. i. cap. xii.

C 2

ver.

donatus , in hunc locum nobilis re-	„ Utrumne magis periculosum est ,
centior Interpres . „ Inani , <i>inquit</i> ,	„ asserere Librariorum incuria men-
„ prorsus labore conantur Interpretes	„ das quasdam in sacros libros ob-
„ loca hæc adeo opposita conciliatu-	„ repisse , an perspicuas fateri esse
„ ri . At brevius expeditiusque esset	„ in his contradictiones , atque ad
„ fortasse asserere , Paralipomenon	„ eas solutiones confugere , quæ ne-
„ locum a librariis vitiatum esse .	„ quaquam satisfacere possint ?

36 DE SUMMA ARTIS CRITICÆ DIFFICULTATE

ver. **xxi.** Arij Spartz Regis ad Oniam epistola, qua in epistola hæc habentur; *Inventum est in scriptura de Spartiatis & Judæis, quoniam sunt fratres, & sunt de genere Abraham (a).* Unde ista cognatio Spartiates inter & Judæos? Aude aliquid hoc loco dicere, & de tuo penu, quod veram doctrinam sapiat, expromere. Est, est inquam Critici, est sapientiæ tuæ & eruditionis, sacrarum Scripturarum loca, quo obscuriora sunt, illustrare clarius, quo implicatiora, explicare felicius.

XXIV. Quid illa, quæ diverso in genere in Scripturis inveniuntur, & quæ implexas gignunt controversias; quam facilis, quam expeditæ putas solutionis? Illa inquam de Assur, qui Genesis cap. **x.** Niniven condidisse dicitur; de ædificatione Babylonis, cujus non unus & idem conditor memoratur; de Juditha, quæ Holoferni caput amputavit; de captivitate Babylonica; de instauratione templi; de Chaldæis Regibus, de Sennacheribo, de Salmanassare, de Nabuchodonosore, de reliquis, quorum opes immensæ prædicantur in sacris Bibliis. Te rerum multitudine tanta satis oppressum video; sed quod tua sponte sustulisti onus, honeste non potes abjicere; aut illud feras, aut eo opprimaris necesse est. Culpam in ipsum te, non in me confer, qui facile isto te onere, si modo tu non renuisses, liberaissent.

XXV. Aude etiam aliquid de Prophetis attingere.

(a) Legendus in hæc duo valde tationem Possini de Assuero Estheris implexa sacre Scripturæ loca Turne- marito, quæ felicissime vir doctissi- minius in Appendice 11. ad Disser- mus & eruditissimus explicat.

Age , celeberrimum Nabuchdonosoris de statua somnium , & arcana illa Danielis responsa interpretare . Dic , amabo te , quam potissimum ratione , quo ordine , qua serie Chaldæorum , Persarum , Græcorum , Romanorumque imperia describes atque partieris ? Cuinam potissimum aurum , argentum , æs , ferrum , ac testam ita tanquam propria adjudicabis , ut , quod uni dederis , alteri ademisse non videare . Male metuo , ne dum statutz hujus quandam quasi imaginem animo adumbras tuo , *Velut ægri somnia , vanæ Fingantur species , ut nec pes , nec caput uni Reddatur formæ* ; itaque Horatiano illi monstro simile quiddam irridendus efficias .

XXVI. Sed digrediamur ab ista statua , quam non satis tibi arridere video , & , si libet , ad pervulgatum illud Danielis de Christo vaticinium veniamus , mihi quæ aliquid de abditis illis ac reclusis septuaginta hebdomadarum mysteriis ediscere , & paullo fusius atque enucleatius expone . Hoc loco , quemadmodum responsurus , quid excogitaturus sis , audire cupio . Quæro primum , hebdomadas hæcne annisne , an diebus ? si annis , lunari- busne , an solaribus constare dices ? Annis , inquires , & quidem solaribus . Ita sane . Quæro deinde , undenam horum annorum exordium capies ? Eosne ab regno Cyri , an Artaxerxis numerare incipies ? Si a regno Artaxerxis ; sic enim respondes ; percontor ulterius , exordierisne ab anno illius septimo an vicesimo ? an vicesimo tertio ? an septimo & vicesimo ? Locus profecto valde dif-

cilis & maxime vadosus , quo navigio isto tuo male contexto atque compacto delatus cum eris , nescio quomodo enavigare feliciter poteris ; & ubi , nisi me conjectura fallit , hærere miserabiliter cogeris , & progredi ulterius frustra conabere .

XXVII. Interea vero , dum multa tu nequidquam moliris , nec habes , quo progrediare ; progrediar ego , atque intrabo etiam magis . Quid ? commoveri mihi videris ; confirma tete , tu te collige , vide qui sis , quid tibi muneris sumpseris ; quam provinciam susceperis , quam denique personam geras , tibi propone . Non est istius dignitatis , muneris , officii , ob tantulas res , tam cito animum despondere . Pergamus igitur ad reliqua . Quid ages ? cum ad infinitam illam , & inde usque ab ipsius exordio mundi altius repetitam , & prope inextricabilibus maximarum difficultatum ambagibus impeditam temporum seriem , & tot annorum sæculorumque rationem ventum erit ? Proh superum atque hominum fidem ! quantum vexaberis ! quas in angustias conjicies ! quantum torquere ! Te indictiones , te cycli illi , quos vocant solares , te , quos appellant lunares , te olympiades , te Juliana periodus , te regnorum initia , te plures eodem nomine appellati Reges , te ipsi præsertim septuaginta Interpretes , singulis generationibus annos centum assignantes , incredibilem in modum impedit , ac miserrime discruciant .

XXVIII. Verum te ad Christi Reparatoris adventum
oppe-

opperior. Habebis hic, si quid ingenio vales, memoria polles, eruditione præstas, ubi exquisitam illam ac reconditam temporum, ætatum, regionum, imperiorum, linguarum, antiquitatis sacræ & profanæ, mixtæ ex sacra & profana, Historiæ denique totius scientiam ostentes. Sume animos, campus hic est, uti vides, longe patentissimus, in quo te, quantum libuerit, jactare poteris. Erige igitur tete, & confirma; nemo tibi cancellos circumdat, nemo te coercet; nusquam gentium, mihi crede, amplior facultas datur & exultandi liberius, & licentius insultandi. Scito tamen (hoc autem commonendi tantum causa, non deterrendi animo dicam) scito inquam nonnihil hoc super negotio inter auctores esse dissidii. Non enim satis adhuc inter eos de tanta re convenit, alii aliter sentiunt; & si controversiam ab ultimo, unde ducitur, capite arcescere velis, aliquot tantum, nimirum nonaginta & eo amplius, variæ discrepantesque sententiæ recensentur. Deus immortalis! quot semitæ! quot diverticula! quot anfractus! quæ disjunctissimarum divortia viarum! An ullos unquam Mæandros? an Labyrinthos unquam ullos, tot tantisque, ac tam inextricabilibus errorum ambagibus impeditos aut exstitisse, aut a Poetis excogitatos fuisse existimabimus, qui cum tanta ac tam incredibili tot inter se discrepantium sententiarum copia ac varietate conferri aliquo modo posse videantur?

XXIX. Jam, ex tot viis, tam multiplicibus, lubricis,

dubiis , ancipitibus , incertis , in diversa , in opposita tendentibus , quam eliges ? cui insistes ? cui te potissimum committes ? Unam tandem aliquam , quam tutiorem existimaveris , ingresso , quam lente ! quam caute incedendum erit ! quam sæpe resistendum ! quam , & multo sæpius regrediendum ! si modo æque obuius ac facilis tibi sese obtulerit egressus , ac patuit introitus . Sed illud certe omnino fieri necesse video , ut in impeditissimo itinere constitutus , tot viarum , partim varietate , partim similitudine , partim occurfu , partim incurfu deceptus , omni consilio destituaris ; hac illac incertus feraris , ac errabundus vageris ; & demum , post varios errores , ad caput , unde discesseris , iterum iterumque revolvare . Dicam clarius atque apertius . Quis poteris , siquidem in tantam audeas te controversiam conjicere , ingenio isto tuo tot tantasque sententias , tam varias , tam contrarias inter se ac discrepantes distinguere , recensere , separare , examinare , cognoscere , ac postremo eas ita invicem contendere , ut cæteris , partim damnatis , partim rejectis , partim conciliatis , tolerabiliorem probabilioremque excipias & feligas ? Quavis sponsione cadam , ne quid gravius dicam , si tu is eris , qui hujus perplexissimæ controversiæ & principium invenire , & exitum possis evolvere .

XXX. En sacra illa , qua tantopore tibi places , cujus peritiam ostentas , historia . En , quot difficultates in ea occurrunt , crebræ , graves , molestæ , quæ superari
vix

vix ac ne vix quidem posse videantur. Satis mihi videor ad rem, de qua agimus, accessisse; satis, quod demonstrandum suscepi, exposuisse. Veruntamen, quam haecenus sum persecutus, multo minima pars est maximarum difficultatum, quas, si per tempus licuisset, persequi potuissem. Nam quis illas aut numero assequi, aut oratione complecti possit? quæ sive ex primigeniarum interpretatione linguarum, sive ex multiplici vocum significatione, sive ex vario terrarum situ, sive ex diversa provinciarum descriptione, sive ex moribus institutisque nationum, sive ex ducta ab orbe condito annorum ac sæculorum ratione, sive ex contentione historiæ sacræ cum profana, sive ex divinorum Scriptorum consensione, sive ex aliis innumerabilibus capitibus emergunt, quarum si præcipuas tantum recensere vellem, me vox, latera, vires, ipse certe dies deficeret.

XXXI. Sed video quid mihi hoc loco responsurus sis; & responsionem anteverto tuam, quæ tibi suffragari nullo modo potest. Dices, difficiliora sacræ Scripturæ loca fuisse jam a sapientissimis viris explicata, quorum labore, doctrina, eruditione & notitia linguarum juvari possis. Hoc, opinor, mihi respondes, hoc dicis; quod quidem si alius quispiam diceret, aliquid momenti haberet; cum vero a te dicitur, nullam vim habet, nisi forte ad augendam hanc ipsam, qua premeris, exaggerandamque difficultatem. Non enim a te, pro suscepti muneris officio, qualiscumque divinarum peritia Scri-
ptu-

pturarum quæritur , sed intima earundem , singularis & exquisita cognitio postulatur . Meminisse debes , te non exscriptorem , sed cognitorem ; non subscriptorem , sed Criticum ; non rabulam & causidicum nescio quem , sed Judicem esse oportere . Porro Judex non aliorum tantum sententias exquirat , sed in eas inquirat acriter , rationes attente perpendat , argumenta subtiliter examinet , omnia cognoscit diligentissime , ac tum demum judicium interponens suum sibi rem ita se habere videri pronunciat . Hoc ego a Critico postulo , atque adeo a te meo jure flagito , qui Critici tibi nomen arrogaris , munusque susceperis . Non est hujus artis tuæ ab aliis discere , & quæ didiceris , indicare ; sed docere , & de iis ipsis , quæ alii docuerunt , judicare .

XXXII. Restaret modo , quandoquidem satis de divina historia diximus , ejusque specimen captum est , restaret inquam , ut te ad ecclesiasticam & profanam historiam provocarem , & quid ego interrogando , & quid tu respondendo efficere posses , experirer . Atque in his etiam difficile mihi , credo , esset , te in omnes partes versare , te præcipitem agere , & novum de te spectaculum adstantibus exhibere ? Quanti enim putas laboris futurum , quanti ingenii ostendere , quam impedita historia , sive ecclesiastica , sive profana esse necessario debeat , cum tantis obsepta difficultatibus divina sit ? Nihil opinor facilius , nihil expeditius . Nam si historia divina , in qua conscribenda , non invidia , non odium , non iracundia ,

dia , non ambitio , non reliquæ animi minus rectæ per-
motiones , quæ omnes omnium fere gentium annales
corruperunt ; & , quod præcipuum est , non menda-
cium , sed una veritas dominata est , tantis tamen labo-
rat incommodis ; quantam in reliquas reliquarum sive
nationum , sive regnorum historias , in ipsam etiam ec-
clesiasticam , investam istiusmodi esse vim existimabi-
mus incommodorum ? Illud quoque reliquum esset , ut
te experiundi causa , ad singulas deinceps facultates
pertraherem , & in unaquaque paulisper consilens ,
tentarem an , ut tu esse te existimas , item re ipsa sis ,
Dialecticus , Physicus , Mathematicus , Geometra ,
Astronomus , Theologus , Philosophus , Philologus ,
cætera . Verum , quoniam nullum exitum habitura es-
set oratio mea , si omnia persequi vellem , totam hanc
actionis meæ partem , multo , quemadmodum vides
& ad agendum uberrimam , & ad demonstrandum facil-
limam , ad alia festinans , tibi remitto ac condono .

XXXIII. Itaque his omnibus de mea oratione præci-
sis , & exposita jam satis , quod ad rerum cognitionem
attinet , artis criticæ difficultate , ad illa gradum facio ,
quæ a me præteriri non possunt , & quibus artis ipsius
usus continetur , unde gravissimæ emergunt difficulta-
tes , quæ non modo te , qui quam tibi doctrinam para-
veris , satis ostendi , sed vel sapientissimum quemque
ab eadem arte detertere possunt . Critica , si bene ejus
indolem novi , ars est hujusmodi , quæ domi sedere ob-
scu-

secura, & privatis latebris contenta esse non potest; avet, gessit erumpere in publicum; tenebras odit, lucem amat, hominum conventu frequentiaque delectatur. Præterea otii & quietis impatiens est, litigiosa, & natura pugna, hac ut de causa ei sæpe in medium contentionis atque discriminis progrediendum sit. Quapropter munita omni ex parte esse debet, quo hostium impetus & excipiat interrita, & repellat invicta. Non est cur unquam de pace cogitet, cur sibi quietis spatium concedi velit, cur momento temporis libere respirare possit; semper excubandum, vigilandum semper, semper ei arma gestanda sunt, quibus aut hostes laceffit, aut se protegat laceffita. Hæc, nisi fallor, artis criticæ indoles, hæc natura est, hæc conditio. Hoc Criticus profitetur, ad hoc paratus semper esse debet, semper promptus ad hoc, ut aut bellum inferat, aut sustineat illatum. In hoc quoque tibi mecum conveniat necesse est; neque in eo disconveniat, magnam hinc oriri difficultatem, quæ ex ipsius artis usu, quemadmodum dixi, se se effert atque emergit. Difficultatem porro hanc ego nunc breviter ostendam, & denunciabo molestias, quo tibi consulere tempestive possis atque prospicere.

XXXIV. Et sane, si a me, qui nullius prope ingenii homo sum, tantum tibi negotium creatum doles, quanto gravius molestiusque vexaberis, cum foras prodeundum erit, & cum acerrimis adversariis dimicandum. Si in hac privata nostra contentione nullus inventus
es,

es, quid de te in publica futurum erit, quæso, considera. Neque enim (nisi a me peramanter admonitus consilium forte mutaveris) Aspendium illum citharistam, quem sibi intus canere Græci aiebant, imitabere; artem nimirum ut criticam tibi soli habeas, & ad usus tantum privatos tuos conferas; quod quidem si de te mihi quisquam præstare potuisset, aut ab hac contentione nostrâ supersedissem omnino, aut hic certe finem dicendi facerem; sed levi inanis gloriolæ cupiditate abreptus, vales magnis inimicitiiis clarescere, & potentiorum accusationibus adolescentiam tuam honestare. Quin, si bene te novi, jam nunc animo typos ac præla meditaris, & nescio quam nominis perennitatem immortalitatemque mente agitas, & cogitatione præcipis.

XXXV. Sed perge porro, quo te ista tua rapit amentia, & inconsulta cupiditas præcipitem agit. Fac te publico committas; *fac asperum tactu leonem provocas; fac remorsurum petas*. Libellus quidem ille tuus summa cura, ut tibi videtur, elaboratus in lucem tandem prodibit, venustissimis formis impressus, quam levissima membrana circumvestitus, additis emblematis, pictis umbilicis, comptulus totus atque concinnus, nihil ut auctori suo de nitore elegantiaque concedat. Veniet in manus hominum, volabit, circumferetur; vulgo legetur, pervolutabitur; laudabitur etiam, typorumne elegantia? an auctoris ingenium? non facile dixerim. Tu homo videlicet callidus & peracutus, nihil distinguere, quid-

quidquid oblatum fuerit , arripere , & præ gaudio ac lætitia propemodum colliquescere , Mensis unus , alter , plures abibunt ; belle omnia procedent , atque ex sententia ; nemo tibi negotium facesset , nemo molestiam creabit . Lætor , & quidem ex animo ; tibi gaudeo , tibi prosperum gratulor non expectatumque successum . Non enim putabam tantum quietis atque otii tibi concessum iri . Verumtamen , si me audis , non est cur præpropere , quasi de certa victoria exsultes , & triumphum tibi propemodum deposcas . Expecta paulisper , dum , quod latet , in lucem prodeat , & quod adversarii in te machinantur tui , tandem aliquando ad perniciem tuam atque exitium erumpat ,

XXXVI. Veniet , veniet inquam , præter omnem expectationem , tempus , quo tempore , te eo vehementius , quo serius oppugnatum senties ; & tum demum intelliges tibi futuram rem esse cum hominibus & ad respondendum paratissimis , & in dicendo exercitatissimis . Jam nunc videre mihi videor , quemadmodum isti miserum libellum illum tuum , quem bonis avibus in lucem exisse arbitrabare , excussuri sint , sive te potius quam omni ratione in omnem partem exagitaturi . Initium ducent ab ipsa lingua , sive latino , sive vernaculo sermone scripseris . Culpabunt obsoletas abjectasque voces , notabunt præpostera tempora , barbaram syntaxim reprehendent , totum denique orationis genus inconditum atque horridum condemnabunt . Digressi a lingua propius
ad

ad ipsum opus accedent , singulas ejus partes dispicient , omnia sagacissime investigabunt , scrutabuntur , speculabuntur . Tum vero erumpent ea , quæ aut errore deceptus , aut improbe mentitus , aut supine dormitans , aut furiose declamitans , subito quodam effervescentis animi impetu concitatus effuderis . Tum primum agnosces te longe a scopo , quem unice propositum habere debebas , aberrasse ; aerem proinde , ut ajunt , verberasse , multa , a re , a causa , a tempore aliena dixisse , hostem , quem ferires , finxisse ; plurima quidem effudisse verba , sed nunquam ad rem ipsam , de qua agebatur , genere suo distinctam , distributam in partes , certisque terminis definitam ac coercitam devenisse . Efferebare demens inter scribendum ; multa de vitiis temporum congerebas , multa de corrogatis undique odiosis adminiculis coacervabas , aliaque inepta hujusmodi , quo majorem in invidiam adversarios adduceres tuos , persequere ; ignorans videlicet , hoc quidem modo imperitæ multitudini a te imponi posse , sed sapientibus & egregie cordatis viris , in quorum manus tua scripta ventura erant , omnino non posse .

XXXVII. Audi in hanc rem Oratorum disertissimum , & Philosophorum Jurisconsultorumque peritissimum , atque ad mirandam sapientissimi viri , tibi vero minime familiaris , eloquentiam aures istas tuas accomoda , & , dum licet , a tanto magistro discere hærrere in causa , nec facile extra causam licentius petulantiusque vagari . *Facile*

cile est, inquit Oratione pro Cælio, accusare luxuriam, dies jam me deficiet, si quæ dici in eam sententiam possunt coner expromere; de corruptelis, de adulteriis, de protervitate, de sumptibus immensa oratio est; ut tibi reum neminem, sed vitia proponas, res tamen ipsa, & copiose, & graviter accusari potest. Sed vera sapientia est, Judices, non abduci a reo; nec quos aculeos habeat severitas gravitasque vestra, cum eos accusator exheret in rem, in vitia, in mores, in tempora, emittere in hominem, in reum, cum is non suo crimine, sed multorum vitio sit in quoddam odium injustum vocatus. Hactenus vir eloquentissimus & doctissimus, cujus verbis præclaraque sententia satis luculenter docetur, quemadmodum se gerere debeat is, qui aliquid in aliquem recte scribere meditetur; & quid potissimum spectari oporteat ab eo, qui laudem ex suis scriptis & commendationem, non infamiam ac vituperationem reportare velit. Sed, unde paullum digressi sumus, redeamus.

XXXVIII. Progredientur ulterius, & se etiam magis ac magis insinuabunt adversarii tui, qui, quas operis partes singillatim expenderit, eas inter se contendunt; & cum te, quod quidem neque magni laboris, neque longæ disquisitionis erit, tibi met ipsi non solum minus consentire, sed etiam tecum aperte pugnare; & modo aliqua tanquam falsa rejicere, modo illa ipsa, quæ rejeceris, tanquam vera amplecti; rursus ea concedere, quæ

quæ negaveris , & , quæ concesseris , inficiari , comperient ; quid reliquum erit ? nisi ut veluti quoddam de te spectaculum legentibus , miserandumne dicam ? an ridendum ? proponant . Infamem tibi scilicet aut infani gladiatoris , aut ex vetere aliqua fabula , eorum , quos Poetæ in pœnam admissorum scelerum furiis agitato prodiderunt , personam affingent , & te tecum pugnantem , ac tibimet ipsi violentas manus afferentem , tanquam in scena , tui ipsius armis percussum abjectumque constituent ,

XXXIX. Quid vëro ? cum abjecto atque percusso insultare acriter incipient ac vehementer ; & te modo ad tua instituta revocare , modo artis illius , quam profiteris , elementa edocere ? Quid ? cum in te dicta jacere . Quid ? cum falsè & amare jocari . Quid ? cum , siquidem aliquid in te boni deprehenderint , ementitas tibi plumas evellere , & furtivis coloribus corniculam denu dare . Tu vero quomodo tot convicia feres ? quomodo tantam poteris infamiam sustinere ? Interea , quæ voces erunt de te ? qui sermones hominum ? qui risus ? qui cachinni ? *Volitabis* enim vero , quod magnopere exoptabas , *vivus per ora virum* ; de te in plateis , de te in triviis , de te in circulis nemo non otiosus loquetur ; quorum hominum generi hujusmodi conviciorum occasionem captantium , ampla sane dicteriorum cachinnorumque a te materies suppeditabitur . Jam in tantis popularium tuorum sermonibus , & quotidiana tui nominis

Tom. I.

D

usur-

usurpatione , quid viros graves & sapientes sensuros putas ? quid dicturos de te ? Non aliud sane & sentient & dicent , quam quod in tali re quemque sapientem & sentire decet & dicere . Parcent ii quidem injuriis , & propriæ gravitatis rationem habebunt ; sed ignorantiam iidem tuam & stultitiam non poterunt non condemnare .

XL. Infelix enim vero tot laborum ac vigiliarum exitus ; calamitosa hominis conditio , quæ moderatiorum fortasse animos & ad commiserationem posset inflectere , & ad defensionem impellere ; siquidem gravissimam Critici provinciam , aut officio adductus , aut precibus exoratus , aut alia quacumque de causa , modo probabili atque honesta , suscepisses . Verum , cum tua te eo sola ambitio , sola libido impulerit , quid est ? cur quisquam tui misereatur , cur tuas partes suscipiat , tibi adsit , tibi opituletur , Sed fac esse , qui misericordia adductus causam tuam , omnium jam opinione damnatam , aliquo modo sublevare contendat . Quid , amabo te , quid excogitabit ? quid dicet ? quid poterit defendere ? Consilii inopiam excusabit ? adolescentiæ æstum prætendet ? perfugio utetur ætatis ? doctrinæ mediocritatem in arte omnium difficillima causabitur ? quo te sublevet , & veniam tibi aliquam deprecetur . Facilis est atque expedita responsio . Erravit , corrigatur ; peccavit , peccati poenam luat ; temere fecit , castigetur ; consilii eget , suo experimento sapere condiscat ; adolescens est , rem sibi fuisse cum viris intelligat ; ignoscas oro , si unquam po-
stea

Ita . . . : verba perdis ; pietatis quoddam genus est ; hac in re esse crudelem ; constituendum exemplum in uno est , quo reliqui commonefiant , & minus audere alieno documento condiscant . Reliqua est excusatio mediocritatis doctrinæ ; sed mediocritati in arte critica locus esse quæ potest ? Hæc omnino suffragari Critico nequit . Mediocres enim Geometras , mediocres Philosophos , Rhetores , Grammaticos , Historicos , & , si vis , etiam Poetas , aliquo modo patimur ; mediocres Criticos omnino non patimur .

XLII. Tu verò , cum te ex omni parte circumfessum oppugnatumque senties , quid consilii tibi capiendum existimabis ? Exspectant omnes , quemadmodum existimationem tuam a tanta sis infamia vindicaturus . Exspecto in primis ego , qui tantum tibi periculum denuncians salutis tuæ , si quo modo possim , consulere vellem . Excipiesne omnes adversariorum ictus ? an dabis operam , ut eos excutias atque repellas ? Alterutrum necesse est , ut ; aut vim vi repellas , aut jugulari te sinas . Dicam apertius . Respondebisne ? an tuo te silentio convictum fatebere ? Sed non dubito , quin responsurus sis . Ut enim quisque indoctior , ita plerunque loquacior est ; hac scilicet ratione , ut ita dicam , sapientiæ inopiam compensante natura , ut , quantum alicui consilii atque ingenii non contulerit , tantum ineptæ garrulitatis & promptioris audaciæ addidisse videatur .

XLII. Euge ; expectatum jamdiu responsum , diuturno-

nioꛑe cura elaboratum , & acꛑioꛑi , ut tibi falſo ꝑerſua-
des , iudicio ſubactum in lucem ꝑrodit . Circumfertur ,
legitur , & ab amicis tuis , qui te atque ulcera tua tan-
quam canes lambere ſolent , vehementer ꝑrobatur , &
miris laudibus in cælum effertur . Tibi ꝑlaces , te cir-
cumſpicis , & quaſi magnum aliquid ꝑræſtiteris , adver-
ſariorumque tuorum ꝑenitus os obſtruxeris , ſubnixus am-
bulas , & depugnatum jam debellatumque arbitraris .
O te miſerum , uſurpabo illud , quod adverſario olim
ſuo ab eodem diſertiſſimo Oꛑatore , cujus verba paullo
ante a me recitari audiſſi , exꝑrobratum , ne tu quidem
fortaſſe ignoꛑas ; *O te* , inquam , *miſerum* , *ſi intelligis* ,
miſerioꛑeꛑe , *ſi non intelligis* , tua iſta reſponſione id
unum egiſſe , ut novos tibi neſcteres laqueos , arctioꛑes
ſtrueres ꝑedicas , quibus iterum induereris , & ridiculum
plane in modum implicareꛑe , Nova denuo , mihi crede ,
arma , eaꛑe multo ꝑoꛑoribus magis capitalia adverſariis
iꝑſe tuis ſubminiſtrabis , quibus tandem aliquando con-
foſſus inteeꛑas . Huc omnes nimirum recident ꝑolitiones
tuæ , huc ꝑmicorum ꝑlauſus , huc ꝑerennitas ꝑominis ;
& hic demum totius ſabulæ exitus futurus erit . Nam ,
ꝑmabo te , quid tandem exſꝑectari ꝑoterat & debebat
ab eo , qui quanto ꝑromptioꛑ ad laceſſendum , tanto eſt
ad reſiſtendum infirmioꛑ .

XLIII. Neꛑe ꝑero hæc a me conſingꛑi ꝑutato , ut cau-
ſæ ſerviam , ſed hiſtorico ꝑene moꛑe , quaſi geſta jam ſint ,
ita exponi fideliter ac narrari , ꝑoꛑ certo hæbeo . Re-
move

move igitur parumper illum assentatorum , sive verius
præstigatorum gregem , quibuscum versaris quotidie ,
quibus assidue stipatus incedis , qui tibi plus nimio blan-
diri , & oculis pene capto illudere consueverunt ; tunc
cæcæ fortasse menti aliqua lux oborietur , & internosce-
re incipies , quibus nimirum , aut apertis inimicis obſitas ,
aut insidiosis amicis non credas . Assuesce bonam in par-
tem salutaria monita accipere , ambitionem compesce-
re , dare locum rationi ; & tum demum omnis con-
tentio cessabit , & prorsus hæc instituta inter nos contro-
versa dirimetur .

XLIV. Hæc de infamia , quæ fere artis criticæ usum
comitatur , ac difficilem reddit molestiarumque ple-
nissimum . Quid vero illa de invidia ? quæ ejusdem artis
comes esse solet , ab ejusque usu sejungi vix potest , quan-
ti facienda existimabis ? Infamia molestias creat ; invidia
denunciat pericula . Nam , aut nihil de veritate labora-
bis , aut solius veritatis studiosus eris ; utrum elegeris ,
id scito contra te futurum . Si primum ; quo in numero
eum Criticum putabimus , qui nihil de veritate sollici-
tus , aut manifesto in mendacio teneatur , aut veritatem
dissimulet , eamque apertius enunciare non audeat ? Si al-
terum , vide quæso , & tecum reputa , quanta invidiæ
tempestas immineat Critico illi , qui unam veritatem in
scribendo propositam habere velit . *Obsequium amicos ,*
inquit ille , *veritas odium parit* . Quod si ita est ; quid a-
ges ? & in hoc tam lubrico atque ancipiti discrimine con-
stitur-

stitutus te quemadmodum geres ? Tune , ut veritati servias , acerbam atque odiosam præteritorum sæculorum renovare memoriam audebis ? tu jamdiu exesa situ ac vetustate detrita turpissimorum flagitiorum instaurare monumenta ? tu obductas gravissimorum vulnerum cicatrices refricando exulcerare ? occulta nationum , provinciarum , civitatum , familiarum probra detegere ? nudare dedecora non formidabis ? Delitescabant in tenebris abdita & consépulta potentissimorum hominum furti , rapinæ , libidines , maleficia ; oblitterata prorsus erat ex hominum mentibus fœdissimorum scelerum memoria ; chartæ ipsæ , quæ tantam turpitudinem continebant , diuturnitate temporis obsoleverant . Tune igitur ea e tenebris vindicare ? tu e latibulis expromere ? tu in lucem proferre non dubitabis ? tu tanquam recentia vulgare ? tu populo non tam legenda exhibere , quam execranda proponere ? Quo tandem id animo tot honestissimas familias , tot nobilissimas civitates ; tot exteras nationes , regna , provincias , tot potentissimos homines laturos putas ? Cupio tibi , quod tamen in me recipere non ausim , incolumem vitam salvæque fortunas ; verumtamen , ut res e sententiâ cedat , poterisne immensam illam invidiæ molem , quæ tantam impudentiam necessario consequetur , vel declinare , vel sustinere ?

XLV. Quid ? quod & Patriæ ipsi , qua nihil antiquius , nihil carius cuiquam esse debet , si ita veritas po-

poscet, bellum quodammodo cogeris indicere. Dura sane necessitas, sed illi omnino subeunda, qui unam veritatem inquirat, ab eaque discedere nefas putet. Hinc nova inimicitiarum origo, novæ lites, nova jurgia, nova pericula; nova, eaque gravissima impeditissimi muneris difficultas. Cogeris enim, si eo te veritas adigat, quæ Patriæ ipsi tuæ, ornamenta tute detraxeris atque abjudicaris, æmulis persæpe civitatibus tradere atque adjudicare. Conqueretur graviter illa de te; se a cive suo de veteri possessione, in qua tot annos sine controversia manserat, injuria depulsam; suis ornamentis se nudatam a te, ac spoliatam lamentabitur. Requiret boni civis officium, pietatem efflagitabit, jus denique suum, a te violatum atque imminutum, qua voce, qua lacrymis persequetur. Immerito hæc fortasse de te exposulabit, qui cum de una veritate laborandum putaveris, posthabita Patriæ caritate, ejus unius rationem habendam duxeris. Ut ita sit; hæc tamen hujusmodi esse vides, quæ possunt per se tuorum in te civium animos vehementissime commovere, & summam odii atque invidiæ flammam excitare; qua ex flamma, etiamsi minime consumptus evadas, nequibus tamen nonnisi male ustulatus evolare.

XLVI. At inquis; Multos gravissimos & doctissimos Criticos in re tam lubrica, ac tam difficili negotio impune fuisse feliciterque versatos. Video. Sed hac ipsa de causâ, quod gravissimi doctissimique & existi-

mabantur & erant, aut tantum in scribendo modum adhibuerunt, ut omnem offensionem vitarent, aut ea, quæ vulgare placuit, tam certis invictisque rationibus confirmarunt, ut nulla vi concuti, nullo labefactari modo possent, aut denique parta singularis eximixque opinione doctrinæ, hac ipsa opinione, opposito tanquam aliquo firmissimo clypeo, ita se contra omnia adversariorum tela protexerunt, ut illis, quocumque auctore emissis, ne levissime quidem perstringerentur. Verum, cum tu a summa præstantique tantorum virorum sapientia quam longissime absis, qui, si quid vales, non ingenio, sed lingua vales, qui nulla commendatione doctrinæ censearis, qui non certa ratione pugnandum, sed insigni confidentia audendum arbitraris, levis, improvidus, promptus, acer, quid est, quod exspectes? non aliud profecto, nisi, ut ad veterem infamiam, tanquam cumulus, recens accedat invidia. Hæc scilicet erit merces pretiumque impudentiæ; hoc lucrum tot curis laboribusque quæsitum.

XLVII. Hæc habui, quæ in præsentia de summa artis criticæ difficultate dicerem, reliqua consequentibus actionibus, quas de hac ipsa difficultate, quam hac una totam explicare non potui, habiturus sum, a me dicentur. Interim, dum nostræ congressionis tempus adveniat, noli in malam partem accipere, quæ dixi; noli mihi irasci, tanquam inimico, ut suspicaris, tuo, qui, si te saluum atque incolumem minime cuperem, non te tam saluta-

ribus consiliis onerasset. Quod si periculosam hanc aleam subire omnino volueris, fac quod lubet; te non impedio; tuæ te permitto cupiditati, quam video plus ad impellendum, quam omnes rationes meas ad deterrendum, apud te momenti habituram. Sed hinc etiam confido fore aliquis fructus ut existat, quem ad tuum commodum utilitatemque referre possis, & hic quidem meo iudicio uberrimus, neque vero a te contemnendus; nimirum, ut, quam mihi fidem, artis criticæ difficultatem, non vano quodam artificio, quo te perverterem, exaggeranti, sed quo tibi prodessem magis, facili quadam popularique dicendi ratione explicanti non habueris, tandem aliquando invisus tuis, despectus ab omnibus, contemptus, abjectus tibi met ipsi habere condiscas; & tum demum aliquid sapere incipias, cum te prorsus desipuisset intellexeris.





DE SUMMA
ARTIS CRITICÆ
DIFFICULTATE

ACTIONIS I. LIBER II.



I quotquot ad Artem Criticam accedere meditantur, quid ea sit, quam difficilis, quam laboriosa, quam plena molestiarum, quam referta periculorum, serio perpenderent; non dubito, Florentini, quin potius ad eandem essent, si qui idonei existimarentur, impellendi; quam ab eadem minus idonei, atque adeo inepti repellendi. Sed quis tandem hominum cupiditati modum imponat? quis obviam ire possit? quis cæcam illam ac temerariam animorum nostrorum dominatricem intra juris & moderationis repagula adigere queat & continere? Quid? istos ut ulla res terreat? ut ullum periculum moveat?

ut

ut ulla difficultas retardet ? ut modestia quadam atque ingenuo pudore ab impeditioribus muneribus abstinere atque refugiant ? Optandum quidem hoc esset ; sed nequaquam sperandum ab istis arbitror , immo vero prorsus desperandum . Sic enim animati sunt , ut quo gravior istis opponitur difficultas , quo gravius objicitur periculum , eo acrius ac vehementius illa ipsa , quam diximus , cupiditas incitetur ; & quo impeditiora sunt munera , eo promptius illa sibi ultro adsciscant atque deponant . Alacriores difficultatibus evadunt , contemnunt pericula , salutaria monita negligunt , de exitu nihil laborant ; una , qua unice valent , confidentia omnia se nullo expedire negotio posse arbitrantur . Atque id recte fortasse quidem ; si quantum in gerendis præliis *audentes fortuna juvat* , in quibus non tam consilio , quam *vi geritur res* ; tantum in exercenda arte critica audacia & confidentia valeret . Sed contra est . In hoc nostro concertationis genere unum consilium prævalet ; una ratio dominatur ; omnia ingenio , æquitate , sapientia ac moderatione administrantur . Hæ sunt virtutes , sine quibus ars critica nulla est , nec quidquam valet ; & si quid valet , ad perniciem unice atque exitium valet . Ego vero , si unam aliquam harum virtutum in illis vulgo residere deprehendissem , dedissem utique jam inde ab initio manus , nec repugnassem , quo minus ad artem , omnium maxime lubricam ac difficillimam , exercendam accederent . Verum cum earum nullam in

iis esse compererim , quid est , quod ego magnopere facere potuerim ? nisi eos ab eadem omni ope avertendos repellendosque curare . Ubi enim in istis ea , quæ superiore actione necessaria Critico præsidia atque adjuvamenta demonstravimus ? ubi acerrimum ingenium ? ubi tenax memoria ? ubi locuples multiplicis doctrinæ instructus ? ubi copiosus eximie eruditionis apparatus ? ubi fama collecta ? ubi parva existimatio ? ubi labor ? ubi contentio ? Nihil horum , Florentini . Contra vero mediocre ingenium , vulgaris doctrina , non singularis non exquisita eruditio , non fama , non existimatio , non labor , non contentio ; segnities autem multa , multa remissio , plurimum otii , omnia denique hujusmodi , ut ad molle potius ac delicatum vitæ genus facti , quam ad laboriosissimum hoc ærumosissimumque aut a natura comparati , aut a disciplina instituti esse videantur . Neque vero illud , in tanto tamque implicato negotio , quod ego jam iis inculcavi , salutare monitum amplecti voluerunt ; nimirum ut , si tantopere arte critica delectantur , illam ad sua tantum privata studia conferrent , domesticis se parietibus sepirent ; conspectum vero hominum frequentiamque sibi omnino vitandam putarent ; tum enim tenere suscepto consilio honestum exitum quæsisse existimarentur . Sed quid his hominibus facias ? aut quibus tandem rationibus convincendos putes ? Prodire omnino volunt , publico carere non possunt ; quam ob causam prorsus ignoro ; nisi

nisi forte ut eorum intemperantia manifestior appareat , & confidentia insignior judicetur . Sic enim fere comparatum esse novimus , ut qui minus possunt , plus audeant ; & plus se posse , fastu quodam superbientis animi arrogantiaque arbitrentur . Verum quid tandem erit , quod tantos spiritus insinuet atque alat , quibus incitati a tanta difficultate negotii minime deterreantur ? Quid est , cur ultro se ingerant ? cur se invitis obtrudant ? cur repellere conantibus se inferre per vim contendant ? quid denique afferunt ? quamobrem aliquo modo tolerabiles Critici habeantur . Unam , mihi credite , afferunt , quam supra dixi , confidentiam ; hac una se ex maximis , quas persecuti sumus , gravissimisque difficultatibus facillime evasuros esse confidunt . At hanc ipsam confidentiam ubinam innixam ? ubi tam firme ac solide constitutam putabimus ? ut tot admotis a me quasi machinis atque arietibus , nulla non solum ex parte labet , sed ne ulla quidem vi concuti ac labefactari posse videatur . Id ego , nisi fallor , mihi videor affecutus , qui istorum ingenium , multo ante , quam in hanc causam ingrederer , laboravi , ut probe cognitum haberem atque exploratum . Est , est inquam , in quo repositam habent spem , omnem suam fiduciam collocant , & quo Critici dignitatem facile tueri se putant posse , Regulas quasdam mente agitant , Canones nescio quos blaterant , quos mihi universos in præsentia objicere meditantur , & tanquam catervam ali-

aliquam maxime bellicosam & invictam ad omnes meos impetus opponere . His confisi nihil reformidant , resistunt intrepidi , & omnia consilia mea aspernantur , quibus eos a tanta suscipienda provincia dehortari ac deterrere conatus sum . Quare videtis , Florentini , mihi has Regulas , hos ipsos mihi Cānones necessario nunc exponendos esse , & paullo diligentius inspiciendos . Examinandum , quid opis in iis collocari possit ; querendum , quid ab iis sperandum præsidii sit ; videndum denique , utrum artis criticæ difficultatem imminuant , an potius adaugeant . Itaque faciam ; atque ut ab instituto dicendi genere minime recedam , Adversarium illum meum rursus adibo , quem tanquam in scenam inducere placuit , quo liberius his de rebus , sine cujusquam offensione , loqui possim ; illi pressius hærebo , eundemque acriter non minus ac vehementer , quam priore actione præstiterim , excutiendum exagitandumque suscipiam . Vos attendite diligenter ; enitar ipse , quantum potero , ut me non attente solum , sed aliqua etiam cum voluptate audiat .

II. Age vero , huc ades Græcule noster . Demonstrata jam satis a me artis criticæ difficultate , quid est , quod hanc ipsam difficultatem aliquo modo levare possit atque imminuere ? Præcepta , inquis , sunt certique canones , quibus Criticus juvetur plurimum , & quorum præsidio , tanquam Ariadnæo illo filo regatur sic , ut , sine ullo erroris periculo , ex ancipitibus illis a
te

te superiori actione commemoratis semitarum flexibus ac mæandris haud ita difficili negotio possit evadere. Audio; & nihil hæsitans do esse præcepta, do esse canones, quot quantosque velis; tantumque abest, ut hunc locum, quem tu tanquam munitissimam arcem aliquam infedisti, & ubi te defensum satis ac protectum putas, reformidem; ut etiam tibi maximam habeam gratiam, quod me huc non modo non repugnantem, sed etiam volentem adduxeris. Tete igitur confirma; esto vir, animumque tuum ad pristinos illos spiritus revoca, quibus in prima congressione nostra paullo exsultantius insolentiusque ferebare. Novi te, novi ingenium tuum, novi ictus, novi petitiones; non is hostis es, cujus aspectu terrear, cujus arma perhorrescam. Congrediamur.

III. Primum, vide quæso, ne erres, qui in ea opinione videris esse, ut statim atque alicujus artis regulas cognoris, ac præcepta didiceris, rem esse in vado arbitreris. Ego aliam ab hac tua sententiam sequor, qui nescio quo fato evenire dicam, ut in hac contentione nostra in omnibus abs te dissentire cogar. Noli tamen me tibi subiratum existimare; sed ad rationum, quas afferam, momenta attende. Etenim ecqua ars reperiri potest, quæ suis præceptis colligata, regulis apta ac coagmentata non sit? Suas habet regulas Musica, suas Pictura, Architectura, Sculptura suas; tamenne omnes, qui hæc regulas perceptas habent,

& his

& his artibus dant operam, arguti Musici, summi Pictores, periti Architecti, Sculptores eximii evadunt? Et Sculpturæ quidem non regulas tantum absolutissimas edidit Policletus, sed statuat ita affabre ex artis suæ præceptis elaboravit, tanta venustate membrorum, tam mira descriptione singularum partium, tanto artificio, ut eam merito *Canonem* appellarit; tamenne multos excellentes Sculptores, & cum Phidia aut Praxitele aliquo comparandos Græcia suspexit?

IV. Atque ut aliquid de mea hac arte dicam, credi vix potest quot regulis affluat, quot præceptis abundet. Pleni sunt horum præceptorum libri, plena sapientum volumina. De his Gorgias ille Platonicus, de his Aristoteles, de his Dionysius Halicarnasæus, de his Demetrius Phaleræus, de his Hermogenes, de his Longinus, de his Lucianus, de his Auphtonius, & hi quidem Græci omnes; ex Latinis porro, de his M. Tullius Cicero, de his Cajus Cornificius, de his Fabius Quintilianus, de his Fabius Marius Victorinus, de his Rutilius Lupus, de his Julius Rufinianus, de his Sulpicius Victor, de his Julius Severianus, de his Aurelius Augustinus, aut alius quispiam vetus auctor, de his recentiores prope innumerabiles; qui viri! quibus studiis atque artibus exculti! quo ingenio! qua eruditione præditi! quam eximia reconditaque doctrina præstantes! subtiliter copioseque disputarunt. Ex his ego multa per otium vidi, legi, pervolutavi; multa audiendo accepi, quæ

quærendoque cognovi ; & , si hoc de me citra ostentationem affirmare licet , didici etiam ; & , nisi mihi nimis fortasse blandior , artis meæ præcepta , si non comode , certe non incommode teneo . Tamen , ita mihi Deum propitium velim , ut , cum aliquid ex Rhetoricæ artis præscripto elaborandum est , quod præsertim e privatis latebris in publicam lucem conspectumque hominum prodire debeat , non solum rei difficultate commoveor , sed graviter etiam vehementerque perturbor . Fatebor de me id , quod est , & dicam ingenue , nihil tum propius fieri , quam ut animum pariter artemque despondeam ,

V. Jam tum mente & cogitatione prospicio , quanta hominum futura expectatio sit , qui conventus doctissimorum eruditissimorumque virorum , quid a publico doctore , quid a Rhetore , qui aliis eloquentiæ artem tradendam susceperit , requiratur ; quæ me , vel in prima rerum dicendarum molitione , anxium maxime faciunt atque sollicitum . Illa deinde ingrata & acerba succedit cogitatio , quam multa sagaciter investiganda sint ; quæ investigaveris , quam solerter expendenda ; quæ expenderis , quam acri judicio eligenda ; ac demum quæ elegeris , quam prope religiose , non ordine solum , qui rebus venustatem afflet , perspicuitatemque conciliet , sed etiam momento quodam disponenda ac dispensanda sint , ut suum unaquæque res *locum sortita decenter* teneat . Hæc ubi summo studio diligentiaque

Tom.I. E per-

perfeceris , nihil propemodum egeris . Ille tibi summus atque omnium multo molestissimus superest labor , subiectam materiam illustrare sententiis , figuris , tanquam luminibus , distinguere , exquisito verborum delectu ornate eleganterque efferre , ut jucunda , teres , polita , admirabilis , plena , & rerum omnium pulcherrimarum copia affluens oratio audientium auribus & animis influat ; tu vero non tam loqui , quod hominis est , modo non elinguis , sed , quod est disertis Oratoris , eloqui videre . Stylus propterea , pro varietate rerum , sæpe variandus ; nunc sublimior ac magnificentior assurgat , nunc depressior atque humilior subsidat necesse est ; nunc eo utendum , qui sit ex utroque & elatioris & depressioris genere temperatus , & subtili quadam mediocritate commendetur . Pandenda sunt modo vela eloquentiæ , modo eadem contrahenda ; nunc lenior , nunc incitator feratur oportet oratio .

VI. Verum , Superi boni ! quam multi occurrunt in hoc ipso scopuli , quam multæ syrtes occultaque insidiæ obijciuntur , quas omnes evitare , & ita orationis cursum dirigere ac moderari , ut portum ulla sine offensione teneat , omnem propemodum vel dexterrimi gubernatoris artem fugit ac superat . Si enim stylum sine modo varies , incertus eris & fluctuans ; si verborum flosculos studiosius confeceris , ineptus & putidus ; si negligas , incompertus & horridus ; si nullo calore inter scribendum effervesceas , remissus & frigidus ; si immodico
ar-

ardore efferaris , furiosus ac prope catenis constringendus . Hinc illa , quæ diu multumque meditatus scripto mandaveris , nunquam non ad examen revocanda , nunquam non acriter discutienda , retractanda sæpius atque iteranda sunt ; fingenda multa , limanda pleraque , non pauca circumcidenda ; quæ vero subito impetu effuderis , abjicienda prorsus , & non raro illa ipsa , quæ labore improbo , & intentiore studio vix demum extuderis , impacto transversim calamo , inducenda . Hinc tot curæ frustra susceptæ , tot vigiliæ deperditæ , tot sudores incassum effusi . Hinc illæ tristitiæ & querelarum plenissimæ voces , quibus cogeris *obductum verbis vulgare dolorem* , & durissimam multorum dierum pertinacissimamque contentionem in nihilum redactam conqueri , atque acerbius lamentari .

VII. Testor conclave illud meum , studiorum ac commentationum mearum conscium , quoties me rebus meis desperantem diffidentemque vidit . Quoties vivos ungues arrodere , scabere caput , pluteum cædere , lacrymas prope non tenere , & meam vicem ægre & dolentèr deplorare . Quoties importuna illa ac præceps animum subiit cogitatio , arma abjicere , Rhetoricæ valedicere , & Græcorum imitari consilium , quorum si qui citharædi evadere non poterant , desperata ejus artis excellentia , eo delabebantur , ubi in aulædis aliqua saltem cum dignitate consisterent . *Aulædus sit* , inquit Auctor idoneus , ad cujus similitudinem me con-

nor fingere , & hæc ipsa scribo *Aulædus* inquam *fit* , *qui citharædus esse non possit* . Verumtamen non mentiar , si dicam ; Me non illud tot laboribus ac conatibus quærere , ut eo enitar , quod pauci admodum pervenerunt ; multo vero minus , in hac mea infantia , & in hac infirmitate ingenii , illud me habere propositum , ut tanquam summus Orator digito monstrer prætereuntium ; satis enim me beatum putabo , & non contemnendum laborum ac vigiliarum mearum fructum consecutum arbitror , si aliquam in hac , quam profiteor , arte mediocritatem fuerim assecutus . Atque id ipsum , ut hoc addam & vere dicam , non mea , sed discipulorum ac moderatorum meorum causa . Discipulorum , ne inepti doctoris disciplinæ commissos dici possit ; moderatorum autem , ne hæc qualiscumque docendi Rhetoricam provincia alicui , quod necesse fuit , demandata ; sed , quod oportuit , aliquo modo , quoad per me effici potest , recte collocata esse videatur .

VIII. Quorsum illa , fortasse dices , tam alte repetita , & exquisitius ornata ? Primum , ignoscas oro , si subitus animi impetus me de recta fortasse via deduxit . *Traçant libenter fabrilis fabri* ; neque vero ego aliena de arte loquens , si quando dexter occurrit locus , oblivisci possum meæ . Deinde non exquisitius ista quidem a me ornata sunt , sed narrata fideliter , ut in me met , quotiescumque memorata periclitandi ingenii incidit occasio , experiri soleo , & nunc in his ipsi actionibus con-

conscribendis experior quotidie . Si vero hæc quem ad finem prolata a me sint , quæris, respondeo ; Non alia de causa, nisi ut illud intelligas, aliud esse alicujus artis præcepta tenere , aliud ex artis cujusque præceptis aliquid elaborare . Primum , si ita vis , facile ; alterum longe difficillimum , quod ex incredidili excellentium in unaquaque arte virorum paucitate perdocemur . Præclare enim vero , & nimis liberaliter cum artium cultoribus actum foret , si regularum perceptione scientia rerum containeretur . Non tantis profecto laboribus nos frangi necesse esset , non tantis contentionibus ad artium ipsarum esset excellentiam enitendum . Sed multo secus , ac tu opinaris , se res habet ; expertis crede , & tantæ rei difficultatem , de qua nondum cogitare potuisti , incipe nunc saltem , me suspicionem commovente , tandem aliquando suspicari .

IX. Verum , quo planius evidentiusque perspicias , quam minimum opis atque præsidii in artium regulis ac præceptis constituendum sit, paullo diligentius præceptorum ipsorum indolem ac naturam investigemus . Ages , & mihi percontanti responde . Putasne , si forte cuiquam , summo studio ac labore plurimo , contingat aliquid extundere , quod ad alicujus artis regulas exactum prorsus elaboratumque sit , id perfectum in suo genere atque absolutum futurum ? Tu quidem statim annues, asseveranter & ulla sine hæsitacione affirmabis. Nec vero aliter existimare potes , qui nihil unquam ulla in

arte effeceris , quod sapientum judicio aliqua saltem mediocritate commendaretur . Ego vero contra æque asseveranter negare non dubito ; non quod aliquid hujusmodi unquam effecerim , quod sapientum judicio probatum fuerit ; conatus sum certe , sed utrum conatus meos fortuna juverit , nescio ; sed quia in una arte consistens , nec per multas , uti tu hactenus , quo doctior & eruditior haberere , liberius licentiusque vagatus , eo vires omnes meas contulerim , ut ejus unius , quam profiteor , artis vim penitus naturamque cognoscerem .

X. Ac ne ab arte Rhetorica , discedamus , cui te aliquam operam , qualis demum cumque ea fuerit , leviter & oscitanter , ut plerique faciunt , quod , non sine stomacho , & animadvertere & pati quotidie cogor , sed aliquam tamen dedisse operam arbitror ; da mihi , quæso , orationem , quæ ex Quintiliani , atque adeo ex Ciceronis ipsius præceptis , tota scripta sit , iisque inhæreat sic , ut non alium , nisi unum aliquem ex iis , qui indicantur , ingressum habeat , ut illis ipsis , quæ ostenduntur , transitionibus progrediatur , ut nullis eorum ornamentorum , quorum , de figuris cum agitur , ingens vis a Rhetoricæ magistris & copia suppeditatur , non solum non careat , sed expleta affatim sit atque abundans . Jam , quid tibi hac de oratione videbitur ? Numeris tu quidem certe omnibus absolutam pronuntiabis . Ego vero nihil inconcinnius ajo , nihil strigosius , ineptius ,
pu-

putidius nihil hac oratione futurum . At tota ex præceptis elaborata est . Audio . Nihil, quod ad eam ornandam illustrandamque pertineat, omisum . Video . Ut ita sit, quemadmodum dicis ; nihilo tamen minus iterum ajo nihil hac oratione invenustius , nihil ineptius esse , nec vero esse posse . Quid ita ? Longum esset hic rationem subjicere atque exponere ; mihi quidem difficile admodum , tibi vero prorsus inutile . Res enim hæc est hujusmodi , quæ facilius intelligentia percipi , quam verbis possit explicari . Miraris tu quidem ; & sane est cur mireris , qui vix primo a limine Rhetoricam salvaveris , ejus penetralia non subieris , & quæ præcipuâ hujus & intimiora sunt artis , nunquam didiceris .

XI. Sed ne fucum tibi facere videatur oratio mea , hoc , quod dico, facile perspicuum fit , & luculentissimo declaratur exemplo . Etenim licet idem animadvertere in Jure, in quo simile quiddam & usuvenire solet, & affirmari potest . Quid ? Quanto magis ad jus quis accederet , nonne tanto magis , si tua ratio valeret , & ab injuria recedere , & ad æquitatem accedere existimandus esset ? Ita , opinor ; sed re ipsa contra est ; & tanto magis ab æquitate quis recedit , quo propius ad summam æquitatem videtur accedere . Hoc adeo verum est , ut in summo jure summa constituatur injuria . Notum est illud omnium Jurisconsultorum auctoritate probatum , & imperitorum etiam contritum sermone effatum , *Summum jus , summa injuria* . Usque adeo non

omnia semper ad severiorem quandam rationem ac normam exigenda omnino sunt; parcendum interdum regulis, & præceptis aliquando non obtemperandum.

XII. Progrediar ulterius, & dicam rem admirabiliorem; quo tu magis ac magis mirere; mirifice enim ista tua admiratione capior atque delector. Dico igitur non solum parcendum regulis, sed interdum contra regulas aliquid etiam audendum. Hic vero tu multo magis miraberis. Quid ni mireris? Admiratio enim diversis ortu principiis non sola cognitione rerum, sed etiam ignorantia gignitur; & non tam sapientiæ comes esse solet, quam ignorantia. Sed quo instructior me evadas magistro, non eximio illo quidem atque præstanti, sed ad te docendum satis idoneo, & mirari tandem aliquando desinas, scito, hoc ipsum, quod dico, multis in artibus contingere, & in Architectura præsertim, cujus jam inde ab initio mentionem fecimus. Mirantur omnes quotquot Romam adeunt, molem æneam Vaticano Apostolorum Principis sepulcro imminentem, & in tantæ, tamque eximiæ molis contemplatione defixi obstupescunt; nec vero satiari possunt intuentes molis ipsius pulchritudinem, descriptionem, magnitudinem vero in primis amplissimo ac latissimo convenientem loco, ac plane accomodatam sic, ut si minor esset, non congrueret, si vero major, exuberaret. Hoc, præter singulare artificium, quo perfecta moles est, præter auri copiam, quo tota colucet, præcipue mirantur omnes; & merito quidem.

Re-

Rogatum , qui molem excitarat , Laurentium Berninum , excellentem in paucis Architectum , qui tam miram , quam vocant , *proportionem* fuisset assecutus , respondisse ferunt ; Se artis suæ præceptis minime paruisse ; si secus fecisset , illam minime assecuturum fuisse . Non alia affirmavit ad tantum opus se usum esse dimensione ; nisi quam ingenium ei suum , sua naturalis habitudo ; & diuturna observatio suppeditarit . Sed ista omittamus , quæ tibi acuta nimis , & captu difficilia videri possunt .

XIII. Quid tum ages ? quo te vertes ? cum subito te præcepta ista tua , quibus tantopere fidis , destituent , cum te regulæ omnes omnino deficient , & frustra ab iis opem expectabis , frustra earum implorabis auxilium . Tunc enim vero te dubium , ancipitem , incertum videre mihi videor , sine duce , sine consilio , non habentem , unde aliquod tibi subsidium in subito discrimine constitutus nanciscaris , qui in regulis atque præceptis omnem spem tuam collocandam putaras . Atqui , uti dico , ita non raro continget . Multa enim omnibus in artibus se se offerunt , & ea quidem fere præcipua , quæ neque præceptis traduntur , neque vero ullo modo tradi possunt . De his magistri silent , co-dices tacent , & in tot voluminibus præceptorum copia refertis atque stipatis ne verbum quidem unum occurrat . Multa docet usus , multa commentandi scribendique diuturna assiduitate percipiuntur , multa solertia mentis ac sagacitate comparantur .

Di.

XIV. Dixi paullo ante , ut ab eadem , qua cœpi-
mus , arte exempla sumamus , stylum subtili quadam
esse ratione temperandum ; hujus autem subtilissimæ
temperationis , quære , vide , circumspice , versa te
in omnes partes , libros omnes de arte rhetorica consu-
le , volve , evolve , voluta , pervoluta , & vel unum ,
si potes , mihi præceptum ostende . Nullum invenies ,
nullum proferre poteris ; ut hæc temperatio multo dif-
ficilior sit , quam illa æris corinthii , quod omnium pro-
batissimum perhibetur ; & hac ipsa de causa difficilior ,
quod arte caret . Quid hic dicam ego ? quid tu ? Quid tu
dicturus hoc loco sis , non laboro ; quid ego dicam , at-
tende . Infelix fane ejus hominis conditio , cui de quaque
re præcipiendum sit , qui nihil sine præceptis , nihil pro-
prio , ut ajunt , marte possit extundere . Nonne sum-
mis eum circumfideri ac premi angustiiis necesse est ,
cum se iis repente nudatum præsidiiis videat , quæ sibi
adjumento sperabat futura , & sine quibus nihil aude-
re , nihil afsuevit efficere ?

XV. Verum esto ; nihil occurrat in quaque arte , cui
suum ac peculiare præceptum adjunctum non sit . Quid ?
fatissime ejus artis cultoribus hoc modo provisum esse exi-
stimabis ? Exspecto quid dicas ; satis , opinor , repones .
Ita est , inquis , satis . Ego contra valde parum , & vix
ac ne vix quidem consultum ajo . Omnia enim illa ipsa ,
quæ expresse traduntur præcepta ad judicium referantur
oportet , in eoque omnino , unde initium duxerunt , con-
quie-

quiescant. Quod quidem iudicium, si vis esse præceptum, non repugnabo ; immo vero tibi concedam , dummodo tu mihi , quod negare non potes , te nondum hoc percepisse præceptum vicissim concedas . Eo igitur te omnes omnium artium magistri , quos tandem cumque adire atque audire malis , vel invitum pertrahent , eo elapsum revocabunt ; tuo te demum regendum iudicio deducendumque permittent . De iudicio vero non est cur præcepta exspectes, cur regulas flagites, quod nullis adstringi regulis potest ; de quo si quis vellet præcipere , iudicio ipse carere convinceretur . Huc autem cum ventum erit , quo necessario , non dico interdum , non dico sæpe , sed dico semper deveniendum esse , vide , quæso , quid de te , qui hoc ipso iudicio destitutus es , quid de tuis regulis , quid de præceptis , quid de canonibus , quid de tua denique tota arte critica futurum sit .

XVI. Nova hæc tibi sunt , & videntur incredibilia . Credo equidem . Neque enim homini inexperto & imperito aliter videri potest ; nihilo tamen minus , quidquid tibi de his videatur , vera sunt , & omnium sapientum consensu sententiaque probata . Quod si adhuc in opinione tua perstas , & mea tibi suspecta oratio est , experire . Aude aliquid ex alicujus artis præceptis efficere , quod quidem aliqua laude dignandum , non vituperatione explodendum sit ; tum fortasse incipies aliquid de tantis rebus suspicari , & experimento ipse tuo edoctus intelliges , regulas prope nihil prodesse , & negotium

tium hoc totum multo esse impeditius implicatiusque , quam tu antea , falsa persuasione deceptus , arbitraberis . Hæc de præceptorum natura generatim , ex quibus efficitur , quam parum præceptis fidendum sit , quam minimum opis atque præsidii in iis collocandum .

XVII. Jam ut ad artem criticam veniamus , de qua potissimum inter nos instituta controversia est , nulla fortasse ars tot præceptis abundat , nulla regulis locupletior . De hac viri doctissimi & eruditissimi luculentissime copiosissimeque scripserunt , nihil ut pene eorum in præcipiendo curam diligentiamque subterfugerit . Multa de criticæ artis vi , indole , natura , necessitate ; multa de singulis artibus ac facultatibus ediscendis & tradendis ; multa de communibus omnium disciplinarum principiis , multa de subsidiis , multa de impedimentis ad earum cognitionem spectantibus persecuti sunt . Quid illa , quæ de scriptoribus univérse , & de singulis nominatim ? Quid , quæ de eorum operibus dijudicandis , de genuinis dignoscendis , de suppositis internoscendis tradiderunt ? Nam quid dicam ? quanta quamque accurata diligentia in veterum cujusque generis monumentorum indagatione versati sint , quanto ea studio cognorint , expenderint , examinerint . In historia vero præcipua Criticorum fuisse consumpta dici potest industria , nihil ut sibi reliqui fecerint eorum , quæ ad eam suas in partes sive describendam , sive certa annorum & sæculorum non intercisa serie ordinandam , sive emendan-

dandam ab erroribus perpurgandamque pertinerent. Exorsi a divina sunt, ab hac progressi ad ecclesiasticam, ab ista ad profanam gradum fecerunt, & omnem totius historiæ vim complexi, totam, quam longe lateque pertinet, incredibili labore, exquisita ac recondita eruditione a se peragratam, non tam perlustrarunt, quam illustrarunt. Neque vero linguarum notitiam a se desiderari passi sunt, quam magno usui Critico futuram jure meritoque censuerunt.

XVIII. Jam, quæ vis! quæ copia regularum! quæ redundantia præceptorum! Quid est, quod præterea non dicam requiri, verum etiam optari possit? Habes hic, uti vides, regulas, quot quantasque velis, habes præcepta, habes canones, si ita præceptiones appellare velis, quo majorem dignitatem iis auctoritatemque concilies. Habes etiam hic, cur tibi plaudas, cur gratuleris, cur exsultes; sed exsultantiam istam tuam, si subsistes parumper, ac diligenter voles attendere, videbis quam facile ego sim compressurus, qui crebrius, quam vellem, ignorantiam cogor, sive potius stultitiam ridere ne dicam, an condemnare tuam. Contendo enim & confirmo, te in tanta præceptorum copia inopem futurum; nec quidquam consilii in tanta magistrorum tibi certatim consulentium, & doctrinæ suæ atque eruditionis lumen offerentium turba, qua circumsisiteris ac prope obsideris, habiturum. Turba confusionem parit; nimium lumen non allevat oculos, sed perstringit aciem-

aciemque debilitat. Etenim, ut nulla fortasse ars, quam critica, præceptis abundat magis, ita nulla incertior est, nulla impeditior; nullius minus tuta præcepta sunt, quibus fidere possis, & te, ullo sine fraudis periculo, committere.

XIX. Ac primo quidem, quod necesse fuit, in tanta præcipientium multitudine, magistri isti tui inter se convenire minime potuerunt. Ut enim non eadem omnibus ratio, non eadem mens; ita varium etiam ac diversum debuit esse consilium. Et sane, non modo ii non secum consentiunt, sed etiam inter se valde dissentiunt. Alii eadem de re alias regulas tradunt, alii aliter omnino præcipiunt. Hi angustiores in definiendo, illi laxiores sunt. Quas circumscriptiones aliqui apponunt, alii penitus tollunt. Quæ constituta ab uno sunt, labefactantur ab alio ac subvertuntur. Neminem fortasse unum invenes, cui plures non contradicant; non plures, quibus non a multo pluribus contradicatur. Non hæc eo dico, quo eorum auctoritatem elevem, regulas infringam, præcepta condemnem; sed tantum dico id, quod est, quod fieri necesse fuit, quod nemo negabit, quod tu ipse inficiari non potes; ut tritum illud *Quot capita, tot sententia*, si usquam alibi, certe in arte critica locum habeat, de eaque jure debeat usurpari.

XX. In tanto autem præcipientium magistrorum dissidio, exspecto, quam potissimum rationem sis initurus. Interponesne te? interpellabis? Quid? quos tanquam

quam magistros audire ac venerari debes, his te audebis interponere? hos interpellare? tu importunum os istud tuum præcipuis artis doctoribus objicere? tu te pacis sequestrem offerre? Quæ tanta auctoritas in te residet? quæ commendatio ingenii, doctrinæ, eruditionis, consilii, nominis unquam fuit, ut inter doctissimos eruditissimosque viros pacis arbiter ac sequester cum dignitate sedere possis? Ten credam ingenio isto tuo, ista vi, isto mentis acumine, isto consilio; hoc est, nullius prope ingenii, solertiæ, consilii, doctrinæ, eruditionis, exiltimationis hominem tantas posse lites componere, tantas controversias dirimere, tam varias conciliare sententias? Vides, opinor, ut initia se dant, quanta in processu difficultas futura sit, cum tanta se in ipso ostendat exordio.

XXI. Sed, ut a præcipientium magistrorum litibus & controversiis ad præcepta ipsa transeamus, quantum ab eorum indole ac natura difficultatem emerfuram putabis? Jam ex his, quæ generatim diximus de præceptis, quid nominatim de illis, quibus ars critica continetur, sentiendum sit, conjectura te arbitror assecutum. Sed tamen de his ipsis, contra atque de aliis aliarum artium præceptis affirmatur, illud universe ac vere dici potest, esse multiplicia, esse varia, esse diversa, esse opposita inter se, esse referta exceptionibus, & pluribus præceptorum se mutuo complicantium ambagibus involuta atque implicata, quæ quidem nescio quem-

quemadmodum evolves atque explicabis . Nam quid inextricabilius esse potest , quam addere præcepta præceptis , regulas regulis cumulare , ut regulis ipsiis , non nisi aliarum regularum ope atque præsidio uti possis ? Illud certe fieri necesse video , ut præcepta præceptis implicentur , regulæ regulis impendantur ; tu vero magis ac magis impeditus & implicatus ex istis ipsiis regulis ac præceptis , tanquam e laqueis ac pedicis expedire te atque explicare non valeas .

XXII. Quid vero , si præceptis obscuritas ? quid , si acumen accedat ? nimirum ut minus clara , & nimis acuta sint ; nonne tum multo magis ad implicandam , quam ad explicandam difficultatem valebunt ? Atqui ita est . Ars enim critica natura sua subtilis est , acris est , acuta est , spinosa est , quæ suis ipsa se acuminibus compungit ac ferit , ut propterea ingenium solers in primis atque acutum flagitet . Neque vero hæc perinde accipias , quasi de industria criticæ artis præcepta nimis acuta faciam atque subtilia ; quo te novis subjiaciendis , inanibusque excogitandis difficultatibus curem subvertere . Etenim si semel dederis , quod negare non potes , artem criticam acutam esse ac subtilem , illud necessario consequens est , non alias habere posse regulas , nisi naturæ atque indoli suæ accomodatas ; acutas nimirum atque subtiles . Multa Criticus videat necesse est , multa introspiciat acriter , multa solertissime distinguat , in res ipsas , de quibus agitur , penitus intimi-
usque

usque invadat oportet . Si secus se gerat , neque muneri suo satisfaciet , neque certi quidquam constituet .

XXIII. Jam in tanta magistrorum inter se dissidentium copia , in tanta præceptorum subtilitate via necessario aliqua ineunda cum sit , quam potissimum tu possis eligere ; ego plane non video . Etenim magistrorum ipsorum conciliare dissidia , controversiasque dirimere , non est , uti diximus , istius ingenii tui . Unum aliquem optare ac reliquis anteponeere summam habet difficultatem . Optio enim contentionem requirit ; singulorum oportet dignitatem expendere , ne cuiquam facere injuriam existimeris , & alium alii sine causa anteponeere videaris . Excerptare autem , quæ in unoquoque sunt optima , id sane multo difficilius est , multi laboris , perfecti subactique judicii . Eadem porro difficultates instaurantur in præceptis , quæ varia cum sint , contentionem ipsa etiam requirunt , optionem flagitant ; ad eorum autem acumen ac subtilitatem hebes profecto ingenium afferri atque opponi non oportere , ne tu quidem , opinor , negabis . Quid ergo ? quid relinquetur ? non aliud certe , nisi cura , labor , angor , molestiæ , angustia , & illa ad extremum , ærumnosorum scopulus , nisi tua , qua unice vales , in tempore confidentia succurrat , desperatio .

XXIV. Sed bonitas causæ quam defendo , & indulgentia mea te ista eligendi magistri , discutiendorumque præceptorum cura molestiaque facile liberant . Sit vir idoneus , qui , quem sequare , doctorem probatissimum ,

& artis criticæ experientissimum suppeditet; ex eo autem, præcepta, si quæ habet obscura, implexa, difficilia, prætereantur; clara, facilia, aperta, ac prope exposita eligantur. Quid tum? quid censes futurum? absolutumne transactumque negotium? Nihil minus. Dico enim illa ipsa præcepta, quæ maxime certa & minus impedita videri possunt, ea etiam esse incerta, & ex quibus non nisi ægre admodum elici veritas possit.

XXV. Age porro, ut quo loco res sit, quam in vado esse arbitraris, cognoscas, unum aliquem ex iis, qui canones appellantur, & quidem ex eorum numero excerptum, qui certiores exploratioresque habentur, speciminis causa, examinemus. Canon sit. Si VETERES SCRIPTORES MINIME INTER SE CONSENTIANT, QUAE QUIS ÆTATE, QUOVE LOCO VIXIT, EJUS ÆTATIS LOCIQUE HISTORIAM SCRIBENTI FIDEM HABETO, TUM QUI PROXIME VIXIT, CONSULITO, AB ALIIS CAVETO. Quid est, quod firmius ad constituendam veritatem stabiliri? quid, quod ad refellendam falsitatem accommodatius præcipi possit? Edicitur fidem habendam illi esse scriptori, qui ea ipsa ætate vixit, qua hoc vel illud factum contigisse narratur, qui minime necesse habuit rem ab aliis discere, cujus ipse testis fuerit, quam suis propè oculis usurparit. Equidem nescio an exploratior certiorque afferri a me canon potuerit, neque vero a te desiderari. Nam quid magnopere consequentium ætatum testimonia requiramus, quandoquidem ejus ipsius scriptoris aucto-

auctoritate nitimur, qui ea prope ipse vidit, quæ scripto mandavit, ut si aliquam rem enunciavit, credere; si vero reticuerit, eam jure negare possimus, atque adeo debeamus. Hoc tibi certum videtur. Sic opinaris, sic existimas.

XXVI. Vide nunc, quid inter tuam, & doctissimi ac nobilissimi Historici opinionem intersit. Tacitum dico, gravem in primis & acutum scriptorem, de quo clarissimi viri illud testimonium reliquerunt; *Non fuisse quidem eloquentia, aut aliis virtutibus Livio superiorem, sed prudentia & judicii notis illustriorem*. Jam tu putas testatorem futuram historiam, quæ ab eo scripta sit, qui ea, qua vixit is, de quo scribit, ætate vixerit; ille vero contra multo aliter existimavit, & majorem illi habendam esse fidem, ea ipsa de causa contendit, quod ea, qua ii, de quibus scribit, ætate non vixerit. Quid ita? Audi ipsum; *Veritas*, inquit Historiarum suarum lib. 1. cap. 1. *pluribus modis infracta Mihi Galba, Otho, Vitellius nec beneficio, nec injuria cogniti*. Paucis oppido verbis multa complectitur, & ea quidem, quæ cuique maxime probari debent. At, inquis, hoc esse non potest. Sed hoc ita esse & multæ & gravissimæ rationes persvadent. Rem enim altius introspectanti, non pauca ostenduntur, quæ Historici de iis ipsis rebus, quæ sua ætate contigerunt, scribentis fidem elevent atque auctoritatem infringant.

XXVII. Et sane, putasne cum illi ipsi Galbæ, Otho-

nes, Vitellii, cum veteres primi Imperatores viverent, putasse, quenquam fuisse scriptorem tantis cervicibus, qui, quæ turpiter, scelestè, nefarie, crudeliter patrant, scripto mandare auderet, eorumque indignationem sustinere se posse confideret? Nonne multa aut premeunda silentio, aut extenuanda verbis erant, ne odiosa turpissimorum flagitiorum memoria ad posteros permaneret? Contra, siqua forte aliqua cum laude gesserant, nonne miris, atque adeo minime veris supra modum laudibus erant efferenda sic, ut maximam sibi partem adulatio vindicaret, minima veritati relinqueretur? Invidia vero, qua plerique eorum flagrabant gravissima & maxima, cum scriptorum animos occupasset, nonne in ipsa irrepere scripta debuit, ut siquas ab iis graves accepissent injurias, eas siue dissimulando, quæ præclare gesta, siue exaggerando, quæ nefarie, siquidem id impune facere se posse existimarent, ulciscerentur. Vides hic scriptorem summas in angustias conjectum; hinc timore, illinc odio oppugnatur, adulatione circumfilitur, tenetur undique, nullum certum ac tutum effugium habet. Jam vero, quam veritatem exspectes ab eo, qui tot angustiis prematur, tot sit obsessus periculis, cui, si vera enunciet, pœna gravis proponitur, capitis ipsius discrimen aditur. De potentissimis, si nescis, hominibus agitur, qui, quæ flagitiose ac turpiter agunt, vulgari nolunt, silentio premi, adulatione extenuari volunt; qui, siquid forte in scripto displiceat, nequaquam, ut
Ari-

Aristarchus Homero , notam adscribunt ; sed interdicta , exilia , carceres , cruciatus , crucem apponunt , necem intentant . Hinc illa ejusdem Taciti Annalium lib. I. cap. I. verissime scripta ; *Tyberii Caiique , & Claudii ac Neronis res , florentibus ipsis , ob metum falsæ ; postquam occiderant , recentibus odiis compositæ sunt .*

XXVIII. At non semper in lubricis hujusmodi argumentis scriptorum versatur labor . Arbitror . Verum non injuriarum solum , sed beneficiorum etiam meminit Tacitus , & in utrisque ad infringendam veritatem summum momentum collocat ; *Mihi* , inquit , *nec injuriæ , nec beneficio cogniti* . Seponamus , si vis , injurias ; facessant interdicta , minæ , exilia , carceres , secures , cruciatus , cruces ; & si qua alia sunt hujusmodi ad incutiendum timorem , constantiamque scriptoris labefactandam excogitata procul abigantur . Quid ? Beneficia exigua , ne vim habitura existimas ad Historici tentandam fidem , de rectoque veritatis tramite deducendam ? Beneficia , non magis scriptoris adstringunt animum , quam linguam colligant , & manum devinciunt , eorumque vim , quo liberalius nacti ingenium sumus , & honestius educati , eo acriorem vehementioremque experimur . Quid ? quod remunerationem beneficia exigunt ; quapropter cum grati ac memores in referenda gratia & videri & esse cupimus , nihil facilius , quam ut beneficiis hominibus nimis faveamus , dissimulemus eorum vitia , virtutes , quæ in illis re vera non sunt , aut videre

dere nobis videamur , aut siquæ sunt , eas scribendo majores amplificandoque faciamus . Hic quoque , uti vides , angustia ; non graviores illæ quidem superioribus , sed quæ tamen scriptoris fidem corrumpere , animumque labefactare possint atque pervertere .

XXIX. Sed reliqua expendamus , quo quis loco vixit ei fidem habeto , His verbis siue patriam , siue nationem indicari puto , Si patria significatur , in qua quis natus , altus , institutus , ecce tibi acrius quoddam & vehementius studium , quo corripitur Historicus , & labefactetur historia , Favemus enim omnes naturæ patriæ nostræ , & ejus caritate ducimur , & facile ab æquitate deducimur , Si vero nomine loci natio intelligatur , ecce iterum tibi novum aliud studium , non minus quam superius , acre & vehemens , Fiet enim , ut scriptor , nisi caveat , exterarum gentium abjiciat laudes , ut suæ gentis decora atque ornamenta extollat , Qua lue omnes fere cujusque nationis Historici inficiuntur , & omnes omnium prope gentium fœdantur annales , Dixi ni caveat ; cavere autem , et pravas omnes animi permotiones , quibus humana tentatur infirmitas , habere edomitas sic , ut nemo lædatur , nemini invidetur , uni studeatur veritati , nonnisi paucorum est , ac plane sapientum .

XXX. Si vero exclusus ab iis , qui ea ætate , qua res gesta dicitur , vixerunt , scriptoribus , ad proxime consequentis ætatis auctores , explicandæ veritatis gratia ,

tia, delaberis, quod a canone his verbis præcipitur;
 TUM QUI PROXIME VIXIT CONSULITO, non vitabis diffi-
 cultatem, sed in multo graviores incurres. Nam,
 quæro, si *Purius ex ipso fonte petuntur aquæ*, quæ, quo
 magis a scaturigine digrediuntur, lutulentiores eva-
 dunt; quæ spes erit puræ, ut ita dicam, hauriendæ
 veritatis a consequentibus scriptoribus, qui tanto remo-
 tiores a fonte sunt, quanto post tempore ab ipsa re ge-
 sta exstiterunt. Si ratio subest de eorum fide dubitandi,
 quia ea ipsa ætate vixerunt, qua res gesta dicitur, pro-
 pter ea, quæ commemoravimus, incommoda, quan-
 to potior ratio erit, cur de consequentium scriptorum
 fide dubitemus? Nam, amabo te, unde quæ scribe-
 rent, petere poterant? quibus certis auctoribus disce-
 re, quæ posteritati mandarent? Si priores scriptores tan-
 quam duces secuti essent, quos indicavimus scopulos,
 effugere non potuissent; fingere autem ex ingenio, &
 comminisci concessum non erat. Quid facerent? Fa-
 mam, opinor, rumores vulgi, qui suis temporibus
 nondum plane conquiescent, consecrari debebant? Sed
 quid his auctoribus incertius? quid levius? quid dubium
 ac suspiciosum magis? Homo scilicet gravis, & Hi-
 storicus, qui in historia sua conficienda sibi uni veritati
 esse serviendum putet, captandam famam, vulgi ru-
 mores, temere plerunque disseminatos, tanquam cer-
 tos auctores, aucupandos existimabit? Jam extrema
 illa AB ALIIS CAVEO non est cur exponam, quæ cla-

ra sunt , & per se necessaria consecutione descendunt :

XXXI. Non igitur in constituenda veritate fidendum *coævis* , quos vocant , scriptoribus , cavendum a consequentibus . At si hoc est , cui fidem habebimus ? cui credemus ? Tibi nimirum novo Critico fidendum erit ? tibi habenda fides ? & quidquid nobis obtuleris , passis statim ulnis amplexandum , & clausis , ut ajunt , oculis excipiendum ? Gravis enim vero auctor , summo literariæ reipublicæ bono , ætate hac nostra exortus , & ad hæc postrema tempora reservatus , quo nos de incertissimis rebus , non modo certos & certiores , sed etiam certissimos faceres . Dicis ; quid igitur fiet ? quomodo veritas elicietur ? quomodo explicabitur ? Hoc a me quæris ? tu videris ; quære potius a te ; tu tibi ipse responde . Munus nunc meum est difficultatem ostendere , non te rationem , qua ex difficultate evadere possis , edocere . Quod si respondere cogor , hoc unum dicam , nec alius quispiam poterit aliter dicere , nisi totum hoc negotium difficilem habere ingressum , propter summam doctrinam atque eruditionem , quam in Critico requiri superiore actione docui ; multo vero difficiliorem , propter summas , quas nunc ostendo , & in quas Criticus necessario conjicitur angustias , habere egressum .

XXXII. At enim ; quid tu tandem impeditissimo docendi munere implicatus , & in scholam illam tuam , tanquam in pistrinum aliquod , compulsus Non est , cur plura addas ; intelligo quid illud sit , quod te
co-

coquit, quod pectore clausum habes, quod jamdiu gestit erumpere, & quod egomet, ne tibi cruditatem gignat, nunc educendum curabo. Planius. Video, quid mihi opponere hoc loco mediteris, & jam inde usque ab initio hujus contentionis nostræ objicere in animo habueris. Dicam igitur de me, dicam aperte, dicam ingenue; Si in hujusmodi loca adeo saltuosa, & tot tantisque sentibus obsita aut necessitate adactum, aut forte fortuna delatum me viderem, conarer quidem, sed nescio quomodo expedire me possem. Sed illud hoc loco attende, quod jam per te animadvertere pridem debueras; Alias hac in contentione nostra tuas, alias meas, & multo diversas esse partes. Mihi pars faciliior obtigit, tibi difficilior incumbit. Aliud est ostendere, aliud profligare difficultatem; primum nullius prope ingenii, alterum summæ eximiæque doctrinæ. Facile est apta dissolvere, difficile admodum dissipata colligare; facile est in littore maris constituto scopulorum tempestatumque pericula denunciare; in ipso vero mari turbulenta tempestate deprehenso naufragia vitare, & portum feliciter subire multo difficillimum. Neque vero est, quamobrem pistrinum illud, quo nomine recte quidem scholam designasti, mihi exprobres. Etenim, uti vides, ex eo pedem non effero. Non in exquisita, non in recondita eruditione verfor; ea afferro, quæ cuique obvia, in medio posita, ac prope vel cæco exposita sunt. Sed, qui uni serio studuit arti, facile de aliarum artium difficul-

cultate, si minus recte, quod mihi non fumo, judicare, aliqua saltem certe potest ratione suspicari. Quare non est, cur de communicanda mecum difficultate cogites, quam vitabo sapiens; neque vero unquam tam impedito de unaquaque re judicandi munere implicabor. Ratione & judicio utens, & pedetentim incedens eatenus procedam, quatenus ratio & judicium sinet, nec committam sanus, ut ulterius progrediar.

XXXIII. Sed ut, unde digressi sumus, revertamur, si in proposito canone prope certo atque explorato tantum inest difficultatis, quantum ostendimus, quid censes futurum in iis, qui neque tam certi sunt, neque tam explorati? Itaque, non est cur reliquos ejusdem generis & æque certos examinandos suscipiam, in quibus, si per tempus liceret, mihi prope ludus esset, idem, quod in allato exemplo præstiti, demonstrare. Sed quid tandem facias? Velis, nolis, hoc habent a se omnes artes, ut fere præcepta facilia sint, usus difficilis; hoc autem amplius ars critica, ut & præceptis sit & usu difficillima. Porro hoc ipsum sive vitium, sive morbum, sive aliud quidpiam appellare malis, pro certo habeto, esse hujusmodi, cui nulla præcipientium consilia subvenire, nulla medentum ars, ne vel adhibito quidem panchresto medicamento, mederi possit.

XXXIV. Verum, omisissis præceptis & canonibus, de quibus satis diximus, pauca de ipsis artis criticæ principiis dicamus, quo difficultas magis, quam ostendendam
fu-

suscepi, ac magis declaretur. Principia cujusque facultatis & artis ea vocantur; quæ communi atque unanimi sententia probata ac recepta sunt, atque in ipso communi sensu propemodum infixæ. Nunc si artis criticæ principia paullo diligentius expendere velimus, eodem, quo præcepta, morbo laborare deprehendemus. Et sane, quid exploratius, quam standum esse auctoritati, obtemperandum rationi, utriusque & auctoritatis & rationis consensionem maximi esse faciendam, multum veteribus, multum antiquitati deferendum. In his omnes consentiunt, nemo discrepat; hæc tanquam bases ac fundamenta a Criticis omnibus jaciuntur, super quæ veritatis ædificium firmum extruatur atque inconcussum. Ex his tamen veris certissimisque principiis dici non potest, quantæ quamque non diversæ solum, sed oppositæ etiam consecutiones deducantur.

XXXV. Unde enim censes tot dissidia inter doctissimos & nobilissimos Criticos eadem de re & exorta olim fuisse, & excitari quotidie, quæ nullum unquam finem habitura esse videantur; si ut certa sunt, quæ communi sententia constituuntur, principia; ita etiam certus & constans usus esset principiorum. Sed ea nescio quomodo cum ad usum traducuntur, lites gignunt, quæstiones pariunt, & tot, pro diversa ingeniorum ratiocinantium habitudine, ex iis variæ erumpunt discrepantesque sententiæ, ut earum incredibilis numerus sit, & desperanda conciliatio. Ultraque ex parte auctoritas op-
po-

ponitur , utrique parti rationem favere contenditur , utrinque antiquitatis testimonium profertur , utrinque pugnatur , & repugnatur acerrime ; nullus disceptationum finis , nullus controversiarum modus . Quæ quidem satis declarant , quacumque de causa id evenire dicatur , quam incerta res ista sit ac plena negotii .

XXXVI. Atque ut id a te infirmari non possit ; a me vero non tam affirmetur , quam confirmetur , allato exemplo demonstrabitur . Celeberrimam Abgari epistolam tibi non ignotam esse existimo . Atqui hæc per eadem omnino principia a doctissimis & præstantissimis Criticis & oppugantur & propugnatur . Ipsa Gelassii summi Pontificis auctoritas , qui eam apocrypham censura sua declaraverat , omnem sustulisse controversiam existimari poterat ; sed tamen hæc ipsa auctoritas non obstat , quo minus irrogata censura non in diversam modo , sed in oppositam etiam partem pro cuiusque studio detorqueatur . Usque adeo eadem de re , iisdemque deducta ratiocinatione principiis , opposita concluduntur . Atque hoc ipsum quidem , si actionis hujus nostræ jam ad exitum properantis modus pateretur , bene multis exemplis doceri posset . Id autem generatim licet animadvertere fere in omnibus , de quibus inter se Critici litigant , & quæ magnis utrinque contentionibus , allata utrinque & auctoritate & ratione , & veterum & antiquitatis testificatione agitantur . Quibus exemplis conficitur , ita rem plerunque se habere , ut tametsi subtrata , tanquam

quam firmissima basi , principiorum certitudine aliquid constituitur , superexstructum tamen ædificium labet . Quapropter , opinor , intelligis omnia propemodum incerta esse , obscura , omnia fere dubia , omnia suspiciosa . Sic est ; quo te cumque convertas , quocumque cogites , usque novi occurrent , qui iter impedian , Labyrinthi , novi Mæandri , novæ ambages , nova novarum diverticula semitarum objicientur ; & illa ipsa difficultas , quam ab initio summam proposui , novis semper difficultatum accessionibus cumulata , & incredibilem in modum exaggerata reperietur . Jam vero tibi quid regulæ prodesse poterunt ? quid præcepta ? quid canones ? quid vel ipsa principia magnopere poterunt prodesse ? Ubi nunc Ariadnæum illud filum , quod incertos gressus tuos regat , a te jam inde ab hujus actionis exordio exproptum , in quo tantam fiduciam collocaras , quod tibi nunquam defuturum , & tanto usui futurum sperabas , ut ejus unius præsidio ex iis , quas priore actione ostendimus , plurimarum maximarumque difficultatum ambagibus evadere te nullo prope negotio posse consideres .

XXXVII. At si hoc est , actum omnino erit de veritate , & de veridica prorsus historia desperandum . Quid hic dicam ? quid reponam ? Non imperite tu quidem , nec vero non opportune hoc mihi nunc objicis atque opponis . Sed , quam facile me expediam , attende . Age , dic quid a me tibi responderi vis ? Mihi æque facile est , & concedere & negare ; concedam si vis ; infici-

ciabor, si voles. Si utrumque; etiam. Itaque, quod Oratoribus fiducia causæ usitatum est & familiare, concedam simul & negabo. Primum concedam desperandum de veritate; sed tibi, homini inexperto, imperito, inexercitato, & vix leviter primis litteris tincto; quæ causæ fuerunt, & quidem gravissimæ, quibus adductus te ab hoc impeditissimo munere avocandum removendumque susceperim. Quid tibi hac de responsione videtur? Certe præter expectationem hominem occupavit; sed tamen nihil verius a me proferri potuit, & magis ad usum præsentem accomodatum. Hoc primum. Deinde nego de veritate esse desperandum hominibus sapientibus, ingeniosis, longo usu edoctis, & qui necessaria ad artem criticam præsidia afferant. Invenient illi, ne dubita, rationem, qua veritatem ex illis difficultatibus, quas hætenus persecuti sumus, evolutam explicent, quam tu rationem nondum invenire potuisti, nec vero fore credo, ut invenias in posterum.

XXXVIII. Cæterum noli putare, orationem hanc meam eo spectasse, omnia ut dubia redderem, ut incerta facerem, ut omnem humanam fidem de medio tollerem. Non huc spectavit, non huc pertinuit oratio. Nihil enim stultius a me insinuari potuisset, quam veritatem explicari nullo modo posse. Si ita me gessissem, more Gigantum pugnassem cum superis, hoc est repugnassem naturæ, ejusque vinculum, quo humana adstringitur societas, dissolvissè merito coarguerer. *Au-
tor.*

*Et*or quippe *Natura Deus*, egregie scriptum reliquit vir doctissimus in præclarissimo illo suo de locis Theologicis opere lib. xi. cap. iv. *in hominum mentibus inclinationem ad credendum naturalem impressit. Siquidem non minus fides necessaria est hominis & vitæ & disciplina, quam aut igni locus supremus, aut terræ imus, ut bene habeant, necessarius est.* Non ego igitur humanam fidem de medio tollendam, non de veritate desperandum esse contendere. Historicis enim gravibus, quales sine dubio non pauci inter sacros & profanos numerantur, ajo fidem esse habendam, ex eorumque auctoritate, si præsertim aliqua de re consentiant, dico posse elici veritatem. Quare, si recte attendisti, unam expediendæ certo veritatis, eamque summam difficultatem sum persecutus; hoc allatæ rationes ostendunt, hoc docent. Si vero reliquis actionibus interesse volueris, sensus omnes hac de re mei, tibi notiores fient; & intelliges planeque perspicies, nihil mihi magis esse cordi; quam veritatem. Interim maneat in causa, quod demonstrandum suscepi; Artem criticam esse difficilem, artis præcepta difficiliora, ex præceptis aliquid certi constituere multo difficillimum.

XXXIX. Quod si nunc a me doceri cupis rationem, quam sapientes atque eruditi viri, ut se ex offensis difficultatibus expediant, inituri sint; tametsi, quemadmodum dixi, hæ partes non sunt meæ, morem tamen geram, ac tibi iusta petenti, & præclara cupienti satisf-

fa-

faciam . Verum , quandoquidem in exitu est oratio ; non id ego te docebo ; sed paucis , atque adeo uno tantum verbo tibi indicabo . Dic , amabo te , dic sodes , an oblitus es , quod , cum paullo ante de præceptis artium generatim , & singulatim de artis criticæ regulis agebamus , diximus , & te meminisse super omnia oportebat , artem nimirum criticam , uti reliquas artes , sed artem præcipue criticam uno ferme judicio contineri ? Quo summam artium jam revocavi , eodem nunc te revoco , ut ab arte omnium difficillima avocem , ad judicium inquam ; dicam iterum ad judicium . En tibi ratio explicandarum difficultatum ; en modus expediendæ veritatis ; en via eo , quo tendis , tuto perveniendi , en regula , en præceptum , en canon firmus ille quidem atque inconcussus , en denique Ariadnæum filum , quo Criticus regitur , cujus ope expeditur , cujus præsidio , quantum & rerum natura patitur , & humana sunt infirmitas , tutus incedit , & feliciter ex ambagibus , quæ in arte omnium impeditissima vitari omnino non possunt , evadit . Judicium fere omnia in arte critica administrat , omnia judicium expedit , omnia transigit judicium . Judicio dissolvuntur ambages , judicio implicata explicantur , judicio involuta evolvuntur . Hoc est , quod pervia facit , quæ videntur impervia , hoc obstantia removet , hoc offendicula tollit , hoc affusas veritati tenebras discutit , hoc facem præfert , hoc præsto est , ubi necessitas postulat , adest , subvenit , opitulatur ; hoc callem

osten-

ostendit , hoc gressus moderatur , hoc difficultates omnes , quantumvis arduas & incredibiles , superat , edomat atque profligat , ubique serpit , in omnem partem se dat ac versat , uno verbo nihil non agit , & hoc denique est , quod ego jamdiu a te requiro ac flagito , & quo tu prorsus destitueris .

XL. Quid ? Tunc , si vel minima hujus , de quo dico , judicii , in te particula resideret , tete huic pelago tam incerto , tam vasto , tam immenso , tam infesto , tam scopuloso , procelloso , æstuoso , tot tantisque naufragiis famoso , sine velis , sine remigibus , sine gubernaculo , sine mente , sine consilio commississes , aut te unquam committere cogitasses ? Næ tu , si quidquam sapuisses , nec desipuisses omnino , aut te portu continuisses , aut si solvere placuisset , extremas tantum litoris oras tutioresque legis , atque ista tibi ratione ac salutis tuæ cautus & sapiens prospexisses . Quid attinuit sponte tua in summum te periculorum omnium conjicere discrimen , atque in medium turbulentissimarum procellarum ac tempestatum certamen istud tuum male compactum , atque omni ex parte fatiscens urgere navigium , nisi ut cupiditate excæcatus , & amentia præceps ad certum rueres naufragium , interitumque voluntarium properares ?

XLI. I modo , jacta illa tua præcepta ,ingere regulas , obtrude canones , in quibus quantam possis collocare fiduciam , jam satis a me opinor esse demonstra-

Tom.I.

G

tum .

tum . Tu quidem antea magnum te quid dam præstitisse arbitraberis , si regulas nescio quas memoria comprehendisses , & ad eruditionis pompam in tuorum æqualium corona recitasses ; nunc autem te nihil egisse , quod ad summam artis criticæ difficultatem levandam pertineat , fortasse intelligis . Quod ad me attinet, nihil omis-
 eorum, quæ in præsentia aliquid ad te persuadendum momenti habere posse existimavi . Quod si ego nihil dicendo profeci, vide, quæso, ne tu agendo plus fortasse , quam velis proficias; & eo cupiditate tua abripi te sinas , ubi æquales tuos exemplo ipse tuo minus audere edoceas . Quare , aut tibi illa doctrinæ adjuuge præsidia , quæ Critico omnino dixi esse necessaria , aut de arte critica noli amplius cogitare ; illudque pro certo habeas , ne eximiam quidem doctrinam , cui summum judicium adjunctum non sit , quidquam Critico profuturam , immo potius obfuturam ; præcepta vero , sine utriusque & doctrinæ & judicii adjumento , nihil prorsus valitura .





DE SUMMA
ARTIS CRITICÆ
 DIFFICULTATE

ACTIONIS I. LIBER III.



A ratio est ac natura omnium disciplinarum & artium , ut nunquam non magnam difficultatem adjunctam habeant, eoque majorem , quo se magis ab humili infimarum atque mediocrium conditione attollunt , & ad altiore dignitatis atque excellentiæ gradum eriguntur . Quod si ita est , quid de arte critica sentiemus , & quem tandem difficultatis modum ei constituendum putabimus ? Nam , cum facultates una omnes præstantia longe multumque antecellat , una omnium perfectam absolutamque cognitionem requirat , una excellentiam contineat , una etiam necessario debet omnium complecti difficultatem . Illa ipsa de rebus om-

nibus cognoscendi judicandique summa potestas, quæ ei jure conceditur, uti artem hanc in editissimo dignitatis fastigio collocat, ita tot gravissimarum difficultatum, quas quodam satellitio stipatam vallat, ut non aditu perdifficilem modo reddat, sed etiam prope imperviam faciat atque inaccesam. Huc accedit, quod, quemadmodum superiore actione demonstratum a nobis fuit, regulis ac præceptis allevari vix, ac ne vix quidem potest; ut in quibus aliqua subsidii spes ac quietis collocari videbatur posse, in iis novæ novarum molestiarum turbulentissimæ moles excitentur, ejusque cultoribus prope desperatio quædam objiciatur. Quare eo res videtur adducta, ut hujus artis sive naturam, sive vim, sive excellentiam, sive regulas ipsas ac præcepta, quibus continetur, spectare velimus, summis undequaque angustiis atque molestiis incredibilem in modum obsepta reperiatur. Constituta hoc modo artis criticæ difficultate, & desperato omni regularum subsidio, illud reliquum esset, ut ad id, quod secundo loco proposui, gradum facerem, & susceptum a me pensum exsolvere festinans, de pravo artis criticæ usu dicerem. Sed tamen ad præcepta revertar, non quod ex iis aliquid opis sperandum sit; sed ne, cum multa de præcipuis artis hujusce canonibus disputarim, illum, qui caput artis prædicatur, omisisse jure meritoque coarguar. Canon est ex veterum silentio depromptus, in quo isti se potissimum jactare solent, & permagni
exi-

existimatur momenti ad ferendum de rebus a nostra memoria disjunctis, in quibus Criticorum assidua ac prope quotidiana disquisitio versatur, certum rectumque judicium. Porro ex hoc canone illud emergit argumentum, quod, recepto apud Criticos vocabulo, *negativum* appellatur. Hujus autem argumenti maximus est usus in arte critica, atque ea in eodem adhibendo frequentia, nihil ut in Criticorum scriptis occurrat sæpius, nihil, quod inculcatum sit magis, perinde quasi tota in eo uno artis criticæ vis ac ratio contineretur. Atque hujus quidem argumenti, si quo crebrior est usus, eo etiam præsentius esset auxilium, aliquo modo arti criticæ consultum existimari posset, & ea, qua laborat ac maxime premitur, difficultas aliqua ex parte imminuta. Sed hic quoque novis urgemur angustiis, novis circumsidemur molestiis, novis conflictamur difficultatibus. Nihil enim hoc argumento incertum fortasse magis, nihil, cui minus fidi possit. Quare operæ pretium me facturum existimavi, si illud ex regulis omnibus excerptum, separatim examinandum susciperem, eique soli, quo copiosius pro ejus dignitate atque præstantia, addo etiam, pro summa, quam isti in eo collocant, fiducia (quid enim expeditius? quid prima specie probabilius? quam aliquid, de quo veteres sileant, aut infirmare, aut inficiari) tractaretur, actionem integram reservarem. Etenim, ut videtis, accurata hujus argumenti investigatio a me præteriri omnino non debuit; ne-

G 3

qua

que committi, ut in quo illi usurpando nimis assiduitatis arguuntur, ego contra in eodem omittendo aut summæ negligentis, aut turpis ignorantis condemnarer. Dixi nihil hoc argumento prima specie probabilius, nihil usu expeditius videri; sed, si me isti, nunc attentius audire volent, multo aliter intelligent se rem habere, atque ipsi falsa persuasione decepti arbitrantur. Docebo quam hoc infirmum argumentum sit, quam omni ex parte labans, quam minime, ut ipsi prædicant, inconcussum. Quo demonstrato illud reliquum erit, ut de summa artis criticæ difficultate dubitare desinant; illudque sibi persuaderi tandem aliquando sinant, hanc ipsam difficultatem nullo modo posse, nisi acerrimo ingenio vinci, non alia via, nisi eximia doctrina superari, non alia demum ratione, nisi excellenti quodam, quod in arte critica maxime pollet, judicio edomari.

II. Atque ut ad Græculum illum meum postremo revertar, quo cum jam tertio congregi placet; age nunc sis, & profer canonem illum tuum, in quo explorando hodierna omnis nostra sive contentio, sive disputatio versabitur; illudque inflatis & percrepantibus buccis, & usitata illa tua capitis elatione ac jactatione pronuncia. SI QUID IN VETERUM SCRIPTIS NON INVENERIS, PERNEGATO. Audio. Veruntamen ne tantisper quidem commoveor, & simul confido fore, ut telum istud immane tuum, quo hodie contra me usus es, ut ad rationum momenta, tanquam ad objectum firmum

num aliquem clypeum , ventum erit , *glacies ceu futi-*
lis icſu diffiliat ; tu vero prorsus inermis reperiare . Ea
igitur , quæ in veterum scriptis non invenero , auctore
canone isto tuo inficiabor . Quid ? Omniane , de quibus
veteres siluerunt , statim tanquam falsa rejicientur ac re-
pudiabuntur ? Primum velim mihi dicas , quæ scis ? unde
habet ? quo magistro didiceris ? quod nihil veteres fu-
gerit , nihil latuerit , nihil non litteris posteritæque de-
mandarint . Cui enim probabis ? tanta eos fuisse diligen-
tia , tanta assiduitate , cognitione tanta , ut prope infini-
tam rerum memorabilium multitudinem non modo non
ignorarint , sed accuratius etiam , undequaque per ipsos
potuit , collegerint , eamque scriptis complexi suis nihil
reliquum sibi fecerint , quod non litterarum monumen-
tis custodiendum asservandumque commiserint . Quid ?
si multa illis objecta fuerint impedimenta , quibus ab
enunciandis sine discrimine rebus omnibus memoria di-
gnis vel dissuaderentur , vel deterrerentur , ut vel no-
luerint , si potuerunt , vel , si voluerunt , id ipsum effi-
cere non potuerint ; tamenne in ea opinione perstabis ,
ut putes nihil eos omisisse , nihil , quod a se posteritas
requireret , prætermittendum exillimasse ?

III. Sed collegerint sane omnia , quippe qui navi in-
dustriique homines & perhibebantur & erant ; nihil iis
obstiterit , quominus omnia & posterorum memoriæ ,
& litterarum monumentis commendare prohiberentur .
Isto nihilo acrius & urgeo . Quid ? omniane , quæ ve-

teres scriptis suis prodidere, ad nostras manus tam longo intervallo pervenerunt? Nulline codices amissi? nullane voluminum facta jactura? Nonne pene innumera-bilia hujuscemodi monumenta partim incuria deperdita, partim invidia de medio sublata, partim odio concerpta, partim vanescentibus litteris deleta, partim tineis blattif-que peresa, partim incendiis consumpta, partim aquarum alluvionibus absorpta penitus atque hausta interie-runt? ut prope miraculo habendum sit, siqua ætatem pertulerint, & ad nostra usque tempora perdurarint.

IV. Quam multa putas, quamque excellentia ex-cellentium olim exstitisse Oratorum opera, Poetarum, Historicorum, Grammaticorum? quam multa sapien-tissimorum virorum, in omni genere doctrinarum & ar-tium, & græcorum & latinorum? quorum operum ne minimum quidem vestigium nunc remanet. Ex tot la-tinis Oratoribus, qui a Tullio commemorantur, ne unius quidem unam nunc orationem invenies. Orator longe disertissimus fuit Hortensius; eloquentissimas ha-buit & scripsit orationes; profer, si potes, de tanto vi-ro periodum unam, verbum unum? Tullii ipsius Ora-torum omnium facile principis eloquentissimæ orationes quam multæ interierunt? Eiusdem de Republica libri illi admirabiles, florente Augustino, & legebantur, & suspiciebantur; nunc, si fragmentum de Somnio Scipio-nis, & paucula quædam, quæ aliis in aliorum aucto-rum operibus indicata reperiuntur, excipias, nulli sunt.

Quid?

Quid ? copiosum indicem vel de solis Grammaticis contextuit , & volumen integrum confecit Svetonius . Horum Grammaticorum præceptiones , quis nostrum vidit unquam ? quis legit ? nisi tu forte eas & vidiſſe , & legiſſe affirmare poſſis , qui tantopere regulis ac præceptionibus delectaris . Annales illi maximi , qui a Romanis ſumma cura ac diligentia conficiebantur , & omnium veraciſſimi habebantur , quorum ante cognoscendorum populo poteſtas fiebat , quam ederentur , nunc quidem nuſquam apparent . De multis vero ſummarum Poetarum operibus ſive græcis , ſive latinis , quid commemorem ? quorum inventio deſperanda eſt , jaſtura vero reparari nullo modo poteſt .

V. Sed levioris fortaiſſe momenti tot Oratorum , Poetarum , Historicorum , Grammaticorum opera periſſe videri poteſt . Quid ? illa præclariffima SS. Patrum volumina , tanto ſtudio elaborata , tanta tamque exquiſita doctrina & eruditione referta , quæ ſummo ad Catholicam Religionem confirmandam , ſi ſuper'eſſent , uſui forent , intercidiſſe , leviterne ac diſſolute ferendum erit ? Ubi nunc exiſtant priorum Eccleſiæ ſæculorum tot egregia hoc in genere monumenta ? quo tandem loco tam abdito ac recondito , ut eo nullius adhuc diligentia in rimando ac ſagacitas aſpirare potuerit , illa cuſtodi atque aſſervari exiſtimabimus ? Ubi Quadrati Apoſtolorum diſcipuli pro Chriſtianis *Apologia* , quam Hieronymus & Eusebius citant ? ubi alia item pro Chriſtia-

sianis *Apologia* ab Aristide Athenienſi Philoſopho ſcripta , cujus item Hieronymus & Eufebius mentionem faciunt ? Ubi S. Juſtini Philoſophi liber contra Hæreticos ? Ubi Melithonis Sardium Epifcopi opera decem & octo ? Ubi plures a Dionyſio Corinthiorum Pontifice Epifcopis & Sotero Papæ epistolæ miſſæ ? Ubi S. Irenæi Lugdunenſis Epifcopi litteræ ? Ubi ejuſdem liber contra Marcionem , & variis de rebus tractatus luculentiffimi ? Ubi Apollonii Senatoris Romani & nobiliſſimi Martyris Catholicæ Religionis invictiſſima propugnatio , qui juſſus a Commodo Imperatore rationem Fidei ſuæ reddere , eam diſertiſſime a ſe exaratam Senatui exhibuit ? De Sanctis vero Patribus qui poſterioribus ſæculis floruerunt , quid dicam ? Nullum fere ex illis invenire poteris , cujus opera bene multa non deſiderentur . Multa deſunt de Hieronymo , multa de Ambroſio , multa de Hilariis & Pictaviienſi & Arelatenſi , multa de Gregorio Turonenſi , multa de Cypriano clariſſimo Oratore ; multa de Paulino Oratore & Poeta celeberrimo ; multa de Fulgentio , multa de Laſtancio , de Caſſiodorio , de aliis latinis Patribus multa . Quid de græcis ? de Athanaſio , de Baſilio Magno , de Gregorio Nyſſeno , de Amphilochio , de Cyrillo Alexandrino , Theodoreto , Dionyſio Epifcopo Alexandrino , Methodio Epifcopo Tyri in Palæſtina nonne multa ? de Ephrem vero Patriarcha Antiocheno omnia . Nam quid plura colligendo enumerandoque perſequar ? Illorum ipſo-

ipsorum Patrum , quorum nulla non ad nos opera pervenisse videri potuerunt , cujusmodi sunt Tertulliani , Origenis , Clementis Alexandri , Augustini ipsius aliorumque ; non pauca tamen insignia volumina prorsus interierunt . Jam paucane periisse tibi videntur ? cum tanta , quanta enumeravimus , hujusmodi monumenta perierint , quæ transmittere ad nos majorum cura non potuit , & vetustas absumpsit .

VI. Illa vero tandem quam luctuosa ! quam exitialis ! quam deploranda divinorum voluminum jactura fuit ! Hanc tamen , si non omnium , quod providentissima supremi numinis cura antevertit , nonnullorum tamen subire temporis injuria coacti fuimus . Novimus ex lib. I I. Regum cap. IV. Salomonem illum , mortalium omnium divino oraculo sapientissimum , tria millia parabolarum locutum esse , & carmina ejus fuisse quinque millia . Hæc autem tot & parabolarum & carminum millia nunc ubi sunt ? ubi latent ? ubi asservantur ? Nusquam sunt , perierunt , interciderunt . Idem ille ipse Salomon , ut ex eodem libro Regum discimus , quam multa de plantarum stirpiumque proprietatibus libris complexus est suis ? qui *disputavit super lignis a cedro , quæ est in Libano , usque ad hyssopum , quæ egreditur de pariete .* Quid vero illa alia , quæ idem est alio in genere multa persecutus ? *de jumentis , de volucris , de reptilibus , de piscibus .* Jam Parabolarum libros quantum utilitatis ad doctrinam & morum institutionem habituros ; reliquos

autem quantum ad humanum usum & vitæ necessitatem commodi, si supereissent allaturos existimabimus? Sed hos ipsos libros idem, qui alios omnium omnis ætatis scriptorum innumerabiles, violentus turbo corripuit atque dispersit.

VII. Quod si divinorum voluminum, quæ tanto religiosius ac diligentius, quanto reliquis omnibus voluminibus præstabilia erant, custodiri debuerunt, evitari jactura non potuit; quid sentiendum de cæteris hujusmodi monumentis putabimus? quorum tantæ facilior amissio esse debuit, quanto minus ex eorum amissione detrimentum consequebatur; ut mirari desinamus, si tot SS. Patrum opera, quot supra enumeravimus (tamen si non omnia collegimus, sed aliqua tantum ex incredibili deperditorum operum numero excerpimus) interciderunt, quandoquidem divinorum ipsorum codicum amissionem effugere non potuimus. Omnino sic se res habet, non singula volumina solum diuturnitate temporis, sed integræ etiam bibliothecæ consumptæ sunt. Scimus asservandorum codicum gratia nobilissimas a potentissimis Regibus constructas fuisse bibliothecas; Alexandrinam a Ptolemæo Philadelpho, Palatinam Apollini consecratam ab Augusto, alias ab aliis alibi. Hæ porro incredibilem voluminum copiam toto orbe, immensis sumptibus, summa cura diligentiaque conquisitorum capiebant. Sed quæ tot volumina capere potuerunt, eadem quo minus ea, una cum regiis ipsis ædificiis, in-

cen.

cendia , casus , ruinæ , direptiones perderent penitus atque absumerent , prohibere non potuerunt .

VIII. Neque vero aliter esse debuisse existimandum est , si ad casus prope infinitos , quibus humanæ res obnoxia sunt animum cogitationemque convertamus . Atque ut omissis prioribus illis sæculis , quibus , vigente Romanorum Imperio , non adeo barbaries dominata est , ad tempora nostris propiora veniamus ; an mihi tu hospes adeo in historia es ac peregrinus , ut Vandalorum , Gothorum , Hunnorum , Longobardorum , cæterarumque barbararum nationum fatales longe lateque excursiones , earumque teterrimas in Italiam præfertim nostram irruptiones ignores ? Has autem parum his , de quibus loquimur , monumentis exitiales fuisse credis & calamitosas ? Quocumque incitata barbarie sua & furore iniquissima gens , & humanitati ipsi inimica rapiebatur , ruinæ , strages , excidia , interitus , direptiones , vastationes consequabantur . Neque vero minor calamitas egregiis sapientissimorum virorum monumentis , depopulatis provinciis , direptis urbibus , everfis bibliothecis , incensis tabulariis importabatur . Mitto hic inclinationem temporum , mitto hominum incuriam , mitto ignorantiam , mitto regnorum , mitto imperiorum vicissitudines , omnia denique bella cujusque generis sive a domesticis , sive ab externis illata præmitto , quibus nostra hæc pulcherrima mundi plaga , præcipua bonarum artium altrix , certa sedes , vetustissi-

mum.

munque domicilium infesta fuit , ut propterea artes ipsæ nusquam tuto consistere potuerint ac conquiescere . Extorres miseræ hac illac vagari cogebantur , ac fuga sibi consulere , qua quidem in fuga , trepida præsertim ac repentina , multum litterariæ hujus , ut ita dicam , supellectilis interire & amitti necessario debuit .

IX. Nam , quid postremo dicam de edacissima illarum rerum confectrice omnium vetustate , cujus tanta semper vis fuit , nihil ut opere , aut manu factum exstiterit , quod ipsa tandem aliquando non consumpserit ? Pepercit scilicet chartis , doctis quantumlibet & laboriosis , quæ se ab immanibus illis atque insanis Ægyptiorum Romanorumque molibus temperare minime potuit ? Jacent moles illæ , quæ ad æternitatem extructæ videbantur , & re ipsa æternum tempus laturæ merito existimari poterant ; tanta erat magnificentissimorum firmitas stabilitasque ædificiorum ; jacent , inquam , everse nunc funditus ac percussæ , vix ut ex illarum reliquiis incredibilem earundem pulchritudinem amplitudinemque æstimare possimus . Neque vero voracissima hæc ipsa vetustas istis ipsis reliquiis parcat ; eas persequitur quotidie , & persequetur in posterum , nec plane satiabitur , donec , quod reliquum est , exedat prorsus atque conficiat . Usque adeo nihil est durabile , omnia fluxa & caduca ; nihil , quod tempus ferat , nihil æternum , nihil immortale .

X. Jam vero in tanta clade , excidio tanto omnis
ge-

generis monumentorum , tu mihi veterum silentium obijcies atque oppones ? Miror equidem , nec satis rationem assequi possum , quare hujusmodi silentio tantum auctoritatis inesse existimandum sit , ac perinde ratiocinandum ex eo , quasi silentium hoc ipsum non tacita esset aliqua de re , sed plane diserta testificatio . Locuti quidem , per me licet , illi veteres sint , nihil prætermiserint , de omni re , quæ esset memoria digna , nos docere voluerint , ut hac de causa magnam illis habere debeamus gratiam . Sed , quæ rerum humanarum incerta conditio est , præclarum illud eorum nos erudiendi juvandique desiderium successu caruit . Eorum opera amplius non exstant ; diuturnitate temporis consumpta sunt , de tot voluminibus ne pagina quidem una reliqua facta est . Quid facias ? quemadmodum tantam jacturam reparabis ? quomodo tanto malo occurreas ? An quæ interciderunt , ne interciderint , efficere quisquam potest ? Reliquum igitur illud est , ut quæ reparari non possunt , iis necessario careamus , eorum jacturam æquo feramus animo , & nos in tantis malis , qua possumus , ratione consolemur .

XI. Tu vero multo aliter mecum agis . Requiris a me eorum opera , quæ nulla sunt ; me adigis expromere , quod non possim . Instas , urges , opprimis , non remittis . Nam , quid aliud est veterum scriptorum silentium obijcere ? quam eorum opera flagitare , quæ si exstiterunt , ipsa vetustate perierunt . Quid ego faciam ?

ciam ? quomodo tibi possim satisfacere ? An eorum auctores ab inferis excitandi erunt , ut adsint , ut præsto sint , ut testificationem interponant suam ? Hoc fieri nullo modo potest . Quid ergo est ? quod tantum momenti in eorum taciturnitate collocandum putes . Quid , quod eorum silentium mihi ingeras atque obrudas ? ex eoque aliquid contra me coneris efficere ? Ii quidem loquerentur , si existerent , taceant autem necesse est , quia nulli sunt . Nonne qui ita se gerat , perinde facere existimandus est , ac si post ingentem magni cujusdam exercitus cladem , eos , quos Martis vis perculit , & campo extincti jacent , testes adhibere velit , ex eorumque silentio aliquid confirmare . At tacent . Credo equidem . Quid ni taceant ? extincti sunt , sensu & lingua carent . Expectandum scilicet , dum mortui loquantur , & vocem emittant . Non est igitur , cur ex eorum taciturnitate quidquam coneris evincere , ut in eadem contra me usurpanda tam creber , tam molestus ac morosus sis .

XII. At non omnia vetera monumenta eandem fortunam subierunt ; multa iniquissimas temporum injurias , multa furacissimas barbarorum manus evaserunt , multa ad nostra usque tempora perdurarunt . Video . Nunc dicis aliquid , quod ad rem pertineat ; sed ne hoc quidem tibi magnopere suffragari potest . Sic enim loqueris , veteres ut codices , aut legisse nunquam , aut si legeris , non intellexisse videre . Si enim legisses & intellexisses , vidiesses profecto multa in iis desiderari , quæ
fru-

frustra sapientissimorum hominum diligentia , frustra sagacitas exquirat . Multa imperitorum sæculorum inscitia , aut ad alienum sensum traducta , aut per vim nullo more, nullo exemplo intrusa, multa librariorum vitio, ignorantia , oscitantia fœdissimum in modum depravata , multa corrupta ac turpissimis mendorum fordibus atque illuvie inquinata , quæ omnia quantum fidem elevent , testimonium infirment , argumentorum vim proterant atque infringant , quis non intelligit ? Plurimam quidem operam & diligentem & diuturnam ad eos ab errorum colluvione perpurgandos contulerunt viri doctissimi , ut , si fieri posset , illos pristinae fidei integritatique restituerent . Utrum vero, quod optimo consilio efficiendum susceperunt , re etiam ipsa perfece- rint , malo sapientum opinioni relinquere , quam in oratione mea ponere .

XIII. Hoc primum; deinde nihilo minus, quam antea, acriter ac vehementer argumentationem inflauro . Nam, tametsi multa veterum scripta ad nos pervenerint , cum tamen ad nostras manus non omnia pervenisse certum sit , quid est ? quod tu in me oppugnando diutius perseveres . Opus flagitas auctoris , cujus mihi silentium opponis . Dico , periisse , quod credibile est & verisimile in tanta , quantam supra demonstravimus , veterum scriptorum clade atque interitu . At hujus ipsius auctoris multa supersunt opera . Esto ; sed non omnia . Quomodo ostendes superesse omnia ? quomodo me convinces ? qui

fatis planum jam fecerim multa eorum ipsorum scriptorum, quorum opera ad nos pervenerunt, multa, inquam, desiderari. Jam, si non exstant omnia, nihil profecto est, quod contra me argumentando ratiocinandoque possis efficere? Illud ipsum opus, quod a me flagitas, potuit intercidere; si intercidit, argumentum nullum est; si potuit, dubium valde ac suspiciosum. Unum de duobus necesse est; aut plane constare debet, nihil ejus auctoris, cujus mihi silentium objicis, desiderari; aut, si hoc non constat, nec demonstrari ullo modo potest, consequens illud est, ut prope nihil inde, quod quidem ratum ac firmum sit, efficiatur.

XIV. Verum esto, hujus ipsius, cujus mihi silentium opponis, auctoris opera exstant omnia, nullum perierit. Quid? si male corrupta, si fœde circumcisa, si interpolata, si interlita, si pessimum in modum depravata ad nos pervenerint? Quid tu? quid Critici omnes argumentabuntur? Poteruntne mihi eripere facultatem reclamandi, omnibus consilio utentibus rationem auferre suspicandi, lacunam exstare aliquam in his operibus ipsis, quam recognitorum diligentia atque sagacitas nequaquam explere potuerit? Quid præterea? si idem iste auctor quanquam multa scripserit, & nihil eorum, quæ scripsit, interciderit, omnia tamen aut litteris consignare noluit, aut, si voluit, ei fuit interdictum; tamenne ejus auctoritas tanti erit, ut, si aliquo de facto reticeat, ejus mihi silentium jure possit opponi?

At

XV. At credibile non videtur, ab accurato scriptore rem ullam, quæ ad illud ipsum, quo scribebat, tempus aliquo modo pertineret, fuisse prætermittam; præsertim vero si res illustris admodum fuerit, si dexter se locus scriptori, si idonea de ea mentionem faciendi obtulerit opportunitas. Verum, ut istud ipsum, quod dicis aliquid ad persuadendum momenti habeat, quod tamen ratione magis, quam usu probatur; quis in se recipere poterit, & fidem interponere suam, nihil hujusmodi vel ab accuratis unquam omisum fuisse scriptoribus? Multa enim re ipsa omissa sunt. Si quam ob causam quæris? nescio. Non enim possum divinare. Et enim & multæ, & graves, & etiam necessariæ causæ esse potuerunt, quare hanc vel illam rem omiserint; hoc unum scio, & certo scio, omisisse. Quid? nonne nobis vel non cogitantibus, vel aliud cogitantibus multa in scribendo elabuntur atque prætervolant? At res erat illustris & hujusmodi, quæ omnino ut de se mentio fieret & postulabat, & flagitabat. Audio. At locus scriptorem admonebat. Video. Compellebat etiam. Non contradico; sed nihilo tamen minus ajo, & re postulante ac flagitante, & loco admonente & compellente, nullum ejus illustris, quam dicis, rei apud scriptorem extare verbum. Tu quidem clamas ac vociferaris, hoc esse incredibile. Sit incredibile, ut vis; sed istud ipsum incredibile tuum & factis refutatur, & exemplis credibile redditur.

XVI. Eusebius certe accuratus fuit scriptor & diligens, vir apprime doctus & eloquens. Multa, quæ suo tempore contigerunt, copiose & luculenter scriptis persequitur suis; nonnulla tamen, quæ commemorari ab eo debuerunt, omnino prætermissa silentio sunt. Certe patrata in salutiferæ Crucis inventione prodigia & insignia fuerunt, & illustria, & ad confirmandam Christianam Religionem maxime accommodata. Locus præterea commodus, opportunitas summa Eusebio offerebatur, ut nonnisi a negligenti & oscitante scriptore præteriri posse viderentur. Omissa tamen ab Eusebio sunt, viro, uti diximus, docto & accurato, & eximio in paucis Historico; cujus historia illustris adeo habetur, ut sine ejus luce in summa rerum ecclesiasticarum ignoratione versaremur. Quod Eusebio usuvenit, quæ potior ratio, cur aliis quoque scriptoribus sive usu, sive casu venire non debuerit & potuerit, etiam si consimili & accuratioris diligentia, & doctrinæ exquisitioris laude commendentur.

XVII. Quid vero? si ob eam ipsam causam, quod res aliqua maxime insignis & admodum illustris fuerit, ac propterea omnibus nota, omnium passim usurpata linguis, jactata sermonibus, supervacaneum judicari potuit eam scripto tradere, & posterorum memoriæ commendare. Scriptores fere in rebus minus notis ac reconditis diligentiam probari volunt suam; a vulgatis & a nemine ignoratis dedita opera abstinere, quas nullo negotio pu-

putant a quocumque scriptore posse litteris demandari . Idcirco diligentissimi quique scrutantur tabularia , abdita quæque investigant , rerum memoriam eruere conantur ultimam ; & tum demum , cum aliquid vulgo ignotum , & a nemine enunciatum e tenebris in lucem protulerunt , se magnum aliquid præstitisse arbitrantur ; tum sibi placent , tum se diligentis omnes implese partes scriptoris putant . Fac nobiliores ejusdem ætatis scriptores in hanc convenisse sententiam , jam hoc pacto præteriri multa potuerunt , quorum memoria digna plane erat , quæ litterarum monumentis consignata non intercideret .

XVIII. Neque vero est , cur hoc loco scriptores omnes , atque Historicos ad boni Historici officium revoces . Hoc etiam advocato in causæ tuæ subsidium adminiculo , nihilo certe meliorem causam efficies . Opinor boni Historici officium hoc esse . *Primum nequid falsi dicere audeat , tum ne quid veri non audeat , demum nequa suspicio gratiæ sit in scribendo , nequa simultatis .* Hæc a doctissimis viris historicæ veritatis jaciuntur fundamenta . Sed quotus quisque Historicus reperietur , qui fundamentis his suum superexstruxerit ædificium . Si Historicos ethnicos spectes , eorum fides multis de causis suspecta est . Funebre s laudationes in morem apud Romanos inductæ omnem fere latinam corruerunt historiam ; quæ affirmante Tullio *laudationibus est facta mendosior* . Nam quid hic ea colligam , quæ vulgo ethnicis scripto-

ribus obijciuntur ? Herodotum & Xenophontem , quos historię parentes Græci habent , confictis abufos esse narrationibus . Porro in Livio , in Sallustio , in Cornelio Tacito , in Trogo non deesse , quorum fides manifestis labefactari possit testimoniis , in vita Aureliani Flavius Vopiscus scriptum reliquit . Hęc autem , aliaque hujusmodi ethnicis objecta scriptoribus , tametsi aliqua ratione diluantur , non usque tamen quaque eos ab omni aut e mentitæ , aut suppressæ , aut superlatæ , aut quocumque tandem modo corruptæ veritatis suspitione purgant .

XIX. Sed missos faciamus ethnicos scriptores , & ad ecclesiasticos veniamus . Adito igitur , si lubet , præcipuos , Eusebium , Rufinum , Socratem , Sozomenum , Theodoretum , Evagrium , Nicephorum , aliosque hujus notæ ac dignitatis annalium scriptores ; tum de singulis Criticorum sententiam exquirito ; neminem fortasse unum invenies , qui aliquid contra memoratum officium peccasse non arguatur . Acuerunt oculorum aciem in eos artis criticæ nobiliores magistri , eorum opera sagacissime ac penitissime investigarunt , & non pauca reprehensione digna a se in iis fuisse reperta gloriantur . Sed gloriantur licet ; hanc ego ipsis gloriam non invideo , hanc laudem non conor eripere . Sed illud meo quidem judicio acutissimi viri neque viderunt , neque providerunt id se egisse , ut , quo plura acri censura digna in ecclesiasticis scriptoribus invenerunt , eo etiam

eo-

eorum auctoritatem magis ac magis infirmarint , argumentumque ab eorum silentio desumptum levius imbecilliusque reddiderint . Ita factum fuit , ut investigatione ipsa negotium per se implicatum non expediretur , sed implicaretur magis , & argumentum per se infirmum ac debile , prorsus enervaretur . Quæ cum ita se habeant , facile est illud efficere , quam parum argumento isti tuo fidendum , quamque etiam multis ei gravissimisque de causis omnino diffidendum sit .

XX. Ego vero quoties hujus ipsius argumenti vim perpendo , toties ejus imbecillitas mihi proponitur , & quanto magis aciem in illud ingenii intendo , tanto imbecillius infirmiusque reperio . Non est cur tu repugnes , non est cur contradicas . Viderunt hoc artis criticæ magistri , & propterea multa addiderunt , quo illud omni ex parte male firmum ac labans , si quo modo possent , fulcirent ac sustentarent . Verum nescio an quidquam profecerint , & argumento huic , quod voluerunt , robur ac firmitatem adjunxerint . Male quidem ædificio , quod fundamento caret , appositis sustentaculis providetur ; ruina non prohibetur , sed producitur ; citius ferius corruet , & subito casu Architecti ignorantiam prodet , temeri tatemque condemnabit . Verum qua potissimum ratione illi subvenerint , & quibus adminiculis confirmandum fulciendumque susceperint , videamus .

XXI. Quid igitur , ut fidem argumento neganti conciliem , quid potissimum faciam ? Quo testatus , inquis ,

scriptorum ejus temporis , quo res gesta affirmatur , silentium sit , ad consequentium temporum scriptores descendere . Quid ita ? Quia , si consequentes etiam ea de re scriptores reticeant ; tum vero certius argumentaberis , rem esse scriptoris nescio cujus , qui sequioribus sæculis vixerit , purum merumque commentum . Descendendum igitur ad consequens tempus ? Ita sane . Descendam , quandoquidem sic jubes . Sed hoc ipsum tempus , quibus tandem terminis definitur ? Varii , inquis , varia ; alii aliter illud circumscribunt atque definiunt . Mallem equidem artis magistri convenirent in re summi momenti constituenda ; ipsa sententiarum varietas me conturbat , & valde dubium facit ac suspiciosum . Etenim , si de tempore definiendo magistri non conveniunt , si litigant inter se , quid , iis litigantibus , quid de discipulo fiet ? cui accedet ? quem potissimum audiet ? Viæ ducibus aliis alio abeuntibus , quam ipse inibit viam ? cui se credet ? aut quo tandem deveniet ? si se magistris in diversa , atque adeo in opposita tendentibus regendum deducendumque permiserit .

XXII. Sed varias hac super re sententias audiamus , ut scire possimus quibus cancellis veritas tacito silentium scriptorum confirmanda testimonio concludatur . Sunt , qui presse admodum & anguste tempus hoc ipsum definiunt , atque illud in exiguos paucorum tantum annorum terminos coarctant atque compingunt . Sunt , qui aliquanto latius hoc ipsum tempus patere volunt , & prioribus suc-

cen-

centent, quod angustii nimis pusillique animi sint. Sunt denique, qui illud, laxatis spatiis, ultra ducentos, & eo amplius annos latissime proferunt. Valde quidem benigne ac liberaliter; sed vereor, ut hac tanta liberalitate tuto uti possim. Nam, siue laxentur spatia temporis, siue coarctentur, difficultas non effugitur. Nam, si laxantur, amabo te, in tanta temporis diuturnitate, nonne uni alicui e multis, quos supra enumeravimus, casibus infortuniisque scriptorum opera obnoxia esse & potuerunt, & debuerunt? ut etiam si diserta scriptoris auctoritas desit, rem tamen aliquam esse gestam negari non possit. Si vero, ut memoratos casus evadas ad angustiora tempora te recipias, & quæ rei, de cujus veritate ambigitur, propiora sint, nova iterum emerget ex ipsa temporis circumscriptione difficultas. Nam, præterquam quod res ipsa, de qua controversia est, potuit nihilo secius a scriptoribus aut ignorantia omitti, aut alia de causa nobis ignota prætermitti, quo tempus angustius est, eo pauciores certe scriptores comprehendit; quanto autem istorum magis exiguus est numerus, tanto facilius eorum deleri opera potuerunt atque obliterati.

XXIII. At enim vero durum nimis videtur, rem admittere tanquam veram, de qua veteres sileant, & quæ solum ab auctore nescio quo posteriorum sæculorum memoretur, qui eam fortasse somniavit. Durum quidem; sed, quod durum est, ferendo sit mollius. Hoc de-

demum siue durum, siue molle aliquo certe modo con-
coquendum necessario est. Verum, ne ludere videar
in re gravi magnique momenti, respondeo. Potuit au-
ctor iste nescio quis rem hanc ipsam, quam memorat,
ab alio prioris sæculi auctore, cuius opera non exsunt,
didicisse; ille vero ab alio, & sic deinceps sursum in-
cedi posset, donec ad primum rei auctorem pervenire-
tur. Posset hoc quidem, si priorum opera auctorum
non intercidissent; sed quando interciderunt, non est
ullus malo reparando locus, cui una mederi patien-
tia potest. At locum auctor ille demonstrare debuit,
& unde, quæ narrat, acceperit, indicare. Tu vero hic
nimium diligens es, atque adeo morosus mihi videri-
ris. Rem narrare satis habuit; auctorem, a quo rem
didicit, prætermisit. Quid vis? Quid facias? Dili-
gentia paucorum virtus est, negligentia commune vi-
tium.

XXIV. Quare, uti vides, in huiusmodi controversiis
eo fere res adducitur, ut nihilo melioris conditionis sit,
qui affirmat, quam qui negat. Tu negas; ego affir-
mo; neque tu certam rationem asserre potes, quare ne-
ges; neque ego, quare affirmem. Fingere ego possum
casus innumerabiles, quibus confirmem, quod tu infi-
ciaris; tu multa comminisci, quibus, quod posuisti,
coneris evincere. In tenebris & caligine antiquitatis
versamur ambo, nec certa ostenditur via, qua tuti sine
periculo incedamus. Reliquum est, ut illud mihi tecum
con-

conveniat , aut hoc tuum argumentum nullum esse ; aut saltem valde dubium ac suspiciosum .

XXV. Quanquam in hoc incerto incertarum rerum articulo constituti ambo cum simus , si recte attendis , multo melior est conditio mea , quam tua . Ego saltem aliquod assero testimonium , quod clare & diserte rem affirmat ; tu nullum , nisi mutum & elingue silentium . Est quidem meum testimonium sequioris sæculi ; sed aliquod tamen testimonium est ; tuum vero nullum omnino . Cui igitur potius habenda fides ? elingue ac muto ? an disertio & eloquenti ? Tacet auctor ille tuus ; non enim alium habes auctorem , quare hoc vel illud neges , nisi silentium . Loquitur meus . Tu te interponis ; & quam fidem adjudicas muto , abjudicas loquenti . Quid hoc est ? cui poterit persuaderi ? pluris esse muti testificationem silentii , quam claram atque apertam loquentis enunciationem . Silentium quondam , ut est apud Poetam , eximium illum quidem sed nimis acrem , sylvas habitasse fertur , & eremi incolarum fuisse socium ; tum vero exosum solitarium illud austerioris vitæ genus mutasse consilium , & , relictis sylvis desertaque eremo , se furibus comitem ac sicariis adjunxisse . Mihi sane silentium quondam prædicanti male quidem res cessit , contigitque , ut cujus silentium laudaveram , ejus manifestum statim furtum teneretur . Quod si ita est , vides , opinor , non esse cur tu quoque magno opere silentium prædices , & illi tantopere fidendum contendas .

Sed

XXVI. Sed tandem video quid dicturus sis ; video quid excogitarint magistri tui , quo pondus aliquod levi argumento adderent , & per se debile admodum atque infirmum, si qua ratione possent, confirmarent . Dices argumento neganti aliquid esse adjungendum *positivi* , quo addito & firmitus sit , & certius aliquid ex eo evincatur . Quid hoc est ? Quod mihi nunc *positivum* narras ? quod *positivum* obtrudis ? *Positivum* istud tibi habeto , quod necesse non habeo a te mutuari , & affatim mihi atque abunde undequaque suppeditatur . De argumento negante nunc sermo est , de hoc inter nos instituta quæstio . Hoc ego dico infirmum esse , debile , incertum enerve , & labans sic , ut sustentari per se vix ac ne vix quidem posse videatur . Tu nescio quæ *positiva* adminicula in medium proferes , quibus me ab instituta quæstione abducas , & ad *positiva* argumenta deducas ? itaque difficultatem , qua premeris, declines ac subterfugas ? Præcidam ; aut hoc tuum argumentum negans esse vis , aut *positivum* . Unum de duobus necesse est . Si negans , secludito *positiva* , quæ si adjungas , jam id , quod est , esse desinit . Si vero vis esse *positivum* , quod re ipsa negans est , illud vis , quod repugnat , quod esse nullo modo potest , & enunciatione ipsa refutatur atque destruitur .

XXVII. Verum , ut usitata jam tecum liberalitate mea utar , *positiva* ista tua adminicula non abnuo, admitto etiam . Sit igitur mixtum argumentum hoc tuum ; & ,
quan-

quandoquidem ita vis , *ex positivo ac negativo* coalescat . Facile patior in causa prope certa atque explorata te ei , quam multa potes , additamenta sufficere ; sed mihi crede , quo plura addideris , minus proficies . Etenim , quod in omni argumento spectari oportet , hoc etiam in isto tuo , usum videlicet , spectandum esse arbitror ; ad hoc enim excogitata sunt argumenta , ad hoc inventa , ut aliquid ex iis , cum se ferat occasio , certi efficiatur . Jam quo plura adminicula congerentur , eo certe rarior usus incidet ; itaque argumentum hoc tuum prope nullum evadet . Difficile est enim ea omnia , quæ ab artis magistris excogitata sunt , & quæ hic singula expendere per tempus non licet , ea inquam omnia concurrere , atque in unum quiddam confluere sic , ut ex eorundem collectione certa deductio fiat . Hoc autem cum nonnisi rarissime contingat , illud consequens est , nonnisi rarissime ad certum usum traduci argumentum posse . Quod si ita est , quam utilitatem , quod commodum illi inesse argumento existimabimus ? quod , si excogitatis additamentis careat , nullum sit ; si vero abundet , rarior ejus usus & infrequentior , ac prope nullus evadat . Efficitur ergo , ut quocumque demum modo usurpetur , aut nihil omnino , aut parum certe commodi atque utilitatis habeat . Ita plane est ; qui ægro deposito ac desperato acriorem præsertim medicinam facit , illum fere non sanitati restituit , sed certius ad interitum festinantiusque propellit .

Quan-

XXVIII. Quanquam , non tam moveor infirmitate argumenti , quam tua imbecillitate commoveor ; non tam illi timeo , quam tibi ; immo vero tibi multo magis , atque adeo unice pertimesco . Attende nunc iustam timoris mei causam , & sine , quod præcipuum huius actionis est , & tua maxime interesse debet , me tandem aliquando expromere . Valde metuo , ne dum huic tuo argumento , tanquam viæ nimis lubricæ ac præcipiti insistis , eo prolaboris , quo tu non cogitas , & ubi te certissimus manet interitus . Tu quidem mihi in ea opinione videris esse , quidquid scripto commissum non sit , jure negari posse , perinde quasi nullo modo , nisi prolato scripto , res aliqua confirmetur . Quid dicam ? Parco adolescentiæ tuæ , parco ignorantæ , parco homini non nimis acuto , & oculis plus nimio fidenti , qui præsentia tantum cernat , consequentia vero animi ratione non assequatur . Facilis quidem res hæc ipsa est , & prima specie probabilis , sed hac ipsa de causa valde periculosa . Quid enim facilius , quam aliquid , quod scriptum non sit , de quo veteres sileant , negare . Quid probabilius , quam nolle aliquid affirmare , quod expressa vetustatis testificatione destituatur . Cæterum , dum viam istam tuam lubricam nimis , quemadmodum dixi , atque præcipientem tenere pergis , recta , si nescis , eo festinas , quo cum veneris , traditionum omnium caput petas , & summam convellas . Ne vero putes me vanos casus fingere , & inania objicere terribula , quibus te no-

va

va periculi denunciatione perterrefaciam . Recita denuo canonem illum tuum ; *SI QUID IN VETERUM SCRIPTIS NON INVENERIS PERNEGATO* . Jam traditiones in sacris Scripturis non inveniuntur ; ne ullum quidem in illis earum verbum apparet ; immo vero si appareret , traditiones esse desinerent . Reliqua igitur consecutio est , si canoni illi tuo generatim standum sit , traditiones esse negandas & pernegandas , quandoquidem in veterum scriptis a prima origine non inveniuntur .

XXIX. Hic vero , cum a me traditiones nominari audis ; quid cogitas ? quid intelligis ? quid a me dici arbitraris ? An fabellas aniles ? an voces in vulgus temere sparsas , ac nullo certo auctore profeminatas ? an delirantium somnia Poetarum ? Res ista multo gravior est , quam ut vel ego verbis explicare , vel tu cognitione assequi possis . Traditiones ab ipsis nascentis Ecclesiæ incunabulis ortum habuerunt . Traditiones ab Apostolis , nec ab Apostolis tantum , sed ab ipso Christo Reparatore ac Magistro nostro originem repetunt suam . Traditiones ita semper habitæ in Ecclesia necessariæ sunt , ut sine illis Catholica Fides atque Religio nulla sit . Hoc Sanctissimi Pontifices , hoc Œcumenica concilia , hoc SS. Patres docuerunt , hoc Catholica sentit Ecclesia , ut qui eas respuat , & se gravissimo scelere alliget , & tanquam ethnicus & publicanus cenfetur . Longum esset hic ac supervacaneum , in re apud omnes recte de fide sentientes extra omnem contro-

tro-

troverſiam poſita , aſſerre documenta Pontificum , teſtimonia Conciliorum , ſententias ac verba recitare Patrum , Juſtini , Egeſippi , Irenæi , Clementis Alexandrini , Athanaſii , Baſilii , Chryſoſtomi , Cypriani , Hieronymi , Ambroſii , Auguſtini , aliorumque , quorum qui vellet accuratam ſeriem contexere , eam jam ab antiquiſſimis inde temporibus poſſet exordiri ; & ad noſtra uſque tempora longa enumeratione perducere .

XXX. Traditiones porro non admittendas ſolum in Eccleſia , ſed neceſſarias etiam eſſe , ne id quidem vocari in controverſiam a Catholico poteſt . Non enim omnia ipſi Evangeliſtæ ſcriptis mandarunt ſuis , quæ nimirum Chriſtus traditione magiſtra doceri nos voluit . *Adhuc multa* , inquit Chriſtus ipſe , Joannis cap. xvi. num. xii. *habeo vobis dicere ; ſed non poteſtis portare modo* . Quid illa ? quæ leguntur in Actis Apoſtolorum cap. i. num. iii. , *per dies quadraginta apparens eis , & loquens de regno Dei* . His autem efficitur non inutili ſilentio tot dies fuiſſe tranſactos ; ſed multa divinum Magiſtrum locutum eſſe , quæ nequaquam litteris prodita fuerint atque commiſſa . Apoſtolos vero , quæ audierint neglexiſſe , neque poſteris ullo modo tradidiſſe ſuſpicari nefas eſt ; niſi eos aut negligentes , aut oblivioſos facere velimus , ut aut res , quas ipſi didicerant , & quæ ad præcipuam Eccleſiæ institutionem pertinere norant , per oblivionem præterirent , aut nos de iſdem per ſummam incuriam negligentiamque celarent . Diſertiſſime Pau-

Paulus Apost. ad Thesal. ep. 11. *Tenete traditiones, quas didicistis sive per sermonem, sive per epistolam nostram.*

XXXI. Hinc tanta vis traditionum est, & semper in Ecclesia fuit, ut non ipsæ solum tanquam dogmata habeantur; sed elicitis inde argumentis Catholicæ ipsius fidei dogmata certissime invictissimeque confirmentur. Harum semper hic apud Catholicos usus fuit, contra atque Hæretici fere omnes, ac recentiores præcipue opinati sunt, qui fidei ac religionis controversias, solis sacrarum Scripturarum testimoniis finiendas esse contenderunt. His de causis semper Ecclesia Catholica summo studio traditiones retinuit; itaque factum est, ut nunquam intercisa tot sæculorum derivatione, uti primum ab ipsa scaturigine eruperunt, integræ inviolatæque ad nostra usque tempora permanarint. Scripto illæ quidem a principio commissæ non sunt, sed per manus quodammodo primum ab Apostolis, deinde ab eorum discipulis traditas accepit & custodivit Ecclesia, cujus plus valere apud Catholicos debet auctoritas, quam omnium primævæ antiquitatis scriptorum summum de illis perpetuumque silentium. Vides igitur quidquid scripto commissum non sit, non continuo jure negari posse.

XXXII. Neque vero traditionum exordium, generatim atque universe loquendo, ab solius Ecclesiæ primordiis, sed etiam ab ipsius mundi incunabulis repetendum est. Usque adeo apud omne hominum genus,
Tom. I. I nullo

nullo tempore non maxime vixit traditionum ac valuit auctoritas . Etenim , amabo te , quod scriptum ante libros Moysis omnium vetustissimos proferre poteris ? quæ volumina ? qui codices primis illis sæculis exstiterunt ? Omnia igitur , quæ ad Religionem verique Dei cultum spectabant , non scripto , sed traditione continebantur . Certe vetustissimi illi primorum sæculorum Patres veri Dei cultores fuerunt ; certos sacrificiorum ritus cæremoniasque , quibus Deum colerent , habuisse dubitari non potest , quæ quidem cum scripto exarata non essent , certe a patribus ad filios sola traditione internuncia transmitti debuerunt . Tolle traditiones , easque a prima illa mundi ætate , & quasi infantia remove , jam omnia permiscebis atque confundes . Nulli certi ritus , nullæ certæ cæremoniæ , nullus certus supremi Numinis cultus , nulla certa externæ Religionis indicia , sed omnia cujusque ingenio atque arbitrio administrata . Et ecce tibi illa impia permixtio , & horrenda confusio , quæ nunc a nefariis ac perditissimis hominibus , quorum sacrilegi tota Europa libelli nunc diffeminantur , inducenda curatur . Omnem isti Religionem , quam dicimus *Revelatam* , de medio tollere contendunt ; Deum cujusque arbitrio placandum colendumque permittunt ; si tamen Deum propitiari & coli aliquo modo volunt , ac non potius una cum religione divinitatem ipsam inaudito scelere omnino conantur extinguere .

Dixi

XXXIII. Dixi, traditiones apud omnes gentes valuisse semper. Etenim consuetudinem hanc tradendi discipulis quædam non scripto, sed verbo a celeberrimis Philosophiæ magistris scimus esse servatam. Certe Pythagoram hunc morem tenuisse posteriorum scriptorum auctoritas diserte testatum reliquit, Cicero lib. I. de Legibus moribus quidem optimis imbuendam Rempublicam existimat, sed non omnes esse leges scripto committendas affirmat. Idem eodem libro consultius Religionis mysteriis provideri censet, si traditione potius, quam scripto evulgentur. Cæsar de Bello Gallico lib. VI. Druidas scribit hoc modo Gallos instituisse, ut quæ ad sacram disciplinam ritusque pertinerent, scriptis consignari nollent; & secus fieri nefas haberetur; Galenus lib. II. de Anat. ait veteres Physicos, quæ ab artis magistris didicerant, non scripto, sed traditione conservasse. Neque vero cur ita se gererent, & tantum traditioni deferrent, & multæ & justæ deerant causæ, quas hic afferre supersedeo, ne reconditionis eruditionis famam captare videar. Usque adeo verum est, non omnia tradi litteris necesse esse; neque vero, quæ scripto consignata non sunt, omni prorsus auctoritate destitui, sed majorem quodammodo acquirere auctoritatem. Sed, ut ad traditiones divinas atque apostolicas revertar, intelligis, opinor, quo te canon iste tuus deducet; vides, quam lubrica via ista sit, quam ingressus es, cui insisti sine prolapsione non potest. Ego denun-

cio periculum ; tu , si sapiēs , illud effugies ; ostendo scopulum , in quem multi impegerunt , & miserabiliter interierunt , tu , si tibi consulere volueris , ejus incursum declinabis .

XXXIV. Dicis , non eandem esse rationem divinarum & apostolicarum traditionum , atque ecclesiasticarum . Audio ; sed has quoque si putas liberum esse cuique aspernari atque rejicere , magno in errore versaris . Scio , nihil tam familiare tibi , nihil tam usitatum æqualibus tuis esse , quam , cum aliqua ecclesiastica traditio non arridet , eam despuere , & tanquam popularem aliquem temere sparsum rumorem criminari . Nihil facilius , quam hujusmodi inconsideratas jactare voces , & , ubi rationum momenta non suppetunt , ad convicia ac probra se convertere . Multa in hanc rem & vere & graviter dici possunt , & a me suo loco dicentur , & , quoad usque adniti potero , vere graviterque dicentur . Nunc tantum dico , ex isto tuo canone tibi summum instare periculum ; dico hoc esse tibi modis omnibus antevertendum ; dico providendum in tempore , ne eo , quo certe non vis (neque enim tam pravam de te opinionem habeo) deducere . Tu facilius expeditiusque putasti , eo uti argumento , quod te ab investigandarum rationum cura molestiaque liberaret ; idcirco illud temere , & clausis , ut ajunt , oculis statim , nihil ulterius cogitans , arripuisti . Existimasti , nihil certius repudiari posse , quam quod disertæ veterum scriptorum

rum auctoritate destitueretur ; sed tua te , ut in multis , ita in hoc quoque fefellit opinio .

XXXV. Dicis postremo , canonem quidem optimum esse , sed quo *caute* quis , *modice* & *prudenter* utatur . Audio . Atque hac quidem in re tantum abest , ut tibi contradicam , ut etiam assentiar quam maxime ; immo vero summopere hoc nomine tibi debeam , quod in fine hujus nostræ concertationis eo rem , nescio utrum sciens ac volens , an imprudens & aliud cogitans adduxeris , quo jam a me pridem fuit adducta , & ubi solus difficultatum , quas persecutus hactenus sum , exitus , & periculorum , quæ undique Criticum circumstant , effugium ostenditur . Sed vereor , ut his verbis plura , quam & tu velles , & ego optare possem , complexus sis . Ain tu *caute* , *modice* , *prudenter* ? Ita , inquis . Ego quoque video , consilio , prudentia , moderatione facile vitari pericula , & ardua quæque felicem perducere ad exitum posse ; sed æque video te his prorsus destitutum esse virtutibus . Et enim quam tibi videris prudentiam comparasse , quæ tibi certam impeditissimi negotii conficiendi rationem ostendat ? Quod in te residere consilium credam ? aut quam , si semel aliquam hujus muneris partem attigeris , cautionem te adhibiturum putem ? qui quidem si cavere didicisses , tibi primum cavisses , nec commisisses , ut hac tanta tamque difficili provincia implicarere . Quæ vero moderatio esse in eo existimanda erit ? qui sibi temperare non potuerit , quo minus sponte sua summum in discrimen

adduceretur . Nonne , in eum ambitione tua adductus locum cum esses , ut tibi de tanta re deliberandum foret , si paulum sublitisses , & hæc duo tantum verba tecum fecisses ; *Quid ago ?* vel *Quo progredior ?* respirasset cupiditas tua aliquantum ? nonne aliquid loci consilio & rationi dedisset ? nonne denique te a tanto tamque operoso munere suscipiendo repressisset ?

XXXVI. Sed fac , ut indulgentiæ ac liberalitatis meæ fontes ad extremum usque nostræ hujus concertationis exitum tibi patefaciam , fac inquam , bonitate quadam naturæ , rationem esse aliquam in te hujus sive consilii , sive prudentiæ , sive moderationis , quas virtutes ego jure jam a Critico dudum , tu vero a te paulo ante requisivisti ; quid tum ? quid censes futurum ? Poteritne hæc ipsa ratio in tanta pravorum atque inter se dissidentium affectuum , quibus obnoxius es , et incredibilem in modum agitaris , perturbatione , veluti in concitatæ plebis tumultu , tanquam Regina sedere ac dominari ? Nonne cum te præfervidus adolescentiæ æstus , intemperans opinandi licentia , insolens rerum omnium veterum fastidium , insanum novitatis studium , effrænata gloriæ cupiditas , ingenii levitas , ambitio , amor , odium , invidia , ira , indignatio , temeritas , petulantia , audacia , & siquæ sunt aliæ impotentis animi permotiones de mente dejicient , etiam illam de solo deturbabunt ?

XXXVII. Jam quid ais ? qui sensus sunt tui ? quid
co-

cogitas de me ? non enim quæro , quid machineris in me . Nam quid est , quod calumniari possis ? Me æquales tuos actionibus hisce meis designasse ? qui neminem nominavi ; omnium existimationi peperci . Male de arte critica sensisse ? qui illam sæpius laudavi , necessariam dixi , & solummodo difficilem , quod extra omnem controversiam est , esse contendere . Me denique eo rem adduxisse , ut artem per se difficilem , *impossibilem* , ut ais , reddiderim ? qui illam explicari ingenio , sapientia , judicio posse affirmavi . Quare nihil est , quod in me agas , nisi forte mihi irasci velis ; sed irascaris licet ; ego certe indignatione ista tua non movebor ; & quidquid etiam in me congerere jurgiorum ac contumeliarum fortasse placuerit , excipiam pacato animo , ac facile tibi remittam & condonabo . Equidem invitus feci , ut te vehementius , quam vellem , exagitarem ; sed morbus is erat , qui dulcem medicinam respueret , amaram posceret ; non lenibus fomentis curandus , sed ferro & igni radicitus extirpandus .

XXXVIII. Sed finis sit , neque enim si omnia consecrari velim , exitum tandem aliquem inveniret oratio mea . Vides , opinor , & satis ex his , quæ tribus actionibus hisce meis persecutus sum , colligere potes ; quid sit Critici munus exercere , & quantum hac in re inter meam , & tuam opinionem , hoc est inter doctum eruditumque Criticum , & ineptum imperitumque rabelam intersit . Magnum est Critici nomen , magna di-

gnitas , magnum munus , & multo majus quiddam ; quam ut & ego verbis explicare , & tu animo assequi ac ratione queas ; qui , si modo tanquam stipes aut truncus stares , tamen ne tum quidem tantæ dignitatis tam gravis ac severæ vel ipsum titulum sustinere posses . Non est hujus tui , mihi crede , ingenii tot ac tanta , tam abdita atque recondita investigare , non hujus memoriæ tam multa , ac tam longe lateque dispersa comprehendere , non hujus imbecillitatis naturæ tot labores , tam graves diurnosque perferre , non hujus prudentiæ atque consilii in rebus difficillimis sine offensione versari , non hujus denique pectoris tam angusti tantas res capere atque complecti .

XXXIX. Tu vero , si quid ex celebriore aliquo Critico deprompseris , memoriæque mandaris , si aliquot Criticorum nomina , exotica præsertim ac peregrina , continenti spiritu , æqualium tuorum plaudente corona , pronunciaveris , te satis ad tantum munus cum laude obeundum instructum putas . Erras , & vehementer erras , si leviter excusso bibliothecarum pulvere , si vix cognitis auctorum nominibus , si raptim pervolutatis librorum indiculis , si festinanter absoluto nescio cujus facultatis curriculo , si prægustatis tantum nonnullis artis criticæ regulis ac præceptis , hac ætate rudi atque inexperta , hoc vitæ genere molli ac delicato , hac contentione languida & remissa , hoc otio , hac inertia atque socordia tantam tibi sapientiam , quantam a Critico

rico requisivi , comparasse arbitreris . Grandis tibi restat via ; immensum tibi stadium decurrendum proponitur , in quo tantum abest , ut aliquid spatii confeceris , ut adhuc vix pedem extra carceres extuleris .

XL. Multa , ut planum feci , Criticus sciat necesse est , atque ita sciat , ut nemo ei neque labore , neque studio , neque diligentia , neque ingenio , neque sagacitate , neque memoria , neque cognitione rerum , neque ullo doctrinarum instructu atque apparatu facile anteponeendus sit . Ad hæc ipsius artis criticæ præstans omnino ac singularis notitia accedat oportet , qua fiat , ut ex illius regulis probe perspectis atque intellectis aliquid , quod plausu & commendatione excipiat , quod sit erudito , quod sapiente Critico dignum , possit efficere . Adde prudentiam horum studiorum adjutricem præcipuam ; quæ una si desit , scientiam ipsam , vel summam ac singularem , Critico non profuturam , sed obfuturam potius sine hæsitatione pronuncio . Huc refer iudicium illud , de quo tam multa diximus , acre , certum , subtile , æquum , incorruptum , exquisitum , a quo ars critica nomen mutuatur , sine quo nulla est , & quo uno difficultates , quibus obsidetur , gravissimæ & maximæ superantur . Eodem pertinet auctoritas quædam atque existimatio , qua se Criticus sustentet , omnemque a se , cum opus fuerit , aut infamiam avertat , aut invidiam depellat , & nomen dignitatemque suam contra omnes adversariorum impetus tueatur atque defendat . Quæ qui-

quidem auctoritas, cum perfectæ cumulataque sapientiæ fructus sit, non nisi in doctissimo viro ac rebus omnibus præcellentissimo reperiri potest.

XLI. Hæc sunt, quæ ego, & mecum quivis sapiens ab homine, qui sibi in litteraria Republica censoris partes deposcat, afferri volet; quorum aliqua si desiderentur, personam quam susceperit, pro dignitate sustinere non poterit. Quare, qui his præsiidiis destitutus est, me auctore, animum ab hujusmodi munere avocabit, & alio, quo tandem cumque ipsi libuerit, curam omnem suam operamque convertet. Utrum ego desipio, an plus, quam ratio ipsa patiat, a Critico peto atque efflagito? Facerem equidem libentissime, ut nostra hac præsertim ætate, hac scribendi licentia, hac vulgandorum nullo sine librorum intemperantia, Criticorum numerum augerem. Ut enim in bene constituta civitate & numero civium affluente multos esse accusatores utile est, ita non minus utile atque adeo necessarium, litterariam Rempublicam censoribus abundare. Sed, cum Critici dignitatem cogito, cum munus perpendo, cum officium considero, cum mihi versantur ante oculos incommoda toleranda, suscipiendæ inimicitia, adeundæ tempestates, cum animo subit doctrina illa, quæ a Critico postulatur, tam varia, tam multiplex, tam copiosa, tam exquisita, cum horum unumquodque mecum tacitus reputo, sanioribus cogor dare locum consiliis, nec facere omnino possum, quin hunc lau-

laudis aditum , quem magnis gravibusque ingeniis semper patere volo , levibus atque mediocribus intercludam .

XLII. Quamobrem , ut te , qui cum solo mihi res hactenus fuit , postremum alloquar , & amice commonefaciam ; Muta , obsecro , istam mentem , & noli in stulto proposito permanere diutius . Sine eos hanc tantam provinciam tam arduam atque difficilem suscipere , atque etiam sibi ultro appetere , quibus divino quodam naturæ habitu obtigit ingenium perspicax , mens experrecta , memoria tenax , iudicium acre , auctoritas summa , prudentia singularis , firma valetudo ; quos labor non frangat , quos vigiliæ non debilitent , quos molestiæ non conficiant , quos ulla difficultas non terreat ; qui disciplina illa vetere , rigida ac severa , educati sint , non hac recenti , languida atque enervata instituti , qui veræ laudi ac gloriæ studeant , non abdomini voluptatibusque serviant , qui pluteo immoti quotidie assideant , non matronarum cathedris affixi hæreant , qui pene omne honestæ relaxationis genus sibi interdictum putent , qui non ludis , non conviviiis , non fabulationibus , non deliciis ullis capiantur , sed toti in eo sint , ut susceptum opus dies noctesque sine intermissione urgeant , ibi habitent , ibi commorentur , nec ullis vel illecebris , vel molestiis se ab instituto abduci patiantur ; ac demum facultatem tantam & animi , & corporis afferant , quantam ad munus omnium longe gravissim-

simum & maximum afferri oportere , huc usque demonstravi .

XLIII. Hac incredibili contentione atque assiduitate , hac ingenii præstantia , hoc mentis acumine , hac singulari doctrina , exquisita eruditione , iudicio , prudentia multi doctissimi viri , & Critici nobilissimi exstiterunt , quos enumerare longum esset , atque adeo supervacaneum , quorum cum fama tota Europa longe lateque diffusa est , tum vero suis præclarissimis editis operibus fatissuperque celebratur . Hos autem si vis , per me licet , adito , hos consulito , ne omnem tibi scientiam videar atque eruditionem invidere ; verum cum hos appellas , nunquam eorum nomen sine laudis præfatione usurpato ; cum grandia illa , quæ reliquerunt , atque immensa volumina pervolutas , exhorresce ; cum legis , siquidem aliquid intelligas , non minus de eorum eximia doctrina , quam de tua singulari inscientia cogita ; cum vero eosdem non una in re peccasse audis , hinc etiam artis Criticæ difficultatem , quam tibi hætenus exposui , conjice atque cognosce ; quorum demum opera non impediam , quin sic evolvas , ut admireris , sic admireris , ut laudes , sic laudes , ut nunquam illorum operum auctores in hac impeditissima studiorum ratione tibi ad imitandum proponas . Dementis enim hominis est illud appetere , quod consequi nequeat , atque eo committi , quo non solum non evadet , sed nunquam se evasurum certo sciat .

DE



DE PRAVO
ARTIS CRITICÆ
 U S U
 AD FLORENTINOS.

ACTIONIS II. LIBER I.



UOD erat maxime providendum , & quod unum , quoad ejus fieri poterat, modis omnibus prohibendum , ne nimis multi ad Artem Criticam , omnium , quemadmodum superioribus actionibus demonstratum a nobis fuit , artium multo gravissimam & difficillimam se conferrent ; id neque provideri satis , neque omnino propter summam hominum cupiditatem ullo prohiberi modo potuit , Florentini . Nam cum plerique in eligendis suscipiendisque muneribus cupiditate atque ambitione magis , quam consilio & ratione ducantur ; & ea fere cupidius appetant , ambi-

bitiosiusque sibi deprecant, ad quæ minus a natura comparati instructique sunt; nulla tanta vis exstitit, quæ obstare potuerit, quin bene multi ad artem criticam, neque cognita prius, uti oportuit, artis ipsius natura, neque perspecta difficultate, neque exploratis proprii ingenii viribus, temere accesserint; rati scilicet, se ad gravissimum Critici munus satis paratos ornatosque, si ad illud cum laude obeundum animi plus & confidentiæ, quam consilii atque excellentis doctrinæ attulissent. Itaque ars critica multo plures, quam necesse fuit, & usus posceret, cultores habuit, quibus oneraretur potius, quam allevaretur; nos vero, si exiguum paucorum Criticorum numerum excipias, quibus idoneis & valde utilibus utimur, incredibilem perferre multitudinem cogeremur & ineptorum, & perniciosorum. Nam quid perniciosius generatim Reipublicæ? quid nominatim Religioni præsertim capitalius esse potuit? quam huiusmodi homines una ambitione & cupiditate incitato ad hanc artem accedere, qui non jam sibi certam veritatis indagandæ rationem atque opportunitatem propositam, sed oblatam potius occasionem, ac prope concessam, obtentu ac simulatione artis criticæ, quælibet impune opinandi facultatem arbitrantur. Qua in re, cum summa arti ipsi conflata est invidia; tum vero objecta nobis iusti timoris causa fuit atque formidinis. Affectis enim hoc modo istiusmodi hominum mentibus, & falsa persuasionē correptis animis, nihil ut sibi ejus, quam profitentur, ar-

artis jure non licere existiment, quid est, quod nos ab illis multo potiori jure timere non debeamus? Ego sane semper ita sensi, nullum ab hujusmodi hominibus expectandum esse bonum; contra, nullum non esse malum pertimescendum. Atque utinam solus timor nos anxios haberet atque sollicitos, ac non potius ea ipsa, quæ conjectari facile poterant, non minima ex parte mala consecuta jam essent, quibus & nos miserandum in modum conflictaremur, & Religio summum in discrimen adduceretur. Pravæ enim opiniones, si unquam alias, hoc certe tempore disseminantur ubique, opinandi licentia crescit in dies singulos, perniciosorum Criticorum augeatur numerus, & impunitate ipsa magis magisque corroboratur. Jam vero, qui de summa artis criticæ difficultate tam multa prioribus actionibus verba fecerim, potero de pravo atque perverso artis criticæ usu reticere? potero publica ac privata incommoda dissimulare? potero in Religionis ipsius discrimine atque periculo lentus haberi ac dissolutus? Ego vero non faciam, neque committam, ut in re tanti momenti mihi, vobis, Reipublicæ, Religioni, quæ me potissimum ad hanc causam suscipiendam impulit, desim; & quandoquidem ad utilis ac maxime salutaris argumenti pertractationem aggredi placuit, multo potissimam institutarum actionum mearum partem desiderari a vobis, ac requiri a me minime patiar. Dicam igitur de pravo artis criticæ usu, qui his temporibus maxime invaluit; dicam quod sentio libere,

re, &, quoad potero, citra cujusquam offensionem dicam. Nam quid dissimulatio prodest in re summi maximeque momenti? Dicam apud vos, quibus arbitris ac disceptatoribus in hac causa uti placuit; & eo alacrius ac fidentius in causam ipsam ingrediar, quod non obscuris, immo vero perspicuis significationibus intellexi, vobis argumentum hoc meum maxime probari, ejus vero pertractandi rationem non improbari. Quo nomine summam ego vobis habere me gratiam profiteor, quod hominem natura timidum, & doctorum hominum non expressa modo, sed tacita etiam judicia, supra quam credi potest, expavescens benevolentia vestra erigitis, & hanc debilem animi mei partem atque infirmam judicio vestro gravissimo & maximo confirmatis. Quare, ne longum sit, nostra hæc ad judicarium tandem morem ac forensē rationem, quam tenere in his actionibus placet, causa componatur. Suscipite vos personam Judicis; Suscipiam ego partes Accusatoris; Critici intemperantes, contra quos solos acturus sum, Rei vices sustinebunt. Quanquam ego non jam accusatoris partes in hac causa, sed patroni ac defensoris potius suscipere mihi videor. Defendo enim artem ipsam criticam, quam isti summam in invidiam sua ipsorum intemperantia adduxerunt. Defendo æquitatem pluribus, ut ostendam, modis ab istis læsam ac violatam. Defendo multos sanctissimos & sapientissimos viros, majores nostros prudentissimos homines, antiquitatem totam; Religionem de-

denique ipsam defendendam patrocinandamque suscipio; ut hæc accusatio mea defensio potius, quam accusatio & appellanda sit, & re ipsa existimanda. Comparate igitur animos vestros, Florentini, ad ea, quæ dicturus sum. Si unquam vos attentos optavi, nunc maxime attentos volo. Agentur res gravissimæ & maximæ, quæ uti vos ad me attentius audiendum excitare, ita me ad dicendum vehementius debent merito suo incitare. Audietis enim de summis gravissimisque ecclesiasticæ præsertim historię incommodis. Cognoscetis levissimis de causis, tenuissimis suspicionibus, inanibus conjecturis per summam injuriam veteres sententias repudiatis; novas quasdam atque hætenus inauditas nullo more, nullo jure, nullo exemplo (tametsi hac ætate exempla non desunt) in earundem locum suffectas; partim ab istis, acute scilicet, excogitatas, partim, immo vero plerasque, ne dicam omnes, quod quidem sine erroris periculo affirmare possim, excerptas ab illis, a quibus minime omnium debuissent. Videbitis sanctam, venerandamque antiquitatem ab istis contemptui habitam atque ludibrio. Intelligetis majores nostros, sapientissimos prudentissimosque mortales superbius appellatos, perinde quasi in summa rerum omnium ignorance constituti, & totius artis criticæ prorsus ignari nihil prope ingenio consequi, nihil ratione internoscere potuissent. Hæc aliaque hujusmodi a me proferentur, quæ prolati factis & recitati istorum ipsorum ver-

Tom. I.

K

bis,

bis, tanquam certissimo aliquo, de quo dubitari non possit, locupletissimoque testimonio confirmabuntur. Quandoquidem vero hujusmodi facta, quæ in crimen vocari possunt, numero prope innumerabilia sunt, non est, cur quisquam a me hoc, vel illud nominatim requirere cogitet; & in eo, quod hoc vel illud omiserim, mihi succensendum putet. In materia uberrima ego præcipua tantum rerum capita ac genera persequar, & in summa factorum copia ea solum in medium afferam, quæ ex una fere ecclesiastica historia deprompta erunt, & hæc ipsa maxime insignia & pervagata, ut mihi etiam huic studiorum generi non admodum dedito, nec reconditoris eruditionis famam captanti, sed non stulto fortasse alieni artificii æstimatori, propter incredibilem istorum in opinando licentiam, non omnino ignota esse potuerint. Postremo illud oro vos, obtestorque, ut, si oblata occasione dolentius interdum conquerar, si vociferabor, si quæ sentiam paullo liberius expromam, mihi ignoscatis; idque non meo ingenio, quod certe ab omni acerbitate abhorret, tribuendum; sed rerum potius, de quibus acturi sumus, indignitati adscribendum putetis.

II. Atque ut a principio intelligatis, cujusmodi causam acturi simus, quam certa, quam explorata sit, nulla ut fortasse certior atque exploratior in judiciis ad hanc diem versata fuerit, hanc ego paucis absolvere, & quam brevissime expedire, si velim, facile possim.

Obji-

Objicio istis in arte critica intemperantiam ; hæc una a me accusatur , hanc unam in crimen voco , de hac una vos judices sedetis & arbitri ; quam quidem ego si tantum ex istorum vocibus atque sermonibus colligam , jam a me quam brevissime causa perorabitur ; nec vero ullum vobis dubium relinquetur , quid de istis sentire , quid decernere debeatis . Nam quid , amabo vos , quid sæpius usurpatum ab istis ? quid repetitum frequentius ? quam ; *Hoc nulla certa ratione probari ; Illud nullo modo verisimile esse ; Aliud manifesta cum veritate pugnare* . Atque hæc jactata quidem , ut prima specie videtur , in incertum , sed re tamen ipsa ac tacito consilio ad certum scopum designatumque directa . Quid illa ? plena cujusdam spiritus , omnia & superbius fastidientis , & contumacius repudiantis , quæ passim loquuntur , & quæ non tam audientium aures feriunt , quam animos graviter vehementerque percellunt . *Huic aut illi Historico* , dummodo iis incommodet , *fidem non esse habendam , pugnantia , absurda , incredibilia scripsisse , cecutisse , dormitasse , somniasse* . Quid illa alia ? quæ in præsentia , cujusmodi sint , non expendo ; sed tantum dico deteriorem in partem accipi ab istis , & malum plerunque in usum detorqueri ; *Cujusquam rationem non esse ducendam ab eo , qui unam veritatem inquirat ; Censoriam virgam nullo discrimine peræque in omnes esse a Critico distringendam ; Stulti hominis esse credere , dubitare sapientis* .

III. Hæ sunt horum hominum voces, quas in vulgus jactant, hi sermones, quos usurpant assidue, quos in congressibus habent, ad sollicitandos nimirum imperitorum animos, quibus sæpe ego ipse interfui, & quos his auribus accepi, & quibus vos multo sæpius interfuisitis, Florentini; quo uno crimine ego eos accusem, & vos condemnetis necesse est; ut non jam diutius in hac causa de vestro mihi judicio sit nec magnopere laborandum. Nam per Deum immortalem? quæ voces? quæ verba sunt ista? Quid inconsideratius dici? quid liberius jactari? quid in vulgus efferri licentius? quid denique ad immoderatam in opinando inducendam confirmandamque libertatem accommodatius potest excogitari? Ita ne vero? Isti, quod commodum erit, tanquam falsum rejicient? quod libebit, respuent? quos volent auctores, repudiabunt? neminem aliquo in numero ducent? præ se despicient omnes atque contemnent? Nos vero hosce spiritus, tantam intemperantiam æquo animo perferemus? nec mala, quæ graviora in dies certissime consequentur, antevertenda putabimus? Nam quid boni expectandum arbitramini ab iis, Florentini, qui eo animo ad artem criticam accedant, ut sibi omnia propemodum licere arbitrentur, qui doctissimorum hominum auctoritatem negligant, qui veterum scriptorum testimoniis non acquiescant, qui pene nemini fidem habeant, qui sic in historia examinanda versentur, ut in ea sibi prope infinitum imperium usurpent; omnia despuant, omnia fasti-

fastidiant, omnia ad arbitrium suum ac libidinem revo-
cent, nullis denique astringi se legibus, nullo circum-
scribi jure patiantur. Dixi jam, & dicam iterum;
Nihil esse boni, quod ab illis expectemus; contra ve-
ro nihil esse mali, quod non pertimescamus. Quare,
ut videtis, vix agitari causa coepta est, absoluta jam
dici potest atque transacta. Ut enim alia mihi argu-
menta, quibus objectum crimen doceam atque con-
firmem, desint, unum hoc, quod attuli, hujusmodi
est, quod nulla ratione dilui potest, & quo uno isti sic
tenentur, ut nullum ipsis effugium pateat. Nam quid
optandum magis accusatori, quam testes habere judi-
ces; ipsos autem reos non solum propria malefactorum
conscientia exanimatos, sed suis etiam ipsorum verbis
sermonibusque convictos.

IV. Verum, ne nimis accusatorie cum istis agere
videar, & ne se circumveniri a me conquerantur, quod
causam non exposuerim, quod crimina non explica-
rim; me, si id fecissem, causam ipsam fortasse suble-
vaturum fuisse, quod vero secus egerim, indicta &
incognita causa, sententiam per vim a iudicibus extor-
sisse; iis morem geram, & omnem de me exposu-
landi occasionem eripiam. Experiar igitur utrum mihi
facilius sit in perpetua oratione versari; an; citato ac
convicto reo, quam citissime causam totam expeditissi-
meque transigere. Experientur fortasse & ipsi utrum
molestius laturos sint, objecta a me generatim iis atque

universe fuisse crimina , an ea singulatim afferri , & fusius luculentiusque explicari . Itaque descendam libenter , quo vocant ; & illud forsitan dicendo consequar , ut eos non molliorem , quam ego ipsis obtuli , sed asperiores hanc , quam ipsi flagitant , optasse conditionem pœniteat . Ne vero alio querimoniarum genere , & eo quidem justo utantur , ita a me objecta esse crimina , nullam ut interrogandi & respondendi ipsis potestatem fecerim ; itaque omnem se defendendi facultatem ademerim ; hoc etiam habeant a me , quod æquum est , quod abnui non potest , quod optima cujusque bene constituti iudicii forma postulat ac requirit . Ita fiet ut de mea fide , officio , diligentia , religione , quam in hac adornanda accusatione adhibuerim , certius vobis constet , & ipsa crimina planius evidentiusque demonstrantur . Hoc modo præcisa omnis querimonia erit , omnis ab hoc nostro iudicio injuriarum suspicio aberit , & æquo inter nos ac legitimo jure disceptabitur .

V. Jam ut tandem aliquando causa constituatur ; Ajo bene multos istorum in arte critica exercenda præstitutos modestiarum ac temperantiarum fines facile ac temere fuisse prætergressos . Video hoc esse mihi allatis factis demonstrandum ; video in hoc ipso adhibendum modum ; video in rebus ex vario & diverso genere petitis certum esse quendam tenendum ordinem . Demonstrandum , quod posui , ut perspecta vobis mea fides sit ; adhibendum modum , quo satietati vestræ occurram ; ser-

van-

vandum ordinem , quo perspicuitati consulam . De demonstratione non est profecto , cur magnopere laborem . Facta enim mihi & plurima ; & maxime insignia ab adversariis ipsis sufficiuntur , & ad docendum intemperantiæ crimen , quod unum istis oppono , præcipue accommodata . In modo quoque mihi non difficilis ratio ostenditur , si ea tantum facta eligam , quæ potiora sunt , & memet ita circumscribam ; ut in una fere ecclesiastica historia consistam . In ordine vero minus expedita ratio proponitur . Difficile est enim in rebus non variis solum , sed inter se maxime disjunctis certum tenere ordinem ; sed ordini tamen , quoad potero , serviam . His ita constitutis , ad facta ipsa , in quibus totastrarum vis actionum vertitur , & exponenda , & expendenda veniamus ; & cum a me nova quædam & inaudita in medium proferentur , vobiscum ipsi reputate , quem tandem exitum immoderatam istam , quam unice reprehendo , opinandi licentiam habituram existimetis .

VI. Examen fuisse scitote quoddam a nescio quo in ecclesiasticam historiam institutum , & non magno volumine comprehensum in lucem prædiisse . Cum examinis vocabulum auditis , nolite commoveri , Florentini ; cum in ecclesiasticam historiam institutum intelligitis ; nolite statim de hujus hominis licentia intemperantiaque cogitare . Non est , cur neque ego , neque vos , neque vero quisquam alius Criti co hoc interdictum putet . Ar-

tis criticæ jus longe lateque pertinet , nihil ut pene sit ; in quod Criticus examen jure suo instituere , & de quo sententiam interponere non possit suam . Historia vero ecclesiastica , uti fere omnes humanæ lucubrationes , hujusmodi est , in quam tametsi a gravissimis & doctissimis viris conscripta sit , nonnulla tamen irrepere poterint , quæ minus probanda sint , atque adeo ab eadem omnino expungenda . Aliqua vel imprudentibus , vel etiam ignorantibus scriptoribus nihil facilius , quam ut aut elaberentur , aut omitterentur , quæ vel reprehendi , vel suppleri a docto censore debeant . Quare , si quis examen in historiam ecclesiasticam eo animo instituat , ut , si quid temere scriptum fuerit , si quid non satis probabili ratione confirmatum , si quid denique falsum , corrigat , emendet , inducat ; in hoc ei a nemine neque succenseri debet , neque contradici potest ; immo vero qui ita se gerat , & æquo & bono jure omnia inspiciat , expendat , examinet , summo opere laudandus est . Hoc jure Critici semper antea fuerunt , hoc in præsentia sunt , hoc esse in posterum , atque adeo in perpetuum debent .

VII. Examen igitur , quemadmodum dixi , a nescio quo in ecclesiasticam historiam institutum fuit ; sed novo more , novo jure , novo exemplo institutum . Etenim auctor hic in toto passim opere ; quid dixi opere ? in unoquoque capite ; non est satis ; in unaquaque pagina ; ne id quidem satis est ; tertio quoque verbo dicere

re debuëram , ita in quibusque historicis factis examina-
nandis dubius , anceps , incertus hæret ; modo in hanc ,
modo in illam partem defleat , modo in neutram in-
clinat , ita titubanter incedit , ita nihil de quaque re
neque negat , neque affirmat , ita lectorem suspensum
tenet , ut cum denique totum opus summo studio di-
ligentiaque pervoluit & accurate discusserit , quid
auctor ipse , non dicam iis de rebus , quæ adhuc dubiæ
sunt , neque satis exploratæ ; sed de iis ipsis , quæ cer-
tissimæ & exploratissimæ habentur , quid inquam auctor
ipse sentiat , prorsus ignoret ; & illud tantum post at-
tentam diuturnamque operis ipsius lectionem certissime
assequatur , omnia ad opinionem quandam adduci , om-
nia in dubium ab auctore revocari .

VIII. Hoc modo instituto ab isto , de quo dico , in
ecclesiasticam historiam examine , repertus est , acuti
vir ingenii , qui aliud examinis genus , sed multo re-
ctius in hominem ipsum instituerit , in eumque acius in-
quisierit . Itaque inquisitor hic , quandoquidem illud as-
sequi non potuerat , ut aliquid certi ex ejus libro excul-
peret , rationem cum homine habere cœpit , & illud
saltem experiri adniscus est , si quo modo ad dubitatio-
num ipsarum summam , quibus totus non modo refertus
liber erat , sed stipatus , sua ipse cura diligentiaque
pervenire posset . Quare omnem dedit operam , ut ,
quod cogitavit , quantocius exequeretur , e sententia-
que conficeret . Igitur libellum totum quam diligentissi-
me

me inspexit, excussit, examinavit, quæ in dubium adducta erant excerptis, fideliter adnotavit, singula accurate digessit atque seposuit, ac demum dubitationum ipsarum summam inivit. Quid vultis? quid expectatis? Dicam rem incredibilem; sed tamen veram; subductione facta in opere perexiguæ molis, ad duo dubitationum millia inventa sunt. Quo comperto diligens operis cognitor, & accuratus inspector hoc ipsum testatus est, nihil ipse quidem dubitans, nihil hæsitans, sed affirmans, sed firmissime planissimeque asseverans.

IX. Hic vero, qua vi vocis, quo verborum pondere, qua gravitate sententiarum singularem hanc, & nunquam antea excogitatam historica facta ad criticæ trutinam exigendi rationem castigandam existimabimus? Proh superum atque hominum fidem! Duo dubitationum millia in unum opus, & hoc non magni voluminis esse congesta! Quid hoc est? quam novum! quam singulare! quam inauditum! quam prope monstro simile! Quem Scepticum, quem Academicum huic homini antefерendum, aut aliquo saltem modo cum hoc homine conferendum putabimus? Quid? fierine potuit, ut in tanta historia examinanda, tam gravi, tam severa, tam locuplete, a tot sanctissimis doctissimisque viris summo studio diligentiaque perscripta, nihil occurreret, quod certum, quod ratum esset, quod sine hæsitatione posset affirmari? Omniane in dubium revocari oportuit? omniane ad opinionem quandam adduci debuerunt? per-

rin-

rinde quasi omnia ad unum nullis nixa certis essent argumentis , & omni non dicam veritate , sed omni etiam probabilitate destituerentur . Et hoc erit examen instituere ? hoc historiam cognoscere ? hoc de ea ad criticæ artis leges ac præscripta judicare ?

X. Exstitit proximioribus ætati nostræ temporibus Philosophus in primis nobilis & acutus , qui quos instituendos in philosophia susceperat , hoc sibi modo initia-ndos putavit , ut nimirum omnibus primum de rebus dubitarent . Non ad eum quidem finem , ut re ipsa de rebus omnibus dubitatio induceretur , sed tantum ut in principiis discendi sustineretur assensus , quoad usque animus veritatem in omnibus exquirere per se , & sua vi deprehendere assuesceret . Hæc tamen opinio communi sententia repudiata fuit . Lumini enim naturæ officere visa est , easque humanæ menti tenebras offundere , ex quibus nulla certa emergendi facultas ostendebatur . Etenim non nulla sunt , de quibus dubitare omnino nec possumus , nec debemus ; quæ clara sunt , perspicua sunt , & vel ipsa enunciatione , vel certo experimento evidenter . Jamvero quæ in philosophicam palæstram induci non potuit , quorsum in artem criticam dubitatio inducenda curabitur ? An ut veterum illorum , quos nominavi , Philosophorum obsoletæ jam & omnium hominum recte tum de divina , tum de humana fide sentientium concordibus damnatæ suffragiis opiniones instaurentur ? Quod quidem , quin , simulatione artis cri-

criticæ, ætate hac nostra, ab immoderationibus Criticis agatur, quis jam est, qui dubitet? ut hæc prope-modum una ab ipsis dubitatio de animis hominum sublata esse videatur.

XI. Sed ut ad hominem de quo dico, revertar, & ad eum speciatim sermonem convertam; Quid? cum id aggrediebare, ut historiam ecclesiasticam examinandam susciperes, perindene in illam, atque in Poetæ nescio cujus carmen, examen tibi instituendum putasti? An ignorabas, historiam inter atque poesim magnum interesse, semperque interfuisse discrimen? Nesciebas, hanc uno ferme niti figmento, illam maxime veritate? Quid ergo causæ fuit, quamobrem sic in historia gravissima ac sanctissima expendenda versare, quasi in explicandis per otium Poetæ alicujus exponendisque fabellis operam studiumque collocares? Et vero, opinor, si id negotii sumpsissem, te moderatius fortasse temperantiusque gessissem. Etenim ii ipsi, qui suam in eo operam posuerunt; ut fabulas interpretarentur, in ipsis Poetarum commentis abditam ac reclusam deprehendere veritatem potuerunt. *Non enim, ut recte admonet Lactantius, res ipsas gestas sumpserunt Poetæ, quod si facerent, essent vanissimi; sed rebus gestis quendam quasi colorem adhibuerunt.* Tu contra, quo historiam quodammodo poesi deteriore faceres, atque adeo contra atque ejus natura ferat, commentitiam redderes, quam veritatem illi in fabulis reperire, tu in hi-

sto.

storia, quæ *veritatis testis* jure semper meritoque habita est, invenire non potuisti? Illi evolutam e Poetarum commentis veritatem explicarunt, tu explicatam in historia dubitationum tuarum involucris implicare conatus es? Illi latentem ac reconditam introspexerunt, tu promptam oculis atque expositam non vidisti? Illi, ut ita dicam, e mendacio veritatem elicerunt, tu autem e veritate quodammodo mendacium emergere atque exsistere voluisti? Quis post hominum memoriam se gessit isto pacto? quis, quis, inquam, præter unum te, tantum sibi unquam sumpsit? quis conatus est? ut unus omnem hoc modo historiam perderet, omnem historicam veritatem de medio tolleret. Nam si ecclesiastica historia omni spoliata probabilitate erit, quid de profana sentiendum putabimus? si ecclesiasticis scriptoribus fides abrogabitur, hæc scilicet ethnicis adjungetur? Herodoto nimirum, Thucydidi, Dionysio, Sallustio, Livio, Suetonio, aut etiam, si superis placet, Apulejo & Luciano? Actum ista ratione, ut videtis, de tota historia esset & conclamatum.

XII. Non ista profecto ratione se gessit, vir clarissimus, & nobilis in primis Criticus, qui necessitate utilissimi operis, quod aggressus erat, ad ferendum non de ecclesiastica solum, sed de profana etiam historia judicium compulsus, timide ac modeste præfatus nihil prius sibi faciendum existimavit, quam ut omnem a se immoderationis ejusque in judicando licentiæ suspensionem amo-

amoveret. Accipite viri gravissimi gravissima verba. Cum enim, inquit de Locis Theolog. lib. xi. cap. iii. non ex sermone hominum recenti, sed ex majorum memoria atque annalium vetustate eruenda sæpe sit veritatis explicatio ejus, quæ in Theologica disputatione versatur, oportebit sane de historia præsertim veteri judicare, historicos omnes internoscere, mendacesque a veracibus discernere. Quam facultatem quoniam mihi nec arrogo, nec debeo; fateor, me non sine metu ac pudore quodam hanc provinciam suscepisse, munere necessitatis, non voluntatis opere perfuncturus. Non quod mihi in tanto officio, tamque gravi causa cura defuerit; sed quod videri periculosum esse eo vel maxime loco judicem velle fieri, ubi vir ille nimirum exigitur, qui & antiquitatis memoriam in numerato habeat, & prudentia summa gravissimoque judicio sit præditus. Hæc ille, quibus quidem verbis nihil gravius, nihil moderatius, nihil viro sapiente dignius dici potuit.

XIII. Neque verò his contentus ulterius progressus est; & non solum non abrogandam historię sive ecclesiasticę sive profanę fidem censuit, sed ex utraque ad confirmandas vel ipsas Theologicas positiones certissima erui posse argumenta contendit, atque hac de causa omnis historię cognitionem Theologo necessariam omnino esse duxit. Sic enim scriptum reliquit, ejusdem libri cap. ii. Etenim viri omnes docti consentiunt, rudes omnino Theologos illos esse, in quorum lucubrationibus histo-

historia muta est . Mihi quidem non Theologi solum , sed nulli satis eruditi videntur , quibus res olim gestæ ignotæ sunt . Multa enim nobis e thesauris suis historia suppeditat , quibus si careamus , & in Theologia & in quacunque ferme alia facultate inopes sæpenumero & indocti reperiemur . Cum vero pateat , quandoque in re quondam gesta Theologicæ disputationis cardinem verti , quis est hic qui neget , interdum etiam in scholastica disputatione opus esse ex annalium monumentis testes excitare clarissimos veritatis ? Quorsum tanta historiarum necessitas ? quorsum tantopere ejus efflagitata cognitio ? si in ecclesiastica historia , quæ reliquis & dignitate , & gravitate , & vero etiam veritate præstat , omnia dubia , incerta , suspiciosa essent ? Næ iste , si ante , quam examen illud suum susciperet , tantum virum consulisset , rectius & verius de omni historia , ac de ecclesiastica præsertim existimasset . Sed hunc hominem missum tandem faciamus , & ad alia non ita contentiosa veniamus , ne omnia jam inde ab initio agere velle cum dolore ac vociferatione videamur .

XIV. Nihil Hispanis olim salutaris , nihil ad illorum famam prædicationemque populorum illustrius accidere potuit , quam ut ad eos , cum adhuc viveret (a) ,
Ja-

(a) Guilielmus Cuperus Parte 11. & ultimo hæc habet . „ Sancte pro-
Comment. Histor. , quæ inscribitur ; „ siteor me ita ad hanc disputa-
de Prædicatione S. Jacobi in Hispa- „ tionem illustrandam accessisse , ut
nia Tom. VI. Act. SS. mens. Jul. n. 555. „ putaverim non usque adeo solida
esse

Jacobus Apostolus veniret, afferret divini verbi semina; atque inde digressus relinqueret aliquot sanctissimos viros, suæ disciplinæ atque institutionis alumnos, qui quam fidem primum ipse severat, latius deinde spargerent ac propagarent. Quod quidem, pro singulari illarum gentium veræ Religionis amplectendæ studio, ac propemodum insita hispanæ nationi atque ingenerata pietate, non admodum factu difficile fuit. Itaque jacta in iis regionibus, tanquam in solo bene comparato, Catholicæ veritatis semina non hæserunt modo, sed ad summam etiam fœcunditatem mirabiliter excreverunt. Quare Jacobum Apostolum summa religione venerantur, & tanquam præcipuum totius nationis Patronum agnoscunt, cujus etiam apud illos magnificentissimum in Galleciæ finibus templum exstat, ubi sacra ejusdem reliquiæ eo jam pridem translata asservantur, maximo omnium Catholicarum gentium concursu frequentiaque celebratum. Hæc est opinio Hispanorum longe vetustissima, quæ apud ipsos semper viguit, nec unquam, tot sæculorum, quæ intercurrerunt, aut diuturnitate defecit, aut intercapedine præcisa fuit. Neque vero hæc solius opinio vulgi est, qui facile decipi potest atque in errorem induci (quanquam vulgi ipsius opinion-

nes,

esse Hispanorum fundamenta ad prædicationem S. Jacobi in Hispania asserendam. Sed postea variis monumentis diligenter exussis, omnibusque utriusque partis argumen-

tis mature expensis, comperi immemorabilem Hispanorum traditionem, antiquis testimoniis firmatam omnibus adversariorum argumentis longe prævalere.

nes, quando consentientes sunt, non continuo repudiari debent; sed unde originem habuerint suam, debet attentius investigari) sed tamen hæc non solius opinio vulgi est, sed omnium hispaniensium Ecclesiarum, quæ ab ipsis Religionis Catholicæ primordiis, iis in regnis; amplissimæ constitutæ sunt ac nobilissimæ.

XV. Jam vero, si istos audias, tam longe absuit, ut Jacobus Apostolus ad ea loca venerit, ut ne unquam quidem de hispaniensi professione cogitarit. Quid? Hoc tot regna testantur, tot provinciæ asseverant, tot populi confirmant; incredibilis hac de re Hispanorum omnium consensus semper fuit, ut idem nunquam non omnes dicerent, idem omnes affirmarent, idem constantissime crederent; accedit præterea vetustissimarum nobilissimarumque Ecclesiarum gravissimum sanctissimumque testimonium; isti videlicet sese interponent? isti intercedent? isti tantæ auctoritati refragabuntur? & tot regnis, tot provinciis, tot populis, tot Ecclesiis idem attestantibus, affirmantibus, confirmantibus, asseverantibus, isti videlicet soli contradicere audebunt ac repugnare? Ecquod tandem argumentum tam certum, tam firmum, tam manifestum, tam denique evidens asferre unquam poterunt, quod tantam testimoniorum vim aut omnino infringere, aut saltem valeat infirmare? Exspecto, dum aliquid hujusmodi afferatur, quod si conferamus cum hoc tali ac tanto tot sæculorum populorumque consensu, conspiranti in unum ac pene

Tom. I.

L

con-

constato, aliquid tandem ponderis ac momenti habiturum esse existimetur.

XVI. Jam si quæritur ab Hispanis, quo potissimum fundamento nixa hæc eorum opinio sit, quanquam hac de re multa, & ea quidem luculentissima afferre possunt, & re ipsa afferunt documenta; tamen præcipue respondent, *traditione*, quæ ab antiquissimis ducta temporibus, perpetua apud eos & nunquam intercisâ derivatione, ad nostra usque tempora profluxit. Hoc illi respondent, & magnum quiddam, cum traditionem appellant, se dicere, arbitrantur; tantumque momenti in uno traditionis vocabulo ponunt, & ab unoquoque, qui æquitate ducitur, ponendum censent, ut una traditio, in re vetustissima & a nostra memoria tot sæculorum intervallo remota, omnium instar rationum habenda sit.

XVII. Sciunt quidem, ut homines eruditi sunt ac sapientes, illa eis opponi; Jacobum nimirum omnium Apostolorum primum, quam evulgaverat, Hierosolymis proprio sanguine Catholicam fidem consecrasset. Sciunt, Apostolos, quod quidem scripto mandatum sit, non antequam ad excolendas Christianis præceptionibus, quæ cuique obtigerant, provincias fuisset digressos, quam altera ab Herode contra Ecclesiæ primordia *persecutio* commoveretur. Non ignorant præterea, ejus temporis, quo profectus in Hispaniam Jacobus dicitur, deesse scriptores, qui id diserte testentur ac liquido confirment.

Non

Non nesciunt, ab adversariis illa etiam obijci; Rem hanc non nisi post octavum sæculum mandari scripto esse cœptam; scriptorum vero auctores alios alia de causa minus quibusdam probari. Hæc omnia probe sciunt, neque tamen dimoveri se ab traditione patiuntur. Non investigant, quomodo tam mature digredi Jacobus ab Hierosolymis potuerit, ad seque venire. Satis est ipsis, quod omnino potuerit, nec evidenti ratione demonstrari oppositum queat. Scriptores vero, qui rem hanc litteris octavum post sæculum prodiderunt, lenocinari ac blandiri quidem, ut isti dicunt, potuisse Hispanis vident; sed vident etiam, tantam esse, semperque fuisse Hispanorum gravitatem, ut majores suos lenocinantibus ac blandientibus scriptoribus aures facile nequaquam præbituros fuisse certissime teneant, nisi eo ipso tempore, quo res hæc vulgari litteris cœpta est, jam apud ipsos testatissima fuisset. Eodem igitur revertuntur, traditionem appellant, ad traditionem confugiunt, ab traditione se dimoveri non sinunt, huic quam arctissime adhærent, & in hac tuti, tanquam in placidissima statione, conquiescunt.

XVIII. Hæc illis; quibus quid est, quod contra jure dici possit? Etenim si demonstrari non potest, eo tempore, quo dicitur, digredi omnino Hierosolymis Jacobum non potuisse; si auctores Jacobi in Hispaniam profectionem octavum post sæculum diserte testantur, si credibile est, hoc ipsum a prioribus, quorum scripta tum exstarent, aucto-

ribus didicisse, si incredibile est, hos ipsos auctores tanta fuisse confidentia atque audacia, ut rem novam & antea prorsus inauditam temere & nulla certa ratione vulgarent, si, etiamsi id ausi essent, non tamen fidem apud populos minime leves, & satis ad suspicandum acutos habituri fuisse videntur, si multa ante sæcula, quam factum tam insigne litteris mandaretur, hanc opinionem omnium Hispanorum animos occupasse verisimile est, si denique post ipsum octavum sæculum, quo primum, ut isti volunt, in scriptis codicibus legitur, ad nostra fere tempora, hoc est quoad per istos concessum fuit, hæc opinio mansit, inconcussa mansit, nemine refragante ac contradicente mansit, quæ tandem ratio tam certa, invicta, manifesta, evidens quemquam compellere potuit, ut tanto post intervallo vetustissimam opinionem labefactandam susciperet, eamque ex nobilissimorum religiosissimorumque populorum animis evellere conaretur?

XIX. Ego sane non assequor, quis unquam istos post diuturnum tot sæculorum silentium vocem mittere, quis clamare, quis tanto strepitu reclamitare coegerit. Etenim, quid causæ fuit aut esse potuit, cur illis tot ætatum nunquam interpellata taciturnitas displiceret, ut ei suis clamoribus ac vociferationibus obstrepere auderent? Quid inde mali? quid incommodi pertinuerunt? Florentissima interim ac religiosissima natio in summa pace atque otio constituta suam tuebatur opinionem, omnibus grati animi significationibus Apostolum ac Patronum suum

suum prosequeretur, cujus opem in adversis ac durissimis rebus experta vel nobilissimas, ipso adstante atque conspicuo, de suis hostibus clarissimasque victorias reportavit. Maxima inde Catholica Religio incrementa apud ipsos cepit, & tam alte egit depressitque radices, nulla ut vi, nullo ut unquam tempore evelli posse videatur. Quid igitur attinuit hanc opinionem tam ingentem populorum illorum animis, tam longa temporum diuturnitate confirmatam attentare? quietissimis atque honestissimis gentibus hac super re molestiam afferre? eisque tantam quodammodo religionem auferendam eripiendamque curare?

XX. Gemina prope hujus, de qua dixi, altera Hispanorum ipsorum opinio est, qua certissime credunt (a), Divinam Matrem, cum adhuc inter mortales degeret, ipsi S. Apostolo in Iberi fluminis ripa constituto, super columnam lapideam se conspiciendam præbuisse, & eam maxime Hispaniæ partem, ubi apparuisset, sibi cordi futuram affirmasse; propterea quia illam præ cæteris sui studiosissimam fore certo sciret. Hæc quoque opinio jam inde usque a vetustissimis temporibus ita insedit in Hispanorum animis atque inveteravit, nullus ut un-

L 3 quam

(a) Gulielmus Cuperus tom. 6. de mo 1. Conc. Hisp. dissert. 9. excurs. 7; Act. Sanct. in Appendice de Cæsaraugustana Deiparæ imagine, quam num. 79. sententiam hispanæ nationi faventem propugnat, rationibus, S. Jacobus statuisse traditur, parag. 4. *piam & antiquam traditionem Aragonensibus gratulatur.* num. 600. re diligenter discussa, & expensis Cardinalis Aguirii, qui to-

quam de ea scrupulus hæserit, nemo unus illorum de re tam certa, tam apud ipsos testata, tot sæculorum comprobata iudicio dubitaverit. Quapropter singulari pietate sanctissimam Dei Genitricem prosequuntur, cui amplissimum etiam Cæsaraugustæ templum posuerunt. Tanto autem pietatis erga Divinam Matrem studio affecti sunt, ut hoc nomine omnes Catholicas nationes facile vincant, aut certe in tam pio & debito officio ab ulla Catholicorum hominum natione vinci se ac superari minime patiantur.

XXI. Atque hic ego similiter, ac supra feci, non istis obtrudam qualemcumque opinionem, non sermonem vulgi, non rumores temere sparfos, non imperitorum hominum & agrestium testimonium; sed consentientem regnorum, sed provinciarum, sed cultissimarum gentium ac gravissimarum, sed Ecclesiarum præcipue ipsarum sanctissimam religiosissimamque testificationem. Hoc similiter Hispani facient, & illam ipsam, quam paullo ante appellarunt, traditionem commemorabunt, atque istis tanquam propugnaculum aliquod, quod expugnari non possit, in primis opponent. Non iis ne hic quidem monumenta desunt, quibus honorificentissimam illam hispanæ genti Deiparæ prædictionem, quam eventus postea, & singularis eorum erga Divinam Matrem pietas satis superque comprobavit, demonstrent; sed tamen iterum ad traditionem confugiunt: Hæc nimirum arx, hæc ara, hoc perfugium semper fuit, quo vetu-

fissimæ opiniones, & ab omni nostra memoria disjunctas se reciperent, & ubi se contra omnes omnium adversariorum impetus tutarentur atque defenderent. Diruatur hæc arx, evertatur hæc ara, auferatur hoc perfugium; jam non erit de sanctissimarum vetustissimarumque rerum excidio, ac de Religionis ipsius, quæ, uti demonstravimus, traditione, non minima sui parte, nititur ac sustentatur; ruina atque interitu recusandum. Sed quidquid isti contra moliantur, stabit semper hæc arx, stabit ara, hoc nunquam non patebit perfugium, ejus aditum nulla vis obstruere unquam poterit, ac penitus intercludere.

XXII. Quod Hispani de Jacobo Apostolo, hoc Massilienses, firmissime credunt (a) de Maria Magdalena & Martha sororibus, quæ una cum fratre Lazaro, Maximino Christi discipulo, & Marcella pedisequa Massiliam accessisse dicuntur. Et Maria Magdalena quidem in antro quodam, quod adhuc visitur, ab omni hominum societate prorsus segregata delituit, ibique animo a terrenis rebus prorsus abstracto, & unice in cælestium rerum contemplatione defixo quam diutissime

L 4

sime

(a) De tota hac controversia legendus est in Aët. Sanct. tom. 5. Julii Jo: Baptista Sollerius in Commentario historico-critico quod inscribitur *de S. Mariæ Magdalena apud Massiliam*, in quo Provincialium possessio asseritur, & verissimè demonstratur. Legendus præcipue Natalis

Alexander Dissert. 17. in Hist. Eccles. sæc. 1. tom. 3. qui S. Mariæ Magdalene appulsam in Gallias pluribus rationibus tueatur atque confirmat, & opposita huic sententiæ argumenta eruditissime more suo refellit atque confutat.

sime mansit; quo tandem in antro extremos dies suos clausit, & sanctissime placidissimeque decessit. Hujus loci sanctitatem plurimi faciunt Massilienses, atque illud antrum veluti sacrarium quoddam inter ipsos a Deo positum esse & constitutum arbitrantur. Itaque eo religionis causa frequentes ventitant, & relicta apud eos sanctissimæ fœminæ vestigia, non obscura illa quidem, sed maxime illustria ac prope manifesta, venerantur. Eo autem non crebri Massilienses solum veniunt; sed eodem ejusdem religionis studio ex circumstantibus etiam provinciis summi fieri nunquam non consueverunt maximique concursus. Avenione cum esset Franciscus Petrarca, civis vester, Florentini, eo se contulit, & sanctissimam fœminam impensius veneratus, cum ipsam, tum etiam antrum, ubi illa habitasse atque obisse fertur, pereleganti carmine celebravit.

XXIII. Hæc quondam fuit de illo sanctissimo speculissimi ac sapientissimi viri perhonorifica sane ac plena auctoritatis testificatio. Hæc item vetus est, jam inde ab antiquissimis repetita temporibus de illo ipso antro constans Massiliensium & consentiens opinio. Quid tum? Exorti sunt isti, qui nimiam Massiliensium, eorumque, qui idem atque ipsi sentirent, levitatem credulitatemque, ut ajunt, increpantes, rem totam, propter incredibilem, quemadmodum ipsis videtur, a remotissimis disjunctissimisque regionibus Massiliam usque sive peregrinationem, sive navigationem, nullis eorum

rum, qui illo vixerunt tempore, scriptis consignatam, ab historia ecclesiastica removerunt sic atque amandarunt, ut prope reliquus ei tantummodo locus aniles inter fabulas, & Poetarum commenta relictus sit.

XXIV. Video hic quid egerim, Florentini. Erigunt se adversarii, & sperant aliquam favoris vestri ex allatis exemplis auram sibi afflari posse, propterea quia probabiles Critici tum de Jacobi Apostoli in Hispaniam profectio, tum de Cæsaraugustana Deipara, tum denique de hoc Mariæ Magdalenz ejusque comitum Malsiliam sive appulsu, sive adventu multo aliter, atque ego existimare visus sum, opinantur. Hic vero quid ego dicam? quid reponam? Possem equidem, si liberet, argumenta asferre, quæ id ipsum, de quo isti triumphum agunt, docerent ac demonstrarent. Possem hic quoque ad traditionem confugere, cujus magna dignitas semper fuit, magna auctoritas; magna vis; quæ magnum semper attulit ad res confirmandas gravissimumque momentum. Sed hoc in præsens non est necesse. Nondum enim ad ea facta venimus, quorum defensionem placet contra istos patrociniumque suscipere. Prima hæc de pravo artis criticæ usu actio nostra, tanquam in pugna, velitatio quædam est, in qua solum placet experiri, quid ego in lacescendo, & explorare, quid ipsi in resistendo possint. Jam ut minime negem alios aliter prolatis de factis sentire; contendo tamen non idcirco statim istis concessum esse, aliquod hujusmodi factum probris incessere, & per

& per summum contemptum prorsus abjicere atque respuere. Hac ego nunc istos parte aggredior, quæ debilis magis est atque infirma, & qua se peti a me cum ipsi minime volunt, tum ego illos pro eo, quod suscepi, boni accusatoris officio adoriri maxime debeo.

XXV. Age vero; res, quæ in controversiam venit, non satis liquet; alii aliud de ea existimant; alii negant, alii affirmant. Audio. Si quis aliter, atque ego, atque alius quispiam, sentiat, non contradico; nec vero a quoquam postulo, ut hanc potius, quam illam, quandoquidem res in disceptatione posita est, sequatur opinionem. Optio ejus, qui rem discutendam suscepit, tota sit; eligat, quod placet, quod libuerit, teneat; me odiosum profecto nunquam interpellatorem habebit. Siquæ sunt, in utranque partem rationes proferantur, rationum ipsarum momenta utrinque bona fide ponderentur; nihil malitiose subducatur, nihil fraudulentè dissimuletur, ad extremum lectoribus judicium relinquatur. Quodsi quis sententiam interponere velit suam, & quod sentit, libere pronunciare, interponat, pronunciet, non impedio; sed contrariæ sententiæ parcat, a probis & contumeliis absteineat.

XXVI. Quod igitur damno, & jure quidem damno, illud est, quod, quotiescunque res aliqua in historia præsertim ecclesiastica occurrit, quæ exploratissima non sit, statim manifestæ falsitatis arguatur, continuo fabulis ac commentis, tanquam omni prorsus de-

sti-

stituta probabilitate , adjudicetur . Quid ? Non placent , ut in postremo allato exemplo consiliumus , rationes , quas afferunt auctores sententiæ , quæ Massiliensibus favet . Audio . Non satis quod contendunt , evincunt . Esto . Contrariæ sententiæ subscribere placet ; per me licet , subscribe ; fac quod vis , non repugno . Facile patior , in causa variis utrinque studiis agitata tuo te uti arbitrio . In hoc vitium non est . Verum , quod vitium est in aliquo historico facto examinando vel maximum , quo jure ? qua lege ? quo exemplo illico rem controversam , quæ tibi minime arridet , probris incesse ? contumeliis afficies ? omni probabilitate nudabis ? illi , si qua habet verisimilitudinis , tanquam ingenuitatis ornamenta detrahes ? turpissimam falsitatis notam inures ? ex historia denique miseram , abjectam , spoliatam ejicies , extrudes , exterminabis ? Qui id factum deicit ? qui oportuit ? qui salva fieri æquitate potuit ?

XXVII. Atque hic nolite putare , Florentini , nos Italos istis , qui tantam Hispanis & Massiliensibus , quantum ostendimus , injuriam irrogarint , nos inquam Italos istis præcipuos adeo atque eximios fuisse , ut nobis pepercerint , & nullum hoc in ipso genere , de quo dico , negotium facesserint . Immo vero ita nobiscum se se gesserunt , ut nesciam , an quidquam nobis inferre gravius , majusque facessere negotium potuerint , de quo neque satis dolenter conqueri me posse video , neque vero satis vehementer vociferari me posse intelligo .
Te-

Tenuimus trecentos & eo amplius annos , atque ulla sine controversia tenuimus , Sanctissimæ Dei Genitricis ædiculam , quæ Lauretana nuncupatur , ad nos inaudito prodigio usque a Galilæa , quæ Palæstinæ regio est remotissima , cælestium spirituum opera mirabiliter deportatam . Quantum inde Italiæ nostræ decus accreverit , quantum præsidium accesserit , quæ sit populorum omnium de illa augustissima domo opinio , hic nihil dicam , propterea quia huic rei certus est a me locus atque integer his in actionibus reservatus . Nunc tantum dico ; istos ne huic quidem omnium sanctissimo ac sacratissimo loco pepercisse , neque tantam religionem , tot tantisque prodigiis confirmatam esse reveritos ; negasse , Lauretanam domum eam ipsam esse , quam Sanctissima Dei Genitrix , Nazarethi cum degeret , habitavit , & ita nos per summam injuriam omnium ornamentorum maximo sacratissimoque spoliasse .

XXVIII. Jam vero , quo nam pacto ornatissimas hæc , quas paullo ante nominavi , nationes tam insignes gravesque injurias tulisse arbitramini ? Quem luctum Hispanorum ? quos gemitus illorum populorum ? quas fuisse querelas putatis Mafsiliensum ? per summam indignitatem sibi domestica erepta esse ornamenta ; vetullissima sanctissimaque monumenta immoderata istorum in opinando libertate polluta quodammodo ac violata ; quod quidem est hujusmodi , ut vel ipsi barbaris immanibusque gentibus miserum semper visum fuerit & maxime cala-

calamitosum . Omnibus enim hominibus illud ab ipsa natura ingeneratum est , nihil ut iis rebus carius habeant , nihil diligentius custodiendum , nihil majori cura , si quando sive ereptum sive violatum sit , aut recuperandum , aut vindicandum putent , quam ea , quæ aliqua religione , aut etiam sola religionis opinione sunt consecrata . Reliqua sibi auferri iniquo quidem animo ferunt , sed aliquo tamen modo patiuntur . Hæc autem sibi eripi maxime indignum , miserandum , acerbum ac luctuosum existimant , & nullo modo ferendum arbitrantur .

XXIX. Nam quid nos Itali , si vere Itali sumus , & de patria dignitate solliciti , quid , inquam , de istis sentiendum existimabimus ? Quo animo erga hujusmodi homines esse debemus ? qui non dicam tantum nobis invidere decus ausi sunt ; sed tantam , quantum quidem ipsi assequi potuerunt , adimere religionem non dubitarunt . Ego sane , ut de me fatear , ob attentatum ab istis tam sanctum venerandumque monumentum , non solum vehementissime commotus fui , sed tantum animo cepi dolorem , quantum verbis explicare non possum . Sed hac tota de re , ut paullo ante dixi , suo loco ; quo cum venero , ita sacratissimæ illius domus , atque adeo Deiparæ ipsius , cujus illa donum est , causam suscipiam , ita nervos animi ingenique mei contendam omnes , ut si minus ea , qua par est , dignitate , causa ista a me tractabitur , illud perficiam profecto , quod solum de mea tenuitate præstare possum , ut omne
ne

ne studium meum , neque Italiz universæ , quæ cælesti hoc munere cumulata cæteris gentibus atque nationibus prælata fuit , neque meæ qualicumque erga sanctissimam atque amantissimam Matrem pietati , cui secundum Deum omnia me debere profiteor , neque vero Deiparæ ipsi , cujus singulari atque eximio beneficio donum hoc ipsum tot jam annos , atque adeo sæcula possidemus , defuisse videatur .

XXX. Sed antequam huic actioni finem imponam , atque ad reliquas , quas de pravo artis criticæ usu habiturus sum , progrediar ; poterone ab istis obtinere , ut æquo inter nos , quemadmodum ab initio constituimus , & legitimo jure disceptetur ? Nam , per Deum immortalem ! quod genus Criticæ hoc esse dicam , quod nunc ab istis in morem inducitur ? Hoc autem jus , quod novo hujusce artis criticæ generi cuditur , inconditum omnino atque ab ipso humano sensu prorsus abhorrens , quo potissimum nomine appellem ? Clamat persæpe tota antiquitas , atque aliquid ita , non autem secus , se habere pronunciat ; clamat traditio , quæ se omnino audiri vult ; ornatissimorum populorum ac florentissimarum nationum accedit consensus , (ut nihil hoc loco dicam de ratione , quæ non raro manifeste se prodit , & luce sua istorum oculos everberat atque percellit) ; ecce tibi repente exsurgit unus ex istis , nova Critici dignitas , non studio vigiliisque confectus , sed unguentis oblitus , odoribusque perfusus , & cerviculam jactans , ac ne-
scio

scio quid de veteribus , tanquam de obliuioſis ac deliriſ ſenibus præſatus, unus maximis totius antiquitatis clamoribus oblitrepere , unus ſanctiſſimis traditionis vocibus reclamitare , unus conſpiranti populorum ac nationum conſenſui aduerſari , unus grauiſſimæ tot conſequentium auctoritatum teſtificationi refragari , rationi , juri , æquitati reſiſtere unus ac repugnare non dubitat . Quæ ? malum ! quæ iſthæc intemperantia eſt , atque licentia ? tantumne iſti ſibi facultatis ſument , quantum a nemine ante eos ſumptum aut legimus aut audiuiſus ? Hæc autem ars tantum juris cultoribus ſuis tribuet ? tantum poteſtatis indulgebit ? Non igitur traditio ? non poſſeſſio ? non jus ? non æquitas quidquam valebunt ? non ſuffragabuntur ?

XXXI. Atqui & jus, & æquitas, & poſſeſſio valere debent, & cujuſque generis cauſas patrociniari. Nam, utram iſti meliorem conditionem putant poſſeſſoris ne, an petitoris ? Ego tot annos atque adeo ſæcula in poſſeſſione ſum; nemo adhuc mihi moleſtus fuit ; nemo litem intendit ; nemo dicam ſcripſit ; nemo umquam dubitauit , quin eo jure eſſem, quo , qui optimo . De repente exſiliunt iſti , litem intentant , dicam ſcribunt , ac jus in judicio perſequi incipiunt ſuum. Hoc tametſi iniquum videri poteſt, tamen non repugnabo . Verum hoc loco quæro, ejuſne , a quo petitur , an eorum , qui petunt , tota probatio futura erit ? Eorum arbitror . Ita plane eſt . Hos igitur proferre tabulas , hos docere , hos probare , ſiquidem ali-

quid

quid efficere velint, oportebit. Quod si non faciant; nunquam profecto me loco movebunt, nunquam de possessione deturbabunt. Doceant ipsi prius certissimis invictissimisque rationibus, siue me, siue eos, a quibus id acceperim, de quo lis est, in aliena jura aut venisse temere, aut dolo malo irrepisse. Hoc nisi plane doceant, nisi demonstrent, nisi luce clarius ostendant, nulla ut mihi alia ratio suppetat, præter hanc, de qua dico, diuturnæ possessionis apud omnes judices, modo non iniquos & perditos, causam obtineam necesse est. Ita opinor fieri solere, ita oportere, ita æquum esse, ac rationi consentaneum.

XXXII. Nam si casu aliquo tabulæ interciderint, cogesne me illas proferre, testamenta expromere ac recitare, quæ vel ignis absumpsit, vel imber corruptit, vel tineæ devorarunt, vel ipsa vetustas confecit? nonne tum vel maxime inveterata me possessione tuebor? His ego armis instructus procedam in medium; his contra petitores meos stabo; his, quoad potero, resistam; quæ mihi si arma eripiantur, omnes adversariorum ictus excipiam necesse erit, quibus contra jus fasque omne juguler atque confodiar. Illud vero novum in istis præterea ac singulare, quod non annorum solum, sed sæculorum etiam possessione concessa, litem intentare non dubitant. Negas possessionem? Usitatum. Possessionis diuturnitatem inficiaris? Consuetum. Sed possessionem concedere, diuturnitatem pos-

ses-

sessionis non inficiari; & nihilo tamen minus perflare in repetendo, & quemquam conari de possessione, (4) & de diuturna possessione depellere, hoc enim vero novum est ac plane iniquum.

XXXIII. Verum, tametsi hoc & novum est & iniquum, tamen, quoad usque potero, istis indulgendo

Tom. I.

M

de-

(4) De possessione ac traditione Ecclesiarum audiendus est Natalis Alexander loco supra citato, cujus præclaras sententias Parthenius noster tum in hac, tum vero multo magis in consequentibus actionibus exscripsisse videri potest. Huius, *inquit*, impugnatores traditionis si qui de generis nobilitate gloriantur, vel hereditatis feuda, agros, domos, redditus possident, adeo antiquis ac firmis titulis nobilitatem suam ac possessiones vindicare non posse confidenter dixerim; quas si litigiosi homines falsi postularent, ingeniosis forte, sed levibus freti conjecturis, illorum conatus acriter ac vehementer repellerent. Ut ut est, Ecclesiarum Provinciæ traditionem sollicitare nolui, ubi de S. Mariæ Magdalena; nec Ecclesiarum Galliæ cum Romana & Græca consentientem traditionem convellere, ubi de S. Dionysio agendum fuit, nec Dionisii Opera Areopagitæ abjudicare; quamvis speciosis, & difficilibus argumentis opiniones illas impugnari posse probe scirem, quibus pro virili respondi, probabilesque, ut existimo,

responsiones ostendi, non minus, quam contraria argumenta. Has partes ut susciperem effecit abhorrens a novitate indoles, & quod Catholici ac religiosi Theologi officium esse duxerim traditiones Ecclesiarum, ubi de illarum originibus agitur, sequi potius, quam evertere; veterumque Patrum opera, quantum fieri potest, tueri, nec consentire Hæreticis illa Fidei, ac disciplinæ propugnacula, puros illos traditionum Apostolicarum latices ad inferiora sæcula detrudentibus, & auctoribus ignotis tribuentibus. Non enim *in destructionem, sed in ædificationem* talentum qualescumque scribendi a Deo mihi collatum arbitror. Minus eruditus, & reconditoria litteraturæ minus peritus hoc nomine videar neotericis quibusdam Criticis, a quibus laudari meruissæ, si Launojanas opiniones adoprassæ; & quas dilui objectiones, probationum loco posuissæ; officio nihilominus fungar meo, inani gloriæ non militans, quam spernere doctor Christianus debet; sed uni Deo placere, & vere sapientibus probari curans.

descendam, nec ea contendam, quæ in omni bene constituto iudicio impetrare debeam. Volunt præcipuo esse jure? Sint, non abnuo, non recuso. Placet in omni historia liberius dominari? per me licet, dominentur. Nolunt religione ulla impediri, quo minus inveteratæ alicui ac receptæ opinioni refragari possint; quandoquidem ita cupiunt, abeant ista etiam cura per me soluti, molestiaque liberati. Illud tamen unum istis edico, atque ante denuncio, ut inanes conjecturas missas faciant, ut ineptis argumentis parcant, ut levibus pugnare rationibus ne velint; sed si aliquid hujusmodi meditantur, ea afferant, quæ merito suo cuivis inveteratæ possessioni jure anteferenda existimentur. Hoc si præstiterint, tum iudicium aliquo modo agi videbitur, & aliquis æquitati locus relinquetur; si secus, omni sublata equitate, non jam amplius iudicium instituetur, sed latrocinium comparabitur.





DE PRAVO
ARTIS CRITICÆ
U S U

ACTIONIS II. LIBER II.



Enio nunc ad Lauretanæ domus causam, quam superiore actione mihi maxime cordi esse significavi, quamque me omni & ingenii, & virium contentione, quantum quidem hac mea facultatis mediocritate assequi potuissem, acturum, si meministis, recepi. Vos ad ea, quæ dicturus sum, animos quæso vestros erigite, Florentini; per ipsam, obsecro, Sanctissimam Dei Genitricem, eandemque omnium nostrum amantissimam Matrem, per ipsam, inquam, cujus honos agitur atque existimatio, cujus religiosissimum augustissimumque monumentum ab ipsamet in nostris sedibus constitutum & collocatum trecentos

& eo amplius annos ulla sine controversia tenuimus; (a) postea vero ab immoderationibus Criticis in controversiam vocatum, nobis ab istis, quantum quidem effici per ipsos potuit, ereptum fuit, atque omni propemodum religione spoliatum atque nudatum. Etenim si Lauretana domus ea ipsa non sit, quam Deipara, cum viveret, incoluit, ecquis est, qui non intelligat, & illam multo potissimam religionis suæ partem deperdere, & nos una cum ea ornamentorum omnium longe maximum atque ampliissimum amittere? Quid enim ad Italorum nomen famamque præclarius? quid ad prædicationem illustrius? quid ad exterarum gentium atque nationum, prope dixerim, invidiam magnificentius? quid denique sanctius ac religiosius expeti aut optari a nobis potuit? quam beatissimam illam ædem tot miraculis nobilitatam, tot populorum concursu frequentiaque celebratam, tanta opulentissimorum copia donariorum cumulatam, inaudito prodigio, per ingentes terræ marisque tractus transmissam ad nos venisse, inter nos locum optasse, apud nos constituisse, & quod præcipuum est, una cum illa tutissimum certissimumque in angustis rebus omnibus ac difficillimis præsidium nobis divinitus fuisse oblatum; nihil
ut

(a) Nazarena domus translata in semel, iterum, atque tertio commo-
Dalmatiam fuit anno 1291. die 9. ratione, constituitur. In definiendo
Maii; anno vero 1294. die 10. De- harum translationum tempore aucto-
cembris in Italiam asportata; octo res omnes, qui de Lauretana domo
deinde post menses anno 1295. in scripserunt, consentiunt.
via militari, ubi nunc est, mutata

ut in vita sive ad animi, sive ad corporis præsentem tutelam exoptandum expetendumque sit, quod nos a Deipara, a qua Italia nostra non diligi solum, sed incolæ etiam habitarique videatur, nostro propemodum jure sperare non possimus. Adeste igitur animis, Florentini, & si rem paullo altius exordiar, id non tam meo qualicumque erga Deiparam studio, quam rei ipsius, de qua acturi sumus, magnitudini adscribendum putetis.

II. Nazarethum est oppidulum pervetus in Galilæa, quo Joachimus & Anna, Mariæ Parentes Sanctissimi, bellici tumultus vitandi causa, solum vertere coacti e Bethleemo, avita sede, concessisse dicuntur, ibique domicilium collocasse. Nazarethi quæsitæ domus, coempta ædícula est; parva illa quidem & humilis, si ædificii forma spectetur; sed plane magna & augusta, si divina mysteria, quibus consecrata fuit, uti par est, æstimentur. Nam ferunt, ibi conceptam & natam esse Virginem, ibi educatam, ibi cælestem Nuncium allocutam, ibi singulari miraculo Dei matrem, nulla integerrimæ virginitatis jactura, effectam, ibi denique magnam ætatis suæ partem sanctissime ab eadem fuisse transactam. Loci sanctitas ea erat, quæ obliterari penitus ac deleri nec poterat, nec debebat. Itaque tradunt, Sanctos Apostolos beatam illam ædicalam omnium primos, summo, ut æquum erat, in honore habuisse, atque in templi speciem concinnatam, ara excitata, ipsum Apo-

stolorum Principem Petrum rite consecrassē . Exinde Nazarena domus non solum ab accolis , sed etiam ab advenis nunquam non impensius culta fuit , ac frequentius celebrata . Visebatur enim religionis ergo ab Asianis , Afris , atque Europæis . Eo etiam venit Helena Augusta , & pro sua erga Sanctissimam Dei Genitricem pietate elegans , ut Nicephorus tradit , Virginis domicilio templum circumdedit . Consequentibus deinde temporibus multi illustres viri eodem , ejusdem religionis studio impulsī , se contulerunt . Tenuit hæc religio multa sæcula , donec Christiana res in Oriente viguit . Verum , postea quam Christianorum opes iis in terris comminutæ a Barbaris atque attritæ conciderunt , & capta Ptolemaide , Ægyptius Rex florentissimam regionem late diruit atque vastavit , omni ferme aditu ad loca sancta intercluso , ac præcipue ad Nazarenam domum Regis avaritia obstructo , religio quoque sanctissimi loci sensim deficere , in dies imminui , ad extremum quasi prorsus aboleri . Non tulit Deus Matris suæ incunabula omni omnino cultu atque honore destituta inter Barbaros manere diutius . Ergo anno nonagesimo primo supra millesimum & ducentesium , qui annus etiam suprema Palæstinæ clade notatur , natale Virginis tectum cælestium spirituum ministerio (admiranda sane res , & ad eam diem inaudita , sed nequaquam omnipotentis Dei facultate superior , Angelo hac ipsa in domo affirmante ; *non fore impossibile apud Deum omne*

ne verbum) a fundamentis avulsam, & ex Asia in Europam translatum in æquata non admodum editi collis planitie, Tersactum inter & Flumen, quæ duo sunt Dalmatiæ oppida, prope Adriatici maris oram constitutum est. Illic annos ferme quatuor ad illarum gentium solatium sacra ædes est commorata; mox^e repente, non sine maximo Dalmatarum luctu ac dolore, trajecto mari, eorundem cælestium spirituum opera, in Italiam venit. Verum ne hic quidem Virginali domui a principio certa sedes & stabilis. Nam deinde locum iterum ac tertio mutavit; nec tamen a nobis omnino discessit. Eximium enimvero mirifici erga nos Deiparæ amoris indicium atque argumentum, quæ a nobis non ea certe, qua par erat, grati animi significatione, cum primum in Italiam se contulit, excepta, locum quidem mutavit, sed nos prorsus deserere, uti meriti eramus, amantissima Mater non sustinuit. Sacra igitur domus primum in Italiam advecta sylvam quandam in agro Recinetensi non procul a mari insedit. Verum non diu mansit in loco. Nam facinorosi quidam ac perditissimi homines, sylva occupata, interceptis per insidias, necatisque peregrinis, omnia cruentis cædibus latrociniiisque miscere, ac nefandum in modum polluere cœperunt. Pollutum humano cruore, & tanto scelere violatum hospitium Virgo deseruit, atque ex eo saltu in colleni duorum Fratrum commigravit. Verum, uti e sylva infame latrocinium, sic ex isto colle turpis ac

detestanda horum Fratrum avaritia divinam Hospitem expulit atque ejecit. Etenim cum ab advenis juxta atque ab indigenis opulentissimis donis Virgo coleretur, hi sibi hæreditatem obvenisse arbitrati, de ea certare inter se instituerunt, ac tantis odiis dissidere, nihil ut propius factum fuerit, quam ut prædæ cupiditate obcæcati mutuis sese vulneribus avaritia stimulante conficerent. Antevertit Deus immane facinus, sublata odii causa rixarumque, & Maternam domum e Fratrum colle ad teli jactum in viam militarem transtulit, ibique constituit, ubi etiam nunc est, ac tot annos atque adeo sæcula immota perstat, ut merito sperare possimus, Sanctissimam Dei Matrem, cujus divinum hoc munus, tanquam prædem atque obsidem eximiae benevolentiae ac voluntatis erga nos suæ, tamdiu obtinemus, nunquam Italiam derelicturam, atque æternam sedem apud nos ac perpetuum domicilium habituram. Habetis expositionem facti, rem tenetis Florentini. Audite nunc quomodo tam insignis facti, tam illustri, tam pervagati veritatem isti elevare conentur.

III. Ac primo, propter nimiam *incredibilitatis*, sic enim loquuntur, speciem, quam factum istud præsefert, de facti ipsius veritate jure dubitare se posse, atque adeo debere contendunt. Quid hoc loco dicam Florentini? quid reponam? quam potissimum ratione ac via ad tanti prodigii ac tam memorandi propugnationem aggrediar? Negabo, hujusmodi prodigium esse ma-
xi-

ximum, singulare, inusitatum, inauditum? At per Deum immortalem! quid tam novum ac singulare, quam domum a fundamentis avulsam, integram alio transferri, tot loca maxime disjuncta atque remota peragraré, interjecta maria transire, tantum spatii, quantum Palæstinam inter & Italiam medium jacet, conficere? Quid unquam post homines natos simile contigit? Quis unquam tale aliquid, aut narrari audivit, aut vero etiam legendo quærendoque cognovit? Itaque prodigii magnitudinem, quæ dissimulari non potest, non negabo, non extenuabo verbis; concedam id, quod necesse est, quod isti maxime volunt, prodigium esse omnino insolitum, esse inauditum, esse singulare. Addo etiam, quo me istis magis dedam, esse hujusmodi, ut pene ipsam fidem superare videatur. Quid igitur? Causa excidam? minime sane. Sit hoc prodigium singulare, sit admirandum, quod concedo; attamen ajo, non idcirco falsum continuo esse atque confictum existimandum. Ita me Deipara semper adjuvet, ita viventi ac morienti bona Mater præsens adsit, cujus cæleste hoc donum, ab ipsamet nobis datum atque oblatum, ab istis vero per summam injuriam ablatum atque ereptum in præsentia repeto, ut non modo non causam amittam, ut etiam hinc vel maxime ad causæ istius defensionem viam mihi muniam, atque aditum patefaciam.

IV. Etenim primo illud valeat iis in rebus, quæ sui admirationem in hominum animis excitare vehementius so-

solent, eas fere fingi non solere. Quis enim eaingat, quæ omnem omnino fidem superent, quæ vix audita, tanquam falsa atque incredibilia, convicio statim repudientur. Nam, ut præteream vix quenquam adeo effulse petulantem, qui tantum audeat, reperiri posse, hoc etiam a fallendi ratione quam maxime abhorret. Quorsum enim aliquid hujusmodi quis excogitet ac comminiscatur, nisi plane fatuus atque amens sit, quod neminem unum propter insignem rei ipsius sive magnitudinem, sive insolentiam crediturum certo sciat. Fingite, aliquid simile nunc in vulgus efferri. Quis crederet? nemo certe, qui sanus esset. Hoc ego dico, Lauretanæ ædi a principio accidisse. Dico, tum Dalmatas, tum Picentes tanti prodigii novitate perculsos eorum, qui rem nunciaissent, levitatem risisse, asseverantibus credere noluisse, & insigni fortasse contumelia affectos ab se repulisse ac rejecisse. At postea tum Dalmatæ, tum Picentes assensi sunt. Igitur adeo prodigii veritas explorata fuit, ut vel ab invitis assensum potuerit extorquere; nisi forte duas florentissimas nationes nullis certis argumentis, ut rem tantam, tam novam, tam inauditam, tam admirabilem crederent ac divulgarent, fuisse adductas, velimus existimare.

V. Et sane si rem ipsam paullo attentius consideremus, patebit profecto hanc, quam nobis obijciunt, prodigii magnitudinem, prodigii ipsius veritatem adstare, atque huic causæ non solum non obesse, sed etiam prodesse.

desse quam maxime . Age vero ; in vacua atque inani Illyrici collis planitie nova repente conspicitur stare domus . Magnum videlicet erat , certo scire nullam antea ibi neque domum , neque domus fuisse vestigia . Hoc indigenas ignorare quis sibi persuadeat ? In hoc igitur colle , quem plane vacuum atque inanem fuisse constabat , præter omnium opinionem expectationemque nova apparet ædes . Quid hoc rei est ? quod monstrum ? quod portentum ? Quis huc lapides ac cæmenta conveyit ? quis opus descripsit ? quis operi faciundo præfuit ? Quis potuerunt tam brevi tempore comportari & coagmentari lapides , duci parietes , tectorium superinduci , culmen imponi ? qui una nocte ædificari domus , atque adeo exædificari potuit ? Video , hoc tanta celeritate fieri omnino non potuisse . Verum , esto , fuerit ita factum , potuerit una nocte furtim ac raptim exstrui domus , perfici ædificium . Quid illud ? ecqua arte factum dicemus , ut isthuc , quidquid operis est , non recens exstructum , sed vetustum appareat , & , si unam religionem demas , quæ plurima & maxima loco inerat , sola antiquitate visendum . Affricu exesi parietes , picturæ evanescentes , tectorium ex parte delitum , limen attritum , caminus fumo infuscatus , Deiparæ statua in loculamento ex cedro elaborata & pervetus , omnia denique unam præferunt , unam exhibent antiquitatem . Omnia ab omnibus eo magna frequentia partim religionis , partim visendi studio confluentibus diligenter

gentius inspecta; singula curiosius perlustrata, investigata follertius, nusquam tamen recentis operis conspecta signa, nusquam nisi vetustatis indicia reperta; omnes ad unum, quod necesse erat, in eam sententiam ire, aut sacram ædem illuc aliunde divinitus advectam, aut ab ipso cælo demissam.

VI. Sed fac (videte quæso, Florentini, quid bonitate causæ confusus istis largiar) fac, inquam, artem hoc assequi potuisse, ut tot oculos singula attente ac per otium contemplantes falleret. Qui potuit illud? ut hæc ipsa ædes e vestigio ex omnium conspectu evanesceret. Hic certe locus arti ac fallaciis reliquus est nullus. Neque enim arbitror Architectum ullum reperiri, qui machina apposita movere domum aliquam possit, eamque transferre, quo velit; id autem multo minus perexiguo tempore, atque adeo momento temporis. Quanta molitione celeberrimi illi Ægyptiorum Obelisci excisi, formati, asportati, ac demum loco suo constituti fuerint, quis ignorat? Cui Caligulæ Obeliscus ab antiqua sede motus, & e proximo Circo ad templi atque areæ Vaticanæ ornamentum translatus inter admiranda Sixti V. opera memoratur; nec minus, quam unius anni spatio, & quadringentorum hominum opera res tanta perfici potuit. Sed ut eo redeam; ædes, quæ proximo die in colle Illyrico conspiciebatur, amplius non apparet, nulla est; nihil reliqui, nisi vestigia in loco, quem occupaverat, relicta. Quid est hoc? quo abiit?

quo

quo concessit ? quo se ex omnium repente oculis conspectuque proripuit ? Quæ molitio ? quæ ferramenta ? qui vectes ? quæ machinæ ? qui ministri tanti operis fuerunt ?

VII. Non longum in medio tempus ; certus ex Piceno rumor affertur mare transisse , in Italiamque commigrasse . Idem stupor , ac religio , quæ Dalmatarum mentes inceserat , Picentum quoque animos occupavit . Certatim omnes ad nemus , ubi consiterat , confluere ; mirari domum tam subito eo in loco constitutam ; hære , obstupefcere , subire limen , & loci ipsius religione edocti illam non tam domum , quam ædem esse sacram , procidere in genua , Deiparæ simulacrum in loculamento conspicuum venerari . Quid dicerent homines minime creduli , & satis ad suspicandum acuti ? Ædificiumne illud raptim ibi ex lapide redivivo fuisse constructum ? At eo in loco , solis arboribus confito , rediviva non erant . Eone aliunde fuisse comportata ? At quemadmodum tam brevi atque exiguo tempore ? An ædificium ipsum integrum aliunde translatum , ibique subito constitutum ? Multo minus . Utrum somniare sese ? At probe vigilabant . An etiam vigilantes vana quadam atque inani objecti cujusdam spectri specie falli ? At oculi , manus , fidem faciebant . Deceptosne se alicujus fraude atque præstigiis ? At a quo ? at quomodo ? Quid igitur credere ? quid opinari ? quid dicere ? quid affirmare poterant ? Illud unum profecto ,
quod

quod ego , quod vos , quod quivis sanæ mentis , si præfens fuisset , illud , inquam , unum , quod reliquum erat ; Inopinatum illius ædis adventum unice ad Deum tanti prodigii auctorem esse referendum .

VIII. Sed esto ; fuerit aliquis inter eos tanta pertinacia , sive potius amentia , qui , quod omnes crederent , omnes ad unum affirmarent , quod ipse usurparet oculis , manibus contrectaret , credere noluisse ; quid hunc dicturum ? quid sensurum tunc fuisse arbitramini ? cum eam ipsam ædem , quam in sylva conspexerat , e sylva in collem duorum Fratrum , cum rursus e colle duorum Fratrum in viam militarem translatam vidit . Nonne tunc amplius repugnare non potuisset ? nonne dare manus , reliquis assentiri , & se plane victum convictumque ipsa oblata prodigii evidentia fateri coactus esset ?

IX. At credo , hæc momento temporis acciderunt , ut intervalla stationum observari satis commode non potuerint . Immo vero si unquam locus , si tempus , si opportunitas aliquid diligentius examinandi , & sollertius ac per otium inspiciendi fuit , hæc omnia certe in hoc prodigio summa fuerunt . Mansit enim sacra ædes apud Illyricos annos tres & menses septem , in nemore Recinetenſi menses octo , in colle duorum Fratrum , brevior quidem spatium ; sed tamen non ita contracto , ut facile non solum ab accolis atque indigenis , sed etiam a convenis & peregrinis sæpius adiri , omnia attentius considerari investigarique potuerint .

Hoc

X. Hoc autem loco quid nobis adversarii concedent ? quid nos ipsis adversariis concedendum putabimus ? Dabimusne Illyricos ac Picentes prodigii novitate attonitos atque obstupefactos vix sui compotes fuisse, hæsisse diu ante quam certi quidquam de tanta re statuerent ac definirent ? Demus hoc, per me licet. Verum quodnam est hoc *diu*, quod non dies, non menses, sed prope quinquennium totum obtineat ? Nunquamne Illyricos ac Picentes toto quinquennio ex stupore se recepisse ? semperne attonitos ? semperne obstupefactos hæsisse credemus ? Dabimusne hosce homines ingenio esse levi, ac credulo ? Demus hoc etiam, non repugno ; sed usque-
ne eo dabimus, ut illos plane stolidos ac meros stipites existimemus, qui, cum prodigii explorandi summam opportunitatem haberent, aut hanc ipsam opportunitatem negligerent, aut quod ipsis satis cognitum exploratumque non esset, in vulgus spargerent ac disseminarent. Facio injuriam cultissimis gentibus, qui de iis perinde loquar, quasi de earum ingenii sollertia ac sagacitate dubitarem. Sed mihi ignoscent opinor ; bonitas causæ, quam defendo, fecit ut huc usque progrederer.

XI. Cæterum nec Illyrici, nec Picentes in re tanti momenti sibi defuerunt, ut mox demonstrabo. Interim illa consideremus quantum ad fidem tanto prodigio conciliandam valere debeant. Prodigium hoc non semel fuisse perpetratum, sed iterum, tertio, ac quarto ; totidem enim vicibus Lauretana ædes locum stationemque mu-

mutavit. Age, prima vice attentius considerari non potuerit. Quid? non potuit altera, tertia, quarta denique? Illo, non potuerit ab Illyricis. Quid causæ fuit, cur neque potuerit a Picentibus? Duasne provincias in re gravissima usque adeo fuisse dissolutas, ut quoties tanti prodigii species earum oculis fuerit objecta, toties de ea aliquid certi cognoscere neglexerint? Etenim si hoc prodigium semel tantum, uti dixi, perpetratum fuisset, si apud incultas barbarasque gentes, si in ultimis Indiis extremaque Japonia, si uno tantum in loco, si clam atque obscure, si uno solum aut altero inspectante, si tempus, si occasio ejus explorandi defuisset, si ab omni nostra memoria omnino remotum, & in primorum sæculorum obscuritate delitescens, si denique ad eorum genus referretur, quo in genere oblati per noctem speciebus quibusdam ac rerum imaginibus facile decipi atque in errorem induci homines possunt; (quanquam hoc prodigiorum genus sacris ipsis jitteris consecratum, non continuo repudiari deberet) tamen si hoc nostrum in hujusmodi genere esset, haud ita ægre paterer adversarios de hujus prodigii veritate, propter summam ipsius admirabilitatem, dubitare. Admirabile quidem est, singulare, nunquam antea auditum. Quis negat? At sæpius visum, sæpius inspectum, sæpius investigatum; at palam atque aperte patratum; at clarissima luce, frequentissima celebritate, in ore atque oculis duarum florentissimarum provinciarum,

rum , at hujusmodi , quod sensibus perspectum fuerit ; in quo non astus , non insidiæ , non prætigia , non vanæ rerum species , non imagines , non insomnia locum habere potuerunt , non denique unum , sed multiplex , ut posteriora prodigia priorum veritatem , nova quædam , sed hac in re ad fidem faciendam , maxime accommodata ratione confirment . Quid igitur isti volunt amplius ? quid requirunt ? quid ulterius flagitant ? In eo ne diutius perseverabunt , ut mihi tanti miraculi novitatem objiciant ? quæ tantum abest , ut hanc causam infirmet , ut potius ex ipsa novitate maximum causæ ipsi robur ac firmamentum accedat .

XII. At enim exsistere vetus quædam in Piceno ædícula potuit Deiparæ consecrata , quæ falsæ opinioni , & concinnando dolo occasionem præbuerit . Facile patior , in causa optima mihi ista opponi , quæ per se facile diluuntur ac refutantur . Etenim hujus sacræ ædis , de qua dico , forma , cultus , positus , vetustas , picturæ , ea ipsa , quæ reperta sunt in æde sacra , si attentius considerentur , eam vim habent , ut omnem ab animis nostris doli suspensionem amoveant , & prodigii veritatem mirifice confirment . Quis enim novam atque inauditam domicilii & templi conjunctionem excogitavit ? quis confinxit ? atque adeo excogitare quis potuit , atque confingere ? Quorsum in æde sacra caminus ? quorsum armariolum fictilibus asservandis fabrefactum ? quorsum ipsa fictilia in armariolo inventa ? Video hæc

habere locum in æde privata ; quem vero locum in sacra habere possint , non video . Quid igitur ista sibi volunt ? quid significant ? quæ quidem , si minime conficta sint , quantum gravia , & ad confirmandam veritatem idonea ; tantum , si conficta , levia sunt , inepta sunt , & ridicula existimanda , ac plane hujusmodi , quæ dolum non adstruant , sed potius evertant . Præterea , hujus ipsius doli verisimilius architectandi causa , altera similis existere in Dalmatia ædícula debuit , quæ in Italiam translata fuisse a Picentibus diceretur ; & sic duas Nationes lingua , moribus , institutis dissidentes , & interjecto mari sejunctas secum convenire oportuit , ut ambæ utramque ædem , quæ apud utrasque existisse , aut exsistere potuisse temere dicitur ab adversariis , Nazarenam esse domum ex composito affirmarent . Hæc autem quis credat ? quis persuaderi sibi ista patiatur ? Quare , ut videtis , omnia aperte docent , hac in re sine fraude ac mala fide Illyricos & Picentes esse versatos , eosque dolum ipsum isto modo componere nequaquam potuisse ; nisi forte velimus existimare , homines maxime ingenuos , atque a fallaciis remotissimos eo usque temeritatis atque audaciæ progressos fuisse , ut turpissimo mendacio posteritatem omnem in re gravissima decipere non dubitarint .

XIII. Sed esto ; videte quæso , quid istis largiar fiducia causæ ; exstiterit multo ante , quam Nazarena domus in Italiam advenerit , ædícula in Laureti finibus Dei-

Deiparæ sacra ; & , si vultis , ut hoc etiam amplius ad-
versariis concedam , Lauretana fuerit appellata . Quid
tum ? quid inde posset evinci ? Statimne hæc ipsa ædes
propter eandem nominis appellationem ea , de qua
dicimus , existimanda erit ? Nihil minus . Non enim
de appellatione , si recte isti attendunt , nostra quæstio
est , sed de re ipsa . Contendo ego Cubiculum illud , quod
nunc Lauretanam domum nuncupamus , non ante ex-
stitisse in Italia , sed Nazaretho in Italiam advenisse .
Hoc argumenta docent , hoc rationes evincunt , hoc
probandum demonstrandumque suscepi . Quid ergo est
cur tabularia mihi quoque non ignota , neque vero im-
pervia , adeant atque scrutentur ? quid ? cur veteres
chartas fugientibus litteris vix conspicuas inspiciant ,
ut cognomines ædes Deiparæ consecratas inveniant .
His ego non tam moveor , si quas invenire possunt ,
quam rationum & argumentorum auctoritate commo-
veor . Etenim per me licet , sanctum hoc venerandum-
que Cubiculum quo demum cumque libeat nomine ap-
pelletur . Deipara enim , quæ in eo colitur , perinde a
vite , ab olea , a quercu , atque a lauro , sive locus ille
lauris confitus fuisset , sive Lauretæ cujusdam Matronæ
Recinetensis , quæ locum illum possedisse dicitur , ju-
ris esset (quod in præsentia nec quæro , nec moror)
deducta nominis derivatione potuit appellari ; quæ qui-
dem appellatio , quæcumque originem habeat , non im-
pedit , quo minus Lauretana Domus re ipsa Nazarena

sit, quod ego contendo; atque ita sua augustissimo sanctissimoque loco inviolata religio maneat. Sed ista missa faciamus, & ad prodigii admirandam novitatem, unde digressi sumus, revertamur.

XIV. Et sane prodigii novitas atque admirabilitas ea erat, quæ hominum animos commovere vehementer & poterat, & debebat. Sed hæc, hæc inquam ipsa miraculi novitas ita omnium oculos ad se attraxit; ita animos subita quadam atque incredibili admiratione perculit, ut mirificum etiam ac singulare rei mirificæ ac singularis certius cognoscendæ studium accenderit atque excitaverit. Neque enim difficile erat videre hujusmodi rem, nisi firmissimis niteretur argumentis, nisi testatissima esset, plus apud posteros admirationis, quam fidei habituram. Attendite igitur diligenter & vosmetipsi judicate, utrum exploratius quidquam ac testatius in tota inveniri historia possit. Dicam primum de summa Tersactensium diligentia, deinde de accuratissima Picentum in explorando prodigio sedulitate.

XV. Et Tersactenses quidem, vir in primis pius ac religiosus, qui Sacra apud ipsos curabat, nomine Alexander, primo certiores facit, sacram ædem recens ad illos advectam eam ipsam esse, in qua Deipara, cum viveret, Nazarethi habitasset, cælestem Nuncium excepisset, & Dei fuisset Mater effecta; idemque affirmavit se, quæ diceret, de ipsa Virgine audisse, cujus sibi dormien-

mienti species fuisset oblata. Porro Alexandri dicto insperata ac subita valetudo (gravi enim morbo, cum hæc acciderunt, implicitus tenebatur) fidem faciebat. Tum enim vero Tersactenses ejus rei certius cognoscendæ incredibili cupiditate vehementer inflammati sunt; omnium eadem & mire consentiens sententia fuit, ut certi homines, qui aliquid certi reportarent, Nazarethum quam primum mitterentur. Frequentes hac de re conveniunt Nicolaum Frangipanum, nobilissimum Equitem Romanum, qui tunc eam provinciam Prætor administrabat, sententiam exponunt suam, rogant, postulant, flagitant, ut statim legatio decernatur. Æquissimis provinciæ postulationibus Prætor obsequendum ratus, quatuor ex omni numero spectatissimæ probitatis ac fidei viros, quorum unus ipse Alexander in primis fuit, elegit, qui Nazarethum adeant, omnia diligentius explorent, quæ exploraverint fideliter referant. Nulla interposita mora Legati discedunt, & secundo cursu in Palæstinam adveſti Nazarethum veniunt. Ut ventum est, nihil illis magis cordi fuit, quam ut statim aliquid Nazarenos de Virginis domo, quæ apud ipsos esse deberet, percunctarentur. Illi respondent fuisse quidem apud se, nunc vero non exstare; se nescire, quo pacto aut evanescere omnino, aut alio transferri potuerit; si domus vestigia, quæ sola erant reliqua, inspicere vellent, se libenter demonstraturos. Legati annuunt, aditur ad locum, ubi sacra ædes

fuerat constituta ; fundamentorum sacri domicilii vestigia vident , domicilium ipsum non vident ; inanis aræ longitudinem ac latitudinem dimetiuntur , atque ad eam , quam secum ejus ædis , quæ apud ipsos erat , attulerant mensuram exigunt ; omnia reperiunt adamussim quadrare , convenire , respondere . Itaque alacres ac successu læti domum regressi , quæ audierant , quæque ipsi viderant , quam in re exploranda diligentiam adhibuerant , quid denique compererant jurati dicunt . Eorum dicta , uti mos est , ad publicum tabularium referuntur . Quid accuratius fieri potuerit , exspecto dum isti suggerant ; ego certe exquisitius quidquam ne cogitari quidem posse arbitror .

XVI. Cognostis Tersactensium , cognoscite nunc Picentum (a) diligentiam . Quatuor a Tersactensibus Legatos diximus fuisse missos ; a Picentibus vero non minus quam sexdecim ex honestissimis ejus provinciæ municipiis delectos , atque omnes suarum civitatum facile principes , primum in Illyricum , deinde in Galilæam scitote missos . Ubi primum Illyricum Legati tenuerunt , magni undique ad eos concursus fieri . Ex omnibus oppidis passim matresfamilias obviam prodire flentes , clamare , vociferari ; Se quidem eorum adventus causam non ignorare , gratulari ipsi cæleste donum ;

fed

(a) Picentes eos esse populos , quos „ que ad Prætutianos , si proprie Pi-
 haftenus indicare Parthenius voluit , „ centes intelligimus ; prima urbs in
 auctor est Cellarius . „ Fines , inquit , „ ora Ancona est . „ Anconam eideam
 „ Piceni in ora Æsi fluminis sunt uf- provincie adcenfet Ptolemaus .

sed suam vicem dolere ac lamentari. Deducuntur Legati magno virorum mulierumque comitatu ad collem, quem sacra ædes ex Galilæa in Dalmatiam adveniens infederat; vident, quod jam ex ipsis indigenis cognoverant, signa quidem, quæ solo impressa sacrum domicilium reliquerat, superesse; domicilium vero ipsum nullum esse. Adhibentur Lauretanæ ædis mensuræ, quas secum ipsi attulerant; omnia congruunt, omnia exacte perfecteque respondent. Interrogant de tempore, quo sacra ædes ex Dalmatia concesserat;prehendunt, eodem plane momento temporis divinum hoc munus & Illyricis ablatum, & Picentibus oblatum. Comperta re, ex Illyrico demigrant, in Galilææ fines veniunt, inde Nazarethum profiscuntur. Atque hic etiam omnia eadem prorsus cura explorata, eadem adhibitæ mensuræ; ne multa; facta mensurarum & locorum, quæ sacra ædes occuparat, contentione, intervalla reperta æqualia, nihil discrepare, omnia cum Nazarena & Illyrica area, & Lauretanæ ædis modo ac forma plane ac mirifice convenire. Anconam, unde solverant, Legati revertuntur. Interposita fide ac iurisjurandi religione Legatorum testimonia excipiuntur, ac litteris publicis consignantur.

XVII. Videtis, opinor, duas hæc religiosissimas Nationes inter se certasse diligentia, utra potuerit adhibere majorem, neutram vicisse; eam enim utraque adhibuit, qua major excogitari non potest. Hic ve-

ro nolite putare , hæc esse a me temere conficta , atque ad tempus accommodata , quæ ex vetustissimis monumentis , ex litteris publicis , ex civitatum tabulariis eruta esse confirmo . His de rebus luculentissimum reliquit testimonium Hieronymus Angelita (a) Patritius Recinetensis , patre , avo , perpetuis ejus urbis , ut vocant , *Cancellariis* . Hic dicit a se diligentissime Recinetense tabularium excussum , scripta vetustissima re-
perta , attente perlecta , quantum per vetustatem li-
cuit , documenta omnia collecta , nullam rei indagandæ diligentiam prætermisam ; addit a Fluminensibus ipsis se multa didicisse , quæ ad hoc prodigium confirmandum pertinerent . Hac porro adhibita diligentia , omnia accurate in unum volumen contulit , quod Clementi VII.

P.M.

(a) Hieronymus Angelita in Epistola nuncupatoria , quam scripsit Clementi VII. hæc habet .

„ Venendomi spesso in memoria quel detto ; Narrino i popoli la sapienza de' Santi , e la Chiesa riferisca le lodi loro , e ritrovandomi so il minimo di tutti gli uomini dopo Vanne Angelita mio Avo , e dopo Gio. Francesco suo figliuolo , e mio Genitore , perpetuo Cancelliere della Comunità di Racanati , ed avendo spesse volte *gli antichi annali di essa con fedel proposito rivolti* , ho ridotto questa Historia in miglior forma , con stile pur assai basso ; non già ch' io sia stato ardito trasmutare il vero ordine del-

la cosa , ma ho cercato illustrarla , quanto ho possuto *regendomi secondo la via mostratami dalla scrittura* , della quale ho di sopra detto . „ Porro supra in eadem epistola nuncupatoria hæc habentur ; „ Ai tempi di Leone X. certi Schiavoni huomini d' integra fede portarono a Racanati una scrittura , trovata tra gli antichi annali della terra di Fiume , che in quelle bande è un luogo posto sul lido del mare Adriatico , nella quale si leggeva , come questa Casa mirabilmente s' era la prima volta trasportata di Nazarette città , in quei paesi ; e ciò a notizia venuto , subito ne fu scritto a sua Beatitudine dalla Comunità di Racanati . „

P. M., qui de tanta re doceri cupiebat, exhibuit; ut suspicari nefas sit, virum æque pium ac doctum, & quem Ven. Canisius vir sapientissimus & eruditissimus appellat *summæ fidei hominem*, tanto Pontifici imponere voluisse. Volumen existat, quod postea consequentes hac de re accuratissimi scriptores non tanti fecissent, nisi in eo certa veritatis indicia clare aperteque deprehendissent. Ante hunc Petrus Georgius Præpositus Teremanus (a), & complures annos Lauretanæ domus

Gu-

(a) Petrus Georgius Præpositus Teremanus Almaz domus Gubernator Historiæ Lauretanæ Summam confecit, & peregrinis legendam proposuit, quæ Summa magno semper in pretio habitata fuit. Summam Præpositi Teremani Bartholomæus Vallis Umbrosæ Monachus Italico carmine valde antiquo, ut ex pluribus idiotisimis manifeste apparet, expressit. Legitur hoc carmen in *Vita B. Virginis* ab Antonio Cornazano edita Venetiis anno 1509. Porro de singulari hujus Præpositi fide, diligentia, religione legendus omnino est Horatius Tursellinus Histor. Lauret. lib. I. cap. 28. Inter alia hæc leguntur hoc loco non omnimoda. „Sane, & historia ipsa a prima Recinetensium memoria repetita est; & ejus auctoritati religio, ac diligentia Præpositi Teremani vel plurimum adjecit. Is quippe interrogatis, qui adhuc supererant, testibus tantam rem, quoad ejus fieri posset, voluit esse testatam. Testes

igitur satis locupletes ab illo citantur duo, *Paulus Rinalducus*, & *Franciscus cognomento Prior*, ambo cives Recinetenses, viri boni, spectatæque fidei. Rinalducus quippe sæpe Præposito Teremano (us ipse met reser) testificatus est, ab se avum suum sæpenumero auditum esse narrantem, se met Beata Virginis Domum conspexisse, cum sublimis ab Angelis supra mare ferretur, & in Recinetensi sylva collocaretur. Quin etiam se sacrosanctam Ædem in nemore sitam cum civibus aliis compluribus sæpius accessisse. Franciscus autem Prior avum suum cxx. annos natum, integrisque adhuc utentem sensibus non semel audierat (us ipse pro testimonio dixit) cum referret, ab se frequenter sacram Ædem in sylvam cum aliis itum: eamque sua memoria in collem duorum Fratrum esse translatam.

Hieronymo Angelitz, & Præposito

Gubernator Summam hujus historiæ a prima Recinetensium memoria repetitam confecit, & Pio II. obtulit. Huic Summæ, etsi stylo rudi ac simplici conscriptæ, ita magna adhibita est fides, ut in Lauretana æde proposita fuerit peregrinis legenda; quæ quidem, quoties vetustate obsolevit, toties fuit instaurata. Tantam illi au-

cto-

sito Teremano merito adconscribendus est Raphael Riera Societatis Jesu, qui egregium de Lauretana domus translatione MS. reliquit, summa diligentia ac religione exaratum. Hoc MS. Martorellius in suo Theatro Historico Lauretano edidit. Hoc plurimi fecit Tursellinus, ex eoque non parum profecit.

„ Neque vero, hic prætermittendum est sacræ Domus vestigia eodem in loco, quem sacra ædes in sylva occupaverat, ad nostra fere usque tempora perstitisse. Qua de re audiat Tursellinus eodem libro, capite 9., ubi hæc habet. „ Eo autem loco, ubi primum in Picenum sacra ædes delata confedit, quandiu sylva stetit; stetit autem usque ad annum hujus sæculi (*nimirum decimi sexti*) ferme septuagesimum quintum, haud obscura exstiterunt ædis ablatae miraculique indicia; quippe area, quam sacra occupaverat domus nitebat semper vernantibus herbis floribusque, cum omnia circa densis obsita virgultis ac sentibus horrent. Nec dubia res. Auctor est Hieronymus Angelita in Virginis Lauretanae Historia, quam Clemen-

„ ti VII. dicavit, eo ipso tempore, cum hoc visentibus miraculo erat. „ Visebantur pariter cum area sanctorum parietum solo impressa vestigia sanctitatem & quasi diuinum quiddam spirantia. Id adeo ipsemet accepi a Raphaelæ Riera, qui ædis vestigia atque area nitorem sapienter magna voluptate sespectasse memorabat. Cæterum exciso nuper nemore, ac solo arationi destinato, eximia illa amoenitas ab imperito rerum agricola & fossione, & fatu olerum violata deficit. Itaque ad retinendam loci religionem ab eodem illo Riera in ipsis vestigiis quoquo versus parietes paullum a terra sunt excitati. *Vidi ego ipse & inspexi locum*, cum hæc ipsa litteris prodirem. Animadverti, parietibus illis aream includi & longitudine & latitudine ædi Lauretanæ usquequaque parem. Verum enim vero ita amissit amœnitatem, ut retineat religionem; & hodie religionis ergo a multis visitur. . . In colle porro duorum Fratrum obscuriora argumenta cernuntur, loci tamen, aut loci potius vestigium monstratur.

toritatem religio & diligentia Præpositi Teremani adjecit . Testes enim locupletes in ea citantur , qui adhuc supererant , & quæ aut ipsi vidissent , aut ab iis , qui viderant , acceperant ipsi Teremano Præposito narra-
runt , & interposito jurejurando confirmarunt .

XVIII. Neque vero apud Picentes solum facti tam insignis vetusta monumenta exstant ; sed perantiqua permanent , & etiamnum visuntur apud Tersactenses . Eo ipso in loco , quem sacra ædes Nazaretho adveni-
ens insedit , templum Frangipanius excitavit ; quod , ut ad tantæ rei memoriam posteritati prodendam maxi-
me valuit , ita non minus roboris ac firmamenti contu-
lit ad hoc nostrum adstruendum confirmandumque pro-
digium . Etenim , amabo vos , quid potissimum nova
hujus ipsius templi molitio spectavit ? quid propositum
hæc subita Frangipanii cura habuit ? Solatium . Sola-
tium ? At quo solatio Tersactenses indigere poterant ,
si ea re caruissent , quæ nunquam in eorum potestate
fuiisset ? Dolemus ea nobis eripi , quæ possidemus ; illa
vero , quæ nostri juris nunquam fuerunt , optare quidem
possumus , sed , quod ea non habeamus , dolere , mœrere ,
angi , nisi forte ex invidia , non possumus . Si ergo nova
templi molitio ad solatium illarum gentium , quæ tanto
bono privatæ fuerant , pertinuit ; si solatium ipsum Ter-
sactensibus oblatum fuit ; id autem & in certa re , &
certo tempore , & certo in loco , & certo in genere ob-
latum , hoc profecto & certæ rei , & certo tempore ,
& cer-

& certo in loco , & certo in genere amissionem clare aperteque demonstrat. Hanc porro certam rem , quæ ista certa compensata ratione fuit , quam aliam esse dicemus , nisi hanc ipsam , de qua nunc ago , & quam tota animi & virium contentione defendo .

XIX. Nam quid dicam de vetusta inscriptione illa , quæ adhuc in eodem templo perspicuis incisa notis legitur , & factum hoc totum disertissime docet ? HIC EST LOCUS , IN QUO OLIM FUIT SANCTISSIMA DOMUS BEATÆ VIRGINIS DE LAURETO , QUÆ NUNC IN RECINETI PARTIBUS COLITUR . Hic ego rursus , amabo vos , Florentini . Quid sibi vult hæc inscriptio ? quid significat ? quid loquitur ? quæ quidem est hujusmodi , si attente consideretur , ut parum honorifica Nationi videri possit . Uti enim sacræ apud ipsam domus comorationis testimonium est , ita est etiam subitæ ab eadem ejusdem domus migrationis indicium . Jam quid attinuit hanc inscriptionem propalam omnibus convenis ac peregrinis legendam proponere ? Quis a Terfaciensibus apertam hujus facti confessionem extorsit ? quis illos impulit , quod nemo ab eis quærebat , sponte ac sincere fateri ? Nonne totum hoc dissimulandum erat ? nonne reticendum ? nisi id ipsum palam omnibus facere manifesta rei ipsius veritas Terfacenses coegisset .

XX. Jam vero quid hic ego dicam , Florentini ? quid vos ? quid isti ? Num hæc conjecturæ sunt , quas scilicet isti contemnere possint , atque aspernari ? tametsi

metſi conjecturæ , quando probabiles ſunt , & plurimum valere debent , & negligi jure non poſſunt . Verum hæ conjecturæ non ſunt ; luculentiffima argumenta ſunt , ſunt inviſtiſſima certiffimæ veritatis teſtimonia . Profero enim vetuſtiſſima monumenta , profero litteras publicas , profero graviffimam honeſtiſſimorum viro- rum perſcriptam auctoritatem . Adſunt quodammodo Legati Illyrici , adeſt ipſe Terſactenſis Alexander , adſunt Legati a Communi Picentum in Galilæam miſſi . Dicunt, omnia ſe quam attentiffime vidiſſe , inſpexiſſe , examinaſſe , cognoviſſe . Dicunt , nullam in re exploranda ab ſe prætermiſſam fuiſſe curam , nullam in tanto munere obeundo nimiam putaſſe ac ſupervacaneam diligentiam , nihil denique ſe omiſiſſe , non modo ad omnem dubitationem , verum etiam ad omnis dubitationis ſuſpicionem vel minimam tenuiſſimamque tollendam . Dicunt, allatas eſſe meſuras , arearum longitudinem ac latitudinem , craſſitudinem fundamentorum fuiſſe dimenſam ; arearum , fundamentorum , meſurarum ipſarum factam eſſe contentionem , omnia depreheſa inter ſe plane convenire , ne hilum quidem diſcrepare , perfecte exacteque reſpondere ; quod dicunt , jurati dicunt ; qui porro id dicunt , hi ſunt graviſſimi viri , ſpectatiſſimæ fidei , ſuarum civitatum principes , Legati publici , qui etiamſi jurati non dicerent , ea eſt horum viro- rum auctoritas , probitas , gravitas , ut illos in re tanti momenti mendacii inſimulare nefas eſſet . Excuſa ſunt , inſpe-

specta tabularia a duobus fide dignissimis viris , Præposito Teremano , Angelita *Cancellario* ; quæ ad rem tam memorandam spectarent , diligenter collecta , publici juris facta , & duobus summis Pontificibus oblata & inscripta . Accedunt pervetusta Tersactensium monumenta , & templi a Frangipanio excitati , & propalam expositæ inscriptionis . Adstipulatur sincera , aperta , & ab una veritate expressa Tersactensium ipsorum confessio . Quid isti volunt amplius ? quid flagitant ? quid requirunt ? Hæc profecto hujusmodi sunt , quibus nihil ad tantæ rei veritatem confirmandam addi posse videatur .

XXI. Atque hic quisquam quæret a me , & usque ad nauseam atque stomachum quæret , utrum ad tantum confirmandum prodigium idonea habeam documenta(a)?

Ec-

(a) Præter ea , quæ supra attulimus , documenta , placet hoc loco alia subicere a Turfeliino deprompta . Ac de situ quidem , *inquit* , lib. I. cap. 10. „ Situs ipse sacrosanctam illam sedem non humana , sed „ divina prorsus arte manumque loca- „ tam facile declarat . Sita igitur est , „ siqua usquam , ad quatuor cali mun- „ dique regiones ex Mathematicorum „ disciplina; neque id solum , sed ex „ veteri etiam SS. Patrum instituto , „ qui aras sacrarum aedium ad solis „ spectare ortum jubebant ... Hunc „ autem tam admirabilem sanctissimi „ sacelli situm non casu occupatum ; „ sed divino quantum consilio , vel

„ illud argumento est , quod in ipsa „ quoque sylva eundem plane situm „ a Virgine optatum , *ut egomet in- „ tentius observavi* , vestigia , quæ „ exstare diximus satis ostendunt .

De positione autem , sive constitutione sacri ædificii illa ex eodem auctore hic exscribenda omnino sunt , qui libro citato cap. 16. „ Videbant „ Recenitenses , *inquit* , parietes , & „ temes & perantiquos stare sine ul- „ lo penitus fundamento . Ingens er- „ go eos incescit cura , veritos , ne „ paulatim temporum injuria , pro- „ cumbentibus parietibus , angustissi- „ ma orbis terræ sedes pestum iret „ rueretque . Itaque optimum factu „ ratâ

Ecqua erunt documenta, si ista documenta non sunt? Ecqua idonea judicabuntur, si ista tanquam inepta repudientur? His, quotquot ante me hac de re scripserunt, viri gravissimi & sapientissimi usi sunt; hæc ipsa diligentissime explorarunt; hæc ad Criticæ severioris regulas exegerunt, & magni esse ponderis duxerunt.

Ego

„rati ædem specie ruinofam undique
„communire, & jactis, quantum res
„ferebat, fundamentis lateritio eam
„pariete circumdant. Fama est haud
„dubiis vulgata auctoribus, nullo
„modo potuisse novam substructionem
„cum sacris parietibus coherere.
„Quin etiam procedente tempore
„novi illi parietes veteribus pro
„fulcimento adjecti paulatim recesserunt
„adeo, ut inter utroque parietes,
„quoties opus foret, puer cum
„accensa face discurreret, quo dis-
„junctorum parietum fidem exploran-
„tibus faceret. Nec vetus est ejus
„rei memoria. Vivebant paucis ab-
„hinc annis viri probi piique com-
„plures, qui discurrentem inter
„parietes puerum sæpius se vidisse nar-
„tarunt Rhaphaeli Rieræ, unde ipse
„cognovi. Huic eidem Rieræ Rainerius
„Nerucius Architectus egregius,
„ædificationi Lauretanæ præpositus pro
„familiaritate commemoravit; Se Cle-
„mentis VII. Pon. Max. jussu de-
„moliendis lateritulis illis parietibus
„præfuisse, cum marmoream cru-
„stam, quæ hodie cum omnium ad-
„miratione visitur, substituere mol-
„retur; ac tum admirandum repe-

„risse parietes illos, contra omnem
„Architecturæ rationem a sacro cubi-
„culo dimotos, neque tam vetusta-
„te, quam arcano quodam consilio
„ruinosos; ut satis appareret, Dei pa-
„rentem ad sustentandam suam do-
„mum excludere hominum industriam
„voluisse; quo divina vis insignior
„foret, si tectum longe antiquissi-
„mum sine fundamentis ullove huma-
„no auxilio per tot sæcula flaret.

Nobilissima, & antiquissima Anticiorum Recinetensis familia alia duo præclarissima monumenta exhibet. Primum quidem litteræ sunt in membrana exaratae Pauli Heremita vulgo a Sylva nuncupati, qui sæpius cælestes flammæ sacro domicilio imminentes aspexit, & hac ipsa de re ad Carolum Secundum Regem Neapolitanum datæ. Alterum, epistola a Prioribus, ut vocant, Recinetensibus hoc de prodigio ad Bonifacium VIII. conscripta. Hæc duo monumenta edita sunt a Cl. Trombellio tom. 6. de *visis & gestis Mariae Sanctissimæ* part. 2. dissert. 24., qui etiam affert Hymnum valde antiquum in Tersaatenfi templo a Minoritis cani solitum.

Ego scilicet iisdem jure meo non utar? ea parvi pendere, ea negligere audeam? neque vero hæc ipsa istis objiciam atque opponam? Dicam equidem quod sentio; Malo desipere cum tot gravissimis ac sapientissimis viris, quorum placet auctoritati subscribere, quam cum istis sapere, qui nondum ex præscripto Apostoli *sapere ad sobrietatem* norunt, &, nisi res ad demonstrationem quandam adducantur, eas fere tanquam falsas & commentitias criminari ac respuere consueverunt. Sed progrediamur ad reliqua.

XXII. Quid vero, si præterea hujusmodi prodigium, de quo agimus, non semel & iterum, quod jam demonstratum est, sed etiam tertio per Legatos publicos fuerit exploratum? Quid, si non provinciarum & civitatum jussu, sed ipsius Romani imperio Pontificis; non per cives, quanquam honestissimos, sed per lectissimos ex ipsa Pontificia familia viros; non remotiore ac vetustiore, sed recentiore ac proximior memoria? nonne quanta maxima adhiberi aliqua in re exploranda potuit, omnis hoc in negotio consumpta fuisse diligentia judicabitur? Atqui Clemens VII. Pontifex Maximus, qui Lauretanam ædem impensius coluit atque exornavit, quo certior tanto prodigio fides conciliaretur, quamvis satis superque exploratum videri posset, tamen denuo explorandum exilimavit. Ergo tres ex omni Cubiculariorum suorum numero, expertæ in primis ac notæ probitatis, fidei, ac spectatissimæ prudentiæ viros ele-

elegit , eosque primum Lauretum , deinde in Illyricum , tum ad extremum in Galilæam cum mandatis allegat ; omnia inspiciant , considerent , atque intentiore cura contemplantur . Quid hic ego toties eadem repetam ? Fecerunt Legati Pontificii , quæ jussi fuerant , suæque legatione eodem prorsus , quo Dalmatæ ac Picentes , felici successu functi sunt . Unum tantum ab iis novum veritatis indicium deprehensum est , quod præteriri non debet . Duos Legati Pontificii secum attulerunt lapides , quibus Nazarethi ædes vulgo ædificari solent , qui cum illis , quibus Lauretana ædes structa est , collati , omnino simillimi ac gemini reperti sunt . Quo factum fuit , ut & miraculi fides novo documento roboraretur ; & simul nova isthæc legatio non frustra a Pontifice decreta videretur .

XXIII. Atque hoc deportatorum a Legatis Pontificiis lapidum indicium mihi quidem non contemnendum , sed certissimum veritatis , quam propugno , argumentum existimandum videtur , atque adeo illustre , ut oculis ipsis subjiciatur . Usque adeo in re tam certa atque explorata versamur , ut veritatem non tam ratione assequi , quam sensibus propemodum ipsis percipere possimus . Lauretana enim domus non cocto latere , sed dissecto lapide contructa est . Porro horum ipsa lapidum materies facile eos a reliquis , quibus nostra ædificia constare solent , vel oculis ipsis iudicium ferentibus , segregat atque discernit . Lapidicinæ autem , ex quibus

Tom. I.

O

hu-

huiusmodi lapides excidantur , in Piceno nullæ sunt ; quæ in provincia similiter , atque tota Italia e coctis lateribus fere ædificia coagmentantur . Hic certe adversarii non dicent , Picentes , quo certius dolum componerent , & fraudi aliquem veritatis colorem allinerent , a Palæstina , aut ab alio remoto loco huiusmodi lapides Lauretum usque convectandos deportandosque curasse .

XXIV. Nunc vero , cum tot eruta e tabulariis documenta protulerim , cum tres nobilissimas legationes decretas produxerim , cum factum hoc diligentissime examinatum a duabus Nationibus , & accuratissime inspectum docuerim , cum summi auctoritate Pontificis exploratum & confirmatum ostenderim , cum novum veritatis indicium postrema legatione Romam allatum manibus quodammodo vestris contrectandum oculisque inspicendum obtulerim , quid est , quod expectari præterea a me possit ? Expectandum , credo , erit , dum perinde agam de re vetere , ac de recenti . Dura sane ac plane iniqua conditio . Sed tamen , quo me magis adversariis dedam , ad hanc ipsam conditionem veniam . Quid igitur ? si de hoc facto testem non vetustum , sed recentem ; quid ? si recentissimum ; quid ? si mihi ipsi cognitum ; quid ? si contubernalem ; quid denique ? si omni exceptione maiorem citare possim . Poteritne quidquam amplius a me expectari , desiderari a vobis , postulari ab adversariis ? Non opinor . At hoc est difficile . Video . At ne jure quidem id postulari potest . Arbitror . Sed
ta-

tamen , quemadmodum dixi , ad propositam conditionem veniam , & hujusmodi testem dabo atque producā . Quid ? quis hic est ? ubi est ? unde est ? Adest , præsto est , a Palæstina , ab ipso Nazaretho . Is est Archiepiscopus Edensis , vir doctrina , moribus , dignitate spectatissimus , qui pene omnia , quæ hætenus persecuti sumus , non auritus , sed oculatus testis disertissime planissimeque confirmat . Recita testimonium Archiepiscopi Edensis . TESTIMONIUM ARCHIEPISCOPI EDENSIS . (a)

XXV. Animadvertistis religionem gravitatemque testimonii? Sancte affirmat, *tactò pectore, more sacerdotali*, Archiepiscopus Edensis cum esset, an.clo.lv.c.xc. sapius religionis ergo Nazarethum adisse, se contulisse ad locum,

O 2

ubi

(a) „ Io sottoscritto, *tactò pectore, more sacerdotali*, attesto ed affermo, qualmente essendo stato nell'anno 1690. Arcivescovo di Eden, più volte per mia divozione visitai il sito, ove era situata la Casa della Beatissima Vergine nella Città di Nazaret, e vidi le sue fondamenta fabricate d'alcune pietre vive, che si trovano in quelle parti; avendo poi rinunziato all'Arcivescovato nell'anno 1714. mi ritirai in Roma, e colla dispensa della felice memoria di Clemente XI., professai nella Compagnia di Gesù; avendo pertanto inteso da certi, che la santa Casa di Loreto era fabricata di mattoni,

nacque in me non piccol sospetto, che la detta Casa fosse quella medesima, le fondamenta della quale aveva veduto in Nazaret; ma essendo l'anno 1731. ai 30. di Settembre in Loreto a visitar quel Santissimo Santuario, compresi di sicuro non esser mattoni quelle pietre della S. Casa di Loreto, ma pietre vive: e di più affermo esser la detta Casa di Loreto della medesima misura delle fondamenta, che si vedono in quelle parti. In fede di ciò questo dì 30. Settembre 1732. *Giorgio Beniamino della Compagnia di Gesù, olim Arcivescovo di Eden.* „

ubi *virginalis domus exstabant fundamenta*, observasse ea *constare vivo lapide*, qui illis in partibus reperitur. Addit, abdicato Archiepiscopatu in Italiam se recepisse; cum autem Lauretanam domum coctis fabrefactam lateribus audisset, vehementer commotum dubitasse se, an ea domus re ipsa esset, quæ ferebatur; venisse Laureteturum anno *clo. lxx. cc. xxxi. prid. kal. Octob.*, comperisse sacram domum non cocto latere, sed *vivo lapide exstru. etiam*, quæ res omnem dubitationem abstergit; animadvertisse præterea Lauretanæ ædis *modum cum fundamentorum a se Nazarethi inspectorum mensura* plane atque omnino convenire. An quidquam certius, testatius, manifestius hac de re afferri possit, ego sane non video, neque videre vos arbitror; prorsus ut divino consilio tam locuples, tam gravis, tam religiosus ac veridicus testis ad hæc ipsa tempora ad edomandam intemperantium nostri temporis Criticorum pertinaciam reservatus fuisse videatur.

XXVI. Jam verò, ut eo denuo redeamus; iterum istos interrogemus. Quid ad hæc isti reponunt? quid dicunt? quid cogitant, aut sentiunt? aut potius quid nos de iis dicere, quid cogitare ac sentire debemus? Quid est, quamobrem taceant, tergiversentur, & se tot testimoniis plane victos convictosque non fateantur? Quid? ne his quidem testibus credent? Non igitur credent Legatis Tersactensibus, non Picentibus, non Cubiculariis Pontificiis, non tot gravissimis viris fide, religio-

ligione , probitate , sapientia , virtute spectatissimis , non huic postremo a nobis allato testi, oculato, recentissimo, gravissimo, fide dignissimo? Quid igitur credent, cui credent? Etenim si nihil credere, si nemini credere in animum induxerunt; quid est, cur hoc ipsum de se palam atque aperte non profiteantur? Tunc enim vero loco cedam atque abibo, neque diutius pergam operam perdere, & in iis revincendis tempus, spiritum, vires, contentionemque consumere. Quod si omnino increduli nec esse, nec videri volunt, & ea credere omnino debent, quæ idoneis testibus confirmantur, quid est, quod credere debeant, si hoc non credunt? quid, quod planum fieri possit, si hoc non sit? quibus indiciis ad veritatis caput perveniri poterit, si hæc via penitus obstruatur? quibus argumentis historicum aliquod factum doceri, si publicorum Legatorum auctoritatem, religionem, iusjurandum aspernemur; si duarum nobilissimarum Nationum consensum repudiemus; si denique sanctissimi Præsulis locupletissimum recentissimumque testimonium negligamus.

XXVII. Hic ego clamo, postulo, obsecro, oro, ploro, atque imploro vestram fidem, Florentini, non in re minima ac levi, sed summi gravissimique momenti. Advertite, cognoscite, animadvertite. Nolo vos huic causæ nimio opere addictos, nolo fautores meos, nolo Deiparæ perstudiosos; volo censores rigidissimos, volo iudices acerrimos; volo, vos putetis nunc, non in con-

cione adesse , ut me singulari , quod facitis , humanitate audiat ; sed , quod jam inde ab initio constitutum fuit , in curia pro tribunali sedere , ut de tanta re cognoscatis & judicetis . Nonne , quandoquidem res hæc in judicium allata est , & vos huic quæstioni præpositi estis , hos homines gravissimis verbis calligare , redarguere oportet , & acerrime reprehendere ? Quæ malum ! tanta pervicacia , ut propter quandam *incredibilitatis* speciem , quam hoc prodigium præsefert , prodigium ipsum tam acri cura investigatum , tot argumentis confirmatum , tot testimoniis demonstratum negare audeant ? Quid jam reliquum istis est , nisi ut Divinam ipsam Omnipotentiam circumscribant , & quod istis credibile non videatur , id fieri a Deo posse inficiantur ; contra atque cælestis Nuncius hac ipsa in domo diserte affirmavit ; *Non erit impossibile apud Deum omne verbum* ; & celeberrima ac testatissima , hoc ipso in genere Gregorii cognomento *Taumaturgi* perpetrata prodigia confirmant .

XXVIII. Nam per Deum immortalem ! ut , quos hætenus produximus , testes amoveantur ; *Si in ore duorum , aut trium testium stabit omne verbum* , ubi hoc ipsum *verbum* , verbum , inquam , veritatis stare ? ubi residere ? ubi inveniri posse censebimus ? si ejus in hoc facto desperanda inventio sit . Tres huc Nationes , quarum hac in re maxima esse debet auctoritas , tres , inquam , Nationes tam moribus , quam regionibus disjunctissimæ , incolæ Palæstini , Dalmatæ , Itali quodammodo con-

conveniunt ; uno ore idem affirmant , nulla in re discrepant , mire consentiunt . Quam domum possidere se Italus dicit , apud se tum incola Palæstinus , tum Dalmata existisse olim confirmat . Inanem aream etiamnum demonstrat incola Palæstinus , inanem nunc etiam ostendit Dalmata . Quid hoc rei sit , quid evenerit , utrique ne rogati quidem advenas ac peregrinos docent ; ut hic neque tabularia , neque veteres chartas reliquiasque blattarum requirere magnopere debeamus . Præterea sacræ Domus migrationis notatur tempus , notatur annus , mensis , dies ; loca stationum demonstrantur ; intervalla distinguuntur . Quid vero ? cum in certamen summi honoris ventum esset , tametsi certare studiis inter se æmulas Nationes oporteret , nec aliam alii præferri facile pati , contra tamen atque usuvenire solet , & humani fastus natura ferat , hæ , quas dico , Nationes non solum secum non dissentiant , sed mirifice consentiunt . Nullam hac in re partem sibi vindicavit contentio , nullam usurpavit invidia ; quod dissimulandum certe erat , ultro Palæstini & Dalmatæ præseferunt , aperte & sincere fætentur . Quid denique ? cum eo res adducta foret , ut aut dirimi , quæ excitata inter utrasque Nationes controversa , aut tolli , quæ suborta videri simultas poterat , deberet ; quid agunt ? quemadmodum se gerunt ? Num litem intentant ? intercedunt ? prælato honori invident ? Nihil horum ; immo vero ultro cedunt , sponte succumbunt Italiæ , eique palmam in re tanti momenti

tantisque religionibus consecrata volenti libentique animo deferunt. Usque adeo veritatis vis in hominum animis dominatur, ut, nisi summa iudicii ac voluntatis peruersitas obftet, aut præjudicata opinio prævaleat, non solum a non repugnantibus obtineat, sed vel ab invitis assensum extorqueat. Hæc autem omnia, si istos audias, tempori accomodata, perperam excogitata, conficta, falsa; ad minus inepta, incerta, dubia, suspiciosa; nihil separatim, nihil conjunctim evincunt, nihil probant. Quid dicam? nescio. quid amplius addam? ignoro.

XXIX. Atque hic, ne quid dissimulem, mihi videmini, Florentini, vos hæere dubii, & cum animis vestris reputare, quid de istis sentiendum, quid iudicandum existimetis. Video ex una parte vos de fide mea non dubitare; ex altera vero adduci non posse, ut istos tam effusæ intemperantiæ credatis, ut a nobis hac in re dissentire sustineant, nisi ad hoc ipsum certissimis sint argumentis adacti & prope demonstrationibus compulsi. Recte id quidem; & ego ipse propemodum, nisi experientia edoctus istorum ingenium jam nossem, vobis assentirer. Etenim rationes, quibus ad negandum tam illustre factum adducuntur, sane evidentes esse necesse est, quippe quæ in optimarum conjecturarum & locupletissimorum testimoniorum contentionem venire debeant. Quare video, hunc a me locum minime esse negligendum, sed omni, qua fieri potest, cura diligentiaque tractandum. Reficite vos ad
ca,

ea , quæ restant , Florentini , & benevolentia vestra
aura orationem meam ad exitum usque provehite . Ego
levioribus omisis rationibus , eas potissimum in me-
dium afferam , in quibus isti se jactant , quas nobis op-
ponunt , quas certissimas atque invictissimas prædicant .

XXX. Ajunt igitur se Antonini & Vincentii , quo
minus tanti prodigii veritatem affirmant , auctoritate im-
pediri . Equidem , ut , quod in memet expertus fui ,
libere expromam , vix ab istis auctoritatis usurpari no-
men audiui , ipso auctoritatis vocabulo vehementer per-
cussus sum . Quid ? isti auctoritatis mentionem facere
audent ? Miror sane . Etenim qua fronte ? quo ore au-
ctoritatem appellant , quam sæpe in suis scriptis ejurare
non dubitant ? Hic vero quid ego agam ? cum isti nul-
lam inconstantia notam detrectent , & nunc ad eam , a
qua plerumque refugere solent , auctoritatem confu-
giant . Nam , vel standum esse auctoritati volunt , vel
non ; si volunt , cur ea , quæ contra communem au-
ctorum omnium recte ac moderate sentientium opinio-
nem perperam comminiscuntur , ipsi non damnant ? si
secus , cur illud a me flagitant , quod ego ab iis obti-
nere non possim ? Sed stemus auctoritati , quandoqui-
dem ita volunt , atque ego non repugno ; immo vero
huic maxime standum esse contendo . Verum , ec-
quid aliud hætenus egi ? in quo hætenus laboravi ,
omnesque & industria , & animi , & ingenii mei ner-
vos intendi , nisi in eo , ut istos ad unam ferme au-
cto-

Auctoritatem provocarem, una ferme auctoritate revincerem? Parumne idoneos vobis hujusce facti auctores illis attulisse videor, qui tres nobilissimas legationes decretas, qui gravissima mandata Legatis data, qui jurata Legatorum ipsorum testimonia protulerim? qui eo usque progressus sim, ut in re vetere, recentissimum testem dederim atque produxerim? Etenim ubinam residebit auctoritas, si hanc a Legatis publicis, a gravissimis testibus, ab honestissimis viris abesse existimabimus?

XXXI. Verum age, quid Antoninus dicat, qui primus objectus fuit, sine cunctatione audiamus. Codex proferatur, recitentur verba, Antonini sententia clare & perspicua voce sic, ut omnes, quotquot adsunt, exaudiant, pronuncientur. Quid? hærent, hæsitant, tergiverfantur. Non est cur declinent, cur subterfugium aliquod quærant. Cedo codicem, cedo verba, cedo expressam Antonini sententiam; ad auctoritatem me ipsi provocarunt, auctoritati standum esse confirmo. Miserum me! quæ verba requiro, quem codicem flagito, quam sententiam postulo? Verba, quæ hanc Antonini sententiam declarent, nulla sunt; Antoninus hac de re nullam suis in operibus mentionem fecit. Cur igitur mihi Antonini auctoritatem objiciunt, qui hoc de prodigio ne litteram quidem ullam scriptam reliquit? Quid hoc est? Illudimurne ab istis, an seriores agitur?

Sed

XXXII. Sed video quid dicant ; Antoninum quidem ajunt, verbum hoc super prodigio fecisse nullum , sed ob hanc ipsam causam negandi prodigii ipsis fuisse auctorem. O rem novam atque inauditam , & ipso prodigio , quo de agimus , pene admirabiliorem ! Quid ? egone , propter unius vel sanctissimi doctissimi que viri silentium , tot juratorum testium sanctissimas gravissimasque voces repudiabo ? Taceat , per me licet , Antoninus ; sed eo tacente , clamant Legati publici , clamant Legati Pontificii , clamant Dalmatæ , clamant Picentes , duæ nobilissimæ provinciæ ac Nationes clamant , & prodigii veritatem affirmant ; res ipsa clamat , quæ , nisi vera esset & testatissima , nullo modo persuaderi potuisset . Hac ego tanta auctoritate confirmatus loco moveri potero ? Unius aut alterius scriptoris silentium tot vocibus , tot clamoribus , ac propemodum vociferationibus , quæ undique circumsonant , anteferendum putabo ?

XXXIII. Sed ne eludere videar argumenti vim, Antonini silentium expendamus . Siluit hac de re Antoninus. Esto . Sed in primis mirari subit , cur tanti auctoritatem Antonini faciant . Non hoc ego dico , quo Antonini auctoritatem plurimi faciendam non esse existimem ; sed miror istos , qui Antoninum , tanquam nimis credulum , nec recentis artis criticæ disciplina institutum , despiciere solent atque contemnere , nunc tantopere ejusdem testimonium , tantis vocibus , ac prope convicio a nobis requirant . Constantiam ab istis flagito , & meo jure flagito .

gito. Si multa ea de causa, quia ab Antonino non satis per istos artem criticam edocto scripta sunt, repudiant, quid est? quod hac super re verba Antonini requirant; perinde quasi, si Antoninus locutus esset, ipsi Antonino credidissent. Suis ipsorum Criticæ regulis implicantur isti necesse est. Etenim si Antonini loquentis per istos non valeret auctoritas, multo certe minus valere debet tacentis. Nam si verba auctoritate destituuntur, quæ inesse auctoritas silentio erit existimanda? Quid hoc est? Antoninus loquitur; de repente isti irrumpunt, & clamant; cave credas, cave ejus dictis fidem adjungas. Antoninus silet; iidem continuo profliliunt; adigunt & compellunt credere. Quid, inquam, hoc est? quam absurdum! quam inconueniens! Ego scilicet per istos Antonino loquenti non credam, silenti credam? Neutram igitur in partem valeat Antonini auctoritas, & siue taceat, siue loquatur ejus testimonium nullum sit.

XXXIV. Verum maneat, uti decet, sanctissimi & doctissimi viri auctoritas, & vel istis invitis ac repugnantibus, qui illam labefactare contendunt, me defendente ac reclamante, inconcussa maneat. Dico igitur, Antoninum, qui multos post annos ab hoc patrato prodigio scripsit, illud existimare potuisse supervacaneum esse mandare litteris, quod fama jam pervulgatum fuisset. Dico, illo sæculo, quo Antoninus scripsit, Italiam Guelforum ac Ghibellinorum factionibus fuisse distractam, ut propterea certus hac de re in Etru-
riam

riam rumor pervenire non potuerit. Incidit enim hoc prodigium in summam perturbationem temporum, ut mirandum non sit tanti prodigii famam se primis illis temporibus unius ferme Piceni finibus continuïsse. Dico denique, ad Antoninum non pertinuisse hoc de prodigio scribere, neque id esse ab eo postulandum, qui totos centum quinquaginta annos ab ipso patrato prodigio floruit; ut sane mirari subeat quid sit, quamobrem isti ejus tantopere a nobis testimonium flagitent; quod quidem ego summæ, qua laborant, inopiæ argumentorum adscribendum puto.

XXXV. At credibile non est, Antoninum, qui multa admirabilia narravit, nos de tanto celare voluisse miraculo. Audio. Multa quidem narravit; sed non omnia; quæ probatur omnia collegisse, omnia narraſſe, nihil prætermiſſe (a)? Eusebius (b) certe, quod jam cum de

(a) Quod Sanctus Antoninus in suo Chronicorum opere non omnia mirabilia colligere in animo habuerit Ipse declarat sub finem libri quarti Summæ Confessariorum his verbis; „Demum de scientia actum est, cui „additur magnum opus distinctum „propter sui longitudinem in tria volumina, non præcise Historiarum, „sed & multorum aliorum de Scripturis sanctis, & dictis notabilium „Sanctorum, sed & aliorum Gentilium. Haftenus Antoninus de suo opere.

Opportune hic Guido Grandius relatus a Trombellio. „Cum verò inquis,

„ & paucis post annis de Sacra Domus in „Italiam adventu monumenta regionis illius, in qua stationem posuit, „indubitata occurrant, & ipso S. Antonino pene sesquifaculo vetustiora, „ad quem nemo prudens pertinuisse „dixerit de re tum vulgatissima expressum testimonium suis historiis „inferere; hinc temere abuti ejus silentio contradictores, ad Lauretani „facelli veritatem impugnandam, manifestum est.

(b) Legendus Card. Ursius Hist. Eccl. tom. 3. lib. 12. num. 59. ubi sic legitur. „ Il silenzio di Eusebio nella Vita di Costantino è paruto

de negante argumento egimus , animadvertimus , Eusebius, inquam, qui Constantini, cujus ætate floruit, vitam accurate scripsit, prodigia illa, quandoquidem de prodigiis agimus, quæ luculenta in primis atque illustria in salutiferæ Crucis, studiose ab Helena Constantini matre conquistæ & repertæ, ipsa inventione patrata sunt, prorsus omisit, & eo loco omisit, quo in historia sua eorum meminisse omnino debuisset; ut etiam mirari desinamus, si idem Eusebius nullam de Nazarena domo, atque eleganti ab Helena Augusta illi, ut tradit Nicephorus, circumdato templo mentionem fecerit. Jam vero, continuone falsa prodigia illa judicabuntur, quæ consequentium scriptorum auctoritate confirmantur? Potest igitur accidere, ut gravis auctor, accuratus & diligens, quædam etiam illustria & singularia prætereat, & quamvis locus ipse auctorem quodammodo admoneat, ut hoc vel illud insigne factum minime reticeat; tamen, quacumque de causa id evenire possit, fiat, ut illud ipsum insigne ac singulare factum ab eodem reticeat.

ad alcuni Eretici un sufficiente argomento non solo per non prestare alcuna fede a' mentovati miracoli, benchè attestati da gravissimi Autori, de' quali alcuni fiorirono in quel medesimo secolo; ma altresì per negare tutta l'istoria dell' Invenzione della Croce. Ma qual conto si debba fare dell' argomento, come dicono, negativo contra le positive testimonianze, se ne ha una

bellissima prova in questo medesimo fatto. Conciossiachè ciò, che Eusebio non ha ricordato in quella opera, lo ha chiaramente accennato in un'altra, venuta da non gran tempo alla luce; onde si può raccogliere, che talora le cose anche più grandi ed illustri sono state omesse dagli Scrittori, eziandio in que' luoghi, ove pareva, che dovessero averne fatta menzione.

ceatur. Quod Eusebio contigit, id similiter contingere potuit Antonino. Non video, quid in simili re dissimile afferri possit, nisi nostri forte prodigii magnitudo; sed magna quoque prodigia erant, quæ Eusebius prætermisit, quorum si magnitudo Eusebium non perculit, potuit similiter magnitudo nostri non percellere Antoninum, præsertim cum hunc neque locus, neque tempus, ut Eusebium, admonerent.

XXXVI. At Eusebius ea ipsa prodigia alio in opere, quod diu latuit, & postea in lucem prodiit, indicavit. Esto; sed non eo loco, quo maxime debuit; præterea non diserte, quod oportuit, est persecutus. Quid vero, si opus illud nunquam lucem aspexisset, si in tenebris adhuc delitesceret? Ab adversariis objiceretur silentium Eusebii, in hoc se jactarent, clamarent, vociferarentur, & nos ob unius scriptoris silentium prope stentoreis istorum vocibus obrueremur. Sed tamen Eusebius, qui rem tacuisse affirmaretur, minime re ipsa, ut postea emergente codice, atque insperato in conspectum se dante patuit, tacuisset. Eusebius igitur locutus erat, & illa prodigia saltem indicarat; quod quid prohibet, quo minus nos idem de Antonino & sentiamus, & affirmemus? Hic porro videtis, opinor, Florentini, quantum hujus generis argumento, quod *negativum* appellant, fidendum sit, quam sit fallax, quam dubium, quam incertum; de quo, cum multa suo loco dixerim, hic addere plura supersedeo.

Alter

XXXVII. Alter nobis opponitur Vincentius . Mitto dicere , hunc quoque non ea , qua isti , disciplina institutum fuisse , & illis vixisse temporibus , quibus nova recentis hujus artis criticæ lux , quæ sola ignorantiae tenebras dispulit , nondum affulserat ; sed tamen nobis objicitur Vincentius , cujus auctoritatem declinare nec possumus , nec debemus . Non est , cur hoc loco , ut paullo ante , cum de Antonino diximus , istos ad proferendum codicem , ad recitanda verba provocem . Ego met novi locum , teneo verba , ipse recitabo . *Quolibet die* , inquit in concione quadam de Assumptione B. M. , *quolibet die potestis ire in Nazarethum ad cameram , ubi Filius Dei incarnatus fuit* . Igitur , repונunt , Vincentius diserte affirmat Lauretanam domum Nazarethi existitisse eo tempore , quo nos translatam jam in Italiam fuisse contendimus . Bene est . Amplector primum Vincentii sententiam , veneror auctoritatem . Non enim Nazarethum auditores Vincentius allegasset suos , nisi tunc Nazarethi Lauretana domus , aut existisset , aut ipse saltem eam ibi exstare censuisset . At hic quoque ab adversariis requiro constantiam . Nam quomodo pro se tantam asserere auctoritatem possunt , qui sacram ædem jam inde a vetustissimis temporibus excisam , ac prorsus dirutam volunt ? quandoquidem per ipsos nullam neque Hieronymus , neque Eusebius de ea mentionem faciunt . Quam igitur nunc domum somniant ? quam *cameram* fabulantur ? quam ædem mihi

hi opponunt? si eo tempore neque domus, neque ædes, neque *camera* Deiparæ Nazarethi per ipsos exstabat ulla.

XXXVIII. At Vincentii valere debet auctoritas. Valeat, per me licet, non contradico, non repugno; immo vero libenter assentior. Sed valeat, etiam, istis vel contradicentibus ac repugnantibus, Ven. Bedæ (a) auctoritas, qui memoriæ prodidit, Nazarethi alteram Ecclesiam exstare *in loco*, quo *Angelus ad Beatam Mariam evangelizaturus intravit*; quæ quidem Ecclesia, nequidquam oblatrante contra Baronium Casaubono, & domus & Ecclesia esse poterat; Ecclesia, inquam, sacro ritu consecrata, quin domus formam amiserit, atque adeo domus esse desierit. Valeat Nicephori, (b) qui scriptum reliquit, Helenam Augustam Virginalem domum eleganti conclusisse templo. Valeat Scriptoris (c)

Tom. I. P vitæ

(a) Ven. Beda de nominibus locorum, vel civitatum, quæ leguntur in libro Actuum Apostolorum, lit. N. „Nazareth, *inquit*, viculus in „Galilæa juxta montem Tabor, unde & Dominus noster Jesus Christus „est Nazareus vocatus, habetque Ecclesiam *in loco*, quo *Angelus ad Beatam Mariam evangelizaturus intravit*. „Huc usque Beda. Hanc auctoritatem nequidquam convellere conatus est contra Baronium Isaac Casaubonus. Partes Baronii susceperunt Ven. Canisius de Deip. lib. 3., & Turrianus in Responsione Apolog. adversus eundem Casaubonum.

(b) Nicephorus Callistus lib. 8. Hist. Eccl. cap. 30. „Nazareth, *inquit*, „pervenit [Helenam], & salutationis „Angelicæ domo reperta, Dei Genitrici „per amœnum excitavit templum.

(c) Acta SS. Ord. S. Benedicti Sæc. 3. part. 2. in Vita S. Willibaldi Episcopi Eistetenensis, qui Loca Sancta visitasse dicitur anno 786. parag. 16. pag. 374. hæc habent. „Orantes „ambulabant in Galilæam *in illum locum*, ubi *Gabriel primum venit ad Mariam*, ubi est nunc Ecclesia. „illam Ecclesiam Christiani homines „sæpe comparabant a Paganis, quando illi eam volebant destrui.

vitæ S. Vilibaldi Episcopi Eistetenſis, qui ad loca ſancta octavo ſæculo veniſſe dicitur, & *ambulaffe in Galilæam in locum, ubi Gabriel primum venit ad Mariam*; quo in loco exſtabat Eccleſia, quam Chriſtiani a Paganis illam exturbare volentibus perſoluto pretio ſæpe redimebant; quod non feciſſent, niſi eos ſumma loci religio compuliſſet. Valeat Scriptoris (a) item Vitæ S. Ludovici Galliarum Regis, qui narrat, Regem Sanctiſſimum, in Palæſtina cum degeret, Nazarethum veniſſe, *pium locum Incarnationis intraſſe*, ibique Euchariftica dape fuiſſe reſectum. Valeant igitur omnes iſtæ auctoritates, quæ hanc, quam defendo, cauſam non parum certe confirmant, & ſacram ædem ad id uſque tempus, quo in Italiam translata fuit, perſiſtiſſe in Galilæa evincunt. Sed

(a) Non eſt, meo quidem iudicio, contemnendum documentum, quod eruitur ex *Vita, & S. Conſervatione pia* ms. Ludovici IX. Regis Francorum per Fr. Gaufridum de Balloloca O.P. ejus Confeſſorem, ex Codice ms. FFfr. Prædd. Conventus Ebroicenſis, Tomo 5. Scriptorum Hiſtoriæ Francorum cap. 22., ubi hæc leguntur. „ In vi-
„ glia Annunciationis Dominicæ Rex
„ deſcendit in Nazareth. Cum autem
„ a longe locum ſanctum videret, de-
„ ſcendens de equo, flexis genibus de-
„ votiffime adoravit, & ſic pedes in-
„ ceſſit, donec humiliter Civitatem ſa-
„ cram, & *pium locum Incarnationis*
„ *intraſſit*. Quam devote ibidem
„ ſe habuerit, quam ſolemniſter, &
„ glorioſe fecerit celebrari Veſperas, Ma-

tutinas, Miſſam, & cætera, quæ ad ſolemnitatem tam celebrem pertine-
bant, teſtes eſſe poſſunt, qui affue-
runt; quod, *poſtquam Filius Dei in*
eodem loco de glorioſa Virgine car-
nem aſſumpſit, nunquam tam ſo-
lemne, tamque devotum Officium
fuerit ibi factum. Ibidem devotus
Rex, Miſſa in altari Annunciatio-
nis celebrata, ſacram communio-
nem accepit. „ Hujus auctoritatem
loci confirmat vetus pictura in pariete Lauretanæ Domus expreſſa, quæ
S. Ludovici effigiem exhibet, & cujus
veſtigia etſi evaneſcentia, non tamen
omnino deleta ad hanc uſque diem
cernuntur. Hujus picturæ exemplar
videre eſt in Ichonographia Lauretanæ
domus apud Martorellium.

XXXIX. Sed ne hic quoque argumenti vim declinare videar ac subterfugere, accedam propius, & nihil, quod adversariis faveat, elici ex Vincentii verbis posse ostendam. Qui igitur potuit, si in Italia jam confederat Lauretana ædes, ad Nazarenam peregrinationem adhortari auditores Vincentius suos? Potuit, Florentini, iterum dico, potuit. Potuit enim implicata schismate Hispania tantum prodigium Vincentius ignorare. Potuit longinquitate locorum, quod in Italia contigerat, homo Hispanus nescire; primis enim illis temporibus tanti prodigii fama, uti diximus, unius ferme provincie fines non est prætergressa. Potuit denique Orator oratorio modo loqui, & non Oratoribus solum, sed vulgo etiam ipsi usitato. Qui Romæ fuit, hoc a me vere dici non ignorat. Quoties enim ad Constantinianam in agro Sessoriano Basilicam itur, toties ad Sanctam Crucem in Hierusalem iri vulgo dicitur. Cur non eodem loqui potuit Vincentius modo? Ego sane, cum Laurentum me contuli, Nazarethum ipsum adire mihi visum. Nam quid erat Nazarethi, de quo illud, ut sacræ Litteræ tradunt, Nathanael pronunciavit; *a Nazareth potest aliquid boni esse?* quid, inquam, erat boni, quamobrem Nazarethum, hac una excepta sacratissima domo, a peregrinis visendum esset; hac translata in Italiam, Nazarethum ipsum, & quidquid ibidem boni erat translatum aliqua vera ratione dici potuit. Quare si hoc modo locutus est Vincentius, non incondite, non in-

inconcinne , sed eleganter dici potest & vere locutus :

XL. Præterquamquod non admodum clare sententiam videtur Vincentius enunciaſſe ſuam . Quid enim illa verba ſibi volunt ? *Quolibet die poteſtis ire in Nazarethum* , perinde quaſi paucula conficienda eſſent Nazarethum uſque milliaria ? Nonne , ut patet , interpretatione indigent ? quibus quandoquidem interpretatio eſt adhibenda , quid prohibet , cur nos ea eam in partem interpretemur , quæ nobis faveat , & affirmemus , Vincentium aut ignoraffe Nazarenæ ædis in Italiam adventum , aut de Laureto perinde ac de Nazaretho locutum eſſe , aut piæ aliquod peregrinationis votum auditoribus ſuis ſive Nazarethum , ſive Lauretum ſuaſiſſe , aut etiam mendum aliquod ſententiæ ſanctiſſimi viri irrepiſſe , quæ fideliter exſcripta non fuerit , ut propterea neceſſario ſit declaranda .

XLI. Quanquam quid eſt , cur diutius & in unius Scriptoris ſilentio , & in alterius interpretatione immoremur ? perinde quaſi veterum auctorum , qui de Lauretana æde in Italia jam conſtituta mentionem faciant , inopia laboraremus . Sunt , ſunt , inquam , Scriptores , qui clare , qui diſerte hoc de prodigio locuti interpretatione non indigent , atque ii quidem & nobiliſſimi & antiquiſſimi , quorum auctoritates , quandoquidem in hac cauſa , contra atque in aliis iſti ſoleant , auctoritatibus delectantur , aſſeram . De Lauretana domo honorificentiffimum exſtat teſtimonium apud Flavium Blondum , virum ex
Pon-

Pontificia Eugenii IV. familia doctissimum (a), &, quod præcipuum est, Antonino & Vincentio ferme æqualem. De eadem domo Leander Albertus (b) meminit ex eadem, qua Antoninus atque Vincentius, illustri *Prædicatorum* familia. Luculentam Lauretanæ ædis Historiam conscripsit Jo. Baptista Mantuanus (c) vir doctissimus & Poe-

P 3

ta

(a) Flavius Blondus Eugenii IV. *Secretarius* fuit, & de Lauretanæ Domus translatione egregium testimonium dedit in sua, quam inscripsit, *Italia illustrata*, Regione quinta.

(b) De Leandro Alberto vide Turfellinum lib. 2. cap. 28.

(c) Joannes Baptista Mantuanus ex sacro Carmeli Ordine, vir doctissimus & Poeta nobilis, Historiam Lauretanam contexit, & Cardinali Roboreo nuncupavit. Verba præstantissimi Historici hæc sunt; „B. Virginis Lauretanæ venerabilis ac toto terrarum orbe celebratissimus locus, in quo manifestis, ac evidentibus miraculis quotidie divina virtus effulget, procul dubio in primis debet a cunctis fidelibus honorari; constat enim Sacellum illud sacratissimum B. Dei Genitricis Mariæ, Cælorum Reginæ, Angelorum Domine, militantis Ecclesiæ Patronæ, peccatorum Advocatæ, fuisse cubiculum, in quo ipsa nata, & in gremio ac sinu Anticæ Matronæ Sanctissimæ dulciter educata, in quo ab Angelo salutata, in quo denique nostræ salutis Ductor fuit enutritus. Hæc eadem eleganti sermone persequitur lib. 5. *Agelario*.

rum. Quæ quidem omnia a se ex vetustiori monumento fuisse desumpta confirmat.

Idem Joannes Baptista Mantuanus relatus a Turfellino lib. 2. cap. 6. egregium aliud ædi Lauretanæ testimonium dedit. „Cum nuper, inquit, venissem ad sacratissimæ Virginis Mariæ sanctum domicilium; vidissemque, qualia & quanta Deus ostendit in eo loco miracula, & suæ virtutis, atque clementiæ signa manifestissima; me subito horror invasit, & visus sum audire vocem Domini loquentis ad Moysen; *Non appropinques huc, solve calceamentum de pedibus tuis, locus enim, in quo stas, terra sancta est*. Inde præfatus, legisse se in templo Lauretano tabulam parieti affixam, situ & carie corrosam, in qua unde & quonam pacto locus ille tantam sibi vindicasset auctoritatem, conscripta erat historia, hæc, inquam, præfatus adjecit. *Historia igitur in tabella continebatur ejusmodi; Templum B. Dei Genitricis Lauretanæ quondam ipsius Virginis cubiculum fuit, in quo nata, nutrita, ab Angelo Gabriele salutata, & Spiritu Sancto suis obumbrata*.

ta nobilis, quam Cardinali Roboreo nuncupavit. Si unus civis vester, Florentini, siluit Antoninus, unius silentium Matthæus Villanus (a) civis item vester, vir cl. & Historicus celeberrimus compensare satis videtur posse. Quid? Pasconius *Minorita* (b) Terfactensis Provinciæ *Definitor* multa ad hoc prodigium spectantia, publici juris fecit, quæ a Terfactensi tabulario ab se deprompta fuisse confirmat. Quid? Ven. F. Petrus ex eodem sacro Ordine Episcopus Maceratenfis *Legendam* quam vocant de Lauretana domo vulgavit jam inde ab anno clō.ccc.xxx. Mitto Franciscum Milietum (c), Bernardinum Cyrilium, (d) Victorium Brigantem, (e) Hieronymum Radiolensem (f), Adricomium (g), aliosque, qui præclarum

(a) Matthæo Villano addi potest Ariottus Mainardus civis item Florentinus, qui tempore S. Antonini vixit, de quo Mainardus tom. 3. Operis sui, quod inscripsit *Veglie piaccuoli*, sic scriptum reliquit. „ Da Fabriano „ si determinò egli l'anno 1449. con „ quattro Fiorentini di portarsi a Loro „ *reto*, e ad Ancona. „ Multo vero expressius in libello etrusca lingua conscripto, qui de ipsius Mainardi facetiis circumfertur, sic legitur: „ Tornando da Fabriano, dove era fuggito Papa Nicolao insieme con la Corte Romana rispetto alla peste, deliberò con quattro Fiorentini andare a S. Maria di Loreto, & Ancona. „

(b) De Pasconio & de Ven. Petro Episcopo Maceratenfis, vide Trom-

bellium loco infra citato.

(c) Franciscus Milietus Eremita S. Augustini ex antiquis membranarum Historiam Domus Lauretanæ concinnavit.

(d) Bernardinus Cyrilus Commissarius Apost. Historiam Millieti luculentis annotationibus illustravit an. 1573.

(e) Victorius Brigantes Canonicus Anconitanus laudatissimam & veracissimam Hieronymi Angelitæ Historiam non parum locupletavit.

(f) Hieronymus Radiolensis Vallis Umbrosæ Monachus in Opusculo, quod inscripsit; *Unde, & quomodo ades S. Maria de Loreto initium sumptis*. Floruit circa medium sæc. xv.

(g) De Adricom. vid. Trombell. ut sup. His libet addere Beatum Joannem Fesulanum ex sacro Prædicatorum

Or.

rum de Lauretana domo testimonium & dederunt, & ediderunt.

XLII. Nam quid dicam de tot summorum Pontificum amplissimis litteris? quid de eorundem honorificentissimis decretis loquar? quibus suum erga Lauretana domum singulare studium ad memoriam pietatis ac religionis sempiternam testatum esse voluerunt. Quid? tot summi Pontifices Benedictus XII. Urbanus VI. Bonifacius IX. Martinus V. Eugenius IV. Nicolaus V. Calixtus III. Pius II. Paulus II. Sixtus IV. Innocentius VIII. Julius II. Leo X. Clemens VII. Paulus III. Julius III. Pius IV. Pius V. Gregorius XIII. Sixtus V. (1) Clemens VIII. & alii deinceps fere omnes, auctoresne idonei per istos sunt, qui in medium prodeant, qui in conspectum se dent, qui hac de re testimonium ferant? Exspecto dum hos etiam omni auctoritate nudent, & perscriptis eorum gravissimis auctoritatibus contradicere audeant ac refragari.

XLIII. Sed jam non est, cur sive doctorum hominum,

P 4

sive

Ordine, Pictorem egregium, qui Lauretanae Domus translationem coloribus expressit, uti exprimi nunc vulgo solet. Floruit circa medium saeculi XIV.

Dantis Aligherii in *Com. Parad. cant. 21. terz. 4.* auctoritas passim a propugnatoribus Lauretanae Domus assertur, quae etsi clara non sit atque perspicua tamen non videtur prorsus abjicienda. Hanc Re-

zoli a Martorello relatus pluribus illustrat.

(e) Sixtus V., praeter Equestrem Ordinem sub auspiciis B. Mariae Lauretanae anno 1587. institutum, praecipit ut illis verbis Evangelii S. Joannis, VERBUM CARO FACTUM EST, a Divinum Sacrificium in Lauretana aede celebrantibus praeponeretur particula HIC. Idem Pontifex Lauretum Urbis titulo & jure donavit.

sive summorum Pontificum de Lauretana æde nimis tenuiter; & singillatim testimonia colligam? qui gravissimum hac de re, ac plenissimum auctoritatis orbis terræ judicium proferre possim. Nam, per Deum immortalem! quid nunc communi populorum omnium consensione confirmatum magis reperiri potest, quod cum hoc prodigio, de quo dico, & jamdiu dico, conferri possit? cujus fama non jam amplius angustis unius provinciæ finibus circumscribitur ac continetur, sed eo usque pervasit, ut ad ultimas terras disjunctissimasque nationes pervenerit ac penetrarit. Equis enim hoc tempore est, vel in ultimis terris positus atque abditus, qui aliquid de Lauretano domicilio non audierit? quis, qui illud visendi incredibili cupiditate non flagret? quis, qui, siquidem ei facultas suppetat, vel longissima ad illud periculosissimaque itinera terra marique non suscipiat? An putamus, tantam advenarum ac peregrinorum multitudinem, tantam vim, tam incredibilem ac prope infinitum numerum (a) ex tota Italia, Gallia, Germa-

(a) Numerum Peregrinorum singulis annis Lauretum confluentium Renatus Forestius Societ. Jesu recenset in sua oratione, quam edidit Laureti an. 1765. super Sanctæ Domus translatione. Maxima Peregrinorum frequentia Italorum est. Galli numerantur ad 2000. Germani ad 5000. Poloni ad 400. Hispani ad 300. Dalmatæ ad 400. Belgæ ad 300.

Conjunctim omnes una cum Italis, quorum numerum maximum esse diximus, centum Advenarum millium summam faciunt. Solemnioribus diebus Peregrini quinque, aut sex millium numerum explent. Ex eodem Forestio discimus, eorum numerum, qui ad sacram Synaxim accedunt; Mense Majo 80. m. Augusto 30. m. Septembri 100. m., & ali-

mania , Hungaria , Polonia , Lithuania , Servia , Dalmatia , Pannonia , Anglia , Hibernia , Belgio , Hispania , Lusitania , ex omnibus denique vel remotissimis orbis terrarum partibus quotannis Lauretum confluere potuisse , nisi omnium gentium animos altius impressa quædam , penitusque insita sanctissimi loci religio occupasset ? atque ita occupasset , ut , cum in viam se dant , ac Lauretum veniunt , non tam ad Virginis domum , quam ad ipsam Virginem se venire ac proficisci arbitrentur .

XLIV. Et sane hac una cogitatione patriam , uxores , liberos , propinquos , amicos deserunt , hac difficillima incertissimaque itinera ingrediuntur , hac ex ultimis portubus navigant , & vastissima infestissimaque maria transmittunt , hac omnia incommoda libenter sustinent , omnia alacri animo perferunt , & tum demum se beatissimos fore , ac jucundissimum tot laborum atque incommodorum fructum laturos credunt , si post tot vitæ capitisque discrimina divino eis munere concessum sit , ut tandem aliquando Virginem ipsam domi suæ convenire possint , ejus incunabula videre , ipsamque in æde propria venerari . Hoc unum scilicet ob oculos habent , hoc spectant , hoc in-

aliquoties 105. & 115. millia . Reliquis anni mensibus , quibus non adeo affluens concursus est , unoquoque mense ad duo aut tria milia numerantur . Solemnioribus item diebus in Ecclesia fere 400. Sacrificia cele-

brantur ; minus solemnibus 150. In ipsa autem sacratissima Domo singulis diebus fere 30. Usque adeo nihil ad Sacratissimi loci sanctitatem augendam non conspirat ; ut certe *In toto non sit sanctior arbo locus .*

intuentur, hoc sustentantur uno; atque hac una spe mirum in modum confirmati ac recreati ad optatam susceptæ peregrinationis metam læti alacresque festinant.

XLV. Quid vero? cum longe augusti templi fastigia apparere incipiunt, ut subito quodam gaudio atque inusitata voluptate perfunduntur, ut venerabundi in genua procidunt, ut ambas ad cælum tendentes manus, & Virginis opem enixius implorantes, ipsam Virginem de via salutant? Quid? cum Lauretum ingressi magnificentissimum templum vident sacro domicilio circumdatum; quid? cum domicilium ipsum in conspectum sedat; quid denique? cum ejus sacratissimum limen subeunt, atque in sanctissimo totius terrarum orbis loco religiosissimoque pedem ponunt. Tunc enimvero videres eos attonitos hærare primo, & quod jamdudum optaverant, & quod ardentissime concupiverant, se tandem consecutos sibi met ipsos vix credere; mox ex illo veluti stupore paullatim se recipere, prosternere humi corpora, pectus tundere, vocem tollere, *Mariam, Mariam* sæpius cum lacrymis inclamare, *Mariam* impensius venerari, omnia suspiriis gemitibusque complere.

XLVI. Et revera quis unquam illam domum siccis oculis aspicere? quis illam sine fletu intrare potuit? Nemo sane, qui plane ferreus atque inhumanus non fuerit. Etenim ea est loci forma, cultus, religio, sanctitas, ut nullum toto terrarum orbe sanctiorem esse locum facile agnoscas, immo vero experiaris. Sic enim ubi
vix

vix intra vestibulum illud pedem intuleris , sacro quodam horrore corripere , sic lacrymæ oculis sponte erumpunt , ut eas cohibere non possis . Qui Lauretum accessistis , hæc a me non confingi , neque exaggerandi causa dici , vestro ipsi experimento edocti estis . Ego sane cum illic fui , lacrymas certe non tenui , qui in harum ipsarum rerum commemoratione continere non possum . Recordor enim fani , loci , religionis ; venit in mentem eorum omnium , quæ vidi , quæ animadverti , quibus ipse interfui ; hæc omnia nunc animo recurrant , & tanquam præsens mecum ipse nunc recolo ac recognosco . Videre mihi videor peregrinorum greges circa beatissimam illam cellam affusos , alios ante aram Virginis provolutos preces effundere , alios parietibus affixos eos suavissime deosculari , illos passis manibus sacrum domicilium genibus obire totum , hos sæpius intro referre pedem , nec a sacra æde abstrahi divelli que posse ; omnes denique respectantes lacrymantisque discedere .

XLVII. Hic vero quid nominatim de Dalmatis peregrinis dicam ? qui singulis annis mare transeunt & turmatim Lauretum veniunt ; quod tam magna certe frequentia non facerent , nisi se tantum olim bonum possedisse persuasum haberent . Quid ? cum divinam Hospitem ad vetus desertum hospitium illis vocibus acerbissimi luctus & tristissimi desiderii plenissimis non sine lacrymis ac gemitibus invitant ; *Revertere ad nos Maria , re-*
ver-

vertere; & quanquam nunquam voti compotes facti fuerint; nunquam tamen singulis annis easdem iterare cum fletu ac suspiriis voces desinunt. Usque adeo hæc opinio, fuisse olim apud ipsos beatissimam hanc domum, atque adeo Deiparam ipsam, eorum non dicam insedit atque inveteravit, sed inolevit animis, ut evelli ac deleri tanta temporum diuturnitate non potuerit.

XLVIII. Cæterum tanta est hujus sacratissimi loci religio, tantos ac tam repentinos introeuntium in animis affectus excitat, ut incolæ etiamnum ab ipsa Sanctissima Dei Genitrice videatur (a). Quod quidem huic uni ædiculæ tam proprium est ac singulare, ut cum aliis ejusdem Deiparæ celeberrimis ac nobilissimis templis commune non sit. Ignoscite, quæso, Florentini, si nimius hoc in argumento sum. De Deipara loquor, de mea, de communi parente loquor, cui quidem ego omnia, quæ hæcenus consecutus sum, me debere profiteor, & reliqua etiam vel immerentem, pro ejus singulari bonitate & clementia, ab eadem in posterum, ac præcipue, quæ ad æternam animi mei salutem pertinent, certo consecuturum confido. Neque vero vos non

(a) Turfelinus in præfatione Hist. Laur. „Quicumque, *inquit*, ad Laur. „ætanam Ædem accedunt, non tam „ad Ædem Virginis, quam ad ipsam Virginem adire sibi videntur. „Et sane hic Deus Dei que Mater mirro quodam modo præsentiam suam „declarat. Marianus vero Augustus

citatus a Benedicto XIV. in suo de Festis B. V. Opere. „Non arbitror, „*inquit*, fuisse aut futurum tam sceleratum, tam perditum, quem non „Laurentam Mariæ aspectus ad alium, quem pietatis sensum commoveat. „Sed omni auctoritate certior ipsa quotidiana experientia est.

non eandem spem fovere credo . Usque adeo amantissima Mater omnes , qui ad eam opis , præsidii , tutelæ fiducia confugiunt , materna pietate complectitur . Quo etiam mihi acerbius accidit , ita istos in causa , mitto certa , mitto explorata , mitto prope evidenti ; sed tam justa , sed tam pia , sed tam religiosa se gerere , ut plane nesciam , de istis opinari quid debeam .

XLIX. Sed ut eo sapius redeam , poterone hanc talem ac tantam populorum omnium ac nationum conspirantem ac pene conflata consensum unius alteriusque Scriptoris silentio , aut clare parum enunciata sententiæ tuto opponere ? Poterone jure ab istis postulare , ut ; quod non jam amplius soli Palæstini , Dalmatæ , Picentes ; quod non soli amplius Scriptores , Historici , Pontifices ; quod non soli eruditiores Critici & sapientiores ; sed quod gentes omnes , populi , nationes , regna , provinciæ , orbis terrarum universus firmissime credunt , de eo desinant tandem aliquando dubitare . *Nemo unus unquam omnes fefellit , neminem unum omnes fefellerunt* . Poterone igitur , quod tanta auctoritate confirmatur , tanta consensione hominum , quanta vix ulla in re hætenus existit , nititur , quod lacrymis , suspiriis , gemitibus comprobatur , ab istis saltem obtinere , ne convellere amplius , atque in posterum labefactare conentur ? Quanquam vellem præterea assensum etiam ipsum ab istis , quem tot hætenus a me allata argumenta & separatim , & multo magis conjunctim sibi conciliant , extor-

torquere , si possem ; atque hunc ne desperem illa cogitatio facit ; Non tantam fere in hominibus iudicii ac voluntatis perversitatem reperiri , quæ claræ ac manifestæ veritati pervicacius obstinatiûsque ue oblectetur .

L. Ego quidem nunquam non certissima huiusce rei , de qua dico , argumenta existimavi prodigia pene innumerabilia , quibus ad hanc usque diem Lauretanam ædem Deus illustravit ; quæ quidem talia ac tanta sunt , ut nusquam divinæ liberalitatis ac beneficentiæ fontes largius , quam hic , effluent atque uberius exundent sive ad ægrotantium valetudinem , sive ad solatium calamitosorum , sive etiam , quod caput est , ad perditorum hominum mentes in diversa mutandas ; sed tamen illud multo certius argumentum , ad istiusmodi præsertim genus hominum revincendum ; mihi semper visum est , quod ab incredibili omnium gentium consensione ducitur . Itaque ego hanc istis oppono , hanc objicio , hac sum contentus una . Non prodigia in medium affero , non miracula prædico ; quanquam hoc ab instituto meo non abhorreret , prodigia prodigiis adstruere ac confirmare . Sed tamen dicant alii , per hæc licet , cælestes flammæ (a) sacro domicilio im-

(a) Prodigiûm hoc cælestium flammarum testatissimum est . Turfelinus sæpius citatus Historiæ Lauretanæ lib. i. cap. 17. „ Vicesimus , inquit , circiter annus est , cum Re- „ cinetensium plures non minus pro- „ bitate , quam ætate conspicui Ra- „ phaeli Rieræ , unde ipse accipi ; ita „ narrarunt . Sub natalem Virginis „ Desparæ diem , nocturnos ignes de „ calo super Lauretanum tectum labi „ visos sua memoria , inspectante Re- „ cing-

imminentes sæpe visas , præsentēs debitasque pœnas , ab iis , qui illud violare ausi sunt , Deo vindice , perfolutas. Commemorent (a) lucis usuram cæcis restitutam , surdis auditum redditum , desperatissimis morbis medicinam adhibitam , optatam sterilibus conjugibus prolem concessam . Addant tot hominum millia , partim certissimo naufragio liberata , partim durissimo servitio exempta , partim ab ipsis instantis jam lethi faucibus erepta . Adjiciant tot oppida Anicium , Lugdunum , Panormum , Utinam , Recinetum , discussa peste , vastitatis solitudinisque periculo liberata . Hæc ego omnia missa facio , istis largior atque condono ; non in his me jacto , in quibus cæteroquin exsultare posset oratio mea populari quadam dicendi ratione , maximeque ad obtinendas causas accommodata ; sed , uti dixi , hæc omnia missa facio , atque in præsentia prætermitto. Ad populo-

rum

„ cinetensi Civitate univēsa ; nec se-
 „ mel ab ipsismet cum incredibili ani-
 „ mi lætitiā esse conspectos. Simul ad-
 „ debant , pridie ejus diei sub noctem
 „ intendentibus se tenebris , Recine-
 „ tenses vulgo concurrere solitos ad
 „ tam gratum jucundumque spectacu-
 „ lum ; ut ex manibus testisque , un-
 „ de modo Lauretana sedes conspici
 „ posset , admirabili illa cælestis flam-
 „ mæ specie oculos atque animos pa-
 „ scerent . Tenet fama , annivērsarium
 „ hoc spectaculum ad Pauli III. Pont.
 „ Max. tempora durasse . Nec ferme

„ ex Lauretanis rebus res est alia no-
 „ bilior . „ Huc revocentur , quæ supra
 adnotavimus de litteris Pauli Eremitæ
 hac de re ad Carolum II. Regem
 Neapolitanum datis. Cælestibus flam-
 mis illustratam esse natalem Virgi-
 nis Domum sub ipsum ejus in Italiam
 adventum tempore Bonifacii VIII.
 testis est Hyeronimus Angelita sapiens
 commemoratus . Vid. Turfellinum
 Art. Lauret. lib. I. cap. 15.

(a) Prodigia , quæ hic indicantur ,
 luculenter suis quæque capitibus ex-
 posita invenies apud Turfellinum .

rum consensionem revertor , hanc apud omnes contendendo gravem ac sanctam esse oportere ; hic hæreo , hic habito ; nec me profecto hoc loco dimoveri patiar , donec isti aliquid afferant , quod hanc talem & tantam auctoritatem , quæ non dico in unius aut alterius opinione constituitur , sed omnium gentium consensu , ac pene totius orbis terræ gravissimo quodam sanctissimoque testimonio conflatur , aut infringat omnino , aut saltem infirmet .

LI. Quamquam bonitate causæ confusus , dum istis indulgere nimis volui , eo progressus sum , unde mihi sentio omnino esse regrediendum . Prodigia atque miracula , quæ innumerabilia in Lauretana æde patrata sunt , & patrantur quotidie , nimis liberaliter istis condonavi ; perinde quasi hæc ad auctoritatem , in qua potissimum argumenti sita vis est , & ad quam tota quæstio adducta jam recidit , referenda non sint . Imprudens non animadverti , in reliquis , quæ jam commemoravi , hominum ; in prodigiis vero omnipotentis & veracissimi Numinis residere auctoritatem , Repeto igitur , quod concessi , nimiam liberalitatem meam damno , indulgentiam accuso . Hos ego nunc meo jure ad hanc ipsam divinam auctoritatem provoco , huc eos vel repugnantes adigo , huc accedere compello ; hac , hac , inquam , divina auctoritate hos conficere prorsus volo ; nisi forte in animum induxerint , Gigantum more pugnare cum Deo . Neque enim verisimile est, Deum ipsum

sum tot prodigiis falsam in hominum animis persuasione-
nem fovere ac confirmare voluisse , & turpi mendacio
tantam superinducere speciem veritatis . Ac meo qui-
dem judicio contrarium opinari , & sentire , nescio
quid impietatis redoleret . Omnia igitur prodigia , quæ
istis largitus sum , repeto ; ea ad auctoritatem revoco ;
ea istis oppono atque objicio . Humanæ auctoritatis
vim experti jam sunt ; divinæ nunc pondus multo gra-
vissimum auctoritatis experiantur ac sentiant .

LII. Neque vero est cur dicant, hujusmodi prodigia ad
unam *Fidem* (sic enim loquuntur) referri debere , ac
proinde ex allatis prodigiis facti hujus veritatem elici ne-
quaquam posse . Ad *Fidem* utique , atque ad pietatem
erga divinam Matrem referantur illa quidem ; sed ita , ut
facti etiam , de quo inter nos contendimus , veritatem
confirment . Qui Lauretum tanta frequentia adeunt , san-
ctissimi loci fiducia adeunt ; Lauretanæ nominatim Vir-
ginis opem , quotquot ad ejus natale tectum se confe-
runt , implorant , ea beneficiorum certo obtinendo-
rum spe adducti , quia , quæ petunt , in ejus sede ac
domicilio petunt ; & cum alibi id commodius possent ,
& nullo loco non præsens Mariæ Virginis sincero
eam animo invocantibus auxilium sit ; tamen illi loco
sua potissimum reservant vota , quem ei maxime cordi
esse certo sciunt , & quem præ cæteris , ea de causa ,
quod ibi VERBUM CARO FACTUM EST , & ipsa Dei
Mater effecta , a Deo & impensius diligi , & longe ma-
Tom.I. Q jo

ioribus atque illustrioribus , quam usquam gentium ; ditari prodigiis ab eodem & cumulari .

LIII. Itaque eadem de causâ referetur , contra atque jam ante de prodigiis deliberaveram , referetur , inquam , thesaurus ille longe locupletissimus , non ad vanam auri argenti ac gemmarum ostentationem ; sed ad novum veritatis certissimum invictissimumque argumentum . Quo in thesauro non tam collectas pene totius Catholici orbis videre opes mihi videor ; quam miram quandam intueri atque admirabilem divinæ cum humana auctoritatis conjunctionem . Quid enim tot pretiosissima donaria ? quid tot anathemata ? quibus non dicam plenus thesaurus hic , sed confertus ac stipatus est ; quid tanta auri argenticque vis ? quid tanta gemmarum copia ? quid , inquam , tot magnificentissima dona significant ? quid declarant ? nisi ex hac una domo divinam beneficentiam ad tot Pontifices , Imperatores , Reges , Dynastas , Principes , Urbes , Nationes , Provincias , quorum omnium donaria exstant , non solum pertinuisse ; sed etiam ad omne hominum genus , ubique gentium atque terrarum disseminatum , largissime effusissimeque fuisse propagatam . Quid vero illa Lauretanæ Virginis in in prægrandi unione mirabiliter expressa effigies ? quam ego ipse vidi ac demiratus sum ; nonne & ipsa prodigium est & prodigia omnia hac in æde patrata novo prodigio confirmat ? Ea enim unionis naturâ compactio est , ut , cum ex pluribus superinductis crustis coalescat , scalprum
re-

respuat, & ad artificis arbitrium incidi ac fingi omnino non possit. Quo miraculo videtur Deus, inter tot dona ab hominibus oblata, suum quoque conspici ac suspici voluisse. In tanta autem divitiarum opulentia non dico homines liberalitate certasse cum Deo, ejusque divina Matre (quod enim certamen inter Deum & homines esse potest?); sed dico, quæ isti haberent pretiosa apud se, ea volenti ac libenti animo in acceptorum beneficiorum testificationem obtulisse; quod profecto non fecissent, nisi votorum facti suorum compotes fuissent.

LIV. Jam vero quid isti dicunt? quid habent, quod reponant? Satisne ad rem, de qua egimus, istis accessisse videor? mihi quidem, nisi fallor, videor satis. Interea, dum nihil hujusmodi, quod & divinam hanc & humanam infringat auctoritatem, isti afferunt, nec vero afferre possunt, quis tandem mihi succenserebit, si hoc loco dolentius conquerar, si vociferer, si istos vehementius accussem, qui nec divina, nec humana veriti jura talem ac tantam religionem attentare, atque adeo convellere conati sunt. Quid? nihilne vos omnium gentium consensus, nihil illa frequentia, quam dixi, nihil celebritas, nihil loci ipsius religio ac sanctitas, nihil prodigia ac miracula pene innumerabilia, nihil humana, nihil divina testimonia, nihil utrorumque testimoniorum conjunctio vos a tanta violanda religione retardarunt ac deterruerunt? Nonne, quod in vobis fuit, & nos Itali pulcherrimum amplissimumque

monumentum amissimus, & vos sanctissimum atque omni veneratione dignissimum Sacrarium nobis invidistis, & per summam injuriam tollendum auferendumque curastis ?

LV. Ego vero hac in re Heterodoxis hominibus aliquo modo ignosco, si tam illustre ornamentum eripere nobis atque auferre conati sunt. Vident enim, quantum inde Catholicæ Religioni decus, quantum auctoritatis pondus accedat; vident, & æquo animo ferre non possunt. Quare illis aliquo modo ignosco; nostris vero immoderatoribus Criticis, nullo modo possum ignoscere. Etenim si hæc causa non omnem extra controversiam posita esset, uti certe est, quod hæctenus demonstravi, si in utramque partem agitari posset, si paria hinc atque hinc rationum momenta haberentur; nonne Catholicum hominem deceret ab ea parte stare, quæ piæ opinioni favet atque adstipulatur? Hoc communis professio Religionis, hoc communia Fidei vincula, hoc æquitas, hoc ipsum, quo Catholici omnes erga Deiparam esse debemus, studium & pietas suo a nobis jure exposcerent ac flagitarent. Parumne bona Mater de nobis, parum de Religione Catholica, parum de universo hominum genere merita est, ut hanc ei vicem rependamus, & tam malam pro acceptis beneficiis gratiam referamus? Ubi nam isti, qua disciplina, quo instituto officia distinguere ac pensitare didicerunt, qui tam inofficiose, ne quid gravius dicam, erga hanc amantissimam Matrem se gerunt? Quam
istos

istos scientiam consecutos putem, si, quid æquitas, quid pietas, quid gratus & beneficiorum memor animus ab homine requirant, ignorent?

LVI. Quid igitur attinuit hac in re tam certa, tam testata, tot argumentis rationibusque demonstrata potius cum Ospiniano, Vergero, Casaubono, Heterodoxis hominibus sentire, quos isti præclaræ sententiæ suæ auctores habent, quam cum tot Catholicis ac doctissimis viris (a), cum Baronio, Canisio, Turriano, Spon-

Q 3

da-

(a) Renatus Guillelmus Forestius S. J. in supra citata Oratione, ducentos & eo amplius ex omni natione Scriptores fuisse affirmat, qui unanimi consensione Lauretanam ædem aut scriptis ornarunt suis, aut ab oppugnationum aggressionibus strenue defenderunt ac propugnarunt; nos præcipuos nominabimus.

Baronius Hist. Eccl. anno 9.

Ven. Canisius de *Deip.* lib. 5. c. 25.

Turrianus in *Resp. Apologes.* ad Petrum Paulum Vergerium pro Domino Lauretana.

Roestius in *Apol. pro Deip. Maria Camera.*

Erasmus, auctore Canisio, orationem habuit de Laudibus Beatæ Mariæ Lauretanæ.

Hieronymus Richeomus Gallus librum edidit, quem inscripsit, *Peregrinus Lauretanus.*

Georgius Histæus Lauretanæ domus patrocinium suscepit contra Cal-

vinistas ejusdem oppugnatores.

Raynaudus contudit Launojum argumenti *negantis sui* armis instructum, & nimis insolescentem, T. 4. in opere, quod inscribit; *Antemurale adversus fortia ingenia.*

Benzonius Episcopus Lauretanus sacram Domum propugnavit contra Petrum Paulum Vergerium, qui pet summam impietatem augustissimum hoc Sacrarium *Idolum Lauretanum* appellare non exhorruit.

Spondanus Tursellinum citat, cujus Historiam Lauretanam plurimi faciunt.

Petra-Sancta, cujus in hanc sententiam auctoritatem affert Benedictus XIV. lib. 4. de *Canoniz.* SS. part. 2. c. 10. n. 13.

Bzovius, cujus monita ex commentariis ad annum 1291. allegat Basnagius.

Papebrochius, & Henschenius in Actis Sanctorum tom. 3. Martii die 25.

Brietius ad Annum 1295.

dano, Echio, Saliano, Gretsero, Raynaudo, Papebrochio, Henschenio, Natali Alexandro, Raynaldo, Bzovio, Honorato, aliisque quam plurimis hujus notæ ac magni nominis viris, addo etiam nobilissimis atque eruditissimis Criticis, siquidem ab istis digni existimentur, qui in Criticorum subsellio una cum ipsis sedent; quorum omnium in eo maxime eluxit pietas & cura, ut Lauretanam domum contra ejusdem oppugnatores acerrime defenderent ac propugnarent? Quid oportuit illis, quos nominavi, impiis hominibus se a seclis præbere potius, quam tot summis Pontificibus,

Bailletus Tursellinum citat, eique non refragatur ad vigesimum quintum Augusti diem, part. 7. num. 37. Bailletus hac in re auctoritatem plurimi faciendam esse eruditi quidem omnes non diffitebantur; mihi vero instar omnium auctoritatum est.

Natalis Alexander Histor. Eccles. sac. 13. „Pontificatus, inquit, Bonifacii PP. VIII. anno primo, Christi 1394. Sacra Deiparæ Virginis ædificula, in qua Filium Dei de Spiritu Sancto Angelo nunciante concepit, in Dalmatia in Picenum miraculo delata in Recineteusis agri sylvæ piæ Matronæ, cui Lauretæ nomen, propria confedit. Inde Lauretanæ Domus B. Virginis est appellatio, quam & in ipso Piceno ter sedem infra autem mutasse repetito miraculo, memoræ proditum est. Qua de re legendus Horatius Tursellinus Societ.

„Je'u Scriptor elegans in Historia Lauretana. „Huc usque Cl. vir & nobilissimus Criticus.

(a) Honoratus a S. Maria Gallus ex sacro Carmelitarum Discalceatorum Ordine, Criticus nobilis & egregius, in suis Animadversionibus in regulas & usum Critices.

(1) Chrysostomus Trombellius Abbas Exgeneralis Canonicorum Regularium Sancti Salvatoris Congregationis Rhenanæ; vir æque doctus ac pius omnium postremus, quod ego sciam, de Vita & gestis Deiparæ Virginis singulari diligentia, nec minori eruditione scripsit; & nominatim de Lauretana Domo pluribus agit, ac piam sententiam & rationibus, & antiquis, quæ exhibet monumentis, & peti facile ab eo possunt, confirmat. Legatur tom. 6. part. 2. dissert. 24.

bus, quorum de rebus divinum ad cultum pertinentibus, de sacris, de ritibus, de cæremoniis iudicium est, ac semper fuit, qui exemplo suo nobis præverunt, & tot præterea honorificentissimis diplomatis editis, & decreto cultu, & imperatis precibus, & sacrosancti Sacrificii oblatione indicta, quid tenere hac de re, quid sentire debeamus, clare aperteque declararunt?

LVII. Sed nimirum isti magnam sibi eruditionis famam conciliari putant, cum quid vulgo receptum negant, præsertim si aliqua religione consecratum sit; nullam cum affirmant; perinde quasi eruditionis fama alia parari via non posset. Miserum enimvero famæ atque exilimationis genus, ipsius famæ atque exilimationis jactura collectum. Verum quin isti, quandoquidem Hæreticorum sententiis tam facile subscribunt, & eorum exemplis delectantur, eos in eam partem imitandos sibi proponunt, qua sine piaculo eos imitarentur? Illi, quidquid Catholicæ Religioni favet, ope omni conantur evertere; quæ vero pro se sectæque sua faciunt, omnibus ingenii nervis tueri contendunt; in hoc elaborant, in hoc vires omnes exerunt suas, & totam rimati sunt antiquitatem, nec rimari desinunt, ut aliquid ex vetere disciplina colligant, unde & sua confirment, & nostra infirmant. Quod illi in pessima faciunt, cur nobis in optima causa faciendum non putabimus? Isti vero contra. Student adversariis, adversantur suis; favent Hæreticis, Catholicis refragantur; il-

los adjuvant, nos oppugnant; quos etiam exspecto, dum eo usque progredi audeant, ut hanc sacratissimam domum cum Paulo Vergerio per summam contumeliam *Idolum Lauretanum* appellent.

LVIII. Jam vero quid hic agimus Florentini? tantæne causæ indormiemus? in tanta re negligentes ac dissoluti videri patiemur? Quin expergiscimus tandem aliquando? quin nos ad pristinam virtutem, atque ad majorum nostrorum pietatem religionemque nosmet ipsi revocamus? quin Italiæ universæ communes partes suscipimus? nostra decora tuemur? nostra ornamenta defendimus? & hos homines qua voce, qua scriptis insectamur, & nullo loco quiescere patimur atque consistere? Solusne in tanta opinandi licentia vocem mittam? solus communem causam sustinebo? solus erepta nobis omnibus ornamenta repetam ac vindicabo? Ego quidem satis mihi videor fecisse muneri, quod recepi, qui in hanc causam, quidquid in me ingenii, virium, facultatis fuit, non contuli solum; sed in eadem curam omnem etiam meam, studium, diligentiam contentionemque consumpsi. Restat ut vos quoque ipsi vobis, studio vestro, pietati, religioni satisfaciatis; communem totius Italiæ causam suscipiatis, eique mecum una ornamentorum omnium maximum sanctissimumque vindicetis.

LIX. Quanquam non tam nos Patriæ amor atque Italiæ decus in hac causa excitare debet, quam, & mul-
to

to magis , ipsius Virginis honos ac dignitas vehementius commovere . Quis enim non videt , quam Deiparæ ipsi præclarum atque honorificum fuerit , usque adeo ejus natale tectum curæ fuisse Deo , ut illud non solum abjectum neglectumque inter Barbaros sine cultu jacere noluerit ; sed etiam singulari inauditoque prodigio in cultissimas terras regionesque Catholicas , atque adeo in ipsum Romanæ Ecclesiæ gremium , a fundamentis avulsam , integrum atque intactum , transferendum asportandumque curaverit . Quod quidem huic uni ferme monumento contigit , cum interim reliqua monumenta vel sanctissimis religionibus mysteriisque consecrata , & nominatim Christi Domini Reparatoris nostri sepulchrum , sub impurissimorum ac barbarorum hominum relicta sunt potestate ; ut hoc etiam nomine hanc a Deo & impensius præ cæteris ædem diligi , & diligentius custodiri , & cum ipsa Virgine honorificentius actum esse pro certo habendum sit . Hoc porro sanctissimum sacratissimumque domicilium nobis oblatum fuit , nobis traditum , nostræ propemodum fidei commissum , & curæ demandatum . Nos cæteris gentibus , non humano , sed divino judicio prælati sumus , qui hoc religiosissimum monumentum tot annos , atque adeo sæcula obtineremus , & quod in veteri Testamento Obededomus ille fuit , apud quem David Rex Arcam illam tot prodigiis illustrem collocavit , hoc nos in recenti essemus , apud quos nova hæc Arca maximis & ipsa insigni-

signibusque prodigiis longe clarissima a Deo ipso constitueretur, & una cum ea innumerabilibus maximisque beneficiis Italia nostra cumuletur. Itaque nostrum sit tantum donum, non merito nostro, quod plane nullum est, sed unice a divina liberalitate ac beneficentia in nos profectum tueri; atque illud pro eo, quo erga Deiparam studio sumus omnes, atque esse debemus, omni ope ab istorum injuria prohibere atque defendere.

Quæ hæcenus Orator persecutus est, ea Horatius Turfelinus in præfatione Historiæ Lauretanæ his verbis plane dignis, quæ ex eo excruciantur, quodam veluti epilogo complectitur. „ Res enim, inquit, „ quanvis admirabilis & antea inaudita; usque eo tamen certa jam explorataque habetur, ut de ea ambigere, ac dubitare sit nefas. „ Quippe summa cura, fide a majoribus velut per manus accepta, deinceps traditur posteris. Nec Illyricis Recinetensibusque monumentis solum, sed Historicorum „ quoque Romanorumque Pontificum „ cum auctoritate nixa est. Ad hæc „ vetustam fidem constans tot ætatum consensus, concursusque omnium gentium affirmavit. Porro „ loci religionem incredibilis tum „ votorum copia, tum donorum „ opulentia insignem facit. Nec vetera magis, quam nova quotidie „ illustant miracula, ut de tam „ testata explorataque re addubitare non possit nisi qui, aut de divina vi ac providentia dubitare velit, aut eximere ex hominibus „ nere humanam fidem.

Hæc Oratio, sive Actio edita jam fuit an. 1770., cujus in fronte, quam hic subjicio, inscriptio impressa legebatur.

DEIPARÆ VIRGINI LAURETANÆ
JOSEPHI MARIANI PARTHENII SOC. JESU
EJUS CLIENTUM MINIMI
ANATHOMA.

DENT ALII GEMMAS, DENT MUNERA DIVITIS AURI,
QUOD MI UNUM, VIRGO, SUPPETIT HOC TIBI DO.
QUANQUAM, VIRGO, TUO HOC IPSUM DE MUNERE VENIT;
QUOD CUM DO, MUNUS DO TIBI, DIVA, TUUM.

DE



DE PRAVO
ARTIS CRITICÆ
U S U

ACTIONIS II. LIBER III.



Isposite ego istos accusare si possem ,
summopere vellem , Florentini . Me-
mini jam inde ab initio , cum de pra-
vo Artis Criticæ usu agere institui , re-
cepisse me, quoad in rebus maxime va-
riis longissimeque inter se disjunctis adniti potuissem, ali-
quem in actionibus hisce meis esse ordinem servaturum .
Putabam, si minus id facile, saltem haud ita ægre ac diffi-
culty assequi me posse , si , multis de accusatione mea
præcisiss, summa tantum rerum capita , ac criminum ge-
nera persecutus essem ; in singulis autem generibus , ea
solum , quæ aut præpostero intemperantioris artis criticæ
usu notarentur , aut monstruosa quadam novitate opinio-
num præcipue emerent , dedita opera elegissem . Ve-
rum

rum in ipsa electionis necessitate constitutus comperi , multo aliter se rem habere , atque a principio falsa persuasione deceptus existimaveram . Etenim non in rebus modo unicuique generi subiectis , sed in ipsis etiam rerum generibus tot ac tanta , eaque maxime insignia , ac plane singularia objecta sunt , quæ cum perdifficilem optionem fecerunt , tum effecerunt præterea , ut prorsus de servando ordine desperarem . Neque vero aliter non solum propter res ipsas , sed etiam propter summam istorum intemperantiam poterat evenire . Etenim cum isti nova quædam atque inaudita in omni genere per se excogitarint , & multo etiam plura ab iis , qui ea ante ipsos jam excogitassent , liberrimis in opinando hominibus , & nullo Religionis vinculo , qui illos cohiberet , adstrictis mutuati sint ; nihil propemodum in eorum Operibus occurrit , quod non insigne , quod non eminens , quod omnino ab accurato ac diligenti accusatore in iudicium vocandum non sit . Quamobrem sentio bene multos non tam de ordine , quam de rebus multo magis sollicitos , & eos quidem egregie erga Catholicam Religionem animatos , nec minus , quam ego sim , istiusmodi immoderationis Criticæ generi infensos , quorum sensus mihi noti sunt , in concione non defuturos , qui multa a me omnino requirent , quæ ipsorum iudicio nullo modo fuissent prætermittenda ; quibus ego hominibus quomodo satisfacere possim , plane non video . Nam , si in summa rerum , qua
in

in hac causa circumfundor ac plane obruor copia, omnibus vel iusta petentibus ac debita flagitantibus aures præbere voluero, nullus actionibus hisce meis esset modus, nullus terminus constitutus. Quare has in angustias coniectus cum sim, ut & multa mihi necessario omittenda sint, & ordo aliquis teneri a me in consequentibus actionibus omnino non possit; nolite, quæso, summo jure mecum agere, Florentini; nolite omnia ad exquisitam & artis meæ rationem, & judicii formam exigere, ut, si minus ordini serviam, & si multa præteream, id & oratoris vitio, & accusatoris negligentiae tribuendum existimetis. Remittite igitur primum mihi aliquid in hac causa de summa rerum, quod cum dabitis, non tam mihi dabitis, quam ipsis adversariis condonabitis. Non enim ii, ut opinor, in hoc repugnabunt; cum sua ipsorum maxime interesse debeat, non omnia crimina ab accusatore in judicium vocari, & multa etiam, immo vero pleraque ab eodem compellente necessitate prætermitti; tum vero sic audite me, ut aliquem quidem rerum delectum postuletis, ordinem vero non magnopere requiratis. Ego quidem, quo muneri meo aliquo modo ne desim, & siqua ratione possim, omnibus morem geram, electissima quæque, quoad mihi in magna copia facultas suppetet, consecrabor; ordini autem hoc pacto me debor; Catholicam Religionem, quæ potissima ratio fuit, cur ad hanc causam accesserim, tanquam scopum

pum aliquem mihi proponam , hanc unice spectabo , in hanc unam aciem obtutumque defigam . Quocunque tandem ordine sagittæ emissæ sint , non admodum mihi videtur esse laborandum , dummodo electiores e pharetra expromantur , & omnes ad certum scopum præstitutumque dirigantur . Itaque , ne vos pluribus morer , egregia duo istiusmodi intemperantioris Criticæ , quam reprehendo , documenta nunc habetote , exquisitiore cura e multis a me delecta , ac plane digna , in quibus exponendis tota hæc nostra actio impendatur . Videbitis in his , & non sine stomacho atque indignatione videbitis , repudiatam totius Antiquitatis auctoritatem , neglectum doctissimorum vetustissimorumque Scriptorum iudicium , læsam graviter sanctorum Patrum estimationem , ipsis sanctis Patribus turpissimam credulitatis iniustam notam , ereptum denique , quod caput est , Catholicæ Religioni gravissimum honorificentissimumque testimonium .

II. Fontes , specus , arbores , lucos , signa præfertim ac simulacra exstitisse quondam , ex quibus Oracula vulgo ac passim ederentur , res fuit prope ad nostra usque tempora æque omnibus cognita , atque omnem extra controversiam posita , Quis enim quercum illam Dodonæam Jovi consecratam Poetarum celebrari carminibus non audivit ? cui vel leviter erudito Jovis Ammonis nomen ignotum ? quæ quidem Oracula sive Jovis Dodonæi , sive Ammonis longe antiquissima perhiben-

hibentur, tantaque olim in existimatione habita sunt, ut, iis per certos homines prius non consultis, nihil pene a veteribus Ethnicis, quod paullo majoris momenti esset, neque terra, neque mari susciperetur. Nam quid hic ego illa commemorem ea ipsa ætate toto terrarum orbe clarissima Oracula? Serapidis Alexandriæ, Apollinis Clarii prope Colophonem, ejusdem Apollinis Delphi, Esculapii Romæ, quo de Oraculo nominatim antiqua inscriptio a Grutero relata nos docet. Mitto alia minus vulgo nota, sed certa non minus, de quibus gravissimi doctissimique scriptores meminerunt; cujusmodi illa sunt Fauni commemorata a Virgilio, Herculis a Statio, Martis a Dionysio Halicarnassæo, Apollinis Aquilejensis ab Herodiano, Clitumni a Plinio juniore, Dei Vaticani ab Aulo Gellio, Fortunæ Antiatis a Svetonio, Gerionis ab eodem Svetonio, & alia sexcenta, quæ ab aliis passim scriptoribus prodita reperiuntur. His addi possunt Cumana antra, & Prænestinæ sortes, specus, luci passim & arbores; Usque adeo totus prope terrarum orbis Oraculis referatus erat, quæ ab Ethnicis & summa religione colebantur, & summo studio (a) consultabantur.

III. Hæc porro Oracula de more consulentibus responsa reddere fuisse solita, auctores sunt cum Ethnici scri-

(a) Legantur Ovid. Metam. Svet. in Neron. cap. 40. Tacitus in Annal. lib. 2. Sveton. in Calig. & Tib. Val. Max. lib. 1. cap. 8. Laert.

in Diog. Macrob. Saturn. lib. 1. cap. 23. Spart. in Adr. Herodian. lib. 5. Liv. Dec. 1. lib. 5. & alii passim scriptores Ethnici.

scriptores omnes, tum Catholici, ac præsertim veteres illi sanctissimi doctissimique Ecclesiæ Patres. Ex Ethnicis quidem Cicero in suo Topicorum libro, ex eo ipso diserte affirmat Oracula fuisse appellata, quod in illis *Deorum inesset oratio*. Sancti vero Patres tantum abest, ut idem de Oraculis non senserint, ut etiam, qua potissimum ratione responsa ab illis reddi potuissent, investigarint, & explicandum declarandumque susceperint. Placet hac super re in medium afferre Augustinum & Cyprianum, non quo horum potior hoc loco auctoritas sit, aut esse debeat; sed quia ipsos præ cæteris placet afferre, quos cum auditis, vos & Hieronymum (a), & Joannem Chrysostomum (b), & Cyrillum Alexandrinum (c), & Gregorium Nyssenum (d), & Athanasium (e), & Origenem (f), & Tertullianum (g), & Theodoretum (h), & Athenagoram (i), & Minutium Felicem (l), & Prudentium (m), & Lactantium (n) audire putatote; tantus est in unam eandemque sententiam omnium Patrum consensus, tanta tamque mirifica conspiratio.

Augu-

(a) In Commentariis super Isaiam Prophetam.

(b) In Psal. 44. item Hom. 29. in c. 12. ad Corinth.

(c) Comment. in Isaiam lib. 4.

(d) Περὶ τῆς ἐγγαστριῦθς id est, de Pythonissa, quæ Dæmonem in ventre habens vaticinaretur.

(e) In tract. de Incarnat. Filii Dei.

(f) Lib. 7. contra Celsum.

(g) In Apologetico.

(h) In Psal. 113.

(i) In Apologia.

(l) In Octavio.

(m) In Apotheosi.

(n) De Orig. error. lib. 2. cap. 17.

IV. Augustinus igitur lib.viii. de Civit. Dei cap.xxiv.

Quid sunt , inquit , idola , nisi quod Scriptura dicit , oculos habent , & non vident , & quidquid tale de materiis , licet affabre elaboratis , tamen vita sensuque carentibus , dicendum fuit . Sed immundi spiritus iisdem simulacris arte illa nefaria colligati cultorum suorum animos miserabiliter captivaverant . Hæc Augustinus . Cyprianus vero lib. de Idol. vanitate ; *Ibi ergo , inquit (immundi videlicet spiritus ,) sub statuis atque imaginibus consecratis delitescunt . Hi afflatu suo Vatum pectora inspirant , fibras animant , avium volatus gubernant , sortes regunt , oracula efficiunt , falsa veris semper involvunt .* Quos porro hi duo Sancti Doctores immundos Spiritus vocant , alii *Dæmones* , alii *Spiritus humano generi insensos* , alii *Dæmonia* , alii *dæmum Spiritus dæmoniacos* appellant , ut omnes iisdem prope verbis mentem suam aperuisse , sententiamque declarasse videantur .

V. Hic vero nolite expectare, dum isti tanta tamque incredibili tum Ethnicorum scriptorum , tum vero præsertim omnium Sanctorum Patrum consensione perterriti , aut hanc ipsam consensionem inficiantur , aut aliquid excogitent atque moliantur , quo summam auctoritatis vim , qua plane obruuntur , aliqua saltem ex parte declinent ac subterfugiant . Certe difficile videtur robustis adeo ac firmis cervicibus hominem reperiri , quem tam immane hoc auctoritatis pondus non deterreat ,

Tom.I.

R

reat ,

reat, & qui subire illud ac sustinere se posse confidat. Sed tamen, ut dixi, nolite expectare, dum isti tantæ auctoritatis pondere commoti illud subterfugere contentur ac declinare. Procedunt in medium alacres, onus ultro subeunt ac tollunt, & tanta objecta difficultate ne vel minimum quidem animo perturbantur. Nihil agunt obscure, nihil callide, nihil dissimulanter. Fatentur sincere id, quod est; ultro atque aperte concedunt, Patres ad unum de Ethnicorum Oraculis idem sensisse, idem affirmasse, idem omnes de iisdem uno prope ore fuisse locutos. Obsepto hoc aditu penitusque intercluso, qui unus honesto cuidam effugio patere videbatur, nunc quam viam singulari illi, cujus auctores dici cupiunt, sententiæ muniant, videte, quæso, Florentini; &, dum licet, novi hujus Criticæ generis specimen capite, quæ quam temperans sit, quam moderata, vel ex hoc uno facto cognosci potest.

VI. *Quid prohibet*, inquit unus ex istis paullo cæteris promptior atque animosior, *quo minus hac in re, quæ magis arridet, sententiam possimus eligere?* Quid est hoc? *Quid prohibet, quominus hac in re sententiam possimus eligere?* Multa in primis, si nescis, prohibent. Prohibet ratio, de qua videbimus postea; prohibet totius antiquitatis auctoritas; prohibet scriptorum omnium tum Ethnicorum tum Catholicorum consensus; prohibet præcipue sanctorum Patrum mire conveniens hac in re conspiransque sententia; & cum hoc tot ac tanta prohibeant,

beant, ab homine sanæ mentis quæri potest, quid sit, quod hoc ipsum vetet atque interdicat? Deinde utrum serio res agitur, an in causâ gravissimâ doctissimis ac sanctissimis viris illudendi occasio captatur? Si, ut docuimus, una omnium scriptorum hac de re opinio ad hoc usque tempus fuit; neque vero tu id negas, sed ultro fateris atque concedis; si omnes sancti Patres idem senserunt, idem affirmarunt, idem diserte, idem uno ore pronunciarunt, per Deum immortalem! qui locus unquam eligendæ sententiæ reliquus esse poterit? Ecquod genus electionis illud appellandum existimabimus, ubi optio nulla sit, nulla eligendi potestas fiat? nisi forte hoc tu loco illam optionem appellare malis, quæ te in eas conjiciat angustias, ut aut idem atque omnes dicas, quod certe non vis, aut omnibus, quod velle non debes, aperte contradicas.

VII. Nam illud, quod additur, dari facultatem eligendi sententiam, *quæ maxime arripet*, cujusmodi esse dicam? Quid? in re tam gravi, tam certis auctoribus probata, tot sententia, quæ consignata testimoniis, *potissimum arripet*, eligi poterit? Non igitur amplius in sententiarum delectu certum judicium, non probabiles rationes, non firma ad persuadendum argumenta, non auctoritatem, sed unam libidinem tanquam arbitram nostrarum opinionum sequemur ac ducem? Cujusmodi autem opiniones prodituras in lucem existimabimus, quas non ratio gubernet, sed una temeritas moderetur; quas non

ad rationem exigere , sed ad arbitrium confingere , & perperam excogitare cuique permissum sit ? Præclara enim vero dux & opinionum nostrarum moderatrix disceptatrixque libido ! si nos ei semel regendos gubernandosque dediderimus . Et mirabimur , hoc tam gravi in re constituto veluti principio , si novæ non dicam opiniones , sed nova opinionum monstra atque prodigia ad ipsius Catholicæ Religionis perniciem quotidie erumpant , & majora in dies eruptura ominari possimus ?

VIII. At *hoc* , inquit , *ad dogma non spectat* . Video. quid igitur ? illudne statim consequetur , rem hanc esse hujusmodi , ut de ea cuique liceat impune ac pro libito opinari ? Nunquam profecto te tam acutum ac subtilem Dialecticum existimassem , nisi te hoc novo more rationationes concludentem audissem . Præclare enim vero historicis monumentis consultum esset , si hæc tua ratio valeret , & cujusque arbitrio ea , *quæ ad dogma non spectant* , sive admittere sive respuere concessum foret . Quam multa sunt , quæ ad dogma non pertinent , quæ quidem aut si negaris , aut si etiam tantummodo in dubium adduxeris , næ tu amens eris , atque omnium judicio non reprehendendus solum , sed in custodiam tradendus . Ad dogma certe non pertinet existisse olim Romulos , Remos , Numas Pompilios , Tullos Hostilios , Ancos Martios , Scipiones , Metellos , Marios , Cæsares atque Pompejos ; eosdem porro alios clarissimos fuisse Reges , alios fortissimos Impertiores , alios alia laude com-

commendatissimos ; hos igitur , quandoquidem isto tuo ratiocinandi genere delectaris , negato exstitisse , & illa inania ac commentitia fictorum Heroum nomina esse dicito .

IX. Hic autem non , opinor , aut ad omnium Historicorum auctoritatem , aut ad communem persuasionem confugies , quam quidem responsionem cæteroquin optimam , tua tibi ipse licentia intemperantiaque præcidisti . Nam quid aliud tibi nunc a me objicitur , nisi hæc ipsa totius antiquitatis persuasio , nisi communis sanctorum Patrum auctoritas , nisi unanimis veterum scriptorum omnium tum Ethnicorum tum Catholicorum conspiransque consensus ? Etenim utram tandem in partem tanta hæc tamque incredibilis conspiratio valere debet ? Nonne , cum nulla potior occurrat ratio , & nihil , quod contrarium manifeste persuadeat , afferatur , nec vero afferri possit , eadem utrobique ratio eandem ad vincendum & convincendum vim debet obtinere ? ut , si propter auctoritatem & communem persuasionem , quos clarissimos commemoravi viros exstitisse fateri adigeris , similiter id , quod contendo , & eadem evincitur auctoritate & persuasionem , non diffiteri cogaris ?

X. Præterea , tametsi hoc ad dogma nequaquam pertinere concedam , non tamen liberum hoc ipsum usquequaque velim tibi fingas ac solutum , ut cum ipso dogmate non sit aliquo modo implicitum & cohærens .

R 3

Non

Non aperte quidem in sacris Scripturis enunciatum, Dæmones infedisse statuas, unde ab impuris spiritibus responsa consulentibus redderentur. Sed si hoc ipsum Divina volumina diserte non enunciant, tacite saltem indicant. Quid enim frequentius in sacris Litteris occurrit, quam Gentium Deos esse Dæmonia (a)? quæ vero a Gentibus sacrificia Idolis offerebantur, ea oblata esse Dæmonibus? Quid? cum Israelitæ ipsi redarguuntur eo nomine, quod, quas infames victimas Ammonitarum Idolis mactassent, eas Dæmonibus obtulissent. Quid? quod eadem Scriptura tradit, certos ab Ocozia Rege missos esse homines, ut Oraculum Accaron consulerent, & responsa fideliter renunciarent. Quorsum Legati missi? quorsum consultum Oraculum? quorsum expectata responsa? si mutum, si elingue fuisset Oraculum; si nulla dabantur responsa; si frustra consulebatur. Quod Oraculum cum aliud non esset a Beelzebub; Beelzebub autem non Dæmonium fuisse solum ex Matthæo discamus, sed etiam *Principem Dæmoniorum*, consequitur Oraculum illud & infessum fuisse a Dæmone, & per eundem responsa consulentibus reddita. Non igitur res hæc, etiamsi dogmate non contineatur, est huiusmodi,

ut

(a) *Psal.* 95. v. 5. Omnes Dii gentium Dæmonia. *Psal.* 105. v. 37. Immolaverunt filios suos, & filias suas Dæmoniis. *Deut.* c. 32. v. 27. Immolaverunt Dæmoniis, & non Deo. *iv. Reg.* c. 14. 2. Ite consulite Beelzebub Deum Accaron, num vi-

vere queam de infirmitate hac, & v. 3. Numquid non est Deus in Israel, ut etiam ad consulendum Beelzebub Deum Accaron? *Matth.* 12. v. 24. Hic non ejicit Dæmonia, nisi in Beelzebub principe Dæmoniorum.

ut quis impune prorsus de ea ac libere possit opinari . Catholicum enim hominem non expressam solum , sed tacitam etiam revereri sacrarum Scripturarum auctoritatem omnino decet , & vero etiam oportet .

XI. Verum præstat tandem aliquando gravissimi viri hac super re audire sententiam . *Non est*, inquit, *cur, quod Antistitum & Sacerdotum astu ac fraude fieri potuit, illud Dæmonibus immundisque spiritibus tribuamus* . En præclara sapientis & moderati Critici sententia ; en inventum singulare ; en novum pulcherrimumque cogitatum . Quid hoc loco dicam , Florentini ? quandoquidem res est hujusmodi , nihil ut in eam , quod quidem gravius ac vehementius dici possit , non convenire videatur . Quid ? Idcircone a communi tot sapientissimorum ac sanctissimorum Patrum sententia , a gravissima totius antiquitatis , ac veterum scriptorum omnium auctoritate recedere oportuit , ut non dicam novam aliquam opinionem , si minus probabilem , at tolerabilem saltem , sed opinionis monstrum quoddam atque prodigium in medium afferres ? Vide porro ac perspice , quid ostendendum susceperis ; vide , quid oneris tibi met ipse imposueris , cui haud scio an ferendo esse poteris ; ut præstabilius sane fuerit illud non suscepisse , quam semel susceptum cogi cum ignominia deponere atque abjicere . Illud enim docere debes , atque adeo demonstrare , si fidem aliquam sententiæ istius conciliare velis ; Tantum astu , dolis atque mendaciis

ciis Ethnicos Sacerdotes valuisse, ut non uni vel alteri sæculo, sed duobus, sed tribus, sed quatuor, atque adeo eo amplius annorum millibus; non uni aut alteri nationi, sed nationibus universis; non in una solum aut altera orbis parte, sed ubique gentium atque terrarum, tota nimirum Europa, Africa, Asia, & incomperta antiquis, nunc vero nobis cognita America; non barbaris tantum incultisque populis, sed cultissimis & nobilissimis gentibus; non solum credulis senibus, non rudi vulgo, non imperitis mulierculis, sed omnibus omnium ordinum præstantissimis doctissimisque viris, Regibus, Ducibus, Imperatoribus, Philosophis, Oratoribus, Historicis, Poetis, omni denique hominum generi, Ægyptiis, Syris, Cædæis, Hircanis, Parthis, Medis, Persis, Arabis, Indis, Gallis, Britannis, Germanis, Hispanis, præsertim vero Græcis, & Latinis, a quibus in omne hominum genus omnis humanitas ac sapientia effluxit & derivata est, nullo non tempore flagitiosissime turpissimeque, addam etiam ad majus orbis terrarum universi dedecus atque infamiam, felicissime imposuerint.

XII. O rem novam! o rem prorsus inauditam atque incredibilem! Tantumne aliquot Sacerdotes cogitare potuisse? tantumne esse aulos? tantumne fuisse assecutos, ut omne hominum genus deceiverint, fefellerint; in fraudem induxerint? Paucorumne hominum astu ac dolis omnes homines illusi? paucorum menda-

ciis

ciis orbis terrarum deceptus universus ? Et hoc quisquam credet ? quisquam sibi persuaderi sinet ? quisquam erit tam patulo gutture , qui talem ac tantam absurditatem uno esu deglutiat ? cujus guttur , ut profundissimus gurgis sit & immensa vorago quædam , tamen arbitror tam immane atque horrendum capere monstrum non posse . Tu vero id docere ? tu id ostendere ? tu planum facere ? tu demonstrare poteris ? ut omnes undique rationes conquiras , ut omnia argumenta colligas , ut omnes locos ad conciliandam fidem a Rhetoricæ artis magistris inventos adeas , scruteris , effodias , egeras , ut ingenii tui vires omnes nervosque contendas . Age sis , vide , quære , pervestiga , si quid forte , occurrat , quod commode possis dicere . Refer te ad istos ipsos tuos Sacerdotum dolos atque fallacias , easque in subsidium voca , & experire an ; ut illi toti orbi feliciter imposuerunt , sic tu quoque nobis æque feliciter possis imponere . Illud enim docere ac demonstrare necessario debes , aut aliquot Sacerdotes ita astutos fuisse & callidos , ut omnes homines soli circumvenerint , aut contra omne hominum genus ita stupidum fuisse ac stolidum , ut ab aliquibus tantum Sacerdotibus facile potuerit circumveniri . Unum ex his duobus , quandoquidem tantopere , ut paullo ante vidimus , optione delectaris , eligere nunc adigeris , unum de duobus docere cogeris ac demonstrare . Eligito igitur , quod libet ; utrum elegeris contra te futurum ,
opi-

opinor, vides; de neutro autem non est cur cogites. Quamobrem quem in locum, ubi nullus patet exitus, unde honeste possis evadere, progressus sis, non dubito, quin ipse intelligas ac plane sentias. Quid igitur attinuit in re vetere novum figmentum comminisci? Quid veterem repudiare, & novam adoptare opinionem? nisi ut, dum nimium Sacerdotum calliditati tribuis, tibi ipse, nomini tuo existimationique detraheres.

XIII. At inquires, hoc est Idolorum Antistites improbissimos homines ac nequissimos omni improbitate nequitiaque absolvere. Immo vero hoc est tot sapientissimos Ethnicos, Ægyptios præsertim, Græcos, & Latinos, qui illis sæculis ingenio, doctrina, eruditione, sapientia, omnium bonarum artium studiis supra omnes gentes flourerunt, viros & ad excogitandum sagacissimos, & ad suspicandum acutissimos turpissimæ credulitatis stoliditatisque damnare; hoc est eandem stoliditatis calumniam sapientissimis Ecclesiæ Patribus inferre, eisque gravissimam injuriam irrogare, quorum hac in re auctoritas negligitur, sapientia contemnitur, testimonium repudiatur. Hoc primum; deinde si recte attendis, ego non Idolorum Sacerdotes improbitate nequitiaque absolvo, sed te dementiæ stultitiæque condemno. Do, uti te vellem intelligo, Ethnicos Sacerdotes impurissimos fuisse homines, do nocentissimos, do avarissimos, furacissimos, do omni scelerum genere coinquinatos; do etiam, quod tu maxime expetis, ab ipsis astus & fraudes

des ad animos hominum pervertendos adhibitas . Quid tum ? Vide , quid dicam , semperne eosdem fraudibus ? semperne astu ? semperne mendaciis usos fuisse dicemus ? Hoc dici non potest . Dico igitur , ad fraudes atque fallacias confugisse ; sed non semper , sed interdum , sed tantum cum eis se dexter locus & commoda offerebatur occasio . Addo etiam præterea has ipsas fraudes fuisse nonnunquam summo cum ipsorum dedecore vulgatas ignominiaque detectas . Notum est illud , quod Beli Sacerdotibus contigisse sacræ Litteræ (Dan.xiv.) tradunt , qui noctu clam per pseudothyrum in templum subeuntes , quos cibos quam lautissime magnificentissimeque apparatus Assyriorum Rex Belo apponendos curabat , abligurirent ; quorum quidem fraus subtilissimo Dianelis consilio detecta fuit , eorumque improbitas a Rege merita morte supplicioque mulctata . Quare quod ab impurissimis & edacissimis Beli Sacerdotibus factitatum fuit , hoc idem non alienum a reliquorum etiam Sacerdotum moribus fuisse concedo .

XIV. Sed, si recte animadvertis , in hoc nostra questio non vertitur ; neque hac in re ego a te dissentio , immo vero mihi tecum convenit . Igitur ad id , quod dico , animum auresque erigito . Dico te , ut id , quod posuisti , aliqua ratione confirmes , docere omnino debere Idolorum Sacerdotes nunquam non fraudibus esse usos , Oracula omnia Antistitum astu ac dolo fuisse reddita . Quod si aliquando malos Dæmones , aut in partem flagitiosissimi

simi operis fuisse vocatos, aut sua sponte venisse concesseris, non est, cur neges Oraculorum responsa Dæmonum præstigiis, non quidem singillatim, quod non est necesse, sed universè ac generatim esse tribuenda. Quo semel concesso, omnis ista tua machinatio corruit, & ita corruit, ut in machinatoris ipsius recidat caput, & sua Architectus ipse obruatur atque obteratur machinatione.

XV. Quanquam quid est, quod diutius dissimulem? Dicam id, quod est, Florentini, dicam clare, dicam aperte; nec de re gravissima & maxima, quæ unumquemque nostrum commovere summo opere debet, reticebo. Quo quidem loco non jam amplius ego te, sed illum potius alloquar, cujus sententiæ, sanctorum Patrum auctoritate neglecta, subscripsisti, cujus etiam libellum pene totum exscripsisti, qui, ut tute ais, ingenii, ut ego sentio, intemperantiæ tibi palmam præripuit, illum inquam Hæreticum Anabaptistam appellabo, cui cum ob eam, quæ mox indicabitur, causam Dæmones illi atque immundi spiritus vehementer incommodarent, idcirco eos omni studio ac contentione ab Idolorum simulacris, ab arboribus, a specubus, a fontibus omni contentione arcendos removendosque curavit. Non hòc illi sententia Patrum displicebat, quod aut esset falsa, aut minus rationi consentanea; neque enim credibile est, cum in re clara atque perspicua tam parum vidisse; sed, quod Hæreti-

ticum hominem Catholicæ Religioni infensum , torquebat maxime ac disruciabat , illud erat , quod , qui Patres Dæmonum arte atque præstigiis fundi Oracula affirmassent , iidem hos ipsos Dæmones post salutarem ac vivificum Christi Domini Reparatoris nostri adventum a Deorum signis ac simulacris pulsos exterminatosque , & tunc primum loquacissimis ac mendacissimis fuisse Oraculis silentium indictum uno ore similiter affirmarent . Non ignorabat ille quidem , hac super re inter cæteros sententiam suam declarasse Athanasium (a) , Cyrillum Alexandrinum (b) , Tertullianum (c) , Hieronymum (d) , Lactantium (e) , Minutium Felicem (f) , & omnium elegantissime Prudentium (g) illis carminibus ;

Delphica damnatis tacuerunt fortibus antra ;

Perdidit insanos mendax Dodona vapores ;

Mortua jam mutæ lugent Oracula Cumæ ,

Nec responsa refert Libycis in syrtibus Ammon .

XVI. Neque vero ad ejusdem notitiam testatissimum illud pervenire non potuit , atque adeo debuit , quod Juliano Apostatæ accidisse narratur , cum ejus facti locupletissimos testes haberet Jo. Chrysostomum (h) , Theodoretum (i) , Sozomenum (k) , Socratem (l) , & omnium novissime Baronium (m) . Nam cum Julianus Apollinem

con-

(a) De Incarnat. Verbi Dei .

(b) Comment. in Is. & Orat. 2.

(c) In Apologetico .

(d) In cap. 41. Isais .

(e) Lib. 4. Div. Inslit. c. 27.

(f) In Octavio .

(g) In Apotheosi .

(h) De S. Babyla Ep. & Mart.

(i) Hist. lib. 10.

(k) Hist. lib. 5. cap. 19. 20.

(l) Hist. lib 5.

(m) Anno 362.

confuleret, & Oraculum de more expeteret, Apollinem ipsum miratus elinguem, non aliud responsum tulit, nisi sibi a Babyla Sanctissimo Episcopo Antiocheno & invictissimo Martyre os esse obstructum. Quo quidem facto nihil illa ætate illustrius fuit, nihil magis omnium linguis sermonibusque celebratum. Julianus vero tantum abfuit, ut sanctissimo Martyri, qui loquacissimo Dæmoni linguam præciderat, irasceretur, ejusque sacros cineres perderet, ut potius ejusdem Martyris reliquias contra Ethnicorum omnium expectationem atque adeo voluntatem, ipsis nequidquam reclamantibus ac contradicentibus, eo quidem loco moveandas, sed in veterem ejus nomini Antiochiæ consecratam Basilicam transferendas honorifice asportandasque curaverit. Quo in facto omnipotentis Dei numen maxime eluxit & potestas declarata fuit, qui tanto prodigio & vim suam ostendit, & præclarissimum Catholicæ Religionis æque a malo Dæmone, atque ab homine nequam & ipsi Dæmoni amico & ejusdem Religionis acerrimo hoste luculentissimumque testimonium extorsit.

XVII. Hæc, aliaque hujusmodi, quæ hic commemorare non est necesse, homo non ineruditus ignorare non poterat; sed, quod Catholicum nomen odebat, & hæresi pertinacissima implicitus erat, hoc, inquam, tale ac tantum Catholicæ Religionis testimonium invidit. Ussit nimirum hominem Heterodoxum

ac pupugit , ipsis Dæmonibus internunciis patefieri veritatem , quam , si quomodo posset , suis ipse cogitatis obruere conabatur ; cui quidem neminem , qui sano sensu uteretur , adlipulatorem præbere se , subscriptoremque oportebat ; hominem vero Catholicum nullo modo decebat . Hinc illæ Sacerdotum fraudes , hinc illi doli perperam excogitati , hinc inepti astus illi atque fallaciæ , hinc vel ipsi Dæmones scelere nequitiaque absoluti , hinc denique præclara ista , de qua satis multa dixi , contra omnium veterum scriptorum opinionem , contra sanctorum in primis Ecclesiæ Patrum auctoritatem perperam excogitata , & tandem post tot sæcula nova plane ac monstrofa derepente exorta sententia (a) .

XVIII. Verum an hoc solum Catholicæ Religioni testimonium auferendum isti eripiendumque curarunt ? Quid illud longe luculentissimum nobilissimumque de Sibyllis ? At quemadmodum ! Deus immortalis ! quam licenter ! quam intemperanter ! quam nulla , non dicam aliquo modo probabili , sed ne tolerabili quidem ratione ! Etenim si sententiam de Oraculis Ethnicorum , de qua jam audistis , cum hac de Sibyllis , de qua nunc dicturus sum , conferre volueritis , hanc præ illa multo superiorem licentia intemperantiaque reperietis .

Ve-

(a) Qui plura super Ethnicorum oraculis desiderat , legat Joan. Franc. Balthus S. J. in Responsione adversus Historiam Oraculorum ab N.N.

conscriptam . Hoc opus eximium & eruditissimum duobus tomis comprehensum prodit in lucem Stræsburgi anno 1707.

XIX. Vetus est opinio , quæ antiquissimis litterarum monumentis continetur , Ethnicas quasdam existisse Virgines , quas ferunt divino Numine afflatas futura præsensisse , ac multa præsertim de Christo Domino Reparatore nostro Jesu Christo , ejusque Sanctissima Genitrice Virgine Maria fuisse vaticinatas . Propter hujus opinionis vetustatem , propter rerum prædictarum sanctitatem opinio ista usque ad sæculum sextum decimum viguit ; & tanto temporis intervallo nemo existit tam effuse intemperans , qui rem tam certam atque testatam , tanta tamque diuturna atque inveterata tot sæculorum auctoritate roboratam , non dicam infringere , sed ne attentare quidem ausus sit . Res igitur fuit hæc olim omnino certa , & ante tempus illud , quod indicavi , a nemine negata , a nemine in dubium , aut vero etiam in minimam dubitationis suspensionem adducta . Constat enim Sibyllinos libros , cum ab Ethnicis omnibus , tum etiam , quod nostra maxime interest , a Sanctis Patribus magno semper in pretio fuisse habitos . Nam & ab hisce libris firmissima ad Catholicæ Religionis adstruendam veritatem confirmandamque testimonia sumpserunt ; & in iis tantum inesse auctoritatis pondus existimarunt , ut Ethnicos ipsos vehementer hortari , atque adeo impellere non dubitarent , ut eos libros adirent , eos legerent , eos attentius inspicerent , & quid demum de Catholica Religione statuendum esset , etiam atque etiam considerarent ; quæ

quæ testibus adeo certis atque idoneis ad eos revincendos uteretur, quos nimirum non ipsa de sinu suo apponeret, sed de ipsorum numero daret atque produceret. Hos minime ipsis suspectos esse debere, hos ab se corrumpi, hos ad tempus accommodari omnino non potuisse; viderent proinde, quid agerent, quid sibi consilii in negotio summi momenti capiendum existimarent. Quæ quidem si ita se res haberet, ut in controversiam vocari nullo modo posset, neque de ejus veritate dubitari, si in hoc negotio bona fide ageretur, si omnis mala fraus & dolus abesset; darent tandem aliquando manus, nec veritati diutius, quam a suismet popularibus assertam ac confirmatam viderent, pugnacius obstinatiusque oblectarentur.

XX. Hæc de libris Sibyllinis sensisse Patres, his ad convincendos Ethnicos fuisse usos, & ad hos libros, tanquam ad certos & incorruptos veritatis testes, Ethnicos ipsos rejecisse adeo exploratum est, ut id ne vel ipsi quidem adversarii inficiantur, qui nescio quo pacto fieri dicam; ut, cum fere omnia aut negare, aut in dubium revocare soleant, sæpe tamen cum ad auctoritatem venit, non institutum tenent, & his nominatim in rebus, in quibus universi consenserunt Patres, unanimem eorum fuisse sententiam, sponte sua atque ulla sine tergiversatione concedant. Quod quidem utrumque honorificæ, quam de Patribus habent existimationi, an singulari cuidam modestiæ tribuendum putem, non

facile dixerim. Ipsorum verba recitabo, quo vos & rem definire, & præclaram, quam de sanctissimis illis doctissimisque viris modestissimi ac temperantissimi homines foveant opinionem, per vos ipsi liquido cognoscere possitis.

XXI. *Non esse, inquit, quid Patres de libris Sibyllinis ac vaticinationibus senserint, magnopere laborandum. Quid hoc est? Male enim vero exordiantur. Quid de libris Sibyllinis Patres senserint, non esse magnopere laborandum? Non igitur, istis auctoribus, Patres idonei erunt, qui audiantur, quorum sententia exquiratur, & auctoritas plurimi facienda in huiusmodi controversia existimetur? Cur? qua de causa sanctissimorum doctissimorumque virorum in re, quæ Catholicam Religionem maxime attingit, negligendum erit contemnendumque iudicium? Qui erunt per istos idonei, qui audiantur, his si in rebus sententia Patrum testimoniumque repudietur? Sed præstat audire reliqua, quæ principio concordant & mirifice consonant. Patres, inquit, vulgi rumores plus nimio aucupari, & res non satis accurate ad recentis Criticæ trutinam exigere fuisse solitos, compertum exploratumque est; eos videlicet illud unum habuisse propositum, ut Catholicam Religionem propagarent, de ratione autem ac via, qua id potissimum assequerentur, non admodum fuisse sollicitos. Hæc isti; omnino illi, ut videtis, quo usi sunt, exordio consentanea.*

Quid

XXII. Quid hoc loco primum ? quid postremum reprehendam , Florentini ? Quæ verba satis idonea ad castigandam tantam coercendamque licentiam reperire me putem posse ? Moderabor mihi met ipse quidem , quoad potero , in verbis ; & illa audaciæ , improbitatis , temeritatis , petulantix , impudentiæ , aliarque hujusmodi ad tantam importunitatem reprimendam facta vocabula , de mea oratione tollam prorsus atque præcidam , ne ejus temperantiæ , quam ab istis flagito , oblitus videar , & in eo peccem , in quo istos reprehendo . Sed tamen quæ facere possum , quin dolori meo tam pia præsertim ac justa de causa suscepto paream , & in summa animi ægritudine vehementius conquerar atque vociferer ? Quid ? sanctissimosne Patres ? doctissimosne Viros ? Ecclesiæ Antistites ? Catholicæ Religionis Doctores , Propagatores , Propugnatores tam superbe ac licenter appellari ? At a quibus ? Ab Heterodoxis , credo , hominibus , qui , ejurata Catholica Religione , Catholicæ ipsius Religionis vindicibus atque assertoribus nefarium perpetuumque bellum indixerunt , qui quorum Orthodoxam oderunt Fidem , eorum contemnunt sapientiam , & quorum premi se atque opprimi sentiunt auctoritate , eorum modis omnibus minuere existimationem contendunt ? Immo vero , o rem miseram ac maxime luctuosam , & nunquam satis deplorandam ! ab iis ipsis , qui minime omnium debuissent , qui in Ecclesiæ sinu

S 2

nati,

nati, alti, atque instituti nobiscum sunt, & se Catholicos dici volunt ac profitentur. Istis porro tot amplissimos gravissimosque viros prope ludibrio esse; Catholicæ Ecclesiæ Patres non, uti par est & pietas flagitat, observari, quis tandem æquo animo ferendum putet? Etenim, amabo vos, Florentini, in tanta indignitate atque atrocitate injuriarum lenti ac dissoluti, si cupiamus, esse quæ possumus? Ego certe, quoad spiritus & vita suppeditabunt, tantam sine merita reprehensione elabi intemperantiam, non patiar, non feram, non sinam. Non committam ut in gravissima causa, apud Catholicam concionem, apud Catholicæ Religionis studiosissimos Judices remissioris ac dissolutioris animi nomine merito coarguar atque condemner. Præstat quascumque subire inimicitias, quæcumque adire discrimina, quam nullam in tanta sanctissimis ac doctissimis viris obloquendi libertate vocem mittere, vocem, inquam, testem cum doloris mei, tum etiam meæ erga veteres Patres & Ecclesiam universam observantiæ.

XXIII. Nam, per Deum immortalem! quæ voces? quæ verba sunt ista? *Patres plus nimio vulgi rumores aucupari solitos; Patres res accuratius expendere non consueisse; Patres recentis Criticæ regulas ignorasse; Patres de modo amplificandæ Catholicæ Religionis non laborasse.* Quid interest, utrum ista dicatis in Patres, an eos nullius ingenii, nullius consilii, indoctos, imperitos

ros, vecordes fuisse affirmetis ? nihil recte examinare, nihil expendere novisse, nihil certo definire iudicio ? Quid ? vosne igitur soli rerum momenta pensitare ? soli artis criticæ leges ? soli iura ? soli præcepta noritis ? Ingens, superba, immoderata, & non ferenda gloriatio. Ecquid unquam, lutei homines, in litteris atque doctrina tantum profecistis, ut non dicam mortalium omnium sapientissimis anteposendi, sed cum iis aliqua vel minima saltem ex parte aut ingenio, aut bonarum artium studiis, aut etiam ista ipsa, qua tantum subnixi ambulatis, arte critica comparandi esse videamini ? Quis vestrum Augustino (a) subtilior ? quis Hieronymo (b) ingeniosior ? quis Origene (c) doctior ? quis Theophylo (d) Antiocheno, Clemente Alexandrino (e), Justiniano (f) Prospero (g) Lactantio (h) sapientior ? Atqui omnes hi vaticinationes istas, de quibus dico, unanimi consensu Sibyllis adjudicarunt, vos contra intoleranda licentia abjudicatis.

XXIV. Quod vero addunt, *Patres ramores vulgi plus nimio aucupari solitos, & de modo amplificanda Religionis non laborasse*, ad quem tandem intemperantiæ gradum pervenire dicam ? Quid ? gravissimos & sanctissimos viros *de modo amplificanda Re-*

S 3

ligio-

(a) De Civit. Dei lib. 18. cap. 46.
& 47.

(b) Contra Jovinianum.

(c) Lib. 7. contra Celsum.

(d) Lib. 2. ad Autolyicum.

(e) Lib. 8. Stromatum.

(f) In Apolog. 2. ad Antoninum
Pium Imp.

(g) De Prædest. par. 2. cap. 19.

(h) Lib. 4. de vet. sap. cap. 15.

ligionis non laborasse ? eam ad illum finem obtinendum rationem adhibuisse , ut vulgi rumores plus nimio aucuparentur ? hos adversariis suis opponerent ? his eos adorirentur ? his denique eosdem sibi esse convincendos existimarent ? Præclara enim vero propagandæ Catholicæ Religionis ratio , si hanc Patres tenuissent , ab ipsis fuisset inita ; perinde quasi Catholica Religio vulgi auctoritate niteretur . Multum sane apud Ethnicos profecissent , si se cum iis isto gessissent modo , a quibus etiam irrideri , & magno cum dedecore ignominiaque repelli potuissent . Si igitur his , de quibus dicimus , testimoniis ad Catholicam veritatem confirmandam Patres usi sunt , si ea Ethnicis objecerunt , si ad eadem Ethnicos ipsos adegerunt , reliquum est , illa rumores vulgi neque Patres existimasse , neque vero pro vulgi rumoribus ab Ethnicis ipsis fuisse habita . Cur igitur ? quam ob causam ? quem ad finem tot in Patres jactatæ contumeliæ ? cur eorum nomini , famæ , sapientiæ , auctoritati , sanctitati irrogata injuria tam gravis , & tam atrox illata calumnia ?

XXV. Abjudicatis hoc , quo audistis , modo a Sibyllis vaticinationibus his , de quibus loquimur , cui potissimum eas adjudicarint , videamus . *Ceterum , inquirunt , non dubium , quin hæ vaticinationes purum merumque commentum sint Christiani nescio cujus primis Ecclesiæ seculis otio & litteris perpèram abutentis .* Audio . Verum , quæ hoc probatis ? quæ docetis ? qua ratio-

ne

ne offenditis ac planum facitis ? Quis tandem iste *Christianus* fuit , cujus nomen ignoratis ? ubi natus ? ubi institutus ? ubi græcis litteris eruditus ? quæ provincia ? quæ regio ? quæ urbs ? hominem hunc sine nomine in lucem edidit . Nonne vos hæc omnia non indicare solum , sed etiam clare , aperte & distincte proferre deberetis , ut aliquam saltem veritatis speciem huic vestræ sententiæ inducere , & eam aliquo modo credibilem reddere possētis ? Singularis ista vestra sententia est , ut vos ipsi fateamini ; quapropter vobis non facio injuriam , si singularis sententiæ singularia documenta requiro ac flagito . Vos autem sola enunciatione contenti estis ; perinde quasi vobis affirmantibus aliquid , & non docentibus fides illico adjungenda foret , & , quod dicitis , tanquam Oraculum habendum statim esset ac venerandum . An obliti estis , Oracula omnia a vobis paullo ante de medio fuisse sublata ? An idcirco ea Dæmonibus & immundis spiritibus eripulistis , ut vobis ea solis propria faceretis ?

XXVI. Sed inquirendo pergamus ulterius . Quæro igitur , quandoquidem commentum hoc *Christiani* , ut dicitis , hominis fuit , ecquando commentum hoc ipsum vulgari , legi , in manibus hominum esse cœperit ? *Primis Ecclesiæ sæculis* . Audio . Verum , quo ? primone ? an altero ? an tertio ? an quarto denique ? Quid ? hæretis , hæsitatis , & quid de tempore , quo præclarum hoc opus publici juris factum sit , certi ac definiti

constituatis, non habetis. Miror sane, vos, qui tempora sollerter inquirere, acute distinguere, & accurate signare gloriâmini, miror, inquam, nihil certi de tempore, quo præclarus hic harum vaticinationum auctor floruit, proferre posse. Ubi nunc illi vestri, quos toties appellatis, *Synchroni* auctores? ubi illa *autographa*? ubi prima *apographa*? aliaque hujusmodi, quæ soletis tanta importunitate ab aliis expetere atque efflagitare? Hic nihil horum profertur, nihil occurrit, exhibetur nihil. Non tempus, non locus, non ipsum nomen designantur. Nonne vos hæc omnia, quibus illustrari veritas solet, & ad rerum, quarum disquisitio instituitur, caput certo perveniri, indicare, docere, demonstrare; appellare personam, notare genus, patriam, locum, regionem, urbem ostendere, definire tempus oporteret, ut fidem aliquam singulari huic vestræ sententiæ conciliare possitis?

XXVII. At res est vetustior atque ab omni memoria remotior, quam ut hæc tam exilia atque minuta sciri atque indicari a quoquam possint. Quid? Minuta atque exilia vobis ea videntur esse, sine quibus tanta illustrari veritas nullo modo potest? Non ego, si recte attenditis, minuta a vobis quæro, non exilia flagito; sed ea, quæ necessario afferri debent ab iis, qui novam, singularem, & hæctenus inauditam contra omnium sæculorum auctoritatem confirmare aliquo modo sententiam velint. Novitas ipsa sententiæ facit, ut ego
ista

ista ipsa a vobis flagitem, quæ in alia controversia prætermittenda existimarem. Cur igitur, si res vetusta est, uti dicitis, tantum vobis sumitis, ut ejus cognitionem vobismet ipsi tanto post tempore arrogetis? cur vetustissimæ rei vetustissima, quæ ego profero, & vos proferre non potestis, testimonia repudiatis? Quid est, quod de illa tanquam de recenti judicium instituitis? quid est, quod in re vetere non veterum testimonia accipitis; in re vetere novum commentum confingitis; in re vetere omnium veterum Patrum auctoritatem negligendam putatis? Ego scilicet vestro recenti judicio in re vetere mihi standum esse arbitrabor? & vetera ipsa Patrum testimonia præ nova vestra opinione negligenda ducam? Patrum, inquam, quos constat illis ipsis sæculis, quibus Sibyllæ floruerunt, multo proximiores, quam vos, vixisse, & magna cum doctrinæ laude, & sanctitatis commendatione vixisse; quos Sibyllinos libros in manibus habuisse, legisse, pervolutasse ex ipsorum testimonio compertum est, qui in iis nihil falsi, nihil simulati, nihil commentitii deprehenderunt, qui denique eos libros, usque adeo illorum veritas explorata erat, Ethnicis legendos exhibere, ad eosque tanquam ad certissimos Catholicæ Religionis testes provocare Ethnicos ipsos non dubitarunt.

XXVIII. Dicunt, hujusmodi libros tanta cura a Romanis fuisse custoditos, ut eos nemo adire, nemo legere, nemo inspicere potuerit. Quid? eos nemo le-

gere ? nemo inspicere ? nemo adire ? Excipient opinor multos ex Ethnicis, & Catholicis (a), qui eos libros & vidisse se, & legisse, & inspexisse diserte testantur. Doceant isti Sibyllinos libros ab Ethnicis & adiri & legi potuisse, a Patribus vero non potuisse. Doceant, si ipsa *autographa*, propter diligentem custodiam adiri, legi, inspicere non potuerint, quid causæ fuerit, cur descripta ab iis exemplaria & haberi & legi & commode inspicere ac considerari nequaquam potuerint.

XXIX. At hi libri eodem, quo Capitolium conflavit, incendio absumpti sunt. Si igitur incendio absumpti sunt, ii certe ante incendium exstiterunt. Si enim nulli fuissent, conflagrare profecto cum Capitolio non potuissent. Verum esto, absumpti fuerint, conflagrarint. Quid igitur ? Nullane toto terrarum orbe eorundem reliqua fuisse exemplaria censendum erit ? quibus aliquo modo tanta reparari jactura potuerit. Exspecto quid dicant. Si concedunt; non est, cur nobis hoc Capitolii incendium ac flammam opponant. Si negant; quid fuit ? quamobrem Augustus Legatos in Asiam, in Africam, atque Erythram hos ipsos libros quæsitum mitteret, & ubique terrarum summo studio

(a) Non desunt, qui ad confirmandum hoc ipsum Virgilianum illos versus Eclogæ quartæ a Poeta Salonino Pollionis filio accommodatos a Sibylla Cumana desumptos contendunt, alii autem negant, & ab Hesiodo fuisse descriptos volunt. Ceterum Constantinus Augustus in Oratione, ut est a. ud Eusebium, habita ad Sanctorum cœtum meminit Sibyllæ Erythræ, ejusque nonnullos versus refert, in quibus nominatim Jesus Christus describitur. Vid. Nat. Alex. tom. 3. fac. 1. Diss. 1.

dio conquirendos ac Romam asportandos curaret? Exstare igitur exemplaria putabantur, si tanta diligentia conquirebantur. Studium vero inquirendi ipsum, magno semper in pretio libros istos fuisse habitos, ac proinde, ne prorsus interirent, sæpius fuisse descriptos clare aperteque demonstrat.

XXX. Jam omnibus exclusi rationibus ad nescio quæ ipsis incredibilia confugiunt. *Quis credat*, inquiunt Nemo sane, qui uti vos, nihil credere, omnia in dubitationem adducere, negare omnia in animum induxerit. Verum age, quid hoc rei est, quod omnem adeo fidem superet, ut credi non possit? Quis credat, inquiunt, Virgines Ethnicas (a) divino numine afflatas tantorum fuisse conficias mysteriorum? Primum credent omnes, præter vos, qui pene nihil credere, omnia tanquam falsa respuere consueveritis. Credent deinde quotquot sacrorum Codicum non sunt ignari, & aliquid de Balaamo impio homine legerunt, cujus pervulgatum illud de Christo Vaticinium exstat; *Orietur stella ex Jacob, & consurget Virga de Israel*. Credent præterea, qui Theologiam vel primoribus, ut ajunt, labiis attigerunt, qui non ignorant Prophetiæ, quæ vocatur, donum non esse

(a) Sibyllas Prophetiæ donum Virginitatis merito consecutas, auctor est Hieronymus lib. i. adversus Jovinianum. Hieronymo Criticus quidam refragatur, & tanti Doctoris inanem hanc esse commentationem affirmare non dubitat. Hujusmodi annotationibus totum hoc opus explere potuissim, nisi lex, quam mihi met jam ab ipsa hujus præfatione operis indixi, sive verius Auctor ipse Editori indixit, vetaret.

esse hujusmodi, quod hominem Deo conciliet & amicum reddat ; qua de causa homini nequam , sine divinæ sanctitatis injuria , tribui potest. Hoc Theologi unanimi sententia docent ; *Prophetiam* nimirum , ut loquuntur , *esse donum non gratum faciens, sed gratis datum* ; unde recte colligit S. Thomas a sanctitate morum esse posse sejunctum ; quod summus ille Doctor ac plane *Angelicus* , sed bonus videlicet vir , qui ex istorum schola non prodierat , nec recentibus novæ hujus artis criticæ præceptis institutus erat , allato Sibyllarum exemplo confirmat . Hoc autem , quod a tam multis creditur , non est cur ego magnopere angar , si isti diutius negare pergant , & credere obstinatius recusent .

XXXI. Estne aliud , quod istis incredibile videatur ? Immo vero est . Sibyllinas ajunt vaticinationes contra atque vaticinationum ipsarum natura ferat , apertas esse nimis atque perspicuas . Sed hoc est hujusmodi , ut de rebus , quas Sibyllæ prædixerunt , non perinde , ac de futuris , sed de præteritis isti judicium instituunt . Præclare in hanc rem more suo Lactantius de Vera Sapientia cap. xv. *Non dubito, inquit, quin illa carmina prioribus temporibus pro deliramento habita sint, cum ea nemo intelligeret. Denunciabant enim monstrosa quædam miracula, quorum nec ratio, nec auctor, nec tempus designabantur.* Non perinde igitur de vaticinationibus ante eventum , ac post eventum judicandum est . Multa hujusce generis exstant in Scripturis , quæ , clara
nunc

nunc atque aperta sunt, obscura tum erant & prorsus reclusa atque abdita, cum primum fuerunt a Prophetis enunciata. Sed fingamus has ipsas vaticinationes obscuras etiamnum esse, fingamus, vocum & sententiarum ambagibus involutas; nonne tunc vel maxime, atque hoc potissimum nomine illas isti rejicerent ac repudiarent. Igitur hæc vaticinationes istis non placent, quia perspicuæ sunt; displicerent profecto, si essent obscuræ. Quid tandem est, quod istis placere possit? illud unum, mihi credite, Florentini, refragari omnibus, adversari, contradicere, repugnare.

XXXI. Quæ cum ita se habeant, quemadmodum demonstravi, non est cur isti in hac nostra controversia me provoquent ad numerum Sibyllarum, neque ad earundem edendum nomen, neque ad ea carmina, quæ in Bibliotheca Patrum leguntur, neque ad carminum ipsorum genus; acrostichane fuerint, an alterius cujusque generis, neque ad alia hujusmodi, quæ ad rem non pertinent, & in quibus nostræ disputationis ratio non vertitur. Non ego hic laboro de numero Sibyllarum, non angor de nomine, carminum genus non moror, cujusmodi fuerit, non quæro; qui circumferuntur Sibyllini versus quanti faciendi sint, non inquirō; hæc omnia missa facio, nec in præsentia investigo. Non est, cur in his mihi negotium isti facessere meditentur. Itaque animadvertant, quemadmodum totam hanc controversiam circumscribam, & quid dicam, & quomodo dicam diligenter attendant.

dant. Dico igitur, Ethnicas quasdam existisse Virgines, quo tandem cumque nomine fuerint appellatæ, qui tandem cumque earum numerus fuerit, quod tandem cumque carminum genus adhibuerint, dico has fuisse fatidicas, dico multa de Christo Domino, dico multa de ejus Virgine Matre prædixisse, dico has prædictiones Ethnicis fuisse notas, dico has ipsas prædictiones ab antiquissimis Ecclesiæ Patribus fuisse perlectas, dico nihil in iis falsi, nihil simulati, nihil commentitii eisdemprehendisse, dico his prædictionibus contra Ethnicos fuisse usos, quod certe non fecissent, si fabulosa illa carmina fuissent, dico ad Sibyllinos libros tanquam ad certissimos veritatis testes a Patribus Ethnicos fuisse rejectos; dico eisdem Patres id minime facturos fuisse, nisi res hæc testatissima fuisset & vulgatissima, ut neque negari, neque ignorari ab Ethnicis posset. Ad-do præterea, ab iis, qui secus, atque hætenus demonstravi, sentiant, non solum scriptoribus Ethnicis, quibus, quando consentiunt, abroganda fides non est, sed etiam, & vero præsertim gravissimam Patribus irrogari injuriam, quorum auctoritas in re tanta contemnitur, quorum integritas, fides, religio, doctrina, sapientia, fraudis, falsitatis, ignorantia, ad minimum nimia credulitatis nomine arcessitur. Addo etiam & dico, contrariam opinionem nullo prorsus niti fundamento, nullo modo probabilem esse, singularem, inauditam, falsam denique, atque idcirco merito ab omnibus repu-

pudiandam . Hæc ego dico , quibus , ut opinor , nemo , nisi qui averſus a vero ſit , contradicat .

XXXII. Satis jam mihi videor , Florentini , quæ duo iſtorum intemperantiæ maxime inſignia atque illuſtria propoſui documenta , luculenter explicaffe , ex quibus vos ſimiliter intellexiſſe arbitror , quomodo duo item illuſtria ac maxime luculenta ab iſtis erepta teſtimonia ſint Catholicæ Religioni , quæ tametſi ſe per ſe ipſa tuetur , & externa ſuffragatione non indiget , hoc tamen ipſi præclarum eſt , atque honorificum ſemper fuit , quod ad domeſticos teſtes externi quoque veritatis ſuffragatores accederent . Verum unde nam harum tam ſingularium ac novarum opinionum originem repetendam exiſtimabimus ? Auditiſtis jam , cum de Oraculis ageremus , ejus opinionis Hæreticum Anabaptiſtam principem a me appellari , hujus autem de Sibylinis libris ſententiæ Calvinianum hominem ſcitote fuiſſe auctorem . En Florentini ſaluberrimi fontes , quos iſti adeunt ; neque vero aliter eſſe poſſe apud me jam inde conſtitueram , cum tam monſtroſas ab iſtis atque adeo Catholicæ Religioni adverſantes proferri opiniones animadverterem . Ex his , ex his inquam fontibus , ſive potius lacunis iſti ebibunt , quod poſtea in circulis ad captandam paſſim novæ cujuſdam ac reconditiſſimæ eruditionis famam , atque animos imperitorum ſollicitandos eructent .

XXXIII. Et mirabimur , iſtos , qui ſe huiusmodi magi-

gistris in disciplinam dederint , de amplissimis Ecclesiæ Patribus tam male sentire , tam licenter detrahere , & quorum singularem sapientiam admirari ac revereri deberent , eorumdem gravissimam respuere ac negligere auctoritatem ? O tempora sane misera & calamitosa ! Jacent in tenebris abdita & conssepulta præclara Augustini , Hieronymi , Ambrosii , Cypriani , cæterorumque Ecclesiæ Patrum volumina , & , si quid ad nos aut transalpinis , aut transmarinis prælis excusum defertur , hoc statim nullo delectu arripitur ; & quod usu venire in mercibus solet , ut illæ pretiosiores habeantur , & ingenti sumptu comparentur , quæ peregrinæ sunt atque adventitiæ , hoc usu similiter venire in libris editis quotidie non sine summo animi dolore videmus . Quotus enim quisque nunc est , qui hujusmodi libros magno studio non conquirat , summo pretio non coemat , assidue in manibus non habeat , avidissime non legat , & , cum ex iis aliquid excerpterit , quod alicui jam receptæ opinioni adversetur , tum demum sibi tanquam de singulari ac recondita eruditione placeat atque blandiatur . Cautum nimirum est saluberrimis Tridentini Concilii decretis , ne quis hujusmodi libros Catholicæ Religioni & bonis moribus pestiferos ac noxios absque legitima facultate legat , neque apud se retineat ; cautum utique ; verum huic tanto malo magis in dies magisque gliscenti non usquequaque provisum . Quæ necessaria cautio est , ea jam a quibusdam supervacanea

nea

nea quædam diligentia prædicatur. Itaque sanctissimis hujusmodi decretis quam nulla prope religione se quidam intercedere posse arbitrentur, quid me attinet dicere? Verum isti, si me audient, quid agant, quo progrediantur, & quibus se gravissimarum pœnarum vinculis adstringant, serio considerabunt.

XXXIV. Et hic a me quisquam quæret, cur hujusmodi libris, qui jam prope soli bibliothecas istorum occuparunt, usque adeo non delecter, ut eorum etiam auctoribus maxime infensum me præbeam atque inimicum? Quid? Qui veterum Ecclesiæ Patrum auctoritatem tueri velit, qui traditas a majoribus nostris, sapientissimis mortalibus, opiniones retinere, qui mores integros, qui sinceram Fidem, qui Religionem salvam esse cupiat atque incolumem, poterit his libris delectari? poterit horum librorum auctoribus inimicum se atque infensum non profiteri? qui id unum omni contentione agere videntur, id unum omni ope studere, ut a qua sanctissima Religione turpiter ipsi ac flagitiose desciverint, ab eadem nos turpiter æque ac flagitiose desciscamus. Nam quid aliud istos velle? quid aliud spectare? quid moliri existimabimus novis his excogitandis disseminandisque opinionibus, nisi ut sensim ac veluti per cuniculos Catholicæ fidei fundamenta subruant atque convellant? Demus hoc illis, quod solum dari sibi in præsentia postulant, ut omnia, quæ testatissima ac prope luce ipsa clariora non sunt, repudiemus,

Tom. I.

T

ut

ut pias quasdam traditiones tanquam imperitorum hominum ac vulgi rumores aspernemur, ut sanctissimos illos Ecclesiæ Doctores, eo, quo par est, in numero non habeamus, tum denique, mihi credite, illud etiam dabimus, atque ii sine dubitatione a nobis auferent, ut desertis ac relictis Catholicæ Religionis signis, transfugæ in ipsorum castra veniamus. Hoc funesta eorum, qui a Romana Fide olim defecerunt exempla docent, quorum exitus luctuosissimos cum recordamur, quæso de nostra, quæso de communi salute cogitemus. Porro hæc qui videat planeque perspiciat, ac prope certo eventura præsentiat, poterit his tantis malis instantibus jam atque imminentibus graviter non commoveri? poterit in eos homines, quos tantorum futuros malorum auctores pertimescat, non vehementissime concitari?

XXXV. Ego vero nunquam Heterodoxorum hominum odi industriam, nunquam despexi doctrinam; laudo etiam, si quid operis, & eos quidem multum posuisse fateor, in id contulerunt, ut bonas artes liberalesque disciplinas excolerent ac propagarent. Magni atque adeo plurimi facio eorum Mathematicos, Astronomos, Geometras, Physicos, Philosophos, Philologos, quibus his maxime temporibus abundant, & quorum tota Europa propter singularem, atque excellentem eruditionem nomina prædicantur, & quoad bonæ artes vigeant, prædicabuntur. Nam quod a Romana communione distracti dissocia-

tique

tique sunt, hoc ego ipsis petulanter non exprobro; immo vero doleo & vehementer angor, tot ac tanta doctrinæ lumina falsis de Religione opinionibus, quasi quibusdam tenebris, obnubi atque obscurari. Quare illud a Deo Opt. Max. iis ex animo apprecor, ut densissima illa errorum, qua miserandum in modum circumfunduntur, discussa caligine tandem aliquando, divina bene juvante gratia, ad Catholicæ veritatis lumen aspirent. Deferbuit ardor ille, quo olim acerrime concitati in nos eorum animi erant, ut a nobis tanquam ab insensissimis hostibus abhorrerent atque refugerent. Detumuit æstus ille, qui eos e sinu communis Matris tanquam e tutissimo portu abripuit, & in medium turbulentissimarum tempestatum discrimen abstraxit. Quid reliquum jam nunc est, nisi ut æquitatem ac veritatem sequentes ducem antiquam exquirant Matrem, in ejusque gremium tandem aliquando se ab diuturno errore ac jactatione recipiant. Hæc eos blande invitat, modis omnibus allicit, passis ulnis expectat, qui quidem si redierint, omnibus maternæ benevolentiae significationibus reduces certe excipiet ac complectetur. Hoc sperare nos & commodi mores, & singularis humanitas, & illa ipsa, qua nunc maxime florent, doctrina jubet, & confidere plus apud illos & æquitatem & veritatem, quam qualecumque propriæ persuasionis defendendæ studium, momenti habituras.

XXXVI. Verum, ut eo redeam, unde digressus
T 2 sum,

sum, quod nunc bene multi e nostris a rectissimis Catholicæ disciplinæ institutis se ab Heterodoxis hominibus abduci sinunt; quod eorum libris, quibus facile perverti possunt, & ad prava, quæ in iis partim aperte & palam propugnantur, partim clam & latenter animis improvidorum infunduntur, dogmata perducunt; quod iis unice delectentur, unice eos legant, pervolulent, ediscant, hoc ego, pro eo, quo erga Catholicam Religionem studio sum & esse debeo, sine merita reprehensione elabi atque abire pati nullo modo possum. Itaque dico istiusmodi libros aut omnino non legendos, aut certe non passim ac vulgo ab omnibus legendos, aut si facta legitima potestate legantur, ne nobis nocere possint summa cura diligentiaque esse providendum. Addo etiam, quæ in hos ipsos libros decreta lata sunt, hæc sanctissime observanda, in re gravissima Ecclesiæ obtemperandum, nec temere ab ejus edictis præscriptisque discedendum. Hæc sunt, quæ in hanc rem ex intimo animi mei sensu ac dolore dicenda existimavi, quæ quidem quam in partem accipi possint, nihil curo; dummodo & ita sentire Catholicum sit, & ita loqui, in tanta præsertim licentiâ, necessarium.





DE PRAVO
ARTIS CRITICÆ
U S U

ACTIONIS II. LIBER IV.



QUI semel effrænata quâdam impotentis animi cupiditate abrepti præstitutos æquitati ac temperantiæ fines transilire non dubitarunt, Florentini, ægre admodum continere se possunt, quin acrioribus ejusdem cupiditatis incitati stimulis in multo majora, quam ipsi ab initio suspicari potuissent, atque in dies graviora prolabantur. Etsi enim a natura ita comparatum est, ut, si quando ab officii ratione declinamus, ad eandem naturæ ipsius admonitu revocemur; ita tamen ingenio nostro in vitia proni sumus, ut naturæ bonitas animi pravitate persæpe vincatur. Neque vero cum lubricam insistere viam cœperimus, fines quosdam nobis constituere possumus, quos temere non

transgrediamur, nec ita nosmet ipsos sustinere, ut in certo aliquo nequitiae gradu consistamus; sed invalescente magis ac magis illa ipsa cupiditate, quæ nos primum de recta virtutis semita deduxit, plerunque flagitia flagitiis addimus, scelera sceleribus cumulamus. Quare illud sapienter præcipitur; ut, quantum possumus, initiis conemur obsistere, & dum res aut in integro adhuc sunt, aut non ita deteriores effectæ, ut restitui non possint, nobis tum maxime, si nos salvos esse cupimus atque incolumes, provideamus. Qui saluberrimum hoc consilium neglexerunt, quantum in eo opis, quantum præsidii ad vitam sancte integreque ducendam contineretur, proprio ipsi experimento edocti sunt. Voluissent ii quidem, posteaquam proclives in vitia, atque adeo præcipientes ferri cœperunt, se in pristinum statum revocare, & ad bonam, ut ajunt, frugem reverti; sed partim rei difficultate deterriti, partim prava consuetudine irretiti, partim pessimo sui similium exemplo confirmati in iis vitiis fere miserabiliter hæserunt, quæ facile a principio aut vitare omnino, aut saltem ab iisdem non ita difficili negotio emergere potuissent. Hoc ego immoderationibus Criticis nostris evenisse si dixerim, non me aberasse longius a vero arbitror. Non enim dubito, quin etiam isti, cum lubricum Criticæ genus primum ingressi sunt, non dubito, inquam, quin certos sibi constituerint fines, ultra quos non temere ac facile progredierentur. Verum

rum ne ipsi quidem in eo gradu, quem sibi ab initio præsstituerant, consistere procedente tempore potuerunt. Quare a contempta, uti demonstravimus, venerandæ Antiquitatis auctoritate, a repudiatis sanctorum Patrum testimoniis, a despecta vetustissimarum sanctissimarumque rerum Traditione, eo sensim devenerunt, quo ne ipsi fortasse quidem unquam se perventuros, & vero prolapsuros cogitarunt. Hinc porro effectum est, ut superiorem intemperantiam nova semper ac majori intemperantia cumulantes, mihi quoque novam uberioremque criminum copiam suppeditarint, unde acriorem in eos inquisitionem instituerem, eosque vehementius accusarem. Itaque non jam amplius de sublatiis piis quibusdam Traditionibus, non de Oraculis Idolorum simulacris istorum judicio abrogatis, non de vaticinationibus a Sibyllis abjudicatis, aliisque similibus Catholicæ quidem Religioni aliquo modo, sed fortasse tolerabili adversantibus opinionibus agemus; sed novæ res, & eæ multo sane graviores, quam quas hætenus persecuti sumus, agentur, ac plane hujusmodi, quæ Catholicam ipsam Religionem propius attingunt, & hac ipsa de causa Catholicum quemque commovere acrius debent ac vehementius. Vos igitur me diligenter attendite; quem non recuso quin sic in consequentibus actionibus audiat, ut, quo magis accusatio nostra progrediatur, eo etiam majora hujus ipsius, quam accuso, intemperantiæ documenta, & ejusdem quos-

dam quasi processus atque incrementa postuletis.

II. Illud ad Catholicæ Religionis singulare decus atque ornamentum non pertinere solum, sed ad ipsam etiam Catholicam Religionem spectare propius, nunquam non sanctis abundasse viris, qui rebus præclare geiis eximiisque virtutibus eandem mirum in modum illustrarunt, nemini non compertum est, Florentini. Horum nomina ritu a majoribus tradito sacris Fastis inscribuntur, iis aræ dedicantur, excitantur delubra; eorumque non tam imagines ad venerandum publice exhibentur, quam virtutes Catholicis omnibus ad imitandum proponuntur. Qui hoc apud nos jure sunt, nemini fas publica veneratione privare, quam cum semel legitime adepti fuerint, eadem perpetuo gaudere debent. Itaque colendi sunt, & non colendi solum, sed divina aspirante gratia etiam imitandi. *Imitatores mei estote*, Gentium Apostolus ad Corinthios scriptum reliquit, *sicut & ego Christi*. Primum exemplar, & omnium certe quidem absolutissimum Christus est, in quod præcipue animum debemus intendere, & unum conari in nobismetipsis, quantum possumus, exprimere. Verum ut hanc virtutum omnium absolutionem, quoad usque humana infirmitas patitur, assequamur, non dubium, quin plurimum propositis etiam sanctorum virorum exemplis juvemur. Id enim habent domestica præsertim exempla, ut iisdem incredibiliter non commoveamur solum, sed ad recte

ſte facta admotis veluti quibusdam calcaribus acriter etiam vehementerque incitemur. Atque hoc præcipuum Eccleſiæ conſilium eſt, ſemperque fuit, cum ſanctos viros nobis ad venerandum proponit; nimirum, ut *quos celebrare delectat, eodem imitari non pigeat*.

III. Hæc clara ſunt atque perſpicua, & apud omnes Catholicos rata ac definita. Quapropter hac de re nulla controverſia eſſe debet, neque vero poteſt. Sed Ars Critica, quæ de rebus omnibus ſibi iudicium ſumpſit, de ſanctis quoque viris cognoscendi poteſtatem uſurpavit. Quo jure, qua facultate, quo exemplo, quo more, nescio, Florentini; ſed tamen harum etiam rerum ſibi cognitionem artem criticam vindicaſſe certum eſt. Exorti ſunt iſti ſacrorum Paſtorum inſpectores in primis acuti, & vero correctores animoſi, qui a re tam ſancta manus cohibere non potuerunt. Quo jure id præſtiterint, iterum dico, nescire me. Sed nunc de jure non diſputo, neque hoc iſtis objicio, neque in crimen voco; quod unice in præſentia reprehendendum condemnandumque ſuſcipio, illud eſt, quod hac ipſa in re plura ſingularis intemperantiæ exempla conſtituere, ſuique ſimilibus imitanda proponere ac relinquere non dubitarunt.

IV. Ne vero hoc a me accuſatorie magis jaçtatum in iſtos, quam vere dictum quiſquam ſuſpicetur, afferantur in medium ſacri ipſi Romanæ Eccleſiæ Faſti, in quibus, quemadmodum dixi, ſanctorum virorum

no-

nomina veteri consuetudine perscribi solent, circumferantur, legantur, inspiciantur. Videtisne ut pluribus in locis frequentis lituræ vestigia appareant? ut plura nomina in ipsa litura demersa prorsus jaceant atque depressa? Jam quid istæ sibi lituræ volunt? quid indicant? quid significant? Quid erat isthic antea scriptum, quod postea inductum fuit? quæ tandem menda lituræ istæ tam crebræ, tam spissæ, tam perspicuæ correxerunt? Ego quidem nihil dico. Facti sunt in medio; codices prostant, qui adiri facile ab omnibus & considerari commode possunt. Nonne, vel tacente me, codices ipsi loquuntur, & se corruptos, interpolatos, interlitos, & fœde ab istis mutilatos clamant? nonne hujus ipsius, quam nunc coarguo, intemperantiæ crimen accusant, docent, condemnant? Quid? Istine tantum sibi sument ac vindicabunt, ut levibus de causis, inanibus conjecturis, futilibus argumentis, quæ de sacris Fastis nomina ipsis libuerit, expungere sibi jure concessum arbitrentur, & re ipsa licenter hoc jure atque intemperanter abutantur? Atqui ita est, uti dico; neque vos de mea fide in re tam gravi dubitare velim, nec vero ullo modo patiar.

V. Itaque scitote existisse hominem, non Italum illum quidem, sed externum, qui in hac licentia ita libere intemperanterque versatus est, ut ab hac cognomen dignum re, dignum facto, dignum prava, qua laborabat, consuetudine apud populares suos invenerit.

Nam

Nam cum sanctos viros Criticus nimis acer passim in operibus suis alios alia de causa insectari, & de sacris Fatis consueffet eximere, hoc adeo visum est popularibus ipsis suis indignum & nullo modo ferendum, ut inde, quemadmodum dixi, proprium ei ac singulare cognomen adhaerit. Quod? quodnam? Verbum latinum ad id explicandum quam vellem idoneum non reperio; si vero circumlocutionem adhibeam, vereor ne vocabuli vis corrumpatur, & quod intelligi volo non apte satis atque aperte significetur. Vocabulo igitur utar italo, quod domesticæ hujus, de quo dico, auctoris linguæ omnino respondet; *Snicchia Santi*. Non quia sanctos viros e loculis, quibus eorum veneranda populo simulacra proponuntur, re ipsa exturbaret; sed quia, si, quæ in ipsos scribere solebat & vulgare, rata habenda essent, exturbari omnino debuissent. Quo vocabulo, ut videtis, & mala hominis consuetudo ostenditur, & facti indignitas justo meritoque convicio notatur.

VI. Hic vero tantæ rei atrocitate commoti & vehementer perturbati exspectare mihi videmini, Florentini, dum hunc hominem, qui tantum audere & conari potuit, proprio nomine appellem. Verum ego, quod hætenus præstiti, neque hujus, neque huic similibus hominum nomen unquam adducar, ut edam. Perstringam intemperantiam, quod unum mihi proposui, quam in hujusmodi auctoribus deprehendero; auctori-
bus

bus vero ipsis parcam , & eorum famæ atque existimationi nominis subductione consulam . Novi qui sim , apud quos loquar ; quid a me dici conveniat , quid vos a me audire deceat non ignoro . Sic ergo habetote . Intendo vocem , ut etiam ii , qui extremi in concione sunt , exaudiant . Ego neminem , nisi cum laude nominavi , neque nominabo ; si quem autem reprehensione dignum judicavero , rem notabo , hominem præteribo . Quare vulgatum illud a me recte usurpari posse video ; *Nemo mihi irasci poterit , nisi qui de se ante voluerit confiteri* . Vos autem , quæ vestra modestia est & temperantia , ulterius inquirendo progredi ne velitis , quos solo , quod enunciaui , cognomine contentos esse decet .

VII. Ac ne illud quidem ego velim vos a me postuletis , ut tale ac tantum , quod dixi , crimen , longe lateque pertinens , & fere per omnes Sanctorum historias diffusum singillatim agam , & sanctos quosque viros ab isto tam insigni affectos injuria commemorem , & qua quemque de causa ex sacris Fastis sustulerit , vos doceam . Possem utique , si vellem , *Liturgicos* codices , quibus insignis Ecclesia utitur , vobis ostendere , & deletos ex iis expunctosque sanctos viros nominatim indicare . Sed cum id ipsum præstitum ante me a Critico docto atque idoneo jam fuerit , non ego nunc tantum mihi negotiū imponam , ut explicandum in præsentia exponendumque suscipiam , quod circumscriptior actionum nostrarum modus non patitur . Ita similiter nolim , a me expectare vos
dum

dum hunc ego hominem meritis verbis reprehendam atque castigem, qui in hac licentia aut singularis omnino fuit, aut certe neminem habuit superiorem. Video, nihil esse, quod quidem gravius ac vehementius dici possit, quod in tantam licentiam intemperantiamque non conveniat; sed hac etiam me cura Romana ipsa Ecclesia molestiaque liberavit. Auctoritatem enim interposuit suam; Hominem merita affecit censura; & quid de eo judicare vos ac sentire debeatis suo ipsa iudicio sententiaque prævit.

VIII. Verum ne sine peculiaris alicujus expositione facti, nostra hæc, præter institutum jam morem, elaboratur actio, unum nunc maxime insigne sigillatim afferam, de quo sic vos me audire convenit, quandoquidem in singulis exponendis insistere, vel etiam percurrendo singula tantummodo commemorare non possumus, sic, inquam, vos audire me convenit, ut de reliquis, quæ prætermittere necessitas cogit, conjecturam capiat. Hilarionem eremi incolam celeberrimum fuisse scitis, eundemque sanctissimum hominem, qui vita caste integreque in summa rerum abstinentia atque asperitate traducta, cum ad extremum devenisset, illud de ipso pervulgatum ac prope nemini non auditum sæpius usurpabat; *Egredere, quid times? Egredere anima mea, quid dubitas? septuaginta prope annis servisti Christo, & mortem horres?* Ita se in supremo agone constitutum ad mortem alacriter constanterque obeundam

dam vir sanctissimus confirmabat. Hilarionis vitam accurate scripsit Hieronymus, auctor omnium certissimus & locupletissimus, de cujus ingenio, sapientia, eruditione, cognitione linguarum & artium, quid ego possim dicere, quod vobis cognitum non sit planeque perspectum? qui inter cæteras, quibus floruit, præclarissimas laudes tantum in sacris Scripturis partim interpretandis, partim recognoscendis studio suo doctrinaque perfecit, ut unius prope interpretis ore Spiritus Sanctus locutus esse videatur. Itaque, tamen si multi in Ecclesia Doctores, præstantissimi illi quidem & sacrarum litterarum peritia eximii, exsisterunt, adeo tamen unus Hieronymus ingenio valuit, adeo facultate cæteris antecelluit, ut sibi *Doctoris Maximi* nomen proprium fecerit ac singulare.

IX. Jam vero cum, de qua dicere instituo, Hilarionis vitæ Hieronymum auctorem tam certum, tam locupletem, tam religiosum habeamus, quis unquam de ejus veritate ambigendi locus fuit, aut esse potuit? quæ dubitatio de tanti viri diligentia, fide, integritate ac religione suboriri? Mihi quidem hoc in facto videtur omnis omni non dubitationi solum, sed vel ipsi etiam suspicioni obseptus esse aditus ac prorsus interclusus. Ita quidem mihi videtur; nec dubito quin vobis quoque idem videatur, qui pro vestra æquitate ac sapientia suis momentis atque ponderibus res expendere, non levia quæque atque incerta confectari indicia con-

confueſtis . Verum iſtis non ita ; qui tanquam venatici canes omnia ſagacius odorantur ac perveſtigant ; & uni præ reliquis nominatim , qui tantum abſuit , ut hiftoriam hanc veram judicaret , ut etiam fictam eſſe totam & commentitiâ , atque ab Hieronymo exercendi ſtyli cauſa fuiſſe conſcriptam affirmare non dubitarit .

X. O rem proſus novam atque inauditam ! Quid hoc eſt ? utrum hanc nos opinionem dicemus ? an potius ſingulare quoddam opinionis monſtrum atque portentum appellabimus ? Igitur non ſanctus re ipſa Vir in Eccleſiam ab Hieronymo , ſed novus quidam Heros , tanquam a Poeta in ſcenam Hilarion inducitur , fictus omnino & commentitiuſ , atque ad efferveſcentis ingenii arbitrium excogitatus . Sed ſi hoc eſt , quid hic agimus , Florentini ? quid hic ſtamus ? quid ſedemus ? quin repente conſurgimus ? quin imus ? & noſtris ipſiſ manibus Hilarionis templa diruimus , aras evertimus ; ſimulacra diſturbamus ? quin tantam ſuperſtitionem a delubris , ab aris , a templis , ab Eccleſia univerſa avertimus ac prohibemus ? quin denique Hieronymi ſcripta , quæ hoc tantum ac tam inſigne mendacium continent , æternis tenebris oblivionique mandamus ? Etenim ſi hoc vere ab iſto affirmatur , ſi Hilarionis vita ficta eſt , ſi commentitia , ſi ab auctore ſuo exercendi tantum ſtyli cauſa conſcripta , neceſſario , ut videtis , illa conſequentur , & ſunt omnino intemperantiſſimi huius , de quo dico , Critici iudicio conſentanea .

At

XI. At non hoc certe de hoc sancto eremi cultore Ecclesiæ judicium fuit, non hæc Ecclesiæ ipsius de Hieronymo opinio, non hæc de hac ipsa nominatim historia sententia. Etenim, ut te potissimum novæ hujus sententiæ sive auctorem, sive exscriptorem appellem, harum rerum cognitionem ad Ecclesiæ spectare judicium, opinor, dabis. Audi ergo, quid de vitis ab Hieronymo conscriptis in LXX. Episcoporum Concilio senferit Gelasius Pontifex auctor gravissimus. *Existimo*, inquit, *Hilarionis historiam, ut & ceteras, quas scripsit Hieronymus, cum omni honore ac reverentia suscipiendas*. Dicam iterum, ut cum rubore quo intemperantia progressus sis tua cognoscas, & te tuimet ipsius pudere incipiat; *cum omni honore ac reverentia suscipiendas*. Nihil profecto ad veritatem ostendendam illustrius, nihil ad sanctissimi Scriptoris fidem vindicandam præclarius, nihil ad tuam licentiam coercendam neque gravius dici potuit neque vero opportunius.

XII. Vide porro nunc ac perspice, quid inter tuam & sapientissimi Pontificis opinionem intersit. Gelasius historias omnes ab Hieronymo conscriptas veras dicit, & ab omni falsitatis suspitione liberat, tu contra in falsitatis ac mendacii suspitionem vocas; ille certa de causa id ipsum affirmat, tu nescio qua inductus ratione inficiaris; ille re cognita sententiam pronunciat suam, tu vero incognita opinionem obtrudis tuam; ille de sapientissimi Concilii auctoritate æquissimum decretum inter-

terponit , tu unam secutus opinandi licentiam sapientissimo & æquissimo decreto intercedis ; denique ille Hilarionis nominatim historiam suscipit , tu rejicis ; ille *omni cum honore ac reverentia* suscipit , tu cum insigni contumelia rejicis . Quem ad gradum tantam evadere intemperantiam existimabimus ?

XIII. Sed quid tandem censori nostro displicuit in hac vita , aut displicere potuit , ut & ipsa tanquam falsa traduceretur , & Hieronymus tantus Scriptor turpissimi mendacii insimularetur ? Gravis enim vero ratio esse debuit , quæ hunc hominem eo adegerit , quo ne vel ipsa quidem licentia progredi potuisse videatur . Itaque , si placet , Florentini , hanc ipsam Hilarionis vitam parumper sumamus in manus , eamque paullo diligentius consideremus . Ac primo quidem ejus exordium gravius esse non potest , nec ad conciliandam rebus , quæ narrandæ sunt , fidem accommodatius . Religiosissimus Scriptor Spiritum Sanctum invocat , ut sibi de sancto viro scribere instituenti adsit , quo ejus vitam & fideliter narret , & luculenter exponat . En sancti Historici ipsa ipsissima verba . *Scripturus vitam beati Hilarionis habitatorem ejus invoco Spiritum Sanctum , ut qui illi virtutes largitus est , mihi ad narrandas eas sermonem tribuat , ut facta dictis exaquentur* . Jam si aliquid fictum & commentitium mandare litteris Hieronymus habuisset in animo , quæ hoc uti exordio potuisset ? Tantumne flagitium admisisse Hieronymum existimabimus ,

Tom.I. V ut

ut Spiritus Sancti opem in re falsa imploraret ? ejus in re commentitia interponeret auctoritatem ? falsitatis ac mendacii testem Spiritum ipsum Sanctum adhiberet ? Horret animus , refugit mens hoc non dicam de tanto viro & Scriptore sanctissimo affirmare , sed vel tantummodo suspicari .

XIV. Ab hoc exordio reliqua prosuunt , & quam sincere narrata sint ; quanta fide , quanta integritate , quanta religione conscripta , legenti manifeste apparet . Et vero in tota narratione nihil occurrit , quod verissimile non sit , nihil , quod incredibile videatur . Omnia ab initio suo deducta , & usque ad finem perpetuo ac non interciso filo perducta . Designantur sancti viri , ortus , natio , patria , institutio , & prima adolescentiæ disciplina , tum omnium rerum terrenarum abdicatio exponitur ; consequitur secessus in eremum , in eaque diuturna commoratio ; deinde sanctæ , ut ajunt , *conversationis* studium , & vero summus etiam in omni virtutum genere profectus ; ad extremum sancti viri obitus accurate luculenterque describitur . Ubique elucet veritas , ubique Scriptoris fides , ubique religio . His accedit , quod sanctus Scriptor , quo majorem sibi conciliet fidem , ad stipulatorem adhibet , & testem citat eorum , quæ narrat , sanctum Epiphanium Salaminæ Cypri Episcopum , qui plurimum Hilarione usus fuerat , cumque pro familiaritate , quæ inter ipsos intercesserat , intime norat , cujus virtutes brevi etiam com-
men-

mentariolo , quod tunc legebatur , comprehenderat .
Quaquam , inquit , *Sanctus Epiphanius Salamina Cy-*
pri Episcopus , qui cum *Hilarione plurimum versatus*
est , laudem ejus *brevi epistola scripserit* , quæ *vulgo le-*
gitur , tamen , & reliqua . Jam , ut videtis , non uno
 res testimonio nititur , sed duplici gravissimo teste cer-
 tissimoque fulcitur ; prorsus ut nihil appareat , quod
 dubium quinquam facere posset , ut aliter de hac vita ,
 quam par erat & æquitas postulabat , tantorum viro-
 rum auctoritate contempta sentiret .

XV. Ego vero , ut hoc loco qualecunque judi-
 cium interponam meum , quoties eam legi , legi au-
 tem sæpe , toties in ea nihil offendi , quod non dicam
 dubitationem , sed ne dubitationis quidem suspensionem
 injicere posset ; immo omnia reperi ad priscorum *Ana-*
choritarum morem , institutionem , disciplinam perfecte
 exacta , omnia denique ita a sancto Scriptore digesta ,
 uti re ipsa gesta erant , & probabiliter , vere , fide-
 literque narrata . Non dubito , vobis idem videri , si eam
 legitis , & visum iri , si eam legere volueritis . Quid
 igitur causæ fuit , cur hac tanta calumnia hæc historia de-
 honestaretur , & non uni solum , sed duobus sanctissimis
 & doctissimis viris tam gravis injuria uno tempore ir-
 rogaretur ? Cur tibi Critico in primis acuto & sollerti
 aliter de hac vita , atque omnibus , qui illam legerunt ,
 aut in posterum legent , visum est ?

XVI. Dicis , *exercendi styli causa ab auctore suo*
 V 2 *fuisse*

fuisse conscriptam. Fuerit; non abnuo, non repugno. Quid igitur? idcircone continuo falsa, & ad arbitrium conficta existimanda erit? Novum sane consecutionis genus, quod hactenus Dialectici ignorarunt; perinde quasi stylus non, nisi in re ficta, possit exerceri. Dic, amabo te, quid est, quamobrem in re ficta stylus exerceri possit, in re gesta non possit? cum idem in utraque æque facili ratione præstetur. Cujus quidem rei exemplum si flagitas, non longe petendum est, & tibi Hieronymus ipse suppeditat. Hoc enim ipsum præstitit in altera historia, quam *de Muliere septies iēta* conscripsit. Excusat initio narrationis, epistola ad Innocentium data, styli desuetudinem, & *Otium*, inquit, *quasi quedam ingenii rubigo parvulam licet facultatem pristini siccatit eloquii*. Quare ut remissum ac desuescentem stylum acueret ac renovaret, & eloquii venam, quo iterum exuberantior efflueret, sollicitaret, hanc scribere est aggressus historiam, qua in scriptione duo præstitit, & stylum exercuit, & vera narravit. Potuit igitur, quod fecit in hac, similiter facere in vita Hilarionis, quin ulla prudens suspicio de Hieronymi fide anxios nos reddere debeat atque sollicitos. Hæc clara sunt, atque perspicua.

XVII. Sed nos hebetes nimirum sumus, nostri caligant oculi, isti soli acuta, qua pollent, oculorum acie, ea vident, quæ præter eos videre nemo neque potuit, neque vero potest. Exspectemus igitur lippi, dum oculis

lis nostris novæ hujus artis criticæ , ut ita dicam , isti collyrium illinant , ut tum demum aliquid videamus , & aliquid his de rebus judicemus . Quanquam , ut quod sentio , dicam , quamlibet novus hic Hieronymi censor sibi de acumine mentis , & de acuta oculorum acie vehementer placeat , ut , quod nemo ante ipsum viderit , solus ipse se vidisse arbitretur , dubitare subit utrum quas Hieronymus scripsit vitas unquam legerit ac pervolutarit . Si enim eas attente legisset ac diligenter pervolutasset , quandoquidem calumniari in animo habebat , ex iis saltem aliquam elegisset , cui aliquo modo tantâ hære calumnia potuisset . Nam , cum vitam Hilarionis vita Malchi Monachi captivi statim consequatur , miror sane , cur illam potius optarit , quam commentitiam esse diceret , hanc præterierit , quæ propter rerum , quæ exponuntur , admirabilem quandam seriem adornandæ componendæque calumniæ aptior videri poterat , & re ipsa erat accommodatio . Mirabilis enim in ea describitur captivitas , & multo admirabilior non multis sine prodigiis e captivitate insperato consecuta narratur libertas . Quid igitur causæ fuit , quamobrem tam pulchram occasionem elabi sibi iste pateretur ? Si in hac Malchi vita elaborasset , & aliquid saltem studii posuisset , aliquid fortasse profecisset , nec se prope orbatum oculis ostendisset . Sed nimirum sua nimia istum opinandi licentia fefellit , & quæque sine delectu arripiendi consuetudo excæcavit ; nisi forte illud affirmare

velimus, istum ea de causa, præterita vita Malchi Monachi, Hilarionis vitam optasse, ut, cum eo honore, quo Hilarion gaudet, qui sanctus & habetur & colitur, Malchus non gaudeat, ejus idcirco intemperantia insignior esset, atque exstantior emeretur.

XVIII. Sed quod tandem cumque hac in re hujus hominis consilium fuerit, quod nunc non investigo, illa certe ex ejus opinandi licentia Catholicæ Religioni vehementer incommoda consequuntur. Etenim si Hilarionis vita, quæ auctorem tam gravem, tam idoneum, tam sanctum habet, falsitatis insimuletur, quid, obsecro, in hoc descriptionis genere reperiri poterit, quod veridicum, quod ratum ac certum habendum sit? Historias omnes expungamus licet, omnes omnium Sanctorum vitas tanquam falsas & commentitias inducamus. Ego sane non video, quæ major auctoritas resideat in Athanasio, qui Antonii Magni, in Gregorio Magno, qui Benedicti, in Ennodio, qui Epiphanii, in Gregorio Nazianzeno, qui Gorgoniar, in Joanne Chrysostomo, qui Philogonii, in Petro Damiano, qui Romualdi, in Bernardo, qui Malachiar, in Bonaventura, qui Francisci, & in aliis hujus notæ, exultationis, sapientiæ, sanctitatis Scriptoribus, qui sive vitas, sive elogia Sanctorum scriptis mandarunt suis, non, inquam video, quæ major resideat auctoritas, quam in Hieronymo Doctore Maximo, ut, si ejus scripta hoc in genere repudientur, non sint aliorum similiter scripta eodem in ge-

genere repudianda. Itaque non ego hic reliquos inferioris notæ auctores commemorabo, qui præclaram operam in conficiendis sanctorum virorum historiis & magno Catholicæ Religionis ornamento, & summo Christianæ pietatis incremento posuerunt. Perculsa enim atque abjecta principum illorum, quos nominavi, auctoritate, reliquorum etiam omnis omnino auctoritas, ut videtis, concidat necesse est.

XIX. Quare non alia hic ego amplius hujus intemperantiæ documenta afferam, nec plura hac de re exempla congeram, ne & me dicendo, & vos audiendo fatigem. Dixi jam, ita vos me audire oportere, ut ab uno alterove crimine reliquorum in eodem genere, quæ explicari ab accusatore per tempus non licet, conjecturam capiatis. Et sane utinam, Florentini, crimen hoc, de quo dico, ad unum tantum alterumve Criticum pertineret. Utinam de istiusmodi Criticorum paucitate lætaremur potius, quam de eorundem multitudine quereremur. Verum multo latius, quam ut & ego possim oratione mea comprehendere, & vos assequi cogitatione vestra possitis, pestifera hæc diffusa contagio est, atque pervasit. Quem enim istorum invenias, qui se hujus Criticæ generi dediderunt, quibus aliquis hoc in genere auctor probetur; qui numeris omnibus per ipsos absolutus sit; quem iidem sive nimix credulitatis non insimulent, sive falsitatis non arguant, sive aliis nominibus non crimentur; quorum etiam nonnullos usque

adeo despectui habent, ut eorum objectam auctoritatem una mollitie cervicis atque argutia digitorum fatis elevare se putent; vero nomen cum risu excipiant, & modesti ac temperati audire velint, si cachinnis ac subsanationibus parcant. Horum ego nunc scriptorum causam non suscipiam, quæ suscepta jam fuit ab viris doctissimis (a) atque idoneis, qui temperantia ac moderatione usi ea norunt distinguere ac separare, quæ acervatim isti confundunt atque permiscunt.

XX. Nam quid præterea hoc loco commemorem ab istis non in Scriptores solos, sed in ipsos etiam sanctos viros intemperantius inquiri, omnia singulorum prope Sanctorum dicta ac facta ad acerrimam censuram revocari, pene omnia infinitis dubitationum ambagibus involvi, pene omnia in falsitatis suspensionem adduci. De nomine, de ortu, de patria, de peregrinationibus, de rebus mirabilibus patratis quæstiones nullo fine instituuntur, dubitationes sine numero commoventur, suspensiones sine modo coacervantur. Quid illos nominatim appellem? qui ab istis propter rerum gestarum simi-

(a) *Legenda omnino est Præfatio, quam Actis Sanctorum premit- tit Joannes Bollandus plenam judicii, plenam moderationis, & vero ac sapiente Critico dignam; quæ duz virtutes moderationis & judicii toto hoc immenso in opere ab Heriberto Rosveido adumbrato, suscepto a Joanne Bollandio, Godofrido Ensch-*

nio, Daniele Papebrochio, tum ab aliis subinde egregii laboris confortibus & fociis continuato, & si non adhuc ad exitum post tot annorum contentionem perducto, saltem valde producto elucent sic, ut in illo lector nihil requirat, quod ad absolutum boni ac probabilis Critici officium implendum pertineat.

militudinem quandam omnino rejiciuntur, perinde quasi in tot Sanctorum millibus aliqua sive in cultu vitæ, sive in peregrinationibus, sive in perpetratis prodigiis similitudo esse non potuerit. Alii quidem aliam fere tenuerunt viam, sed cum omnes eodem, ad cælestem nimirum patriam, tenderent, quid est, cur in eadem vestigia eorum nonnulli aliquando non incurrerint? Quid denique illa referam? quæ passim in *Liturgicis* ipsis codicibus (a) isti condemnant, aspernantur, despuunt, quasi apocryphis & commentitiis referti essent narrationibus. In his aliisque hujusmodi infinita istorum disquisitio se jactat, in his istorum labor versatur assidue, quæ si vellem singula colligere, nullum modum habitura esset oratio.

XXI. Atqui aliquis certe modus tantæ intemperantiæ meo quidem judicio est constituendus. Nam quod Criticæ genus istud esse dicam? quod exlex, sine modo, quo libet impune vegetur, & sacratiora ipsa adyta pervadat atque perrumpat? Non jam tentatur solum, quod ille *expertus vacuum aera pennis non homini datis*, sed *calum ipsum petitur stultitia*; ut ego sane, qui voca-

ca-

(a) Melchior Canus de Loc The. lib. 11. cap. 5. „Eſto in publicis Ec- „cleſiæ precibus habeantur quædam „etiã falſa; num idcirco hifto- „Eccleſiæ omnibus fidem abrogare „perges? . . . Mihi quidem illud „Gelaſii conſilium placet, ut cum „huius generis hifto- „Eccleſiæ legerint beati Pauli ſententia præ- „cedat; *Omnia probare, quod ho-* „*num eſt tenere* . . . Maneat Di- „vorum geſta, quæ in Eccleſia le- „gi ſolent, deſpici nullo modo o- „portere.

cabula omnia potestatis , imperii , dominationis , licentiae , intemperantiae jam consumpserim , quo potissimum nomine artem hanc , ut ab istis exercetur , appellem , non inveniam , nisi forte illud in eam quadrare existimetur inauditae cujusdam proscriptionis , qua illius caelestis patriae coloni ex illis ipsis supernis sedibus , quas sibi vigiliis , jejuniis , laboribus , sudore multo , & fuso etiam non raro sanguine acquisiverunt , iniquissimo jure propemodum exturbandi exterminandique denotentur .

XXII. At enim multa in Sanctorum historias irreperunt , quibus censura non parcat , & quae merito ab eorundem historiis removeantur . Audio ; atque in hoc non repugno , non contradico . Potuit , ego quoque concedo , interdum humana Scriptorum ipsorum infirmitas labi , potuit credulitas decipi , potuit *simplicitas captivari* ; potuit his in rebus se vulgus immiscere , & , ut est natura ad rerum admirabilitatem augendam proclive , nonnulla depravare , potuit denique verum admixto falso corrumpi . Quid igitur ? projiciamne aurum , quod fere purum non est , & multa ex diversis inferioris notae metallis , & vero etiam luti ipsius ac terrenae fecis concreta habet ? Sanctorum historiae non plus fere quam humanam sibi vindicant fidem , non solidiori , quam quod humana subternat fides , fundamento nituntur . Sed hoc ipsum fundamentum ab istis subrui , humanam hanc fidem iis abrogari , hoc ego dico , & saepius dicam , & sine intermissione dicam nullo modo esse ferendum

ferendum . Itaque per me licet Historicorum , qui hæc vel illa de sanctis viris posteritati tradiderunt , ingenium , gravitas , eruditio , probitas , fides exquirantur ; historiæ ipsarum veritas expendatur , omnia suis ponderibus examinentur , vera a falsis secernantur ; & , si quod est aliud , omne boni censoris officium expleatur . Sed adsit modus , adsit æquitas , adsit sobrietas , adsit aliqua præscriptio , & illa præsertim , quam sæpius appellavi , & qua una virtutes omnes , quæ a Critico requiruntur , comprehendisse mihi videor , temperantia adhibeatur .





DE PRAVO
ARTIS CRITICÆ
U S U

ACTIONIS II. LIBER V.



REDO ego vos superiore actione vehementer esse miratos , Florentini , eo usque istorum in opinando evasisse licentiam , ut sanctissimis viris , quorum memoriam venerari ac revereri sanctitatem maxime debuissent , non modo non perpercerint ; sed eosdem etiam in supernis illis sedibus constitutos , in quibus cum Christo beati regnant ac vivunt , propemodum adoriri novo atque inusitato more non dubitaverint . Verum , ut , quod sentio , libere dicam , tametsi hoc indignum valde & effusæ cujusdam intemperantiæ est , mihi tamen neque novum in istis , neque inusitatum , neque vero magnopere pro cætera intemperantia mirandum videtur . Dixi antea , semel istos præcipi-

cipitem nimium lubricæ artis ingressos viam nequaquam futurum, ut se intra præstitutos cujusdam moderationis terminos continerent, quin in deterius ruerent, & superiorem intemperantiam nova semper eaque majori intemperantia cumularent. Quod jam fore certo prædixeram, hoc ut demonstravi, & novis a me documentis confirmabitur, non sine Catholici nominis probro, nec minore Catholicæ ipsius Religionis detrimento evenit. Atque utinam secus, atque ante denunciaram, accidisset; utinam a me graviora istis, quam quæ hætenus objecta sunt, opponi non possent, & interceptus nunc actionum mearum consistere hic necessario cursus atque hæreere cogeretur. Mihi fane molestum hoc (ita me Deus adjuvet, ut ex intimo animi sensu loquor, & quod latet in pectore vere sincereque expromo) mihi, inquam, molestum hoc ac grave non esset; immo vero gauderem maxime, & pro eo, quo erga Catholicam Religionem amore sum atque esse debeo, addo etiam, pro meo erga istos ipsos studio, mihi in præsens ademptam ulterius in accusando progrediendi facultatem incredibiliter vehementerque lætarer. Non enim me ad hanc accusationem privatæ ullæ similitudines inimicitiarumque, quæ cum his intercederent, pertraxerunt; quæ quidem si intercessissent, facile eas ego cum ipsis, tum præcipue Religioni remissem, libenterque condonassem. Verum ista ipsa Religio, quæ me, quod sæpius professus sum, ad hanc causam suscipien-

piendam impulit, dies noctesque stimulat, quietum esse non sinit, & non solum ad perstandum in instituto, sed ad idem acrius etiam ac vehementius urgendum impellit. Quo quidem loco non dubito, quin isti ægre admodum laturos sint, & deteriorem fortasse in partem accepturi odiosi accusatoris in incæpto perseverantiam. Sed, præterquamquod privata incommoda publicæ utilitati sunt anteponenda, sciant me bono animo agere cum ipsis, nec tam communem in hoc iudicio respicere, quam peculiarem ipsorum spectare utilitatem, illudque habere propositum, & pro viribus contendere, ut, si quo modo possim, ipsis prosim, & ita prosim, ut in posterum meliore conditione sint, quam hætenus fuerint, & ipsi fortasse esse volunt. Etenim non ego ex eorum condemnatione ulla mihi spolia flagito atque depono; neque vero ullam nominis famam atque existimationem quaero, unde crescere mihi liceat, qui in novissimo loco recumbens ad altiores gradus ascendere nec laboro nec volo, sed satis amplum qualiscumque hujus contentions meæ præmium me reportasse arbitror, si eos ab immoderata opinandi licentia ad certam quandam temperantiam ac moderationem, a pravo Artis Criticæ usu ad rectum ejusdem artis usum Deo bene juvante traduxero. Quapropter, quamcumque tandem in partem ea, quæ dicturus sum, accepturi isti sint, non magnopere laborabo, & nihilo secius persequar institutum, urgebo propositum, obsequar studio erga Catholicam

licam Religionem meo , obsequar vestro , & pergā , quantum assequi potero , bonorum omnium votis satisfacere . Ita mihi favor vester atque humanitas , quam hactenus expertus sum , adsit , & me ad exitum usque prosequatur , ut ego hujus ipsius , quam accuso , intemperantiæ progressionēs , quod jam recepi , vobis non ostendam solum , sed etiam , quoad per vires licebit , efficiam , ut vos quoque , quos summa de nimia istorum in opinando licentia admiratio cœperat , novis iisque gravioribus de eadem ipsa licentia edocti exemplis mecum una in posterum mirari desinatis .

II. Sancti viri , quorum de hi storiis jam egimus , non solum rebus præclare gestis eximiisque virtutibus , quibus , dum viverent , floruerunt , sed etiam admiranda illa a Deo ipsis tradita potestate , qua multa supra humanæ naturæ modum facere poterant , & re ipsa consueverant , quam maxime celebrantur . Hoc autem ipsum Christi Domini denunciatum fuit Oraculo , qui disertissimis verbis affirmavit ; Discipulos suos non solum mirabilia , quæ fecisset ipse , facturos , *sed horum etiam majora facturos* . Eventus porro ipse , ut in Sanctorum ipsorum monumentis passim legitur , tantæ prædictionis veritatem confirmavit . Jam qui prodigia sanctis viris aliqua ratione adimere conatur , is non tam in eos criminosus ostenditur , quam in Deum ipsum , cujus omnipotentiam quodammodo videtur circumscribere , injuriosus esse convincitur . Nihil enim est , quod Dei Opt. Max. nume

men clarius evidentiusque declaret, quam prodigia, quæ a sanctis viris vulgo & passim perpetrata dicuntur. Hæc immoderatiores Critici nostri non negant ea quidem; sed, quod in huiusmodi rebus faciliare consueverunt, quantum assequi vel commovendis suspicionibus, vel congerendis dubitationibus, vel siqua alia ratione possunt, convellunt, ut ex hoc capite major, ut videtis, eorum semper ac major intemperantia, quod demonstrandum suscepi, vincatur.

III. Atque ut sine cunctatione, & a me instituto jam more ad hoc ipsum docendum veniamus, Historiam scitote quandam, quæ sanctorum virorum res gestas complectitur, in lucem fuisse editam. Hæc autem ab auctore suo homine externo tanta tamque exquisita diligentia, tanto artificio, tanta sollertia contexta fuit, ut ab ea, quæ hic vel ille sanctus vir patrasse fertur, sublata miracula ac præcisâ inveniantur. Sed præstat facti tam singularis ab ipsomet auctore exquirere & audire rationem, quam sane gravem fuisse necesse est, quæ hominem eo adigere potuit, ut prodigia contra omnium Ecclesiasticorum Scriptorum consuetudinem atque auctoritatem ex historia sua expungeret atque deleret. Exco-gitate, Florentini, rationem, quam potestis, acutam, novam, singularem; vincam tamen expectationem vestram. Hunc igitur auctorem, qui Sanctorum vitas tam fœde, ut dixi, circumcisas ac mutilatas edidit, tantum absuit, ut facti sui puduerit, ut excusandum

dum etiam defendendumque susceperit. Accipite rationem peracuto ac religioso homine dignam. Ait *se noluisse ea scribere, quæ homines admirarentur; maluisse, quæ imitarentur, litteris consignare.*

IV. O rem novam atque hæctenus inauditam! O cogitatum plane incredibile! quo id agitur ac molitur, ut, si quo modo fieri possit, omnis prorsus admiratio de mundo tollatur. Hic ego miror vehementer, miramini vos, Florentini, & omnes, qui historiam hanc in manus sument, non minus, quam ego, quam vos, profecto mirabuntur, quid causæ fuerit, cur auctor hic adeo admirationi infensus exlitterit, ut eam in lectoribus suis sibi nequaquam excitandam putarit; nec vero animadverterit, se, dum omnem comprimere admirationem conatus est, hoc ipso magnam de se, magnam de suo singulari facto omnium admirationem commovisse. Quanquam, ut castigatius loquar, stomachor ego, stomachamini vos, & omnes, quotquot hoc opus legent, profecto stomachabuntur; ut re ipsa non iste quidem admirationem sui excitarit, sed omnium & moderate, & recte, & pie sentientium in se indignationem concitarit.

V. Sed quid tandem vitii in admiratione deprehendit iste, aut deprehendere potuit, ut eam in lectoribus commovere refugerit, ac propemodum exhorruerit suis? Atqui Deus ipse tantum abfuit, ut ab admiratione refugeret, ut eam etiam in condenda pulcherrima

hac rerum universitate dedita opera industriaque quæ-
 sierit. Quorsum enim tantopere ornatui indulgit? quor-
 sum cælum tot luminibus, signis, planetis, syderibus-
 que distinxit? quorsum terram tanta tamque admira-
 bili arborum, herbarum, stirpiumque varietate conve-
 stivit? quorsum, inquam, tantus in tanta molitione
 rerum ordo, varietas, species; copia, venustas? *Per-
 fecti*, inquit, *sunt cæli & terra*, (Gen. II. 1.) *& om-
 nis ornatus eorum*. Tantam, credo, speciem jumen-
 tis & brutis animantibus spectandam Deus admirandam-
 que proposuit, & non potius expositam esse voluit
 hominibus, quibus & omnipotentiam ostenderet suam,
 & in eorum animis justam ac debitam tot admirandis
 ab se constitutis operibus admirationem conciliaret.

VI. Neque vero in tam admirabili rerum condenda or-
 dinandaque varietate admirationem quæsitivum solum, sed
 eam etiam, ac præcipue quidem, & nominatim ab homini-
 bus requisivit. Nam quid frequentius in sacris Scripturis
 occurrit? quam illa; *Recordor mirabilium tuorum*, &
Laudans altissimum de mirabilibus suis, & *Narrate om-
 nia mirabilia ejus*, & *Considera mirabilia Dei*, aliaque
 hujusmodi sexcenta, quibus passim Deo ipso hortato-
 re atque adeo impulsore ad supremi numinis, ejusque
 operum admirationem erigimur atque excitamur.
 Quid? Deus *mirabilia* sua suspici vult, considerari vult,
 laudari, narrari; prædicari vult; iste nimirum sese in-
 terponet, &, si qua admiratio in hominum animis exci-
 tari

tari cœperit , eam comprimere , atque in ipso exortu ac semine elidere prorsus non dubitabit ? Isto scilicet auctore ac suafore tantam pulcherrimarum rerum varietatem , speciem , venustatem , tantum ornatum , quo perfecti sunt cæli & terra , non admirabimur , nec tenue saltem hoc munificentissimo ac magnificentissimo Domino tot nominibus debitum admirationis tributum exolvemus ?

VII. Jam qui in condendis rebus inanimis sensuque carentibus tam admirabilis fuit , multo sane admirabilior idem exstitit in servis suis , non solum propter eximias , quibus illi excelluerunt , virtutes , sed etiam propter signa atque miracula , quæ patrarunt ; ab eodem enim fonte & eximiarum virtutum copia , & patrandorum miraculorum potestas in eosdem redundavit . Verum , quanquam virtutes merito suo prodigiis sint anteponden-
dæ ; tamen nescio quomodo hæc præ illis vehementius homines commovere solent , & acrius eorum animos percellere atque ad sui admirationem excitare . Quos igitur tanta collata potestate Deus admirabiles effecit , & in quibus ipse admirabilis exstitit , & se admirari profecto voluit , nos isto auctore nequaquam eos suspiciemus atque mirabimur ? & quo omnis admirationis occasio tollatur , novo more atque exemplo prodigia ab eorum historiis removebuntur ?

VIII. Veteres certe illi sanctissimi ac sapientissimi Ecclesiæ Patres , quibus novum hoc consilium

ignotum prorsus erat, nec vero ingenio ipsi suo aliquid hujusmodi excogitare poterant, non ita sese profecto gesserunt, nec sibi a referendis sanctorum virorum prodigiis abstinendum esse existimarunt. Hoc inter cæteros, ut de Cypriano, Athanasio, Ambrosio, Hieronymo, aliisque Patribus bene multis sileam, præstitit Augustinus lib. xx. l. cap. viii. *de Civit. Dei*, ubi narrat miracula, quæ ad Aquas Tibilitanas, quæ in Castello Synicensi, quæ Calamæ, quæ alibi passim ea ætate beatissimi Protomartyris Stephani implorato auxilio copiosa atque illustria patrabantur. Quid illa, quæ sermone cccxxiii. ex iis, quos *de Sanctis* inscribit, ab eodem beatissimo patrata Stephano fuisse luculenterque persequitur? Quid illa, quæ leguntur in ejus Confessionum libris, ubi illius nominatim prodigii meminit, cui ipse, Mediolani cum esset, interfuit, & quod Deus ostendit, cum sanctorum Martyrum Gervasii & Protasii corpora recenti respersa sanguine, ac si eo ipso die martyrio affecti fuissent, a Sancto Ambrosio reperta sunt. Miracula, credo, doctissimus ac sanctissimus vir & scribendo, & concionando persequebatur, ut nimirum lectores auditoresque suos minus de imitatione sollicitus, vana quadam atque inani admiratione defixos ac suspensos teneret.

IX. At enim fortasse sterilis, & bonæ frugis prorsus expers existimanda admiratio est, ut propterea iste ei se jure iniquum adeo infestumque præbuerit. Sterilis

lis admiratio ! Bonæ frugis experts ! O noster ofor admirationis huc ades , ac paullisper adsta , & vide , quam multa quamque excellentia ab admiratione , quæ in nostram utilitatem derivari possint , bona proficiſcantur . *A magnitudine* , inquit , (Sapient. xii. v.) *speciei* , & *creaturæ* , quæ utique ſui admirationem excitant , *cognoscibiliter poterit Creator horum videri* ; neque videri ſolum , ſed etiam divinæ ejus perfectiones aliquo modo intelligi poſſunt atque cognosci . *Invisibilia enim* , ut ait Paulus Apoſtolus , (ad Romanos I. xx.) *ipſius a creatura mundi per ea , quæ facta ſunt intellecta conſpiciuntur ; ſempiterna quoque ejus virtus , & divinitas* . Jam , ſi ex admiratione hoc ſolum boni proveniret , ut ſpecie ac magnitudine *creaturarum* objecta ad Creatoris cognitionem erigeremur , parumne utilis ac frugifera admiratio exiſtimanda eſſet ? Nam quid homini in hac vita expetendum eſt magis , quam conditorem ſuum auctoremque cognoscere ? Atque hac fere via , multi Gentiles & conſiderando opera Dei & admirando ad Dei ipſius notitiam evaſerunt . Niſi forte eam fingis admirationem , quæ ſtupida ſit , & quam nulla conſideratio conſequatur . Beſtiæ enim admiranda videre poſſunt , admirari non poſſunt , quia carent intelligentia . Porro ex cognitione Dei illa proveniunt ; niſi prava voluntas obſtet , ut eum colat , diligat , ei pareat , & fidelem ſe præſtet in hac vita , quoad uſque illum in altera tanquam finem conſequatur . Species

cies rerum admirationem commovet, admiratio considerationem gignit, consideratio cognitionem Dei, cognitio Dei & cultum, & obedientiam, & amorem parit, ex quibus illa demum superna ac sempiterna emergit beatitudo. Hæ sanè bonæ fruges sunt, quæ ex hoc, veluti admirationis agro, quem tu inanem ac sterilem videris existimare, copiosæ atque uberes efferri possunt, & vero efferuntur.

X. Nam quid de prodigiis nominatim dicam? quot, & quanta bona ex iis proveniant; quantæ erumpant utilitates, quid commemorem? Prodigiis nutrimur, atque alimur ad Fidem. Prodigiis in ipsa Fide confirmamur. Prodigiis Catholica olim Religio longe lateque per totum terrarum orbem diffusa fuit ac propagata. Prodigiis etiamnum propagatur; quod recentissima utriusque Americæ & Indiarum exempla declarant. Prodigiis ad fiduciam erga Deum, & Sanctos ipsos excitamur, ut ea etiam, quæ supra naturæ modum sunt, nos similiter, atque alios, quos aut legimus aut audivimus, aliquo in discrimine sive animi, sive corporis constitutos, consecuturos esse confidamus. Prodigiis sæpe terremur, & proposita Dei vindicis in scelestos animadversione a vitiis ad bonam frugem revocamur. Prodigiis & Sanctorum cultus augetur, & debita Deo prodigiorum auctori veneratio incrementum capit. Tolle prodigia, jam uno eodemque tempore tot ac tanta bona sustuleris. Nunc quid vis amplius? ut
cum

cum admiratione in gratiam redeas , nec eam pergas bonæ frugis vacuam atque inanem criminari .

XI. Dicis , *te uni imitationi studere voluisse , & ea scribere , quæ homines non admirarentur ; sed quæ imitarentur* . Audio . Sed primum , quomodo doces , admirationem cum imitatione componi non posse ? Meo quidem iudicio admiratio nunquam imitationi impedimento fuit , quominus proficere propositis Sanctorum virorum exemplis possemus , etiam si conjunctim cum prodigiis virtutum exempla proponantur . Nisi forte tu pertinuisti , ne lectores tui cum miracula legerent , posthabitis virtutibus , ea sibi tantum imitanda arbitrarentur ; ut exempli causa qui mortuum ab inferis excitatum legerit , sibi similiter imitandi causa excitandos esse ab inferis mortuos existimaret . Facile quivis lector , quæ admiranda , quæ vero imitanda sint , separare novit atque distinguere . Cur igitur ea tu , quæ copulari inter se possunt , dummodo ad diversa referantur , dissocianda existimasti ? Deinde , quæ ostenditur a te , prodigia ipsa ad imitationem , hoc est ad mores nostros componendos , & vitam recte instituendam nihil conferre posse . Atqui , ut inquit Apostolus (ad Romanos xv. iv.) *Quæcumque scripta sunt , ad nostram doctrinam scripta sunt* . Jam in Scripturis sanctis quam multa a Moyse & Josue clarissimis populi Israelitici Ducibus , quam multa ab Elia & Eliseo celeberrimis Prophetis , quam multa a Christo Domino Reparatore nostro in Evan-

gelio, quam item multa ab Apostolis in Actis Apostolorum patrata illustria prodigia narrantur? Hæc nimirum omnia tibi, qui idcirco admirationem excluderis, ut certius imitationem obtineres, fortasse a sacris codicibus removenda videbuntur, ne forte Spiritus Sanctus, ejus aflatu sacri codices conscripti sunt, minus de imitatione sollicitus unam captare legentium admirationem voluisse arguatur. Prodigia igitur illa cum *ad nostram doctrinam scripta sint*, existimandum sane est, multum ad ipsam etiam morum institutionem plurimumque conferre; quod si illa, cur non ea quoque simili ratione, quæ passim in Sanctorum historiis referuntur? Hæc autem aliaque hujusmodi si ante tibi proposuisses, & attentius considerasses, quam operi tuo manum admoveres, te multo profecto aliter in conficiendo illo ipso opere tuo gessisses.

XII. At inquis, te excepisse prodigia Divina auctoritate consecrata. Credo equidem; sed ista ipsa præclara exceptio parum tibi suffragatur. Etenim ratio illa tua, si recte animadvertis, cum omnia æque afficiat prodigia, inde consequitur necessario, ut si propter imitationem, cui admirationem officere videris existimare, ab Ecclesiastica, propter eandem causam etiam a divina Historia miracula omnia removenda sint. Tu vero, qui sacram reveritus auctoritatem ea admittis prodigia, quæ in Scripturis enunciantur, cur ea respuis, quæ in ipsis Scripturis divina inter-

terposita auctoritate esse in posterum perpetranda differtissime apertissimeque affirmatur. *In nomine meo, Christus inquit (Marc.xvi. xviii.) demonia ejicient, linguis loquentur novis, serpentes tollent, & si mortiferum quid biberint, non eis nocebit; super agros manus imponent & bene habebunt.* Quorsum tam ampla ac magnifica promissio? si nullus post ipsam promissionem nullus inquam fuisset aut dæmon ejectus, aut æger sanatus, aut serpens sublatus, aut mortifera veneni sublata vis. Prodigia igitur, præter ea, quæ in sacris codicibus leguntur, multa fuisse consequentibus ab hac promissione temporibus patrata, universæ ac generatim negari non potest. Quod si ita est, cur ea tu omnino ab historia tua removenda existimasti, perinde quasi omnia suspiciosa essent, & omni prorsus auctoritate destituerentur?

XIII. An, si tu aliquam vel mediocrem diligentiam adhibuisses, fieri poterat, ut in collectione tot prodigiorum atque acervo unum alterumve saltem non invenires, quod probares, quod dignum, cui aliquis in historia tua locus esset, arbitrare? Quid? nullum igitur auctorem reperire potuisti, cui fidem haberes? Nullum prodigium, quod certum existimares? prorsus nullum? Non illa, quæ passim a sanctis Patribus referuntur; non illa, quæ a gravissimis auctoribus commemorantur; non illa, quæ ab ipsius Conciliis rata habentur; non denique illa tanto tamque exquisito studio examinata, de quibus Romana nunc Ecclesia, cum sanctis viris publicam veneratio-

tio-

tionem decernit, judicium interponit suum. Magnum videlicet aliquid erat, & intolerandi, credo, laboris, illam, quam dixi, diligentiam adhibere, aliquem habere delectum, & si aliqua adhibita diligentia nullum probabilem auctorem, quem sequereris, si nullum habito delectu prodigium, de quo dubitari non posset, invenisses, tum demum, quod tibi visum esset, faceres, tuum institutum teneres, & novo more atque exemplo omnia ab omnibus omnium Sanctorum historiis miracula prorsus tolleres atque præcideres. Quid igitur causæ fuit, cur in re tam certa atque explorata, in qua nullum esse poterat, dummodo aliquam in referendis prodigiis certam rationem tenuisses, errandi periculum, in qua Sancti Patres, in qua Scriptores omnes, qui Sanctorum res gestas vulgarunt, immo ipse Spiritus Sanctus exemplo suo tibi præverunt, quid, inquam, causæ fuit, cur tu solus hac in re tam diligens, tam religiosus, tam cautus & acutus, tam denique singularis esse volueris, cum præsertim tibi conficiendi operis, quod ad fovendam pietatem maxime conducere, provinciam suscepisses?

XIV. Sed quid ego longius hunc hominem insequar? perinde quasi solus esset in crimine; nec hujus ipsius, quod nunc redarguo, criminis socios haberet multo fortasse perniciosiores, qui contra atque hic, de quo diximus, præstitit, cum miracula omnia verbo tenus admittere videantur, nullum respuere, re ipsa nullum ad-
mit-

mittunt, omnia respuunt. Eos enim veritati, certitudini, probabilitati, verisimilitudini constituunt terminos, tam presse definitos, tam arcte circumscriptos, ut prope miraculo habendum sit, si aliqua inter hujusmodi cancellos prodigia locum inveniant, & intra illos per vim compingi possint, quin loci angustiis excludantur. Et enim si miracula, quæ paullo inusitatior modo naturæ modum superant, ea incredibilia existimentur, jam de omnibus pene miraculis actum esse, nemo est quin videat. Quid vero illi multo prioribus perniciosiores? qui in re sancta male falsi, ne dicam impii, *visiones*, quas vocant, *raptus*, *extases*, aliaque hujusmodi per corporeas species sanctis viris oblata contemnere solent atque ride-re; perinde quasi similibus corporeis refertæ speciebus Scripturæ non essent, quibus aliud ostenditur, aliud indicatur. Præclare Augustinus generatim atque univ-erse de prodigiis omnibus, quæ acriorem sui excitant admirationem, animosque hominum vehementius per-cellunt, præclare, inquam, Epist. LXIV. Si hoc, in-quit, quod de *Jona scriptum est*, *Apulejus Medaurensis*, vel *Apollonius Thyaneus fecisse dicerentur*, quorum multa mira nullo fideli auctore jactant, non jam in buc-cis creparet risus.

XV. Sed pergant porro isti de re Catholica isto mo-do bene mereri; pergant criminari prodigia; per-gant eorum, qui ea narrant, elevare auctoritatem. Magnam profecto gratiam se ab infensûs Catholicæ Reli-gio-

gioni hominibus inituros certo sciant, quibus certissima Fidei nostræ indicia remittunt atque condonant. Ecquando enim ipsis prodigia, quæ passim in Ecclesia Catholica perpetrantur, objecta sunt, ut iis se vehementissime oppugnatos non senserint? Cum huc pertrahuntur inviti, quid dicant ignorant, quid reponant non habent; hoc convicti argumento obmutescunt, & Catholicam Religionem præ sua veram & unice veram taciti coguntur agnoscere. Quod quidem *credibilitatis*, uti vocatur, argumentum tanti semper ipsi fecerunt, ut cum veris prodigiis destituerentur, falsa confingerent, quo errores suos populo persuaderent, qui hujusmodi veritatis testimonia, quibus fere unicus vincitur ac tenetur, flagitat atque reposcit. Nunc vero hac cura, quæ eos semper maxime torisit, per istos liberati sunt. Aculeus hic, qui eos nunquam non acrius pupugit, de eorum animis sublatus est. Jam minime in posterum ad astus, quibus falsa miracula confingant, confugere necesse habebunt. Jam nostrorum liberalitate censorum utentur; nec sibi profecto deerunt, quin hanc tantam & defendendi sui, & nos oppugnandi oblatam a Catholicis ipsis opportunitatem arripiant, ex eaque ad Catholicæ Religionis damnum exitiumque proficiant.

XVI. Hic jam, quod proposui, cum satis docuerim, actioni huic meæ modus a me imponi posset. Sed ignoscite, quæso Florentini, si ulterius progrediar, & date mihi hanc veniam, ut, quandoquidem de prodigiis
agi-

agimus, peculiari cuidam meo studio obsecundem, & unius nominatim eximii hoc ipso in genere Scriptoris causam contra istos defensionemque suscipiam. Vestra in me audiendo singularis humanitas fortasse facit, ut ego ista ipsa vestra humanitate, & vero etiam patientia abutar, ac longius, quam par est, producam orationem meam; sed iterum quæso vos, date hoc mihi, quod enixius postulo; quo, quam brevissime fieri a me poterit, transacto, perorabo.

XVII. Quam multa Gregorius ille cognomento Magnus, quam omni doctrina referta, quam toti Ecclesiæ salutaria scripserit, nemo est, qui ignoret, cum luce ipsa meridiana clariora sint tanti viri opera; inter quæ summa laude ii feruntur libri, quos Dialogos inscripsit, in quibus conficiendis perficiendisque ita vir summus elaboravit, ut in illis suam effigiem plane ad vivum expresserit, nobisque spectandam atque oculis propemodum ipsis usurpandam exhibuerit. Quæ duo confocianda divinus Præceptor discipulis edixit suis, *prudentiam* nimirum *serpentis*, & *columbæ simplicitatem*, hæc, meo quidem iudicio, non in omni solum actione vitæ conjunxit sic, nihil ut de simplicitate prudentia, nihil de prudentia simplicitas decerperet; sed etiam in scribendo ita copulavit, ut in omnibus suis operibus insigniter emineant & mirabiliter eluceant. Atque ut singulatim de ejus Dialogis, de quibus sermo nunc instituitur, quod sentio, dicam, hos ego libros legi persæpe, &

vehementer in his demiratus sum non singularem tantum in rebus narrandis fidem, sed ipsum etiam elocutionis genus. Quare his libris nihil puto esse, nec vero esse posse venustius. Stylus enim, (a) si quid de stylo judicare possum, mira quadam & subtilissima, ac plane aurea mediocritate temperatus est; atque ejus generis, ut, qui eum penitus non introspiciat, illum facile assequi imitando se posse confidat, idem vero expertus, in ipso conatu succidat atque deficiat. His de causis hi libri mihi semper ita probati fuerunt, ut eos, quemadmodum dixi, sæpe legerim, & nunquam expleri eorum lectione potuerim, neque vero possim, usque adeo & legendo delector, & sine satietate delector.

XVIII. Porro his ipsis in libris multa admiranda, mul-

(1) Contra atque hic de Gregorii stylo Parthenius sensit, de suo ipse Gregorius stylo videtur sensitse, qui in fine Præfationis, quam Enarrationibus suis in Sanctum Job præmittit, & S. Leandro Hispalensi Episcopo inscribit, diserte affirmat se de styli elegantia non admodum laborare; *Indignum*, inquit, *vehementer existimo, ut verba calistis Oculi restringam sub regulis Donati*. Sed, præterquamquod pro sua animi demissione ita sanctus vir locutus est, sic ad eloquentiam natura ipsa factus erat, ut non posset non esse elegans. In coagmentatione verbo-

rum, in clausulis periodorum sane harmonicus est & suavis. Neminem autem adeo insulsum futurum arbitror, qui ei vel barbarissimos vel solecissimos objiciat, quos lingue, qua tunc homines loquebantur, usus effecerat ne barbarissimi vel solecissimi essent; usus, inquam, *Quem penes*, ut ait ille, *arbitrium est, & jus, & norma loquendi*. Delicati nimium atque adeo inepti existimandi sunt, qui secus sentiant. Cæterum Patres omnes suum proprium eloquentiæ characterem habent, quem qui probe internoscat, non poterit eorum lectione non vehementer delectari.

multa supra naturæ modum a sanctis viris perpetrata continentur. Multa de sancto Benedicto Monachorum parente ac magistro longe clarissimo, multa de aliis præcipuæ sanctitatis viris mira narrantur; ut hoc etiam nomine magnam ei habere gratiam Historia Ecclesiastica debeat, quam incredibilem in modum locupletavit. Plurima enim vir accuratissimus collegit, quæ nisi ipse litteris posteritatiq; commendasset, in tenebris consépulta oblivionis perpetuo jacuissent. Quare opera atque assiduitate sua effecit, ut, qui rerum copia munimentisque Græcos superabamus, ab iisdem, qui in pro-denda rerum suarum memoria sane accurati fuerunt, studio diligentiaque ne vinceremur.

XIX. Hæc a me vere de tanto Ecclesiæ Doctore dicta esse arbitror; & non tam a meo, quo præcipue in eum feror, pietatis atque observantiæ studio, quam ab unius veritatis amore profecta. Porro hunc talem ac tantum virum, qui in tam præcelso culmine locatus omnem extra teli jactum constitutus esse debuerat, quis non crederet istorum censuram evasisse? Evasisse! immo vero hunc ipsum, de quo dico, talem ac tantum virum non sua divina virtus, non sapientia, non gravitas, non dignitas, non locus, non auctoritas ita sepsit atque munivit, ut ad illum, perfractis tot repagulis, licentior istorum censura intemperantiorque non pervaserit. *Multo patientiores, inquit, quam opus erat, & vero etiam patientiores hominum* ser-

sermonibus mirabilia ferentibus aures Gregorius præbuit ; quasi vero nos non multo , quam oportuit , patientiores , ac patientiores tot jactatis in Patres conviciis aures hætenus præbuerimus , & adhuc præbere cogamur . Nimiæ igitur , ut videtis , credulitatis infumatur Gregorius in conficiendis illis suis Dialogorum libris referendisque prodigiis ; minimi consilii , nullius prope judicii , qui mira omnia , quo tandem cunque auctore oblata , nullo delectu arripuerit , litterisque mandarit .

XX. Agite vero nunc , & primum vosmetipsi an accuratius quidquam ac diligentius fieri potuerit , cognoscite ; tum vero utrum illæ contumeliosæ voces , quas ego met hisce auribus accepi , quibusque non sine stomacho & non raro interfui , jactari debuerint , judicate . Qui mirabilia narraturus erat , quæ de sua veritate dubitationem fortasse aliquam suspensionemque commovere possent , quo omnem dubitationis ac suspensionis ex legentium animo scrupulum eximeret , & nostrorum nimiam Criticorum in inquirendo diligentiam anteverteret , opus suum ab hoc exordio auspicatur , quod præstat audire , quo tanti viri diligentiam simul , ac prudentiam admiremini . *Ea , inquit (Petrum Diaconum suum alloquitur , quem in his Dialogis interlocutorem adhibet) , ea , inquit , quæ mihi sunt virorum venerabilium narratione comperta incunctanter narro , sanctæ auctoritatis exemplo , cum mihi luce clarius constet , quod Lucas & Marcus Evangelium , quod scripse-*

pferunt , non visu , sed auditu didicerint ; sed ut dubitationis occasionem legentibus subtraham , per singula quæ describo , quibus hæc narrantibus mihi comperta sint , manifestabo . Hoc vero scire te cupio , quia in quibusdam sensum solummodo , in quibusdam vero & verba cum sensu teneo ; quia si de personis omnibus ipsa specialiter verba tenere voluissem , hæc rusticano usu prolata , stylus scribentis non apte susciperet ; Seniorum valde venerabilium didici relatione , quæ narro .

XXI. Quod hoc in exordio recipit , nimirum , ut quibus hæc vel illa mira sibi narrantibus comperta fuerint *manifestet* , hoc toto in opere præstat sic , ut fere in principio uniuscujusque capitis illa suo quæque loco accommodata legantur ; *Libertini viri Reverendissimi , Fortunati Venerabilis Abbatis , Leandri Episcopi , Gaudentii Presbyteri , & reliquorum* , quorum hic non est necesse indicem texere , *relatione , narratione , cognovi , accepi , didici* . Præterea in singulis narrationibus loca , tempus , personæ designantur ; locorum , temporis , personarum notantur adjuncta ; neque ea sibi objicere interdum omittit , quæ dubiam ac suspiciosam facere narrationem possent ; nec vero etiam ea non diluit ac plane dissolvit , quo omnis omni dubitationi ac suspicioni aditus intercludatur . Hic ego rogo vos , Florentini , qui isto se modo gesserit , potueritne credulitatis & nimiae credulitatis jure insimulari ? Ego certe non video , quid gravius ad veritatem ostendendam ,

Tom. I. Y quid

quid ad omnem dubitationem , & vel ad minimam tenuissimamque dubitationis suspensionem amputandam non dicam fieri , sed ne excogitari quidem a diligentissimo accuratissimoque Scriptore accomodatius potuerit .

XXII. Miracula quidem sanctus Scriptor narrat , & multa narrat , & illustria narrat , & inusitata narrat ; sed ea , quæ narrat , singula sibi virorum fide dignissimorum narratione comperta narrat . Prodigiiis utique totum illud opus contextum est , sed non tam prodigiis , quam summis gravissimisque auctoritatibus coagmentatum . Dicit , se quæ narrat de *Seniorum valde venerabilium relatione didicisse* . Dicit , se multa iisdem verbis , quibus sibi narrata sunt , scripto mandasse fideliter . Dicit , se in quibusdam narrationibus sensum tantummodo ; in quibusdam vero verba cum sensu retinuisse . Quæ qui dicit , apposite profecto ad conciliandam fidem dicit . Addit præterea , minime esse necessarium , ea , quæ narrantur , visu , sed satis esse si auditu percepta sint , & hoc ipsum allato Lucæ & Marci Evangelistarum exemplo confirmat . Neque vero quemquam , opinor , rusticana illa verba , quæ usurpare se nolle dicit , commovere debent , perinde quasi quæ narrat a rusticanis accepisset & minus fide dignis hominibus . Nam , præterquamquod *pleraque a Senioribus valde venerabilibus* se didicisse diserte affirmat , non rusticana idcirco verba rejiciuntur , quasi falsi aliquid contineant , cum sententia teneatur ; sed quia sermonis elegantiam perderent
at-

atque corrumpent. Qua re satis ostendit, ita se veritati studuisse, ut linguæ nitorem, qui summam rebus dignitatem conciliat, non neglexerit.

XXIII. Hic ego iterum rogo vos, utrum vobis accuratius aliquid fieri ac diligentius posse videatur. Ego sane non video, quæ nam major atque exquisitior adhiberi potuerit diligentia. Si in hoc erro, cupio doceri a vobis, cupio corrigi, atque adeo redargui non ægre feram. Sed vobis tacentibus, & mecum sentientibus, & approbantibus irrumpunt isti, omnium hominum plane confidentissimi, & certius de rebus ipsis a Gregorio narratis sibi iudicium vindicant. Audite quomodo? Ego, Gregorius inquit, rem vidi, rem perspexi, aut rem ab eo, qui vidit & perspexit, cognovi; opportunitatem habui, rogandi, quærendi, & quidquid ad rem ipsam certam faciendam pertineret, sciscitandi, ac demum omnibus rite perpenſis & examinatis, ita hoc, vel illud, quod narro, & non aliter se habere pronuncio. Hæc Gregorius. Quid isti? Non illi, qui rem vidit, qui perspexit, qui singula, quæ opus erant, sciscitari potuit, aut rem ipsam, de eo, qui & vidit & perspexit, se didicisse asseverat, fidem adhibe; sed quam illi fidem detraxeris, nobis, qui tanto post tempore fuimus, qui rem nec vidimus, nec perspeximus, nec ab eo, qui vidit & perspexit, cognoscere potuimus, adijunge. Numquid tibi idonei non videmur, qui his de rebus iudicemus? Idonei

nei quidem estis , sed pervellem his temporibus , quibus hæ res actæ dicuntur , proximiores essetis ; cuperem certis auctoribus vobis easdem esse cognitās ; vobis etiam oblatam fuisse interrogandi , quærendi , sciscitandi facultatem . Quam proximitatem , reponunt , temporis flagitas ? quam interrogandi opportunitatem requiris ? Nos his de rebus , quanquam in summa temporum longinquitate constitutis , sine tot percunctationibus multo certius ars nostra critica ferre sententiam docet . At enim ars critica iudicium est , quo tantum Doctorem destitutum esse quis credat ? Iudicium sit ; sed hoc ipsum iudicium recentioribus hujus ipsius artis præceptis institutisque perpolitum multo rectius censerī debet atque limatius . At hæc ipsa ars ex earum artium genere non est , quæ consequentibus temporibus , ut Physica , ut Astronomia , ut plures aliæ , incrementa sua debeat . Quare cum multis opportunitatibus , quando de rebus a memoria nostra disjunctis agitur , ars ista vestra necessario careat , minus idcirco idonea ad ferendum suum de iis iudicium interponendamque testificationem videtur esse existimanda , ut in contentione testificationum illæ , quas antiquitas commendat , jure sint antepōnendæ . Præterea . . .

XXIV. Sed quid est , cur ego ulterius stomachando progrediar , & plura congeram ? Audistis jam , & mecum etiam doluistis , quo in numero Ecclesiæ Patres isti ducant ; quam iis generatim atque univēse pietatem impendant ,

dant, quam reverentiam & re & verbis exhibeant; ut omnes prope ordinis, loci, dignitatis gradus (a) sustulerint, ut omnia denique ad arbitrium suum licentia intemperantiaque exæquarint. Nunc autem, ut de reliquis si-
leam, quem isti Patrem, Deus immortalis! tanta affecerunt injuria? quem Virum credulitatis, perinde ac si judicio prorsus destitutus fuisset, insimularunt? quem Scriptorem infra sequioris notæ Historicos detrudere cogitarunt? ut mihi quidem in tanto Patre, Viro, Scriptore statutum ab istis tantæ intemperantiæ exemplum esse cum maxime acerbum propter indignitatem rei, tum propter auctoritatem hominis (b) omnino intolerandum videatur.

XXV. Etenim estne hic Gregorius ille Magnus, cujus præclarissima merita toto terrarum orbe diffusa ad Ecclesiam universam pertinuerunt? cui cognomen illud dignitatis atque auctoritatis insigne, uni tantum inter summos Pontifices, si Leonem I. excipias, propter singularem sanctitatem & doctrinam & res præclare ge-

Y 3

stas,

(a) Egregie, ut cætera, Melchior „ bari legentibus, quam multa re-
Canus de Loc. Theol. lib. 1. cap. 6. „ probari malo.

„ Modeste, *inquit*, & circumspetto (b) Ad elevandam tanti viri au-
„ judicio de tantis viris, (*Gregorio* „ storitatem nescio quid de anima Tra-
„ *nimirum*, *cui Bedam adjungit*) „ jani ab inferis precibus S. Gregorii
„ pronuntiandum est... Pautæ enim „ liberata nonnulli blaterant. Hanc
„ in eis possis arguere, quanvis „ fabellam egregie confutat Baronius
„ Historiam Ecclesiasticam revocare „ in suis Annalibus. Legendus omni-
„ ad severiora judicia contendas. „ no est Natalis Alex. tom. 3. sec. 2.
„ Ac si necesse est in alteram pec- „ diss. 1. qui rem non tam expendit,
„ care partem, omnia eorum pro- „ quam definit.

stas communi Ecclesiæ ipsius consensu sententiaque tribu-
 tum est. Estne hic Gregorius, de quo sanctus Ilidorus
 Hispalensis Episcopus amplissimum illud & longe hono-
 rificentissimum ab se conscriptum reliquit elogium, his
 verbis; *Gregorius Papa, Romanæ Sedis Apostolica Præ-*
sul, compunctione Dei plenus, humilitate summus, tan-
to per gratiam Spiritus Sancti scientiæ lumine prædi-
tus, ut non modo illi præsentium temporum quisquam
Doctorum, sed ne in præteritis quidem illi par fuerit
unquam? Estne hic, quem Honorius Augustodunensis
Organum Spiritus Sancti, incomparabilem omnibus suis
prædecessoribus nuncupat? quem Jo: Tritermius *Theo-*
logorum principem, splendorem Philosophorum, Rhetor-
um lumen nominat, & *virum in divinis Scripturis*
eruditissimum, & in secularibus litteris doctissimum
 appellat? Estne hic, quem Venerabilis Beda tanquam
 Anglorum Apostolum, ut re ipsa fuit, & colit, &
 prædicat? Estne hic, qui Catholicam Fidem multis lo-
 cis labefactatam restituit, qui Donatistas in Africa con-
 tudit, qui Arianos in Hispania coercuit, Agonitas
 Alexandria ejecit, Neophytos hæreticos e Gallia ex-
 terminavit, Gothos pestiferam sectam ejurare adegit,
 Mauritium Imperatorem ab iniqua sententia deterruit?
 Estne hic, cui Spiritus Sanctus, quæ scripto manda-
 bat, dictasse fertur, quem Petrus ipse Diaconus colum-
 bæ specie ejus capiti insidentem sæpius se vidisse testa-
 tus est? Estne hic, qui librum, quem Euthymius Patriar-
 cha

cha Constantinopolitanus contra veram *carnis resurrectionem* scripserat, confutans ita Tiberii Imperatoris animum commovit, ut eum librum tradendum flammis Imperator ipse absumentumque judicaret; Euthymium autem ita convicit, ut in extremo vitæ suæ termino constitutus pellem manus suæ contrectans multis præsentibus illud testificaretur; *Confiteor, quia in hac carne omnes resurgemus?* Estne hic, qui Joannis Patriarchæ item Constantinopolitani sibi *universalis* Ecclesiæ Episcopi nomen arrogantis audaciam fregit petulantiamque compressit, & nomen illud uni Romano Pontifici asseruit ac vindicavit? Postremo estne hic, qui summum honorem fugiens, & in spelunca alieno vestitu, ne agnosceretur, delitescens, indicio igneæ columnæ ostensus ad Petri Cathedram invitus & multum repugnans evectus eam virtutibus, moribus, sanctitate, doctrina, institutis, edictis, legibus, libris editis, & prodigiorum patratorum fama mirandum in modum illustravit? In hoc igitur tali ac tanto viro intemperantiæ tam gravis exemplum constitui oportuit? Hunc, quem sine aliqua significatione honoris ne nominare quidem licet, credulitatis & nimix credulitatis insimulari? O rem acerbam ac maxime luctuosam! de qua nec satis graviter conqueri, nec satis digne vociferari, nec vero ad id ipsum præstandum verba satis idonea, qui vehementiora omnia vocabula jam de mea oratione præciderim, & unum, mite

fane illud ac moderatum , intemperantiæ mihi reservà-
rim , reperire me posse intelligo .

XXVI. Sed moliantur , machinentur isti licet omnia,
omnem lapidem moveant ; sudabunt , si Superi volent ,
& nihil tot molitionibus ac machinationibus assequuntur .
Istis vel invitis , contradicentibus , repugnantibus , oppu-
gnantibus , quæ ab auctore gravissimo , ingenio , sapien-
tia , fide , religione , integritate , sanctitate , prodigiis cla-
rissimo scripta sunt , manebunt , & inconcussa mane-
bunt . Exstabunt sanctissimi Pontificis & sapientissimi
Doctoris opera omnia , & hi nominatim Dialogorum
libri , non solum ad tanti Scriptoris commendationem ,
sed ad rerum ipsarum , quæ his in libris narrantur ,
recordatione & fide dignissimarum , notitiam sempiter-
nam exstabunt ; & Opus hoc eximium , singulare , ad-
mirandum , divinum , quam in Ecclesia Græca , cu-
jus etiam in linguam conversum est , semper obtinuit ,
in Latina nunquam non retinebit auctoritatem .





DE PRAVO
ARTIS CRITICÆ
U S U

ACTIONIS II. LIBER VI.



ON dubium , Florentini , quin inter omnes sanctos viros , quorum causam proximis duabus actionibus defensio- nemque suscepi , sancti in primis Mar- tyres , & egregiarum virtutum co- pia , & miraculorum patratorum fama maxime emi- neant , & longe multumque antecellant . Hi sunt for- tissimi Athletæ , qui in durissimo agone constituti pro Religione Catholica strenue decertarunt , hi sunt , qui impiis Tyrannorum edictis invictè resisterunt , qui eorum minas , quibus illos a vera fide abducere , & ad ne- fandum Idolorum cultum traducere conati sunt , intrepide contempserunt , qui carceres , vincula , exilia , ignes , gladios , secures , cruces , inaudita cujusque ge-
ne-

neris tormenta fortiter constanterque perpessi de ipsis demum Tyrannis clarissimum obita morte & fuso sanguine triumphum reportarunt. Tantam autem inde gloriam Catholica mater Ecclesia, quæ tam fortes ac generosos partus edidit, instituit ad fidem, armavit ad pugnam, erudit ad coronam, consecuta est, ut non majorem a reliquis, quorum vita, etsi acta sanctissime fuerit, non ita tamen *per omnia probata fuit*, adepta sit. Quapropter jure ac merito illos peculiari honore ac veneratione dignos semper existimavit; eorum nomina sacris Fastis jam inde a vetustissimis temporibus inscripsit; præclara eorum certamina quotidie prædicat, triumphos celebrat, & augustioribus indiëtis solemnioribusque cæremoniis eorundem annuos dies festos memoriamque prosequitur. Vidit hoc æmula Hæresis; vidit, & invidit, ac nigro livore tabescens tanto se honore nudam prorsus ac spoliatam ingemuit. Itaque, ne quidquam hoc in genere laudis Catholicæ Ecclesiæ concederet, ad astus atque fallacias confugit, ac Marcionitas primum & Cataphrygas, tum alios subinde mendacissimos homines nequissimosque commovit, & nescio quos ab illis excogitados Martyres colendos imperitæ multitudini venerandosque proposuit. Sed sua eam fefellit astutia; non enim illud providit, quod providentissime Catholica Ecclesia in Martyribus suis, quos *non facit pæna, sed causa*, multo ante, atque adeo a suo ipsius exordio præcaverat. Hac igitur spe de-

dejecta , quam conceperat, fore , ut iisdem nobiscum insignibus ornata procederet , alio consilia sua, immo vero astum atque fallaciam improba veteratrix contulit , aliamque sibi ineundam esse rationem existimavit , ut , si quo modo assequi posset , Ecclesiam Catholicam , aut tanto ornamento spoliaret , aut certe multum de tanto ornamento detraheret . Sed conatus omnes licet exerat suos , omnia moliatur ; nihil sane proficiet , nihil conatibus , nihil molitionibus suis assequetur . Quos Hæresis desiderat Martyres , quibus caret , & carebit in posterum , iis nullo non tempore Catholica abundavit Ecclesia ; & , quoties se præbebit occasio , nunquam non abundabit . Ardor ille , quo gloriosissimi olim & fortissimi Heroes incensi fuerunt , restinctus non est ; viget adhuc , & multorum pectora succendit , ut non longe a memoria nostra repetenda recentiorum Martyrum æque certa atque illustria exempla declarant . Jam vero ægre admodum fero accusationem meam in eum esse locum necessario adductam , ut istorum , hoc etiam in genere intemperantiam dissimulare non possim , quæ tanto gravior existimanda est, quanto insignius meriti de Ecclesia Catholica Martyres sunt , majusque ei decus præ reliquis sanctis viris atque ornamentum contulerunt . Verum , quando ipsi hac in re non se dissimulanter gesserunt ; dabunt mihi , opinor , hanc veniam , ut ego quoque nihil dissimulem , & ea non obtegam ac silentio premam , quæ ipsi primum palam facere , & editis libris

bris vulgare non dubitarunt . Vos attendite , Florentini , & quantum potestis in re gravissima maximique momenti attentionem vestram intendite . Contendam & ego, atque omnes ingenii animique mei nervos in hac causa, quoad potero, exeram. Digna res est genere suo , quæ luculenter tractetur , digna , quæ diligenter audiatur , digna communi pietate , digna communi Religione , atque hujusmodi , in qua meum in dicendo studium cum vestra in auscultando diligentia certet .

II. Sanctorum Martyrum agones , supplicia , cruciatus , quæstiones , responsa , causa suppliciorum & necis , exitus denique ipse , qui vitam sanctissime plerunque atque innocentissime traductam clausit & consecravit , vetustissimis litterarum monumentis continentur , quæ *Martyrum Acta* nuncupantur. Hæc summa diligentia collecta olim fuerunt , ne tantarum rerum sempiterna plane commemoratione dignissimarum memoria prorsus interiret , ac diuturnitate temporis aboleretur . Egregiam huic rei operam jam inde ab Ecclesiæ ipsius exordio Clemens sanctissimus Pontifex & Martyr navandam curavit , qui Urbem in septem regiones a se descriptam totidem Notariis assignavit , quorum munus esset *Acta Martyrum* accurate perquirere , litterisque mandare . Idem præstitit Fabianus ejus successor & item Martyr , qui illud præterea addidit , quo *Acta Martyrum* fide digniora & quam testatissima essent , ut septem a Clemente ad pium hujusmodi munus jam designa-

stinatis Notariis totidem Subdiaconi præessent, qui, quæ Notarii collegissent, accurate diligenterque cognoscerent. Ecclesiarum omnium Principis & Magistræ exemplum reliquæ secutæ sunt Ecclesiæ, & eandem ferme rationem in conquirendis describendisque Actis Martyrum adhibuerunt.

III. Neque vero quomodo fortissimi Athletæ in agone suo se gererent certo cognoscere ac plane habere perspectum difficile admodum erat, immo vero perfacile. Non enim fere ea iudicii forma adhibebatur, ut indicta causa Christiani nullo more, nullo exemplo, temere condemnarentur. Accusabantur, evocabantur, interrogabantur; nomen edere, Religionem profiteri cogebantur; proponebantur edicta Imperatorum, contra quæ fecisse arguerentur; ad statuas Deorum, quas colerent, quibus thus adolerent, adducebantur; quod si recusarent, torquerentur, ac demum morte afficerentur. Omnino in his quæstionibus usitata ac plane forensis ratio servabatur; palam atque aperte res agebatur, in conspectu atque oculis omnium, ut, qui vellet, adesse posset, & Christiani ipsi Ethnicis immixti adesse non nolent, quo Martyrum ipsorum responsis atque exemplis erudirentur, & se ad eadem, ubi oblata foret occasio, fortiter atque alacriter perpetienda, & ad fundendum etiam, si opus esset, libenter pro Christo sanguinem tanta proposita constantia confirmarent.

IV. His de causis factum est, ut, quæ gesta erant, cer-

certo cognosci possent, quippe quæ, aut ab Ethnicis, qui hac in re mentiri non poterant, audita, aut ab ipsis, qui adfuissent, Christianis accepta tenebantur. Itaque multa de Sanctis Martyribus præclarissima ad nostram pervenerunt notitiam, & illa præsertim, quæ interrogati Martyres constanter intrepideque responderunt, in quibus omnino divina vis & sapientia elucet, ut re ipsa impletum manifeste appareat disertum illud Oraculum atque illustre, quod jam ante Christus pronunciarat illis verbis; *Cum steteritis ante Reges, & præsides nolite cogitare, quomodo, aut quid loquamini; dabitur enim vobis in illa hora quid loquamini; non enim vos estis, qui loquimini, sed Spiritus Patris vestri, qui loquitur in vobis.* Et illud aliud non minus disertum atque illustre; *Dabo vobis os, & sapientiam, quibus non poterunt resistere ac contradicere omnes adversarii vestri.* Quapropter responsa Martyrum & dicta, utpote quæ Divino afflatu juxta Christi ipsius pollicitationem ac vaticinium edita cælestem doctrinam continent, non dubium, quin Catholicis omnibus non solum probata esse maxime & commendata, sed summam etiam apud eosdem obtinere debeant auctoritatem.

V. Et sane, si Acta Martyrum sumere paulisper in manus voluerimus, ubique non tam singularem in perferendis cruciatibus fortitudinem eminere, quam cælestem in dictis atque responsis elucere sapientiam reperiemus. Cum Secunda nobilissima Romana Virgo imma-
nif

nissime cæderetur , Ruffina soror, quæ cum in eadem esset causa, non eadem afficiebatur pœna, Tyrannum appellans ; *Quid est*, inquit, *quod sororem meam honore, me autem afficis ignominia ? jube ambas simul cædi, quæ simul Christum Deum confitemur* . Quo , quid constantius ac divinius dici potuit ? Crudelissimis torquebantur cruciatibus Marcus & Marcellianus fratres , quos cum his verbis Judex affaretur ; *Resipiscite miseri*, & *vos ab his cruciatibus eripite*, responderunt ; *Nunquam tam jucunde epulati sumus, quam hæc libenter Christi causa perferimus* . Quid ? cum Processus & Martinianus sævissime verberarentur, ecqua alia vox inter dolorem crepitumque plagarum exaudiebatur, quam hæc ? *Sit nomen Domini benedictum* . Quid ? Joannes & Paulus proposita Imperatoris gratia a Terentiano sollicitati quam intrepide illa intulerunt ? *Si tuus Dominus est Julianus habeto pacem cum illo ; nobis non alius Dominus est, nisi Jesus Christus* . Quid denique nobilissimam Virginem & Martyrem Luciam commemorem ? quæ Præsidem affata ; *Caste*, inquit, & *pie viventes templum sunt Spiritus Sancti* ; cui cum Præses interminaretur se jussurum illam eo raptari, ubi ejus castitas violaretur, & sic templum Spiritus Sancti esse desineret, illa addidit præclarissima ; *Si me invitam jusseris violari, palma mihi duplicabitur ad coronam* . Hæc aliaque hujusmodi dicta, quæ passim in Actis Martyrum leguntur, & hic colligere non vacat, nemo non videt plena invictissimi roboris

boris esse , plena sapientiæ cælestis , saluberrimorum plena documentorum . Quo nomine , quemadmodum dixi , nobis Acta Martyrum commendata maxime esse debent , & tanto commendatiora , quanto ea legendo & salubrioribus instruimur præceptis , & acrioribus ad omne virtutum genus stimulis excitamur .

VI. Jam vero cum tanta , quantam demonstravi ; Martyrum Actis sanctitas , tanta religio , tanta auctoritas insit , tantus inde fructus , tantus in omni virtutum genere profectus consequatur ; quis unquam Catholicus esse poterat , qui ea , quoquo modo attentare auderet ? Dodvvellus fuit homo Heterodoxus , qui cum videret quantum ex prope innumerabili Sanctorum Martyrum numero Ecclesiæ Catholicæ & ornamentum & firmamentum accederet , illud aggredi non dubitavit , ut , si qua ratione posset , Catholicam Ecclesiam tanto simul & ornamento spoliaret , & firmamento nudaret . Quapropter opus edidit , quod inscripsit , *De paucitate Martyrum* , quo in opere negat tantum esse Martyrum numerum , quantus ad vanam ostentationem a Catholicis prædicatur . Hoc , ut confirmet , omnia fere acta Martyrum de medio sustulit , alia falsitatis , alia incredibilitatis insimulavit , alia alio modo labefactare conatus est . Quandoquidem autem contra omnem omnium sæculorum auctoritatem , contra omne omnium Scriptorum testimonium pugnare instituerat , ut cæco quodam præjudicatæ opinionis impetu repiebatur ,

tur, eo delatus est, ut Neronēs, Decios, Valerianos, Maximianos, Domitianos, Diocletianos, aliaque hujusmodi inauditæ inhumanitatis monstra atque prodigia crudelitatis absolveret. Verum cum plane constaret, infinita Christianorum millia supplicio esse affecta, absolutis nocentissimis hominibus, sævissimæ cladis culpam aut alio derivavit, aut, in ipsos innocentissimos Martyres per summam injuriam contulit. Sed homo alienæ laudis invidus ausu suo neque lætatus, neque vero potitus est. Ipsi Heterodoxi (a) nimiam hominis in re testatissima abominati licentiam, eundem adoriri ac confutare non dubitarunt. Plus apud eos valuit æquitatis amor, quam quaecumque, quod de propria Secta, cui opinio illa suffragabatur, fovebant studium; &, damnata iniqui obrectatoris sententiâ, præclarum veritati, & vero etiâ perhonorificum Catholicæ Religionis testimonium dederunt.

VII. Hoc modo omnis prorsus aditus ad acta Martyrum non dicam convellenda, sed vel carpenda tantum omnino præclusus videri poterat; quando Heterodoxi ipsi patrocinium veritatis, contra ejusdem Sectæ hominem, causamque susceperunt. Quid igitur?

Tom. I.

Z

Hanc-

(a) Dodvællum confutarunt Christianus Guillelmus Loescherus, & Joannes Leonardus Buchta, ambo Heterodoxi. Hæ confutationes editæ sunt Vittembergæ, altera an. 1697., altera an. 1703. Eundem Dodvællum e nostris egregie confutavit Theo-

doricus Ruinartius e sacro S. Benedicti Ordine, vir doctissimus & eruditissimus, ac de S. Martyribus insigniter meritis in præfatione, quam præclarissimo Operi suo præmittit, quod *Acta Martyrum selecta atque illustrata* inscribit.

Hancine isti opportunitatem sibi tantam exercendi artem illam suam elabi sinent? Nihilne in summa vetustissimorum monumentorum copia mollementur? nihil machinabuntur? Temperabuntne sibi a veneranda antiquitate, quæ, cum res tantas, tam varias, tam illustres, & quod præcipuum est, a memoria nostra distinctissimas exhibeat, videtur quodammodo istis & cavillandi ansam præbere, & ingenitam illam, qua laborant, quælibet carpendi libidinem commovere acriter ac provocare? Hoc certe fieri nullo modo potuit, nisi forte prorsus ingenium isti exuerint suum, & pravum morem diuturnæ consuetudine confirmatum correxerint. Attendite igitur, Florentini, & videbitis, istos aliam quidem, atque ille Antesignanus, quem paullo ante commemoravi, tenuisse viam; sed tamen eundem spectasse terminum, atque eodem varia per diverticula tandem aliquando evasisse.

VIII. Ac primo quidem ita ad Acta Martyrum cognoscenda aggressi sunt, ut in ea severissimum examen acerrimamque disquisitionem instituerint. Laudarem consilium, si temperantia consilii comes ac moderatrix affuisset; sed quando una fere hoc in negotio dominata intemperantia fuit, consilium ipsum non possum non reprehendere. Tot enim veritatis notas, tot falsitatis indicia excogitarunt, ut si quis ea singulis Martyrum Actis accommodet, omnia propemodum tanquam falsa & commentitia damnare cogatur. Has porro veritatis

notas , hæc ipsa falsitatis indicia saltem præcipua (neque enim omnia per tempus licet) nunc , si videtur , paullo diligentius expendamus .

IX. Volunt igitur in primis Acta Martyrum , ut veridica habeantur , esse brevia . Quid ? quæ nova isthæc lex est ? quæ hujusmodi Actorum Scriptoribus tanto post tempore edicitur . Lex , si eas res excipias , quæ sponte sua malæ sunt , ut , etiam si lex non esset , vitari deberent , futurum tempus respicit , non præteritum ; sed tamen quæ nova isthæc lex est ? Si multa narrari debuerint , si sæpius hic vel ille Martyr cruciatus fuerit , si diversis tormentorum generibus affectus , si non semel , sed si iterum , si tertio , si quarto denique ad Judicis tribunal adductus , si pluribus interrogationibus fatigatus , si multæ propositæ ad dissolvendum quæstiones , si alia ex alia , uti fit , emergente controversia sermo productus , si *amplius* pronunciatum & reus comperendinatus , si alia præterea multa , quæ usu in judiciis venire solent , inciderint , quamobrem judicium ipsum non expeditius transigeretur , hæcne omnia istis auctoribus omittenda a Scriptore erant , ut brevitati , quam veritatis notam esse contendunt , studeret ? Brevisitas , ut ego arbitror , neque veritatis , neque mendacii indicium est , cum utrisque æque possit accommodari ; sed tamen ista ipsa brevisitas Scriptoris negligentiam interdum oscitantiamque coarguit , qui multa omiserit , quæ posterorum memoriæ mandare omnino debuisset . Bre-

vitae quidem inepta, ridicula, supervacanea, ad rem non pertinentia respuit; sed non verborum, nec rerum paucitate definitur ac circumscribitur. Brevis oratio longa esse potest, si superfluis redundet; contra vel longissima, si nihil redundans in ea sit, brevitatis virtute commendabitur. Cur igitur brevis ista hic tantopere postulatur? quæ Martyrum Actis omnino attemperanda erat, ut Acta ipsa pro natura questionum & Judicium & personarum, pro varietate rerum & temporum, alia aliis contractiora, alia aliis productiora esse necessario debuerint.

X. Brevitati adjunctam esse volunt, quam vocant *simplicitatem*. Non repugno. *Simplicitas*, si recte intelligatur, salutari, quæ duplex dicitur, opponitur. Da mihi veram narrationem, non ex ingenio confictam atque compositam, hanc ego *simplicem* appellabo. Absit mendacii fucus, absint rerum extraneorum pigmenta, & meo iudicio, & ut credo, etiam vestro, narratio & vera & *simplex* erit. Si quid aliud desideratur, nos doceant. Hic autem, ut quod sentio dicam, tum illa brevis, tum ista *simplicitas* mihi valde in istis suspecta est. Certe Joannes Chrysostomus (in arg. Epist. ad Philem.) tantum absuit, ut brevitatem in iis, quæ ad sanctos viros quoquo modo pertinent, reposceret, ut potius minima quæque poterorum memoria a Scriptoribus consignari voluisset. Loquitur ille quidem de sanctis nominatim Apostolis; sed nihil prohibet, quominus de reliquis sanctis

viris ejus verba intelligantur . Nam quid ego eam prolixitatem non amem , qua erudior , quæ mihi prodest , qua melior fio ? Isti vellent Acta Martyrum esse breviora ; ego contra Chrysostomi sententiæ adhærens multo esse vellem , quam re ipsa sunt , productiora . *Simplicitatem* vero quemadmodum isti interpretentur plane non assequor ; sed veteri subit , ne hanc quoque malam in partem accipiant atque detorqueant .

XI. Et sane tum brevitas , tum *simplicitatis* nomine sancti Justini Martyris Acta isti mirabiliter efferunt , & tanquam veridicorum Actorum specimen vulgo legenda proponunt . Gaudeo nobilissimi Martyris Acta istis vehementer probari . Lætor hæc saltem eorum feliciter evasisse censuram . Quid vero , si omnia fere Martyrum Acta oppugnari vehementius , quam hac ipsa simulatione laudis non potuerint ? Attendite diligenter ; nemo Judex bonus esse potest , qui suspitione non moveatur . Ego sane tanta liberalitate laudum commotus Acta Justini illico adii , legi , & inter legendum illud statim menti objectum fuit , quod est apud Poetam ; *Concurritur , hora Momento , aut cita mors venit , aut victoria lata* ; tolle disjunctionis particulam jam prope absoluta Justini Acta habebis atque perfecta . Rustico Præsidi Justinus silitur cum sociis ; ad obtemperandum Imperatori , & Diis sacrificandum invitantur , recusatur ; pauculæ fiunt interrogationes , respondetur ; capitalis pœna proponitur , excipitur ; Judex *fecisse videri*

deri pronunciat; confestim decretam animadversionem licitor exequitur, Martyres verberibus affecti securi feriuntur, humanantur; prorsus nullum ut citius transigi judicium expeditiusque potuerit.

XII. Jam, si ad hanc brevitatis & *simplicitatis* normam reliquorum Martyrum Acta exigantur, non est, cur de omnium propemodum hujusmodi monumentorum jactura recusemus. Plurima certe vel optimorum judicio Criticorum probatissima repudianda erunt, propterea quia nequaquam consimili & brevitate & *simplicitate* commendantur. Quid igitur ista brevitatis sibi vult? quem ad finem ista tantopere efflagitur *simplicitas*? nonnullis quidem Martyribus æqua, sed reliquis iniqua atque exitialis. Isto modo Justinus ipse Acta sua laudari non vult; vestram repudiat laudem cum reliquorum Martyrum vituperatione injuriaque conjunctam. Multa occurrunt, ut videbitis, in Actis Martyrum, quæ isti ab eorum Scriptoribus commemorata nollent; multa, quæ expuncta omnino vellent, idcirco Asiatici ipsi in refellendis Martyrum Actis, in iis cognoscendis & examinandis Lacones repente facti sunt. Quanto consultius, quam in Actis Martyrum damnant prolixitatem, eandem in se ipsi damnaissent; quanto salubrius quæ multa in eos scriptitarunt, brevitati studentes contraxissent, aut etiam omnino de suis operibus sustulissent.

XII. Sed quid censores nostri de stylo quoque sentiant, audiamus; neque enim hunc sine censura abire passi

passi sunt, atque in veritatis indicium advocarunt. In hoc autem illud plane singulare, quod styli varietate graviter offenduntur, perinde ac si unus atque idem istiusmodi Scriptorum stylus esse debuerit. Quid hoc est? cui unquam venit in mentem, eundem a Scripto-ribus stylum efflagitare? Stylus uniuscujusque Scri-ptoris ingenio & eruditioni accommodari solet, & pro varietate rerum & artium varius esse atque diversus; ut, qui unum atque eundem in Scriptoris stylum po-stulet, perinde faciat, ac si una atque eadem in omni-bus hominibus oris lineamenta requirat. Suus cuique, ut sua cuique facies, sic in scribendo color est; qua in re tantum abest, ut idonei rectæ dictionis æstimatores offendantur, ut ipsa varietate elocutionis ac dissimilitu-dine delectentur. Est quidem in huiusmodi scriptis idem fere atque unum narrationis filum; sed unus at-que idem postulari stylus jure non potuit. Quæ igitur varietas in Historicis æque, atque in Oratoribus lauda-tur, qui in eloquendo exponendoque inter se dissimiles sunt; fusior hic, pressior ille, ornatior hic, ille minus ornamentis abundans; hæc Criticis nostris displicebit? hæc Actorum Scriptoris vitio dabitur? hæc in suspi-cionem ementitæ veritatis adducetur?

XIII. Nam quid de superbissimo istorum judicio, si-ve potius fastidio dicam? qui usque eo delicati sunt, ut ipsis vocalis, siqua pro aliqua affini ac consimili, contra atque debuit, fuerit usurpata, ad nauseam us-que

que soleant commoveri. Equidem non dubito, quin prima Actorum exemplaria recte scripta fuerint, sed cum sæpius exscripta sint, quid facilius, quam in affinis hisce vocibus errare librarium? cui nota non est venalium huiusmodi hominum inscitia, negligentia, oscitantia? Quanquam similitudo ipsa vocabulorum facit, ut aliud pro alio vocabulum sua prope sponte sub acumen styli in scribendo subeat, ut auctores ipsi, ne dum excriptores, nisi diligentius caveant, ipsa vocabulorum affinitate decipiantur. Atqui scitote, ab istis de industria conquisitas huiusmodi voces, in quibus librarii errarunt, & tanquam falsitatis notas sanctorum fuisse Martyrum Actis obiectas. Quid? Quod antiquis omnibus MSS. commune est, & æquo animo ferimus; hoc in Actis Martyrum singulare erit, & nullo modo ferendum? Quæ nova isthæc diligentia est? quæ morositas? quod fastidium? Esto; librarius dormitans pro *Fabio Fabianum*, pro *Fabiano Flavianum* scripserit; idcircone ob unius voculæ crimen Acta ipsa minus sincera judicabuntur? in falsitatis suspicionem adducentur? tanquam falsa repudiabuntur? Sed tamen ita est, uti dico; hæserunt isti ad hæc voculas, & tanquam ad scopulum graviter impeerunt; sed, quod dolendum summopere est, ad hunc ipsum scopulum multa sanctorum Martyrum Acta forte fortuna delata naufragium miserabiliter subire coacta sunt.

XIV. Verum; quandoquidem isti prope censoriæ artis

artis obliiti Rhetoris personam susceperunt , qui multa de brevitate , multa de *simplicitate* narrationis , multa de stylo disputarunt , nunc quid præsertim de Eloquentia præcipiant , audire præstat . Istorum verba afferam , quo vos etiam de eorum stylo judicetis , & quomodo illum in Patres acuant novis edocti exemplis cognoscatis . Cum *Acta Martyrum* , inquiunt , aut *eorundem Elogia a Patribus descripta legimus unumquemque nostrum meminisse oportet . . .* Meminisse oportet ! Quid hoc est , quod , cum *Acta illa* aut *Elogia legimus* , oporteat nos meminisse ? Ego sane quoties ea lego , toties de sanctissimorum Patrum officio , religione , fide , gravitate , integritate cogito ; toties eorum mihi sapientiam , doctrinam , eruditionem , auctoritatem propono ; horum memini , horum recordor ; hæc una cogitatio subit . Ne in mentem quidem venit , quod nefas esset suspicari , eos in narrandis sanctorum Martyrum rebus gestis , celebranda constantia , prædicandis virtutibus quidquam addidisse de suo , ut res supra modum efferrent , supra veritatem exaggerarent . Quid ergo est , quod *unumquemque nostrum meminisse oporteat* ? Nisi isthuc ipsum , quidquid tandem illud sit , nobis isti suggerant , nec mihi certe , nec vobis , ut credo , in mentem venire potest ; nihil præter ea , quæ dixi , nihil prorsus , quod meminisse debeamus , occurrit aliud .

XV. Audite reliqua , & tum denique quid *meminisse nos oporteat intelligetis* . Non *neglexerunt* , addunt , *Patres*

tres Eloquentia privilegiis uti, quibus eos artificiose collo-
quentes inducerent, quos in scenam producebant. En, quod
 meminisse debemus ; en , quod nos recordari oportet .
 Itane vero ? quæ Patres de sanctis Martyribus po-
 steritati tradiderunt , perinde scripta a sanctissimis viris
 exitimabuntur , ac si non de veritate iidem laborassent,
 sed unice de locupletanda novis commentitiis Heroibus
 scena cogitassent ? Et mirabimur, hanc ipsam calumniam
 Hieronymo, ut audistis, jam ab istis afflictam, nunc prope
 omnibus communem Patribus fieri ? Hæc igitur erunt
Eloquentiæ privilegia , quibus Patres usi sunt ? abuti
 nimirum arte ceteroquin optima , eamque ad pessimum
 usum per summam improbitatem nequitiamque con-
 ferre . Nam quod tandem novum hoc *privilegiorum*
 genus esse dicemus , hætenus ab omnibus , qui Elo-
 quentiæ præcepta tradiderunt , ignoratum , & ab istis
 solis excogitatum ? Non aliis ad hanc diem *privilegiis*
Eloquentia gavisa est , quam gaudeat Historia . Oratori
 æque atque Historico in narrando rebusque exponendis
 communis semper fides fuit , a qua si utrique rece-
 dant , uti non hic Historici , ita neque ille Oratoris no-
 mine dignabitur ; nisi forte istis Eloquentiæ *privile-*
gia sint , res supra veritatem efferre , fallere , decipe-
 re , mentiri , ut nullum jam inter Oratorem , & impro-
 bum veteratorem circulatoremque discrimen intersit .

XVI. Sed quem potissimum e Patribus novis hisce
 atque inauditis *privilegiis* isti designent , quæ Acta vel
 Elo-

Elogia indicare velint, mihi videor affectus. Ambrosium designant; Elogium Agnetis, Acta Laurentii indicant. Age vero, quo specimen hujusmodi *privilegiorum* capiamus, eloquentissima Ambrosii ipsius de Agnete primum, tum de Laurentio verba recitentur, plane digna, quæ etsi alias audita, tamen iterum ac sæpius audiantur, & quibus impolita hæc atque inficeta oratio mea non tam ornetur, quam persperfo veluti quodam disertissimi Patris oratorio lepore condiatur. *Hæc*, inquit, (lib. de Virg.) *tredecim annorum martyrium fecisse traditur; quo detestabilior crudelitas, quæ nec minusculæ percipit ætati; immo magna vis fidei, quæ etiam ab illa testimonium invenit ætate. Fuitne in illo corpusculo vulneri locus? & quæ non habuit, quo ferrum reciperet, habuit, quo ferrum vinceret. Hæc inter cruentas carnificum impavida manus; hæc stridentium gravibus immobilis tractibus catenarum; nunc furentis mucroni militis totum offerre corpus, mori adhuc nescia, sed parata, vel si ad aras invita raperetur, tendere Christo inter ignes manus, atque in ipsis sacrilegis focis trophæum Domini signare victoris; nunc ferratis colla manusque ambas inserere nexibus; sed nullus tam tenuia membra poterat nexus includere. Novum martyrii genus. Non dum idonea pœnæ, & jam matura victoriæ; certare difficilis, facilis coronari; magisterium virtutis implevit, quæ præjudicium vehebat ætatis. Non sic ad thalamum nupta properaret, ut ad supplicii locum, læta successu,*
gra-

gradu festina virgo processit. Flere omnes, ipsa sine fletu. Mirari plerique, quod tam facile vitæ suæ prodiga, quam nondum hauserat, jam quasi perfuncta donaret. Stupere universi, quod jam divinitatis testis existeret, quæ adhuc arbitra sui per ætatem esse non posset. Quanto terrore egit carnifex, ut timeretur? quantis blanditiis, ut suaderet? quantorum vota, ut sibi ad nuptias proveniret? At illa; Et hæc Sponsi injuria est, inquit, expectare placituram. Qui me sibi prior elegit, accipiet; quid percussor moraris? pereat corpus, quod amari potest oculis, quibus nolo. Stetit, oravit, cervicem inflexit. Cerneret trepidare carnificem, quasi ipse addictus fuisset, tremere percussoris dexteram, pallescere ora alieno timentis periculo, cum puella non timeret suo. Habetis igitur in una hostia duplex martyrium, pudoris & religionis. Et virgo permansit, & martyrium obtinuit.

XVII. Hic vero quid ego dicam? Negarim nobilissimæ Virginis Martyrium elegantissime ac plane oratorie a sancto Doctore fuisse descriptum? Sed nihil certe ornatius scribi potuit atque eloquentius. Quid igitur? idcircone minus vera descriptio judicabitur? quia elegans & eloquens est, quam si incompta fuisset & rudis. Mitto illa verissima, detestabiliorem Tyranni crudelitatem, quæ minusculæ non pepercit ætati; magnam extitisse vim fidei, quæ testimonium ab ea invenit ætate; magisterium impleuisse virtutis, quæ præ-

præjudicium vehebat ætatis. Illa vero, in eo *corpufculo* non fuisse vulneri locum, nullum reperiri nexum potuisse, qui *tenuia* delicatioris puellæ membra constringeret; *quam nondum hauserat*, vitam profudisse, & his similia quemadmodum intelligi debeant, istos docere hoc loco prætermitto. Sed eorum, in quibus tota narrationis sita vis est, quid isti negant? Stridentium tractus catenarum? cruentas carnificis manus? impavidum Martyris pectus? incensos ignes? expansas in ignibus Christo manus? addictam morti tenerrimam atque innocentissimam victimam? stetit? orasse? cervicem inflexisse? magnanimam, intrepidam, in communi luctu ac pallore lætantem supremum ictum, quo Martyrii corona decoraretur, excepisse? Quid, inquam, horum isti negant? quid infirmant? quid reprehendunt? Exspecto quid dicant, quid reponant? Re enim ipsa hæc, quæ affirmantur omnia, præstitit invictissima Martyr; & læta processit, & expandit manus inter ignes, & stetit, & oravit, & jugulum præbuit, & ictum excepit. Ubi hic *privilegia* Eloquentiæ ab istis perperam excogitata? ubi scenæ? ubi theatra, quæ isti ad elevandam non tam disertæ, quam veræ narrationis fidem comminiscuntur?

XVIII. De Laurentio autem illa sunt non minus digna, quæ[†] audiantur. Non prætereamus, inquit,[†] iterum & sæpius, *S. Laurentium*, qui, cum videret *Sixtum Episcopum suum ad martyrium duci*, flere cæpit, non passionem illius, sed suam remansionem. Itaque his verbis appellare cæpit;

Quo

Quo progredieris sine filio, Pater? Quo, Sacerdos sancte, sine Diacono properas? Nunquam sacrificium sine ministro offerre consueveras. Quid in me ergo displicuit, Pater? Num degenerem probasti? Experire certe, utrum idoneum ministrum elegeris. Cui commisisti dominici sanguinis consecrationem, cui consummandorum consortium Sacramentorum, huic consortium tui sanguinis negas? Vide, ne periclitetur iudicium tuum, dum fortitudo laudatur. Abiectio discipuli, detrimentum est magistri. Quid? quod illustres & præstantes viri discipulorum certaminibus, quam suis vincunt? Denique Abraham filium obtulit, Petrus Stephanum præmisit; & tu, Pater, ostende in filio virtutem tuam; offer quem erudisti, ut securus iudicii tui comitatu nobili pervenias ad coronam. Tunc Sixtus; Non ego te, fili, relinquo ac desero; sed majora tibi debentur certamina. Nos quasi senes levioris pugnae cursum recipimus; te quasi juvenem manet gloriosior de Tyranno triumphus. Mox venies, flere desiste; post triduum me sequeris. Inter Sacerdotem & Levitam hic medius numerus decet. Non erat tuum sub magistro vincere, quasi adiutorem quæreres. Quid consortium passionis meæ expetis? Totam tibi hereditatem ejus dimitto. Quid præsentiam meam requiris? Infirmi discipuli magistrum præcedant, sortes sequantur; ut vincant sine magistro, qui jam non indigent magisterio.

XIX. Hactenus Ambrosius libro I. Officiorum cap. xli. Quanquam hæc non Ambrosii, sed Laurentii

tii (a) & Sixti existimanda sunt verba, quæ pariter si negem esse eloquentia ac plane oratoria, ejus, quam profiteor, artis ignarus omnino videar. Plena quidem, non diffiteor, pietatis ea sunt, plena luctus, plena amarissimæ conquestionis; sed omnia invictissimi Martyris in sanctissimum Pontificem pietati, omnia incensissimo, quo Laurentius ipse flagrabat, Martyrii desiderio, omnia fortitudini, quam in perferenda inauditorum tormentorum atrocitate idem præ se tulit, plane consentanea, omnia denique hujusmodi, quæ ex intimo animi sensu a clarissimo Martyre prolata esse appareat; quo ex sensu si quando loquimur, omnes sine istorum *privilegiis* eloquentes & disertis sumus. Male isti de Eloquentiæ studuissent, multo aliter de ea sentire & loqui didicissent. Ejus semina in nobis insita a natura sunt, quæ quidem accedens ars explicat, sed ea non ad mendacium, sed ad veritatem educit. Ars perficit naturam, non corrumpit. Quapropter si illa ipsa verba attentius perpendantur, nemini dubium esse

(a) Legatur Ruinartius, qui in *Admonitione in Martyrium S. Laurentii* hæc habet. „ Subjungimus „ duo loca insigniora ex S. Ambro- „ sio Officiis, ne extrema aliquot „ tanti Martyris ad mortem pro „ Christo subeundam anhelantis ver- „ ba tantopere celebrata hic a nobis „ prætermissa nonnemo queratur. „ Porro hæc eadem verba saltem præ-

cipua animadversionibus legantur illu-
strata apud Augustinum Tract. 27. in Joan., & Maximum Hom. 1. de S. Laur., quod indicio est, non esse ex arbitrio conficta, sed internuncia traditione accepta, ut reipsa fuerunt tum a Sanctis Pontifice & Levita pronuntiata, qui sine ullis *privilegiis* ferventissima in Christum sola charitate eloquentes esse potuerunt.

esse potest, quin ita, uti ab Ambrosio relata sunt; re ipsa a SS. Martyribus Sixto & Laurentio fuerint pronunciata. Omnino nescio quid divinum sonant, & tantum flexanimæ vis adjunctum habent, ut in audientium mentibus infigi atque hærare debuerint, & dignissima existimari, quæ posteritati nullo, vel tenuissimo apice immutato traderentur. Hic ego iterum quæro ab istis, ubi in his verbis Eloquentiæ *privilegia*? ubi scenæ? ubi theatra? ubi fictitii Heroes illi ab istis perperam excogitati, qui a Patribus *artificiose secum colloquentes in scenam producerentur*? ubi denique ea, quæ, cum Patres de Sanctis Martyribus scribentes legimus, nos *oporteat meminisse*? Monita isti sua sibi habeant, sibi reservent, & meminerint in posterum de Patribus & honorificentius sentire, & temperantius loqui.

XX. Ab Oratoria ad Poeticam gradum faciunt. Atque hic quoque audite rursus, audite, inquam, istorum verba & ea vos momentis suis pro vestra æquitate ac sapientia penditote. *Est cur credamus, inquit, S. Panlinum ex Poeticæ disciplinæ ingenio S. Felicis virtutes celebraturum ab ejus artis licentia se nequaquam abstinuisse*. Quid hic ego dicam, aut agam? Nolo dolentius vociferari; nolo conquestionibus intemperantius indulgere. Quid faciam igitur aut dicam? Parco misellis; parco ignorantibus, qui sicuti nunquam veræ Eloquentiæ studuerunt, ita, quid Poësis sit, nunquam didicerunt; redarguendi quidem certe, sed non minus etiam docendi. Poeta fictor est, Poëma est

est compositio . Itaque hi tantum Poetæ habendi sunt , qui aliquid ad arbitrium quidem , sed substrata facti aliquid illustri veritate componunt ac fingunt , & ita nobis naturam suis expressam coloribus in aliquo Heroe exhibent , ut ad vitam recte instituendam illo veluti proposito exemplari erudiamur . Cæterum qui tantum res gestas adstricta poeticis numeris oratione persequitur , is non Poeta , sed Versificator habendus est . Electioribus quidem verbis in rebus exponendis hic uti potest , sed res ipsas fingere omnino non potest ; ut non aliud inter Oratoris & Versificatoris orationem discrimen intersit , nisi quod altera adstricta numeris est , altera plane incedit libera ac soluta ; nisi forte communes utrique numeri judicentur , ut una oratoriis vineta sit , altera poeticis numeris adstringatur . In hujusmodi autem Poeta , qualis Paulinus fuit , mitto reliqua tanti viri ornamenta a sanctis Ambrosio , Hieronymo , Augustino , Gregorio scriptis suis celebrata , quorum gratia plurimi ejus ab istis fieri debuit auctoritas ; sed tamen in hujusmodi Poeta quæ suspicio exaggeratæ aut eminentiæ veritatis esse potuit ? Sed hæc isti neque distinxerunt unquam , neque distinguunt , qui illud unum videntur habuisse propositum , ut Acta Martyrum poetico expressa metro in falsitatis suspensionem adducerent .

XXI. Quapropter non hoc loco eorum ego mentionem faciam , quæ de Martyribus bene multi versibus exarant , quorum egregios labores isti tanquam *e poeticæ*

disciplinæ ingenio, & ab *hujus artis licentia* profectos crimirabuntur. Neque vero quidquam dicam de Hymnis & Rithmicis hujusmodi carminibus, quæ quidem carmina, si vetustate commendentur, magnam obtinere debent his in rebus auctoritatem. Picturas autem quid hic in medium afferam? quæ non solum nos delectant cognitione formarum, sed rerum etiam notitia erudiunt. Non enim dubito, quin illa statim *potestas quidlibet audendi Pictoribus atque Poetis* communis mihi ab istis sit opponenda. Esto; Acta nobilissimæ Martyris Euphemie Asterius Amasenus Episcopus expressa tabulis tanti fecerit, ut ea digna putarit, quæ a se descripta posteritati spectanda propemodum transmitterentur. Esto; eadem contra Iconoclastas a Concilii Niceni Patribus fuerint adhibita ad sacrarum imaginum asserendam confirmandamque venerationem. Hæc ab istis nullius auctoritatis, nullius momenti existimantur, in quibus Poetarum videlicet & Pictorum *licentia* dominari potuit. Itaque per istos retexantur licet Coronæ illæ ac lacerentur, quibus Prudentius Poeta nobilis & pius Martyres insignivit suos. Inducantur Elogia illa, quæ sanctus Damasus carminibus exarata Martyrum sepulcris pro sua erga eos pietate ac religione insculpenda curavit. Picturæ denique amoveantur, ne Pictorum *licentia* ad confirmandam veritatem abuti videamur. Hæc aliaque hujusmodi ex eorum loquendi formulis, si eas recte interpretemur, necessario consequi, mentientur isti profecto, si videre se negent.

Quan-

XXII. Quanquam, si me audire volent, non erit, cur tot circumlocutionibus utantur, cur *nova Eloquentiæ privilegia* excogitent, cur *poeticæ licentiæ* fines amplificent, atque his similia comminiscantur, quibus incauti facile decipiantur. Dicant aperte quod sentiunt; quidquid isthic latet in eorum pectore, tandem aliquando erumpat in lucem. Si ita fiet, non mihi contendendum ulterius erit, non diutius laborandum; non eliciendæ sententiæ, atque a verborum involucris, quibus eas circumvestire solent, mea magna molestia, & vero etiam vestra explicandæ. Nam quid est? quod eos impediat, quo minus, quod sentiunt, aperte enuncient. Pudor? at eos non puduit nova, uti vidimus, opinionum portenta in medium afferre, & ea plusquam *Oratoria ac Poetica licentia* confirmare. Antiquitatis auctoritas? at ei refragari ac contradicere in multis, ut demonstravi, non dubitarunt. Reverentia erga Patres? at eos quo in numero ducant, & supra in aliis actionibus, & paulo ante vidimus, ac suis ipsi verbis perspicue declararunt. Religio Catholica? at huic fortasse plus nocent hoc modo tectæ atque obscuro, quam si eam illustri atque aperto, nulla simulatione, dissimulatione nulla adorirentur. Facilius enim ab imperitis caveri tum possent, qui cum ancipitia quædam vocabula usurpari audiunt, facile in errorem inducuntur. Prodant igitur sine tergiversatione mentem suam sententiamque declarent. Dicant, Acta Martyrum, quæ ab se temere excogitatis

veritatis indiciis carent, esse dubia, esse suspiciosa, esse commentitia, esse falsa, plena verborum esse, inania veritatis. Hæc si dicent, si hoc modo sententiam enunciabunt suam, magna me primum, ut dixi, cura liberabunt; tum imperitis non offendiculo erunt, non piis *scandalo*. Ita dicent, ut nemo sapiens eos audiat; ita dicent, ut eorum dicta nemo pius excipiat; ita denique dicent, ut eos sua ipsorum oratio refellat & sermo condemnet.

XXIII. Sentio, Florentini, mihi vestræ occurrendum esse fatietati; sentio in magna rerum copia moderationem adhibendam. Sed ignoretis, quæso, si ulterius dicendo provehar; & ad ea, quæ restant, mentes animosque vestros, quæso, reficite, & quam sancti ipsi Martyres, quorum nunc causa agitur, in tolerandis cruciatibus patientiam exhibuerunt, eandem mihi de illis dicenti exhibere ne recusetis. Quanquam haud scio, utrum majorem mihi, an istis, de quorum intemperantia jamdiu dico, hanc ipsam eritis patientiam exhibituri. Neque enim his, quæ hætenus exposuimus, veritatis ac falsitatis indiciis contenti ad alia & multo graviora progrediuntur, quæ quidem ego nunc temporis angustiis exclusus non singula persequar, sed præcipua solum, quam brevissime potero, expendam.

XXIV. Homines, quod miremini, Philosophiæ cæteroquin amantes philosophari Martyres nolunt, & si qua hujusmodi, quæ Philosophiam sapiant, in
co-

eorum Actis occurrunt; omnia ab Actorum Scriptore addita ex ingenio criminantur. Non negarim, interdum in Actis Martyrum aliqua reperiri, in quibus dialecticum acumen, & respondendi ac lacescendi prompta vis ac plane insignis apparet. Ego certe quoties Acta sanctissimæ Virginis & nobilissimæ Martyris Cæciliæ (a)

A a 3

legi,

(a) Antonius Bosius de SS. Martyribus egregie meritis omnium primus sacra Urbis Cœmeteria exquisita indagatione perlustravit, & inde quæ colligi potuerunt spectantia ad Martyres monumenta eruit, quibus opus illud longe utilissimum coagmentatum fuit, quod *Roma subterranea* inscribitur. Idem Acta sanctæ Cæciliæ edidit una cum *Passione* S. Urbani I. & Litteris S. Paschalis I. de *Revelatione*, *Inventione* & *Translatione* corporis B. Cæciliæ in avitam ejus domum jam a S. Urbano in Basilicam consecratam. Hæc omnia ex Vaticanis aliisque optimis MSS. deprompsit, atque eruditis adnotationibus illustravit. Postremo ne quid, quod ad nobilissimam Martyrem pertineret, omitteret, recentiorum ejusdem corporis sub Clemente VIII. P. M. *Desectionem* adjecit. Volumen hoc Paulo Sfondrato Cremonensi Gregorii XIV. fratris filio Tit. S. Cæciliæ Cardinali nuncupavit; non tam quia is eo Titulo decorabatur, quam quod ipsum Titulum magnificenter decorandum curavit. Quæ pia ad ejusdem ornamen-

tum Cardinalis munificentia contulit hic breviter adnotabo. Corpus B. Cæciliæ arca argentea, Clem. VIII. quæ fuit munus, pondo cc. i. conclusit. Sepulchrum lapidibus pretiosis ornavit. Conspicuo in loculo lydio lapide constructo ejus statuum eo corporis positu, quo reperta fuit, egregie elaboratam locavit. Antiquum *Cibarium* sepulchro imminens, subterraneam *Confessionem*, *Presbyterium*, *Oratorium* beatissimæ Martyris, *Balneum*, in quo Martyrium passa est, marmoribus pretiosis, ære inaurato egregiis picturis nobilitavit. Ad alendos lychnos xc., fere omnes argenteos, qui perpetuo collucerent, annuos redditus attribuit. Annuos item redditus Presbyteris, Clericis aliisque ministris constituit. Pretiosissimas Sanctorum omni ex parte Reliquias colligit, & auro argentoque inclusas in eandem Basilicam intulit, quam demum ex asse hæredem reliquit. Non dubium quin pius Cardinalis tam insigni munificentia tantæ Virginis & Martyris, cujus etiam *ad pedes* tumulari voluit, patrocinium sibi conciliarit.

Cer-

legi, legi autem sæpe, toties philosophantem, toties acutas ratiocinationes concludentem, instantem Quæstori suo Almachio, ejusque dicta repellentem & refellentem sum demiratus. Sed miror, non minus istos, qui multa ad rem non pertinentia *meminisse* nos volunt, eorum oblitos esse, quæ diserte servis suis promisit Christus; ipsis, *cum stetissent ante Reges & Prasides*, verba non defutura, quibus non tam ipsi loquerentur, quam Spiritus Sanctus in ipsis loqueretur. Spiritus igitur Sanctus, istis auctoribus, in Martyribus suis philosophari non potuit? Eadem est ratio locorum sacrae Scripturae, quæ passim in Actis citantur, & quæ isti a Martyribus prolata negant; perinde quasi quo magistro Petrus, qui piscator antea fuerat, & sacris certe Scripturis non fluiderat, tantam Scripturarum, quantam ab Cœnaculi egressu ostendit, cognitionem acquisivit, eodem Martyres acquirere magistro non potuerint.

XXV. Verum, qui philosophari Martyres nolunt, & quibus notitiam Scripturarum negant, non tam ex Philosophiæ, quam ex Scripturarum ipsarum præscripto majorem fuisse ab ipsis adhibendam in dictis moderationem contendunt. *Optandum fortasse*, inquit, (opportune apponitur particula *fortasse* ad mitigandam asperitatem acerbioris duriorisque sententiæ) *optandum fuisset*
in

Certe apud posteros immortalitatem bus non quam citissime defecturis, nominis consecutus est, qui tam pie sed diu ac perpetuo mansuris collo-
opes suos impendit, easque in operi- candas existimavit.

in posteritatis exemplum, ut Martyres suavitatem & moderationem a Christo Domino discipulis suis præscriptam, & cum re, tum verbis in semetipso expressam, operibus retulissent. Neque enim credendum est Divinum Spiritum ita esse locutum, ut multi Martyres locuti esse perhibentur. Optandum, dico ego, & multo quidem potiori jure optandum, ut moderationem a Christo Domino, tum re, tum verbis in semetipso expressam, ipsi in ejus servos, quos modis omnibus exagitare non sunt reveriti, retulissent; neque hujus tam intemperantis licentiæ exemplum posteritati reliquissent. Quo loco, ut videtis, isti nescio qua religione ex improvîso correpti nonnullis sanctorum Martyrum dictis graviter offenduntur; quasi vero, exempli causa, illa constanter æque ac juste clarissima Virgo & Martyr Agatha Tyranno non exprobrasset suo; Impie, crudelis Tyranne non es confusus amputare in femina, quod in matre suæxisti. Quid est? quod in his verbis quisquam reprehendat? quid? quod scandalum creet? nisi forte isti propriæ dignitatis obliti se ab amplissimo Criticorum ordine ad infimum pusillorum vulgus sponte sua demiserint atque abjicerint. Itaque dico, hæc aliaque hujusmodi dicta in sanctis Martyribus reprehendi non posse; multo vero minus tanquam a Christiana mansuetudine ac patientia aliena in crimen vocari.

XXVI. Patiens profecto erat & mansuetus Joannes ille Christi Præcurzor, & tamen Judæos cum repre-

henderet, *viperarum genimina* appellare non dubitavit. Patiens certe & mansuetus Stephanus erat, & illa tamen suis popularibus exprobravit; *Vos semper Spiritui Sancto resistitis*, & quæ sequuntur, satis gravia ac vehementia. Omnium certe Christus & mansuetissimus & patientissimus fuit, qui non præcepta solum patientiæ & mansuetudinis dedit, sed luculentissima harum virtutum nobis ad imitandum reliquit exempla; Herodem tamen *vulpem* nominavit; *dicite vulpi illi*. Mitto hic ea commemorare, quibus idem Scribas & Phariseos, & omnes generatim hypocritas exagitavit. Possunt igitur hæc aliaque hujusmodi dici, & sine piaculo dici, cum iusta ita loquendi causa adsit, & ita dici, ut a mansuetudinis & patientiæ præscripto non discedamus. Pro sua quidem potestate ita locutus est Christus; pro ea, quam impertiri servis suis ipse potuit & Martyres loqui potuerunt. Doceant isti, a sanctis Martyribus hujusmodi dicta extra locum, extra tempus, nulla de causa esse usurpata; demonstrent, præfracte, petulanter, odio, ira, invidia, indignatione jactata; ostendant, eos animo malo incitatos ac prava conviciandi voluntate locutos esse, tum a patientiæ ac mansuetudinis præscriptione discessisse concedam. Cæterum si loco, si tempore, si certa de causa, si quiete, si pacate, si nulla prava animi commotione permoti locuti sunt, quid est? quod eorum quisquam dicta reprehendat atque condemnet. *Non est ista*, recte & præclare Hilarius adversus
Con-

Constantinum , *non est ista temeritas , sed fides ; neque inconsideratio , sed ratio ; neque furor , sed fiducia .*

XXVII. At Tyranni excandescebant . Quid igitur ? num parcendum idcirco erat veritati ? num præseferenda ignavia ? animus humilis , demissus , abjectus , ostendendus ? At illi sæviebant atrocius . Esto ; sed eorum crudelitati robur invictum , & incredibilis constantia opponebatur ; & fortasse non magis commovebantur Martyrum dictis , quam eorundem in perferendis tormentis constantia irritarentur . Constantia igitur , animus excelsus atque erectus , firmum robur , pectus impavidum minus erat exhibendum ? minus libera Catholicæ Religionis facienda professio ? tacenda multa ? multa dissimulanda ? quibus Tyranni , si vellent , proficere & corrigi possent , ne illi sævirent atrocius , ne vehementius in rabiem ac furorem agerentur . Quæ nova isthæc ratio est ? quod Tyrannorum ipsorum culpa fiebat , id Martyribus vitio vertere ? innocentes condemnare ? nocentes absolvere ? Atqui , quod vix credibile videatur , hanc ipsam mansuetudinis laudem , quam patientissimis Martyribus negant , quibus omnium minime debuissent , concedunt . Adduci non possunt homines subita commiseratione perculsi , ut credant , tantam expromptam esse in Martyres crudelitatem , quantam Acta ipsa præseferunt & docent . Itaque exquisitorum quædam & inusitata tormenta ab Actis Martyrum remouent ; qua re & invictæ Martyrum patientiæ insigniter

ter derogant, & eorum Tyrannos novo mansuetudinis ac clementiæ præconio ornant.

XXVIII. Hic vero, quandoquidem ut in multis, tum præcipue hoc in genere Acta Martyrum istis suspecta sunt, quo certius de eorum veritate constet, amotis parumper Actis, hujusce rei veritatem aliunde exquiramus. Ac primum; parum ne atrocita illa sunt, quæ Paulus Apostolus (Hæb. xi. xxxvii.) de Martyribus jam inde ab exordio Ecclesiæ scripta reliquit? *Lapidati, inquit, sunt, secti sunt, tentati sunt, in occisione gladii mortui sunt; circumierunt in melotis, in pellibus caprinis, egentes, angustiiati, afflicti, quibus dignus non erat mundus; in solitudinibus errantes, in montibus & speluncis & in cavernis terræ. Quæ vero consequentes Martyres multo atrociora passi sunt, eorum certissimi Scriptores meminerunt. Inter hos præstat audire Gregorium Nyssenum & Eusebium. Et Nyssenus quidem in vita Gregorii Thaumaturgi gravissimis verbis immanissima a Martyribus tolerata supplicia ita describit, ut ea nobis quodammodo spectanda exhibeat. Unus, inquit, carnificinarum apparatus omnem afferebat concussionem. Enses, ignis, bestie, scrobes & foveæ; item instrumenta, quibus membra constringerentur & torquerentur; tum ferreæ sellæ ignitæ, tum ligna erecta, in quibus stantium corpora dum intenderentur terribilium unguium violentis admotionibus lacerarentur; atque alia item innumera ad varia corporum tormenta exquisita ab iis excogita-*
ban-

bantur . Studium iis, qui eas potestates susceperant, unum erat , ne quisquam alteri secundus exsuperantia sævitie mitior videretur . Non misericordia infantium , non honor canitiei , non virtutis verecundia in mentem veniebat infensis ; ne mulierum quidem naturali sexus infirmitati indulgebatur , ut ejusmodi periculis exemptæ manerent ; sed una adversus omnes crudelitatis erat lex , eodem modo pænæ , nullo discrimine sexus habitō .

XXIX. Non minori verborum gravitate eandem suppliciorum , quibus Martyres affecti sunt , immanitatem exsequitur Eusebius Hist. Eccl. lib. viii. cap. xii. , cujus oratio longe lateque discurrit, & totam Ægyptum, Thebaida, Antiochiam, Syriam, Pontum, Arabiam, Cappadociam, Mesopotamiam , Alexandriam peragrat . *Quid nominatim* , inquit , *attinet commemorare , aut varia plagarum & suppliciorum genera , quæ insignes Martyres perpeSSI sunt , oratione depingere ? partim securibus cæsi , sicut his qui erant in Arabia , contigit ; partim cruribus confractis divexati , veluti his , qui in Cappadocia versabantur , accidit ; partim etiam pedibus in sublime appensis capiteque in terram demisso , igne paullatim accenso , & leniter exardescente , & fumo e materia accensa ascendente suffocati , quemadmodum illis , qui in Mesopotamia morabantur , evenit ; partim naso , auribus & manibus amputatis , cæterisque corporis membris dilaniatis deformati , ut his , qui incolebant Alexandriam , ob-
tigit . Quid opus est etiam eorum , qui Antiochiæ mar-
ty-*

tyrium subierunt , memoriam renovare ? quorum alii candentibus craticulis suppositis , non ad mortem usque , sed ad longinquum & diuturnum cruciatum assati sunt . Ab his autem regionibus idem digressus , & oratione sua ad Pontum deflectens ; Cruciamenta , subdit , que Martyres in Ponto tolerabant auditu videntur horrenda . Quidam enim digitos manuum ab extremis unguibus acutis arundinibus transfixos habuere ; aliorum terga plumbo igni liquefacto , ejusque materia jam ebulliente effervescenteque perfusa , & corporis partes , quas natura maxime ad necessitatem fabricata est , flammis adusta . Nonnulli membris pudendis ac visceribus cruciatus turpes , intolerandos , & ejusmodi , quos exprimere reformidat oratio , subierunt .

XXX. Jam vero, quid ad hæc nostri misericordes, qui usque eo atrocitate insolentiaque suppliciorum commoventur, ut ab Actis Martyrum omnino expuncta velint, quid hic dicunt aut sentiunt ? Nam per Deum immortalem ! si enses , si ignes , si bestia , si scrobes , si ferreae ignitaë sellæ , si candentes craticulae , si ligna erecta , si acutaë arundines unguibus infixæ levia cruciamenta existimabuntur , quæ gravia judicabuntur ? Si nullis corporis partibus parcebatur , quæ amputabantur , concidebantur , dilaniabantur , assibantur , liquefacto plumbo torrebantur ; si ne vel ipsa quidem pudenda reveriti tortores , ea modis omnibus dilaniabant , si tormenta erant hujusmodi , quæ *refugit exprimere ac reformidat*
ora-

oratio, si vel solus instrumentorum & *carnificinarum apparatus omnem afferebat concussionem*, si hæc aliaque huiusmodi supplicia non inaudita, inusitata, atrocia, horrenda nominabuntur, quod tandem suppliciorum genus erit, quod his vocabulis exprimi debeat atque indicari? Postremo si Præsides ipsi de crudelitatis palma secum certabant, eamque alius alii præripere conabantur, *ne quisquam alteri secundus exsuperantia sevitiæ minor videretur*, quid ad tantam immanitatem addi queat, exspecto, dum isti dicant nobisque significant. Nonne huiusmodi sunt, ut ea malus Dæmon Præsidibus suggessisse dici possit? Quod si ita est, & hæc ipsa aliaque huiusmodi supplicia nobis a certissimis auctoribus tradita verissimisque tenentur, quid est, quamobrem eadem in Actis Martyrum locum habere non possint?

XXXI. At enim in edictis Imperatorum hæc & his similia horrenda supplicia perscripta non erant. Esto. Sed primo non quæritur nunc, quid in edictis scriptum fuerit; sed quid re ipsa factum sit indagatur. Fuerint nec ne in edictis huiusmodi tormenta perscripta, hoc ad rem non pertinet; quod ad rem pertinet, illud est innocentissimos Martyres crudelia quæque atque atrocia fuisse perpeßos; quod certissima, etiam amotis Actis, quæ istis suspecta sunt, testimonia manifeste evincunt atque declarant. Deinde quis non intelligit, hæc fere ex eorum arbitrio ac voluntate pendere, quorum munus est edicta Principum executioni man-

mandare ; neque vero ex eorundem arbitrio tantum & voluntate, sed etiam ex natura plerumque atque ingenio, quo, qui aliis immaniores efferationesque erant, ita fiebat, ut immanioribus etiam atque atrocioribus suppliciorum generibus Martyres excruciant. Quid ? quod Proconsules, Præsides, Præfecti, Judices expro-menda in Christianos crudelitate Imperatorum se gratiam inituros putabant. Quid ? cum videbant ipsa vel atrocissima supplicia a Christianis vulgo negligi atque contemni. Quid ? cum vinci se a pueris interdum puel-lisque iniquissimo animo paterentur. Quid denique ? cum hæc ipsa tormenta supra naturæ infirmitatem imbecillitatemque sexus alacriter atque intrepide tolerari viderent, hoc autem magicis artibus tribuerent, ut sibi jam non cum ipsis Martyribus, sed cum infernis pote-statibus certamen esse crederent, quorum vim atrocitate pœnarum atque immanitate tormentorum a se vincendam subigendamque esse arbitrarentur ; nonne tum vel ma-xime ad multo atrociora supplicia animum converte-re, & ad inaudita ac singularia, quo inauditam ac sin-gularem constantiam edomarent, excogitanda tormen-torum genera propemodum adigebantur ? His igitur de causis fiebat, ut efferationes evaderent, vehementius excandescerent, atrocius sævirent, atque extrema quæ-que, etiamsi in edictis scripta non essent, contra in-nocentissimos homines supplicia experirentur.

XXXII. Sed quo tandem cumque modo scripta essent

Im-

Imperatorum edicta , non est, quamobrem eos isti immanitatis conetur absolvere , & in tantæ partem cladis atque excidii venisse negent . Quidquid illis vel non repugnantibus , vel conniventibus , vel consentientibus fiebat , etiamsi in eorum edictis perscriptum non esset , ipsis tamen erat præcipuo jure tribuendum . Præsidum , Præfectorum , Proconsulum , Judicum iniquissimi contra Christianos edicta , quoquo modo & vel sua etiam sponte ab iis lata , ipsorum Imperatorum jussa atque edicta censerī debebant . Immo vero ipsi Accensi , Apparitores , Satellites , Lictores , Carnifices non tam Judicum ac Præfectorum , quam ipsorum Imperatorum manus putandæ erant , quibus illi ad expromendam in mansuetissimum atque innocentissimum hominum genus crudelitatem utebantur . Ipsi igitur Imperatores Christianos divexabant , ipsi cruciabant , ipsi exilio , carceribus , morte , inauditis tormentorum generibus afficiebant .

XXXIII. Ac ne illud quidem dici potest , quæ fiebant Imperatores longe positos atque absentes ignorasse . Multa enim hujusmodi facta sunt ipsis jubentibus , præsentibus , adstantibus , videntibus , lætantibus . Sed abfuerint licet disjunctissimis longe in terris regionibusque constituti . Quid ? totus terrarum orbis inauditæ crudelitatis testis erat , testes omnes mortales , omnes nationes , vel in intimis terrarum orbis partibus abditæ ac reclusæ , atrocissimæ cædis testes erant & conscia , & hæc
po-

poterant Imperatores ignorare? Palam atque aperte Christiani conquirebantur, capiebantur, ad tribunalia, ad fellas Judicium raptabantur, quæstiones publicæ habebantur; prope infinitum eorum numerum carceres non capiebant; fora, theatra, amphitheatra innocenti sanguine redundabant, ubique luctus, ubique gemitus ubique plurima & teterrima imago mortis omnium oculis obversabatur, & hæc Imperatores ignorabant? ignorabant hæc omnia? Tantisne rebus, tam gravibus tantique momenti, quæ regimen imperii, pacem atque otium provinciarum atque regnorum propius spectabant, quæ præcipuam boni Principis curam ac vigilantiam merito suo requirebant, eos indormisse credemus? Sed dormierint, licet, arctius graviusque dormierint atque stertuerint. Quid? toto terrarum orbe contra Christianos personante, tantis clamoribus nequaquam excitatos e diuturno veterno Imperatores fuisse, nunquam evigilasse censebimus?

XXXIV. At certe neque Trajanus, neque Antoninus, neque Marcus Aurelius, quorum Imperatorum in pluribus Martyrum Actis mentio fit, quidquam in Christianos sanxerunt. Quomodo non sanxerunt? Si in quæstionibus habitis, his ipsis Imperatoribus, eorum nomina a Judicibus appellabantur, quæ dici potest, nihil in Christianos sanxisse? si nihil sanxerant, quid erat, cur illa vocabula, quæ *jussionem ac præceptum* significabant, sæpius a Judicibus inculcarentur? quid?

cur *voluntatem* Imperatorum toties obtruderent ? Quam *voluntatem* ? quam *jussionem* ? quod *præceptum* Judices somniabant , si neque *voluntatem* , neque *jussionem* , neque *præceptum* ulla lege lata , ullo edicto Imperatores ipsi indicassent ? Præterquamquod , si nihil illi contra Christianos sanxissent , quid causæ fuit , cur Justinus Apologia Antonino oblata de nimia edictorum atrocitate quereretur ? Quid , cur Apologiam item Meliton Sardicensis Episcopus M. Aurelio exhibuerit ? in qua illa leguntur ; *Persecutionem nunc patitur piorum hominum genus novis per Asiam decretis exagitatum* ; & illa ; *Delatores ex Imperialibus edictis occasionem nacti palam diu noctuque grassantur* . Quid , cur Apollinaris Hierapolitanus , cur Athenagoras , cur Miltiades , crudelibus per ea tempora sævientibus *persecutionibus* luculentissimas pro Christianis Apologias & scripserint & obtulerint ?

XXXV. Verum esto ; nulla hujusmodi horum edicta Imperatorum nomine re ipsa fuerint promulgata. Absolvendine idcirco erunt Imperatores isti , atque omni prorsus crimine liberandi ? Nullo modo , Florentini , dicam iterum & sæpius , nullo modo . Sunt enim in crimine ob illa ipsa edicta , quæ eorum nomine lata nunquam fuisse isti contendunt . Fuerint illa decessorum , facile patior , non repugno . Sed quandoquidem ea nec rescinderunt , nec abrogarunt , quod facere omnino debuissent , si pro suis habere nolissent , sua ip-

forum' ac propria existimanda sunt. Jure igitur eorum nomina a Præsidibus appellabantur; jure eorum edicta proponebantur; jure auctoritas interponebatur; jure illa vocabula *jussio*, *præceptum*, *voluntas* & usurpabantur, & inculcabantur; ac proinde jure ipsis quidquid contra Martyres agebatur adscribendum erat ac tribuendum. Non enim magis alicui id imputatur, quod per ipsum fit, quam ei, cui adstricta demandati muneris officio potestas sit aliquid perhibendi, ne per alium fiat.

XXXVI. Neque vero solum, quo Imperatorum causam sublevare pergant, atrociora supplicia negant, sed etiam iterata pernegant. Et certe suppliciorum iteratio in edictis Imperatorum ullo modo neque perscripta erat, neque præscripta. Quo loco, deserta sanctorum Martyrum causa, propemodum cogor Judicum ipsorum patrocinium defensionemque suscipere. Nam cum sæpe eveniret, ut divina virtute ensium atque securium acies retunderetur; rogis impositi Martyres non conflagarent; flagellis lacerati, atque *ungulis* discerpti subito curarentur & convalescerent; carceribus inclusi januis clausis ferisque intactis manentibus educerentur; in profluentem dejecti aquis supernatarent, & salvi atque incolumes in ripa sisterentur; objecti leonibus rabidos eorum morsus evaderent; quam in rem illa præclarissima sunt Ignatii Antiocheni; *Utinam bestiis fruar*, & quæ sequuntur satis nota ac pervulgata; hæc aliaque hujusmodi cum usu venirent, nonne,

ob-

ut ita dicam , iterare Judices supplicia cogeantur , nec finem facere alia aliis cumulandi , donec vel igni , vel aquis , vel ferro , vel alia qua tandem cunque ratione , quos prorsus consumptos volebant , absumerent ? Quid enim facere poterant Judices , siquidem invictos Christi Confessores perdere omnino vellent , quid magnopere facere Judices poterant ? Qua in re non tam crudelitas Tyrannorum apparet , quam suprema divini Numinis potestas maxime elucet , qua fiebat , ut non eo mortis genere , quo Tyranni vellent , sed quod decretum jam ab ipso fuerat , atque adeo horæ momento Martyres interirent ,

XXXVII. Ab iteratis suppliciis ad iterata demum prodigia delabuntur , ne sine censura , quæ pars hujusmodi Actorum est multo potissima , & sanctis ipsis Martyribus longe gloriosissima , elabatur , Quid ? Prodigiorum igitur numerum , mensuram , modum libito suo statuent isti atque definient ? Pauca miracula probabunt ? plura non probabunt ? sæpius iterata improbabit ? perinde quasi in divinæ potestatis arbitrio non fuerit illa aut omnino non patrare , aut , si ita visum esset , semel , iterum , tertio , quarto denique & eo sæpius patrare ? Quæ nova isthæc & inaudita licentia est ? præscribere Deo hac in re , & divinam ipsam Omnipotentiam ad Criticæ leges adducere . Atqui , ut ad hæc ipsas leges res adducatur , si opportunitas , si tempus , si locus , multa eaque clarissima patrandi prodigia unquam fuit , ea profecto opportunitas , illud

tempus, is locus certe fuit, cum sancti Martyres terribilissimis in suppliciis constituti cælesti magis ope indigebant, qua divinitus allevarentur. Vulgo despecti atque contempti, gravissimis criminibus accusati, ab omnibus oppugnati cum essent, nonne tunc vel maxime eorum patrocinium a Deo suscipi, innocentia defendi debuit, Tyrannorum retundi improbitas, atque insignioribus de cælo signis Martyrum virtus & constantia illustrari.

XXXVIII. Quid? quod patratorum prodigiorum, & magno numero patratorum illa aderat causa sane præcipua & multo maxima, amplificandæ nimirum Christianæ Religionis. Prædicabant illustres ac generosi Athletæ *Iesum Christum & hunc Crucifixum*, *Judeis quidem scandalum, Gentibus autem stultitiam*. Ista porro sapiens stultitia superbis hominibus & humanæ sapientiæ fastu intumescantibus persuaderi quomodo potuisset? nisi ad summam Martyrum pro illa ipsa sapienti stultitia acerbissima quæque tolerantium fortitudinem ingens prodigiorum numerus & divina etiam testificatio accessisset. Itaque Magnus ille Gregorius ob hanc ipsam causam prodigiorum copiam in exordio Ecclesiæ necessariam fuisse probat, atque ut ad *Fidem cresceret multitudo credentium, miraculis fuisse nutriendam* affirmat; quia & nos cum arbutis plantamus, tandiu eis aquam infundimus, quousque in terra coaluisse videamus. Cæterum si Martyrum ipsorum se-

sepulchra, si sacri cineres, si ossa arida (a) perennes prodigiorum scaturigines sunt & fontes inhexausti, ex quibus in nos omne beneficiorum genus *exuberat usque in hodiernum diem*, quæ fere hujusmodi Actorum conclusio est; quanto exuberantior hæc vena & scaturigo esse debuit in primordiis Ecclesiæ, quo ipsa Ecclesia copiosius uberiusque irrigata non solum altius radices ageret, sed quam latissime ramos suos toto terrarum orbe propagineque diffunderet.

XXXIX. Multa, ut hæcenus demonstravi, ab istis ad abrogandam sanctorum Martyrum Actis fidem excogitata sunt; multa. Estne aliquid ultra, quo progredi istorum intemperantia potuerit? Est, est inquam, cum dolore ac gemitu dico. Intemperantia nescit modum, quem si nosset, intemperantia non esset. Sed quem ipsa modum non adhibet, mihi adhibendum esse intelligo. Quapropter plura non addam, quandoquidem ex his, quæ vel cursim & strictim persecuti sumus, satis per vos ipsi colligere potestis, & vobiscum animo reputare, quanta hujusmodi

B b 3 mo.

(a) S. Joannes Damascenus de Fide Orthodoxa lib. 4 c. 16. „Christus Dominus Sanctorum reliquias velut salutaris fontes præbuit, quorum nobis beneficia manant, suavissimumque unguentum profuit. Nec vero quisquam huic sermoni fidem detrahat. Nam si aqua in deserto ex aspera & solida rupe, atque ex asini maxilla ad sedandam Sampsonis sitim, Deo ita volente, profiliit; eritne, cur

„cuiquam incredibile videatur, esse Martyrum reliquiis suave unguentum scaturire? Per eos Demones expelluntur, morbi profligantur, ægroci sanantur, cæci prospiciunt, leprosi mundantur, tentationes ac moerores discutiuntur, ac denique omne donum optimum a Patre luminum eorum opera ad eos, qui fide minime dubia postulant, descendit.”

monumentorum jactura necessario facienda sit, si istorum pati licentiam voluerimus. Nam per Deum immortalem! ex Actis Martyrum cæde, quam isti appellant, narrationis prolixitatem; præcide verba paullo elegantius atque eloquentius elata; expunge poeticos, si qui usurpati sunt, numeros; amputa quæstiones aliquanto longius productas; tolle responsa Martyrum, si qua aut asperiora aut subtiliora istis videntur; aufer iterata supplicia; mitiga suppliciorum ipsorum diritatem; dele edita contra Christianos ab Imperatoribus lata; exaggera eorundem in eosdem clementiam ac mansuetudinem; suscipe causam Proconsulum, Præfectorum, Judicum, & si superis placet, Licitorum etiam atque Carnificum; absolve nocentissimos homines atque nequissimos; remove prodigia atque miracula, aut saltem ea verbis extenua; carpe, quæ potes, detere, imminue; quid, tot de vivo ista ratione refecatis, quid per Deum immortalem! quid, amabo vos, Florentini, quid demum reliqui, quid puri fiet? Quid tot commotis suspicionibus, tot veritatis & falsitatis indiciis exaggeratis quid, inquam, quod minime dubium, quod certum, quod ratum, quod sincerum in Actis Martyrum habendum sit, relinquetur?

XL. En cur sanctissimi Pontifices jam inde ab exordio Ecclesiæ tanta cura ac diligentia Acta Martyrum conquiesierint. En cur ea tanto studio cognoverint. En cur summa fide exarata ad nos transmittenda curarint.

rint. Designati Notarii, qui ea describerent; destinati Diaconi, qui, quæ Notarii scripserant, accurate fideliterque cognoscerent. Nihil omisſum, quo certius de Actorum ipsorum veritate constaret. En cur non raro Martyres ipsi summis defuncti suppliciis, & suis superstites cruciatibus Acta ipsi sua, quo minus nos de eorum fide dubitare possemus, descripserint; quod inter cæteros nobilissima Martyr Perpetua, Saturus, & Flavianus præstiterunt. En ea, magno interdum persoluto pretio, Christiani ab Ethnicis ipsis cur emerint & compararint. En cur tanta a majoribus nostris in iis asservendis custodiendisque adhibita fuerit diligentia? Jam quid attulit tantum in iis conquirendis, cognoscendis, describendis studium impendere? quid in custodiendis & asservendis tantam curam insumere? quid tot sumptus in comparandis facere? si huc tandem aliquando & diligentia, & cura, & studium, & sumptus evadere debebant atque recidere, ut illa demum ad istorum manus pervenirent, qui ea fœdissimum in modum distraherent, conciderent, lacerarent, discerperent.

XLI. O rem, vel in maxima hujusmodi monumentorum copia, acerbam ac luctuosam! sed quanto in summa eorundem paucitate acerbior ac luctuosior? Et sane, parumne multa sanctorum Martyrum Acta interierunt? exiguusne eorum numerus amissus? ut quæ pauca reliqua facta fuerint, isti perderent atque corrumpere? Itane vero? quæ nobis non ulla vis abstulit,

non Tyrannorum iniquitas interceptit, non Hæresis improbitas interpolavit, non tempus invidit, non vetustas confecit, non incendia absumpserunt, non alluviones asportarunt, non ullus ex innumerabilibus eventis, quibus antiqua monumenta obnoxia fuerunt, eripuit; hæc, hæc, inquam, nobis una istorum intemperantia auferret, interceptiet, interpolabit, invidebit, conficiet, absument, asportabit, eripiet? Attamen ita est, uti dico. Plus hæc una, mihi credite, plus iterum dico una hæc, quam illa conjunctim omnia, ad nocendum valuit; & quod neque ulla vis, neque Tyrannorum iniquitas, neque Hæresis improbitas, neque tempus, neque vetustas, neque incendia, neque alluviones, neque casus ulli effecerunt, hoc una istiusmodi Criticorum effecit intemperantia, ut hæc sanctissima monumenta non tam ex tot infortuniis erepta & conservata, quam ad istorum injurias funestamque censuram delata propemodum ac reservata esse videantur.

XLII. At enim in Actis Martyrum non pauca occurrunt, quæ minus consentanea veritati videri possunt. Audio. Et per me licet examen in illa instituat; studium & diligentia in iis cognoscendis, discutiendis, & pristinae integritati restituendis adhibeatur. Secernantur Acta inter se, & *Autographa*, & *Apographa*, & *Archetypa*, & *Proconsularia*, & *Præsidialia*, & vetustiora, & minus vetusta, & hoc aut illo sæculo descripta, & si qua alia observanda sunt, per me licet obser-

serventur, expendantur, distinguantur, Nolo acervatim omnia & nullo delectu proponi; nolo permisceri; nolo confundi; sed clare, apte, ordine, loco, tempore distinguere quæque ac separari. Non ego hoc, si quid hujusmodi ab istis factum sit, non recte factum criminor, non accuso, non condemno. Non usque eo arti criticæ infensus sum, ut quidquid illa moliatur, modo justa, modo certa de causa, modo sobrie ac moderate fiat, criminandum putem. Fecerunt hoc, non me latet, in hujusmodi monumentis clarissimi & doctissimi viri, sed quod fecerunt, consilio fecerunt, sobrie & moderate fecerunt, & magno Ecclesiæ bono fecerunt. Quid ergo est, in quo ego istos accuso? quid, quod reprehendo? illud unum, quod sæpe dixi, quod jamdiu queror, quod uno vocabulo toties complexus sum, *intemperantiam*. Hanc ego unam in crimen voco, hanc unam accuso, hanc condemno. Quorsum enim spectat tot ac tanta, quorum nullus finis est, exstruere & superexstruere? Quorsum novam prope *Babelicam* ædificationem moliri, qua in immensum producta tandem certissima rei ipsius, quæ constitui ac stabiliri debuit, ruina consequatur? Quorsum tot notas ad internoscendam Actorum veritatem excogitare? ut cum demum eas Actis ipsis accommodaveris, non solum in summa rerum ignoratione verferis, sed de omnibus dubitare cogaris. Sed præcidam, ut finis sit; Unum de duobus omnino necesse est, aut istorum cohibenda licentia, aut hu-

juf-

jusmodi monumentorum jactura necessario subeunda .

XLIII. Quæ cum ita sint , expurgiscimini tandem aliquando , Florentini , & vosmet ad vestram virtutem revocate ; frænate istiusmodi hominum licentiam ; cohibete dominationem , & tantam importunitatem a sanctissimis vetustissimisque monumentis avêrtite . Suscipite , obsecro , causam Martyrum , suscipite causam Religionis , suscipite patrociniû fortissimorum Heroum , qui *per fidem vicerunt regna , adepti sunt repositionem* , qui *viventes in carne plantaverunt Ecclesiam sanguine suo* , qui *venerunt ex magna tribulatione & laverunt stolas suas in sanguine Agni* , qui *tradiderunt corpora sua ad supplicia propter Deum , ne servirent Idolis* , qui *amaverunt Christum in vita sua , & ideo coronas triumphales meruerunt* , qui *sicut aurum in fornace probati sunt , & per ignem & aquam educti in refrigerium* , qui cruciatibus & certaminibus suis nobis hanc pacem atque otium , quo Religionem professi Catholicam nunc fruimur , conciliarunt , qui nobis ad cælestem patriam , quo omnes contendimus , præiverunt , atque iter proprio triumphali cruore signarunt , quorum dictis cælesti sapientia refertis erudimur , quorum eximiis virtutibus proficimus , quorum singulari fortitudine ad aspera quæque pro æterna animi salute subeunda roboramur , quorum invicta constantia in sancto susceptæ Fidei instituto confirmamur , quorum clarissimis sanctissimisque exemplis ad imitandum cuique nostrum expositis & propositis non instrui-

struimur solum, sed ad omne virtutum genus incredibiliter incitatur; & si ob tantam virtutem & egregia ipsorum erga Catholicam Ecclesiam promerita annua eorum memoria nobis semper læta recurrit ac jucunda, si eorundem patrocinium nunquam nobis apud Deum defuturum confidimus, si speramus fore, ut eorum *candidato* exercitui tandem aliquando in cælis jungamur, si eorum agones celebramus, si vel ipsa duri agonis instrumenta lanceas, enses, ungulas, sagittas, flagella, rotas, cruces, laureis revincta ramis suspicimus, & pio cum religionis sensu intuemur; si eorum reliquias colimus, si imagines veneramur, si ossa auro argentoque ornamus, si sacros cineres marmoreis loculis includimus, si iis aras facramus, si templa exstruimus, si statuas ponimus, si Patronos, statores, defensoresque urbium ac provinciarum agnoscimus, si harum ipsarum appellationum vim sentimus, si patrocinium angustis in rebus atque adversis experimur, si denique Martyres omnibus obsequii atque honoris significationibus jure meritoque prosequimur; nobis etiam eorum Acta; quæ ipsorum virtutem, exempla, fortitudinem, constantiam, certamina, coronas, triumphos continent, commendata esse debent, & ita commendata, ut ea omni ope a cujusvis injuria, ac nominatim ab istorum intemperantia tueri conemur atque defendere. Satis, ut credo, meo erga Sanctos Martyres studio ego feci; vos providete, ne studium illis vestrum defuisse videatur.

DE



DE PRAVO
ARTIS CRITICÆ
U S U

ACTIONIS II. LIBER VII.



Ideo , Florentini , non ea solum , quæ jam præcidere de mea accusatione decreveram , sed ea ipsa , quæ agere ex hoc loco deliberaveram , mihi esse necessario prætermittenda , ut aliquis tandem aliquando actionibus hisce meis finis adsit & modus constituatur . Sollicitus a principio nimis fortasse fui de argumenti copia & gravitate ; itaque ad eam causam accedere placuit , quæ sane gravis esset & copiosa ; nunc autem sentio , me & ejusdem copia obrui , & gravitate debilitari . Quare , si propriam infirmitatem confessus ingenue , hanc , quam suscepi , provinciam oppido gravem ac laboriosam
aliis

aliis tradidero , qui integris & firmioribus viribus fesso jam & longa contentione enervato succedant , hoc & optimum factu duxerim , & jure a quouam minime reprehendendum existimarim . Confido enim non defuturos , qui ad eandem causam accedant , ac multo majoribus , quam ego sim , & ingenii , & doctrinæ , & eloquentiæ præsiidiis instructi quidquid a me omissum fuerit , abunde compensent , & causam ipsam multo pleniore atque uberiore tractatione explicatam feliciter ad exitum usque absolutionemque perducant . Quid igitur ? inquiet fortasse aliquis ; cum tam multa de Historia Ecclesiastica verba feceris , Divinam , cujus inde ab ipso initio summam exposueris difficultatem , tacitus prætermittes ? Nihil de hac audietur a nobis ? nihil dicetur a te ? & quæ multo potissima hujus accusationis pars esse debuerat , ea prorsus relinquetur , ut illa non tam per incuriam omissa , quam dedita opera prætermissa esse videatur ? Quid ? Istosne ea , qua par est , reverentia divinos libros esse reveritos ? ab iis se consulto abstinuisse ? Quis hoc credat ? An vero mutasse ingenium ? vel novam Criticæ rationem adhibuisse , ut , qua potestate reliquis in rebus usi sunt , hac una in re minime fuerint intemperanter abusi ? Multo id quidem minus . Etenim , si locus unquam aut usquam fuit , in quo se jactare liberius isti licentiusque potuerint , is profecto est , & omnium quidem longe patentissimus , quem vel sola , & ea propemodum immensa iis exhibere potue-

potuerunt spatia Scripturarum? Quid? Peregrinæ linguæ, quibus ab origine sacri codices conscripti sunt, diversæ codicum ipsorum *versiones*, ratio interpretandi exponendique Scripturas tam varia & multiplex, Israelitici populi mores, leges, instituta, ritus, cæremoniæ, aliæque hujusmodi prope dixerim infinita, quæ in sacris libris occurrunt, parumne amplam & locupletem materiam ad captandam exquisitoris reconditorisque eruditionis famam istis subministrasse? parum acuisse ingenium? minus acriter istorum opinandi licentiam sollicitasse existimabuntur? Hoc omnino esse non potuit. Silebitur igitur a te de tot gravissimis & maximis rebus? nihil de istorum hoc in genere intemperantia dicetur? & hujus ipsius intemperantiæ ne specimen quidem aliquod exhibebitur? Hic ego tam subita interpellatione oppressus quid agam, Florentini? Repudiabo æquissimam postulationem? at hoc ab ingenio meo abhorret. Morem geram? at portum spectans immenso adigor me rursus pelago turbulentissimoque committere. Verum, quandoquidem postulatio non æqua solum est, sed moderationis finibus circumscripta, ne inofficiosus omnino videar, non abnuam studio vestro, &, quod enixius petitur, impetrari a me facile patiar. Postulatur tantum specimen; specimen dabo; & quidem hujusmodi, quod reliquis, quæ afferri possent, merito suo anteponendum sit, & quo uno vos ipsi contenti esse possitis.

II. Christum Dominum, qui nunquam non Mosaicis
le-

legibus diligentissime religiosissimeque paruisset, iisdem se in extremo vitæ suæ exitu obsequentiſſimum præstitiſſe, itaque ante quam sanctiſſimam mortem obiret ritu a maioribus tradito ſolemnique cæremonia Paſcha cum diſcipulis ſuis celebraſſe, vetuſtiſſima fuit opinio, & quoad per certum hominem licuit, ſæculorum omnium mirifice conſentiens & conſpirans, nullo prope contradicente, ſententia. Mitto hac ſuper re tum Latinorum, tum Græcorum Patrum certiſſima afferre documenta; mitto hic de ſacro codice verba recitare; nihil dico de Concilii Tridentini auctoritate, nihil de totius Eccleſiæ conſenſu, nihil de inveterata traditione, nihil de conſenſione Scriptorum omnium tum Catholicorum tum Heterodoxorum, propterea quia qui contrariam opinionem tuetur, id non diffiteatur modo, ſed ultro etiam concedat ac præſeferat. Sed præſtat hac ſuper re Auctoris huius audire verba, quæ ſane digniſſima ſunt, quibus aures veſtras quam attentiſſimas præbeatis. *Quandoquidem*, inquit, *opinio, quam tueri aggredior, in univerſum deſerta erat, propterea congregari cogor cum Theologis, Scripturarum Interpretibus, Hiſtoricis Eccleſiaſticis, Chronologis, & generatim cum omnibus iis, qui cum inter Catholicos, tum inter Heterodoxos celebriori eruditione præſtiterunt. Cuncti adverſarii mei ſunt, quos partim adior, partim repello, ut de me dici poſſit, quod de Iſmaele tradunt litteræ ſancta; Manus ejus contra omnes, & manus*

nus omnium contra eum. Huc usque auctor hic, de quo dicere instituo.

III. Hic vero inexpectata hujus exordii novitate percussū hærere attoniti mihi videmini, Florentini, & quorū tantus tantarum rerum apparatus evasurus sit, dubii atque ancipites cum animis vestris vobiscum ipsi reputare. Novus Ismael in lucem prodit, & præsidens atque interritus procedit in medium; unus contra omnes in arenam descendit, unus contra communem omnium sententiam stare, unus omnibus objicere se atque opponere non reformidat. Cum hoc autem novo Ismaele quis tandem congredi audebit? quis manum conferere? cui tantum animi & virium suppetet, ut ejus ictus repellere, impetum sustinere, & vel solum aspectum ferre se posse confidat? Quid igitur? Audentiorne ego, & tanto animosior, quam cæteri, ut propius accedere non dubitem; nec ejus mihi certamen in præsentia fugiendum congressionemque vitandam putem? Fuit hoc animo quondam adversus Goliatem Philistæum arrogantius insolescentem, & agmina Dei viventis conviciis petulantius insectantem tener adolescens & pastor David, qui divina virtute fretus contra Gigantem stetit, processit intrepidus, strenue pugnavit, felicissime depugnavit. Ego vero, qui novo huic Ismaeli par esse nullo modo possum, quid consilii capiam? Illud unum, quod optimum duco, & ab eo capi necesse existimo, qui propriæ infirmitatis conscius saluum se atque incolumem

cu-

cupiat . Arma tantum , quibus novus hic limael usus est , vobis spectanda proponam , ut ex iis & pugilis virtutem , & pugnae exitum conjicere per vos ipsi possitis . Hoc de armis Goliathis factum in divinis codicibus reperio , cujus hactæ modus a sacro Scriptore definitur , & loricæ pondus quantum esset indicatur ; nimirum ut ex armis qualis quantusque foret is , qui ea tractabat , quam terribilis , quam metuendus agnosceretur . Ego quoque sic faciam ; arma tantum istius vobis ostendam , hoc est rationes , quibus sententiam propugnat suam , exponam ; vestrum judicium erit , an his armis feliciter usus hostes suos re ipsa confecerit , de iisque triumphum , quem sibi ante tempus propemodum gratulatur , reportarit .

IV. Atque ut inde initium ducam , unde iste exorsus est ; quid de magnifica illa , quam audistis , ostentatione sentiendum putatis ? quæ quidem est hujusmodi , ut ego certe , quod iste de se profitetur , vobis non fuerim enunciaturus , nisi iisdem prorsus , quibus ipse usus est verbis , uti potuissem . Abhorret enim a boni accusatoris officio aliquid proponere , quod statim atque propositum sit , aures ipsæ tanquam falsum & incredibile respuant atque repudiant . Sed ejus audistis verba , & reliqua etiam deinceps audietis , quibus ego prefusus , quoad potero , hac tota actione mea inhærebo . *Opinio* , inquit , *quam tueri aggredior in universum deserta erat* . Si igitur *deserta erat* , co-

gnita ante fuerat ac probe explorata ; si non *deserta* solum , sed in *universum* *deserta* ; non igitur unus aut alter , sed doctissimi viri illam cognorunt diligentissimeque examinarunt ; & quod nullo ea modo propugnari poterat atque defendi , idcirco unanimi consensu repudiandam , & in *universum* *deserendam* exilimarunt . Sedit quodammodo pro tribunali tota Antiquitas , assederunt Ecclesiæ Patres atque Doctores , Theologi , Scripturarum Interpretes , Historici Ecclesiastici , Chronologi , sapientissimi quique inter Catholicos viri , ipsi etiam Heterodoxi celebriori eruditione præstantes in consilium adhibiti sunt ; citata ad comparandum opinio , examinata , discussa ; & demum cognita causa , ac probe perspecta , quid de ea sentiendum fuerit , unanimi consensu suffragioque pronunciatum . Jam vero hoc modo transacto tali ac tanto iudicio ? quis non subscriptor accedat ? quis audeat refragari , quis intercedere ? Vix credibile videtur , exsistere unquam potuisse tanta confidentia hominem , qui hunc ipsum confesum tam gravem , tam frequentem , tam unanimem , non solum , quod par erat , non reveritus fuerit , sed ei , quod minime decebat , unum se objicere atque opponere non dubitarit .

V. Et vero exstitit , & quas asserat rationes ad elevandam primum consentientem Patrum auctoritatem , qua maxime premitur atque oppugnatur , ex ipso præstat audire . *Patres* , inquit , *penitus hanc*
con-

controversiam non cognorunt , quippe qui neque satis otii ad id præstandum habuerint , neque si habuissent , id ipsum illos præstitisse putandum esset ; propterea quia toti in eo erant , ut & populorum pietati utilitatisque consulerent , & Hæreticorum errores refellerent ; ac propterea Scripturas sacras facili quadam ac populari ratione interpretarentur . Quot verba , ut videtis , non tot certe Patrum elogia , de quibus nihil dico , propterea quia hujusmodi loquendi formulis valde istis familiaribus & usitatis aures jam nostræ obduruerunt . Patres igitur ad hanc controversiam penitus cognoscendam satis otii non habuerunt ? Quis est iste , qui Patrum occupationes scrutetur ? qui , quid otii , quid negotii , quid liberi ac vacui temporis habuerint , acrius & curiosius inquiret ? ac ne illud quidem tempus iis concedendum putet , quod certe nancisci non potuissent , si quantum temporis plerique somno , ludis atque conviviis tribuunt , ii tantundem in studiis suis non impendissent . At erant in populorum institutione occupati . Fuerint sane . Sed has inter ipsas occupationes fierine potuit , ut aliquid vacui temporis non reperirent , quod ad penitientem Scripturarum cognitionem intelligentiamque conferrent ? Alienum scilicet erat ab ejus , quam susceperant , vitæ ratione , ut populos erudirent , attentius sacras Scripturas meditari , quo certius rectæ populorum institutioni prospicerent ? Immo vero non aliunde , quam a Scripturis , uberius iis suppetere poterat , unde

illud ipsum, quod susceperant erudiendorum populorum munus & cumulatius explerent & salubrius exsequerentur. Quid vero illi? qui nullo publico munere distinebantur, qui frequentiam exosi in solitudinem se receperant, qui institutum fuerant amplexi *monasticum*, quo liberius, nulla procuratione districti, Deo ac sibi viverent, studiisque suis impensus vacarent. His certe satis otii, satis vacui ac liberi temporis & fuit, & esse debuit, quod in acerrima divinorum codicum meditatione impenderent. Hosne etiam populari tantum Scripturarum intelligentia contentos fuisse credemus, ut in Scripturarum ipsarum intimiora adyta non penetrarint? Quid? Summo præditi erant ingenio, abundabant otio, divinos libros diurna nocturnaue manu versabant, meditabantur, contemplabantur, & intimum eorundem sensum reconditioremque cognitionem non assequebantur?

VI. Sed quale tandem cumque hoc studium a Patribus divinis libris impensum pro diversa vitæ ratione fuerit, sive ipsi occupati, sive vacui, sive publica procuratione districti, sive soluti dicantur, sive quo se cumque modo habuerint, quomodo studium hoc ipsum non ad erudiendos populos tantum, sed ad confutandos etiam Hæreticos, ut ille posuit, conferre poterant, si populari tantum & cuique obvia Scripturarum intelligentia contenti fuissent? Hæresis ingenium quale sit nemo ignorat, quam callidum, quam subtile et acutum. Pugnât omni ratione, doctrina, eruditione, cognitione lin-

linguarum & artium . Sacros vero codices armamentarium putat esse suum , unde armaumat , quibus adversarios minus fortasse infelicitur , quam iste prælitetur , *adoriatur* atque *repellat* . Præclaros enim vero Catholicæ Religionis propugnatores contra acerrimos hostes omni ratione pugnantes hic nosster opponit , qui eos populari tantum divinorum librorum notitia instructos non tam ad contentionem producere , quam ad certum obijcere interitum videatur .

VII. Sed non est , cur de Patrum otio sive negotio plura disseramus , qui , ut multum otii habuerint , ut animum ad Scripturarum studium adjecerint , ut summo fuerint ingenio præditi , ut plurimum contenderint , in intimam tamen Scripturarum cognitionem pervadere omnino non potuerunt . At quæ hoc esse potest ? Me interrogatis ? ex ipso quærite ; ipsum audite . *Patres* , inquit , *multis caruerunt cognitionibus ad enucleandas penitus Scripturas necessariis ; ac propterea hæere multis in locis coacti sunt , quæ expeditissima sunt iis , qui rem altius a fonte ipso haurire possunt* . Mitto hoc loco quærere , quænam sint hujusmodi *cognitiones ad enucleandas penitus Scripturas necessariae , quibus Patres caruerunt* . Non percontor quæ nam *loci sint , ubi iidem hæserunt* , ut ex iis expedire se non potuerint . Non investigo nunc novos istos *fontes* Patribus clausos penitus atque obstrictos ; istis vero apertos solis atque patentes , unde tanta salubrium aquarum copia erumpit , quas Patres non

gustarunt, & quibus sola istorum ingenia ubertim irrigantur. Hæc omnia missa facio, & tantum quæro, quod nostra maxime interesse debet. Si gravior aliqua super implexiori aliquo sacræ Scripturæ loco incidit difficultas, sublata isto modo Patrum auctoritate, qui *cauerunt multis cognitionibus ad enucleandas penitus Scripturas necessariis*, qui *hæserunt multis in locis*, qui *fontes ignorarunt*, unde *res alius hauriri possunt*, quæro, inquam, nec quærere desinam, quid nobis, in eo, quem dixi, rerum articulo constitutis faciendum? quid consilii capiendum sit? quo confugiendum?

VIII. Etenim si hoc perfugium, quod in Ecclesia semper maxime patuit, adeundi Patres, eorumque de difficilioribus Scripturarum locis exquirendi sententiam obstructum atque interclusum sit, quo iste nos allegat? quo amandat? ubi responsa atque oracula petamus. Dicat ipse, audiemus nos; si consilium probabitur, utemur etiam. Delphumne? an Dodonam proficiscemur? At Oracula omnia ab illis prorsus sublata meministis opinor, quæ elingua fuisse contendunt, & solum fraude atque astu Sacerdotum diserta. An proprio ex ingenio Scripturas quisque interpretabimur? At periculosum hoc nimis est, & omnino vitandum, quippe hoc modo *spiritus*, qui vocatur, *privatus* induceretur, quo nihil exitiusius ac pestilentius esse potest; unde exortæ Hæreses omnes, quæ statum Ecclesiæ miserandum in modum labefecerunt. An Ecclesiæ ipsius iudicium exquirendum

dum? Recte id quidem. Ecclesia enim sola est magistra Fidei, sola nuncia veritatis. Sed Ecclesia ipsa, inconsultis Patribus atque inauditis, nihil constituere, nihil decernere consuevit; Patres semper in consilium adhibuit; Patrum sententiam requisivit; Patribus plurimum detulit; nec vero, si præsertim aliqua in re consenserint, ab eorum opinione iudicioque recessit; atque id quidem more a maioribus tradito, & in Ecclesia nunquam non retento, & in ipsis Œcumenicis conventibus sancte religioseque servato. Quo igitur tot viis obstructis deveniendum nobis erit? Quid tandem fiet? quis doctor? quis magister adeundus? quis consulendus?

IX. Verum tametsi supra allata verba huiusmodi sint; quæ omnem propemodum eripere, intimam certe Scripturarum cognitionem Patribus adimere videantur; nolo tamen quemquam falso insimulare, & video illa ad hanc citra *dogma* potissimum controversiam ab auctore suo referri. Subdit enim *desiderari Patrum opus, quo in opere hanc de Pascha controversiam examinandam susceperint*. Audio. Sed primum; si Patres non satis otii ad id præstandum habuerunt, si contenti populari tantum Scripturarum intelligentia ad populos erudiendos accommodata fuisse dicuntur, quem ad finem implicatissimam de Pascha questionem instituerent, quæ ad populi institutionem non pertineret, eamque exponendam rudi vulgo explicandamque aggrederentur? Deinde si cognitionibus ad *enucleandas penitus Scripturas necessariis caruerunt*, quid erat, quam-

obrem in eam se quæstionem longe difficillimam conjicerent, in qua certe *hæsissent*, & ex qua se explicare nullo modo valuissent? Quid? non conceditur otium Patribus, & opus a Patribus, quod sine otio elucubrari non potuit, efflagitur? Negatur intimior cognitio Scripturarum, & opus, quod sine summa earundem intelligentia nemo conficiat, postulatur? Hoc quid est? nisi geminum ac simillimum illi, quod Hebræis contingit a Pharaone, quibus lateres imperabantur, & necessaria ad lateres ipsos conficiendos non præbebantur.

X. Affirmatur igitur, nullum a Patribus super hac controversia opus esse confectum. Atqui egregium volumen de Pascha edidit Anatolius Pontifex Laodicens in Syria, cujus ingenii præstantiam ac singularem doctrinam Hieronymus & Eusebius laudant atque suspiciunt. Aliud item, & eximium illud quidem de Pascha volumen scripsit Theophilus Patriarcha Alexandrinus, & Theodosio Imperatori nuncupavit. Quid? triginta, quas vocant, Homiliæ de Pascha a s. Cyrillo Patriarcha item Alexandrino elucubratæ. Quid? Proterii, qui eandem Alexandrinam sedem tenuit, epistola hoc super argumento ad sanctum Leonem Magnum data. Quid? alia item epistola Ambrosii, eadem subiecta materia, ad Episcopos Æmilix. Quid? Canon Paschalis Victorii. Quid? ejusdem hac ipsa de re ad Hilaram Pontificem Max. litteræ missæ. Quid? Dionysii cognomento *Exigui* de Pascha graves epistolæ duæ. Quid?

Quid?

Quid ? Cycli Paschales a veteribus bene multis summo studio diligentiaque elaborati , e quibus ille etiamnum exstat , qui in marmorea Pontificali sede S. Hypolitii Portuensis Episcopi perspicuis insculptus litteris adhuc Romæ patentibusque conspicitur. Nonne hæc opera Patrum , nisi forte ea in libros , in capita , in sectiones digesta velit , hac ipsa super controversia sunt ? quæ ille ignorare neque debebat , neque vero poterat ; cum præfertim Chronicon Paschale rimari totum ac scrutari aggreßus sit, ut inde pro se auctoritatem aliquam, quæ tota est a nobis , eliceret , atque ut , si quo modo posset , auctoritate ipsa sententiam suam adstrueret & confirmaret .

XI. Sed qua demum ratione sententiam hanc ipsam adstruat iste atque confirmet suam , tandem aliquando præstat audire . Magnam exordio illo suo , quod a me recitari audistis , de se excivit expectationem ; omnium in eum unum intenti animi , omnium arrectæ aures ; magna , illis verbis commota expectatio fuit , cui non satisfaciat solum quomodocumque oportet , sed eam vincat ac longe multumque superet necesse est . Non enim parva res agitur ; totius Antiquitatis infirmandum iudicium , omnium Patrum multo sane felicius , quam hætenus præstitit , elevanda auctoritas , infrigendum omnium Scriptorum testimonium , Theologorum tum veterum tum recentiorum , Chronologorum , Heterodoxorum ipsorum in unum conspirans disturbanda consensus , formidandum tot adversariorum agmen invaden-

dendum ac profligandum omnino est, de eoque insignis reportanda nemine non acclamante victoria. Tale tantumque negotium, aut ego fallor, aut una confici demonstratione potest, una effici evidentia debet; & ea sane hujusmodi, cui oblectari ne ipsa quidem impudentia possit. Rebus hac ratione, quam æquissimam puto, constitutis ipsum audiamus.

XII. Atque in primis *abjicienda esse* ait *præjudicia*. Verbo ancipiti valde, & satis periculoso utitur atque suspecto. Parco quid nomine *præjudicii* intelligat sciscitari; & quænam potissimum *præjudicia* abjicienda sint, non percontor. Sed abjiciantur licet *præjudicia*. *Opus est etiam rem, de qua agitur, funditus percipere*. Quantum quidem hac nostra infirmitate ingenii poterimus, *rem percipere*, & *funditus percipere* conabimur. Neque enim reperies quod vis, nisi prius *noveris probe, quod quæris*. Sententia admodum obvia atque vulgaris. *Exquisitum judicium monet intelligendum prius esse quid hoc Pascha sit, & quo tempore celebrandum*. Satis hoc quidem videtur ab ipsa disci Scriptura sine *exquisito judicio* posse; sed tamen si hoc *exquisitum judicium* afferre non poterimus, nobis auctoris ipsius judicium non defuturum confidimus. Numquid est aliud, quod præcaveri debeat? Immo vero, inquit, est; *Si namque tempus Paschæ nondum advenerat, evidens est Christum licet legi obsequentissimum non debuisse illud celebrare*. Satis quidem verbose, quæ præmisit; hoc
au-

autem postremum , quod addidit , apte sane ac recte circumscriptum , & res , ut ajunt , ad terminos juris redacta . Tota igitur , nisi fallor , rei summa huc revocatur , ut *evidenter* iste nos doceat , legitimum Paschæ tempus , pridie quam Christus moreretur , non advenisse , ut necessario idem , qui legi semper paruiisset , a celebratione Paschæ excluderetur ? Hic vero , Florentini , si unquam alias , attentos vos maxime volo . Tenetur , ut videtis , & iis constrictus cancellis tenetur , quos ipse sibi circumdedit ; nullum patet effugium , in eum locum provectus est , unde vel evadere cum laude debet , vel ubi hæreere parum honeste cogitur . Non qualicumque confirmatione contentus esse potest ; sed demonstrationem asserre omnino debet . Demonstrationem ipse recepit se allaturum , demonstrationem nobis asserat necesse est ; nos demonstrationem poscimus jure nostro , demonstrationem ipse denegare non potest .

XIII. Age vero , ut flagitata a nobis , & promissa ab isto demonstratio conficiatur , præstituenda certa dies est , qua die peragi ex lege Pascha debuerit , & ita præstituenda , ut *evidenter* constet , eam nondum advenisse , ut propterea legitimo exclusus tempore fuerit Christus , atque a Paschæ celebratione prohibitus . Hoc *evidenter* si ostendatur , tantopere expetita demonstratio habebitur ; si secus , omnes conatus incassum recident , & concitata expectatio decipietur . Jam solemnem , statum , legitimum diem , atque adeo horam nondum advenisse quæ
e vi-

evidenter docebitur? quī demonstrabitur? Audiamus. Auctoritate, inquit. At qua? ea fortasse, quam repudiavit? & cui in sententia totius antiquitatis suffragio confirmata stare noluit? Sed hoc omisso, qui tandem erunt auctores tam graves, tam idonei, tam locupletes, tam omni exceptione majores, qui non solum cum Patribus, Theologis, Chronologis, Historicis conferendi sint, verum etiam his conjunctim omnibus anteferendi? Quis horum primus prodire audebit? quis in conspectum se dare? Verum ne vos diutius teneam; procedit in medium, & primus omnium *Talmud* (a) in conspectum se dat. *Talmud*! quid hoc est? quod monstrum? quod prodigium? Neque monstrum, neque prodigium hoc est, sed gravis nimirum auctor ad tantam definiendam controversiam evocatus. Quis huic succedit! alius non minus idoneus auctor & gravis, qui nos de legitimo tempore *evidenter* doceat certosque faciat; adest, præsto est, nec desiderari exspectarique se patitur. Quis hic est? *Mischna*. *Mischna*! inusitata inconditorum barbarie vocabulorum ne commoveamini, Florentini, & vos met ad

(a) *Talmud*, hoc est *doctrina*, complectitur legis explicationem, caeremonias, & Jus Civile Judæorum. In duas partes dividitur, quarum prima *Textum* continet, & *Mischna* appellatur, altera *Glossam*, & *Guemara* dicitur. Duo *Talmud* habentur, primum Hierosolymitanum ea in urbe augmentatum anno circiter 469., alterum Babylonium Babylone elucubratum anno 476. Utrum utri præstet

non est querendum, cum plane constet Opus hoc pessimum esse, & falsis traditionibus, & anilibus fabulis, & horrendis blasphemis redundans, ac proinde merito a multis Summis Pontificibus damnatum. Porro *Maimonides* celebris Rabbinus fuit, & *Talmud* publice profiteri anno 999. ingressus est.

ad similia vocum portenta comparate . *Mischna* inquam , cui tertius adjungitur auctor longe locupletissimus . Quis ? quisnam ? *Kalendarium* . *Kalendarium* ! utique *Kalendarium* , & illud quidem , quo nunc ad festos dies notandos Judæi utuntur , cui gravissimo & certissimo auctori nefas est contradicere , id non tam affirmante , quam confirmante , atque adeo asseverante , & vero etiam jubente *Bartolocio* nescio quo . Jam si de ritibus Paschæ celebrandi , de loco , de cæremoniis plenius doceri voluerimus , *Majmonides* nobis erit adeundus , *Majmonides* consulendus .

XIV. Quid hic ego dicam , aut potius querar ? O rem fane miseram atque acerbam , Florentini , & maxime luctuosam ? Solebamus antea in divinarum expositione Scripturarum audire præclara Hieronymi , Gregorii , Augustini , Ambrosii , Hilarii , Cyrilli , Chrysostomi , aliorumque hujusmodi doctissimorum sanctissimorum virorum nomina , quæ cum audiebamus nescio quid plenum sapientiæ , plenum dignitatis , gravitatis , auctoritatis plenum audire nobis videbatur ; & vero re ipsa digna erant , quæ omni cum pietatis tum religionis sensu audirentur . His nominibus aures nostræ jam assueverant ; his nihil gratius , nihil jucundius nec usurpari a nobis , nec usurpatum ab aliis percipi poterat . Nunc autem incondita *Talmud* , *Mischna* , *Maimonidis* nomina audire cogimur , & barbarorum his similium insolentiam vocabulorum immanitatemque perferre . Ex-

pun-

puncta jam prope de catalogo Interpretum Patrum nomina dici possunt, in eorumque locum sussepta *Rabbino- rum*. Illis de medio remotis, qui divino afflati spiritu sacras nobis litteras interpretabantur, novi Doctores successerunt, qui eorum locum occuparent, sacros libros exponerent, & abjecta priorum auctoritate Doctorum in Scripturis sanctis dominarentur. Quis unquam tantam rerum conversionem, atque adeo perversionem fieri potuisse existimasset? Et vero facta est. Usque adeo vix quidquam incredibile videri potest, quod tempore non fiat credibile, & alicui verum sit, ac propugnandum etiam existimetur.

XV. Atque hic nolite ulterius postulare, ut ea colligam, quæ multa de phasibus Lunæ, de cyclis, de novis Astro- nomorum tabulis disputat. Illa quoque nolite quæ- rere, quæ de diebus *artificialibus ac naturalibus* fuscè persequitur; ut hos ab illis distinguat; ut de primis evangelicos semper esse Scriptores intelligendos contendat. Nam, quæ ad amovendam, qua maxime pre- mitur, invidiam subtexit; Quæstionem hanc ad *dogma* non pertinere; non ad morum spectare doctri- nam; liberum esse hac in re cuique opinari, quod libet; jus sibi negari non posse appellandi petendique, ut causa, quæ probe discussa non fuerit, iterum co- gnoscatur; ineptire Theologos, qui nova commini- scendi *dogmata* nunquam finem faciunt; hæc aliaque hu- jus generis evidentiam non conficiunt. Quapropter, ut
pau

paucis multa complectar , eo quæstionem totam adducit , ut a solis Chronologis atque Astronomis dijudicanda sit , & pene una *Rabbinorum* auctoritate definienda . Hi nimirum sunt *fontes* a Patribus ignorati , hæc *loci* , ubi Patres *hæerere coacti sunt* ; hæc *cognitiones ad enucleandas penitus Scripturas necessariae* , quibus illi novis hujus recentis Criticæ adminiculis destituti caruerunt .

XVI. Verum ne vobis oratio mea suspecta sit , & ne quibusdam eo artificio , quod imperiti oratorium , ego veteratorium appello , usus videar ; neve huc commentitia illa , de quibus superiore actione audistis , me advocasse *privilegia* quisquam criminetur ; non negarim Chronologiam atque Astronomiam ad hujusmodi quæstiones dissolvendas magno usui esse posse atque adjumento . Neque vero illud inficiabor , subsidia non contemnenda his in rebus suffici nobis item posse ab eruditione ac peritia Hebraicorum rituum & cæremoniarum ; & , si vultis , non minimum etiam opis a *Rabbinis* eruditioribus doctioribusque conferri . His usus est divinarum Scripturarum scientissimus Interpres & cognitor Hieronymus , quem non puduit Hebræorum doctissimos consulere , ab iis nonnulla discere , eosdemque eruditæ suæ peregrinationis , qua totam obivit Palæstinam , habere comites . Quid igitur causæ fuit ? quamobrem Patres , si Chronologiam & Astronomiam ignorabant , non Chronologos sui temporis & Astronomos hac super controversiâ consulerent , qui Lunæ phases

ses solerter distinguerent , diligenter notarent ; certo designarent , qui tabulas ad Astronomiæ leges exactas ostenderent ; unde omnia , quæ ad hanc quæstionem explicandam pertinerent , adjumenta Patribus suppeditarentur . Totamne antiquitatem defecisse Chronologos ? nullumne olim exstitisse Astronomum in cæli ac planetarum ratione versatum existimabimus ? quem Patres adire possent atque consulere . Nullusne omnibus retro actis sæculis paullo doctior ac peritior *Rabbinus* fuit ? *Talmud* nullum ? *Mischna* nullum ? nullus *Maimonides* ? Philo certe & Josephus antiquissimi auctores sunt , & inter Hebræos magni nominis & laudatissimi . Eosne Patres nunquam vidisse ? legisse nunquam ? ignorasse prorsus ? nihil ut ex eorum lectione notitiaque profecerint . Quod si a Patrum gravitate , ut exemplo Hieronymi docuimus , non abhorrebat ab aliis , atque adeo a *Rabbinis* ipsis , quod sibi non suppeteret , mutuari , eosne in re tanti momenti sibi defuisse censebimus ? ut neque *Rabbinos* , neque sui temporis Chronologos atque Astronomos hac super re interrogarent , eorumque exquirere judicium sententiamque negligerent .

XVII. Video recentes Astronomos & Chronologos veteribus jure anteponi . Quare non est , cur recentium præ veterum scientia magnificentius extollatur . Facile concedi potest , Chronologiam atque Astronomiam multo majora ; quam habuerunt præteritis sæculis , ætate hac nostra cepisse incrementa . Verum si
 hos

hos ipsos recentes Chronologos atque Astronomos Patres adire ac consulere non potuerunt, quos ætas posterior tulit; hi certe a sapientissimis & eruditissimis viris, quos in hac causa acerrimos habuit adversarios, & aditi & consulti sunt. Nam simul atque nova hæc erupit sententia, doctissimos quosque excivit ad seque convertit. Hi profecto recentioris Chronologiæ & Astronomiæ præceptis instituti erant; exquisita ac recondita eruditione censebantur; nec *Talmud*, nec *Mischna*, nec *Maimonidem*, nec præstantiores *Rabbinos* ignorabant, nec certe quidquam illis deerat, quo minus hac de controversia recte judicare possent. Hi tamen tantum abfuit, ut promissæ ab isto evidentia acquieverint, ut potius demonstrationes demonstrationibus, & has quidem ab recenti Astronomia & Chronologia petitas objecerint, testimonia testimoniis, *Talmud Talmudi*, *Mischna Mischnae*, *Maimonidem Maimonidi*, & universe *Rabbines Rabbini* opposuerint. Non igitur majus a recentibus Astronomis & Chronologis, quos Patres consulere non potuerunt, quam a veteribus ad hanc definiendam controversiam peti subsidium potuit. Quod si credibile est nullam hac in re prætermittam fuisse a Patribus diligentiam, qua quæstionem hanc penitus cognoscerent; illud necessario consequitur, aut Chronologorum Astronomorumque rationes repertas ab ipsis congruere cum tempore, quo Christus Pascha celebrasse dicebatur, aut, si aliquo modo discrepare visæ fuerint, tantum momenti apud

Tom. I.

D d

iplos

ipſos evangelica habuiſſe verba , ut receptæ jam opinio-
ni adhæ-ere ſatius exiſtimarint , quam ab eadem cum
erroris periculo recedere ,

XVIII. Et ſane quid clarius atque apertius a ſacris
Scriptoribus enunciari potuit , quam Chriſtum re ipſa
Paſcha cum diſcipulis ſuis celebrâſſe , ſi evangelica ver-
ba tantummodo curſim perlegantur ? *Miſit Petrum &
& Joannem dicens , euntes parate nobis Paſcha , ut mandu-
cemus .* Diſcipuli reponunt *ubi vis paremus ?* Docet eos
Chriſtus quid factò opus ſit , & quomodo ſe gerere in
exſequendo mandato debeant . Indicia certa demonſtrat,
quæ ſi ſequantur , falli non poſſint . Illi imperata faciunt ,
& *paraverunt Paſcha* . Quid vero illa multo prioribus
clariora atque apertiora ? *Discubuit , & duodecim Apo-
ſtoli cum eo , & ait illis , deſiderio deſideravi hoc Paſcha
manducare vobiscum , antequam patiar . Dico enim vo-
bis , quod ex hoc non manducabo illud , donec impleatur in
Regno Dei , & reliqua* , quibus opportune cæna legalis ab
Eucharistica diſtinguitur ſic , ut illa præceſſerit , hæc fue-
rit conſecuta . Et hic quiſquam in tanta luce nobis tene-
bras offundere conabitur ? Chronologos & Aſtronomos
ingeret ? Lunares phaſes opponet ? Cyclos obiiciet ? infi-
nitam numerorum ſeriem obtrudet , quibus ab obviâ
Scripturarum intelligentia nos abducatur , & ad implicatiſ-
ſimam controverſiam adducat ?

XIX. Quanto igitur illud æquius fieri & rectius
deuiſſet ? quandoquidem evangelica verba ita ſonabant ,
ut

ut ad eorum veram germanamque significationem Patres omnes, totamque cum Patribus antiquitatem attraxerint, ad eam ipsam significationem Astronomorum rationes & Chronologorum *tabulas* adducere, ut & Astronomia & Chronologia enunciatae a divino Scriptore veritati servirent ac famularentur. Nec vero difficile erat ipsam etiam eruditionem, quo tandem cumque a fonte petitam, eodem detorquere ac derivare. Quod quidem si generatim a quovis requirendum fuerat, nominatim ab isto & potiori quidem jure postulandum fuit. Etenim si Evangelistae non satis concordare secum videbantur, ita temperari poterant, ut concentus plane consentiens existeret. Nam quid aliud expectandum erat ab eo, qui optimo usus consilio divinos Scriptores conciliare inter se & *Harmoniam* quandam efficere instituerat.

XX. Haec sunt arma, quibus iste usus est; his adversarios suos provocavit, his contra omnes stetit, his pugnavit; an vero his feliciter usus depugnaverit, palmamque de tot acerrimis hostibus, quos se *partim adoriri, partim repellere* jam inde ab initio professus est, reportarit, vos judicate. Hic etiam expectabit, opinor, dum ei triumphum decernamus, & victoriam voce maxima gratulemur. Sed quomodo ei victoriam vir gravissimus & doctissimus, popularis suus, & quibus potissimum verbis, epistola ad eum missa, gratulatus sit, operae pretium est hoc loco cognoscere. Digna sane est haec epistola, quae tota legatur, sed ego aliquot tantum

eiusdem particulas excerptam, ex quibus quid hac de sententiâ, quam hæcenus exposui, sentiendum sit, intelligetis. *Novi equidem*, inquit Scriptor epistolæ, *præstantes ingenio atque eruditione viros sentire alteram tui Operis partem*, ea est, in qua nova opinio propugnatur, *ansam præbere* Quam ansam? cui rei? *Ad reverentiam Patribus debitam imminuendam*. Dicatur iterum, & pronuncietur clarius sic, ut omnes exaudiant. *Ad reverentiam Patribus debitam imminuendam*. Jam non ego solus hoc sentio, non ego solus damno, & accuso; *Præstantes ingenio & eruditione* viri idem mecum sentiunt, idem damnant & accusant. Ex imminuta porro auctoritate Patrum quid incommodi ac detrimenti metuendum sit, ex eodem Scriptore discite. *Quod perincommode accideret sæculo nostro*. Cur peculiare sæculum commemoratur? cur *nostro* potissimum *sæculo* scribitur? Quod uni perincommode accidit sæculo, alteri certe commode accidere non videtur posse, si præsertim perniciofa per se res aliqua sit atque exitialis. Quid igitur causæ fuit, quare illud *nostrum* ad reliquorum sæculorum discrimen apposuerit? Audite reliqua. *Perincommode accideret sæculo nostro, quo calamitosa patet hominibus celebriores Ecclesiæ Patres in contemptum adducendi licentia*. Potuitne quidquam scribi verius, gravius, vehementius? *Calamitosa*, inquit, funesto vocabulo utitur ac lugubri; *calamitosa licentia* non Patres tantum, si qui inferioris notæ sunt, sed *celebriores Ec-*
cle-

desiæ Patres in contemptum adducendi. Quid ? quod affirmat hanc calamitosam licentiam patere . Quid sibi vult patere ? quid verbum hoc indicat ? quid significat ? nisi multorum hominum animos istam ipsam calamitosam Patres in contemptum adducendi licentiam corripuisse , & longe esse jam lateque diffusam . Sed quid tandem ab hac calamitosa licentia , quæ hoc etiam sæculo patet latiusque diffunditur , incommodi consequatur , ex eodem auctore audiamus . *Quo sæculo* , ait , *religione nulla a Fidei nostræ Patribus Deique amicis* , magnifice laudantur Patres , & merito ornantur præconio , *non pauci transfugiunt* , & haud raro ad utriusque hostes , videlicet Fidei & Dei , *infensissimos devolant* . Huc nimirum accedunt , qui *religione nulla* a Patrum auctoritate recedunt , atque hic demum nimix in opinando licentiæ exitus esse solet .

XXI. Hactenus Scriptor Epistolæ (Tillemont. tom.II. ep. ad N.N. art.LXIII. Criticus Critico , Criticus nobilis Critico nobili , eruditus erudito , popularis populari , civis prope civi suo . Quare non est , cur iste de me conqueratur , perinde quasi alienis a meo instituto me quæstionibus immiscuerim . Protuli litteras Critici nobilis , protuli viri docti , protuli popularis , verba epistolæ recitavi . Nec vero aliter me cum ipso gessi , cuius etiam verba hac tota actione attuli , & tantummodo sententias exposui , ut non tam ego locutus sim , quam ipsum ex hoc loco loquentem induxerim . Cæterum ;

quod ad me attinet, laudo summum hominis ingenium, singularem doctrinam, exquisitam eruditionem, quibus virtutibus inter paucos censetur atque eminet. Fateor, hanc quæstionem ad *Dogma* non pertinere. Scio, suffragatorem etiam magni nominis esse nactam. Sed quid inde in Catholicam Ecclesiam commodi redundarit, non video; illud sane video, magnam præberi *ansam* potuisse ad infringendam Patrum non singulorum tantum, sed conjunctim omnium auctoritatem in re quidem non *dogmatica*; sed exemplo valde suo periculosa; quæ unica causa fuit, quare, cum bona viri doctissimi & eruditissimi venia, ejusque suffragatoris, non sententiam ego meam pronunciarem, sed qualemcumque animi mei sensum vobiscum hac super re communicarem. Sed nimirum homines sumus, & humani interdum aliquid patimur. Gloriæ cupiditas non raro nos de instituto deducit, & quo nollemus adducit. Placet novitas opinionum, & illæ ipsæ, quæ nostra causa excitantur, contentiones & turbæ non displicent. Jactatur hoc modo nomen nostrum, Opera nostra cupidius expetuntur, leguntur avidius, magno pretio comparantur; nec vero persæpe non auctor ipse minimo in lucro compendioque versatur. His de causis nobis ipsi blandimur, & inanem ac falsam laudem, vera contempta ac solida, aucupamur.

XXII. Quanquam ne hanc quidem laudem, si laus dicenda est auctorem dici novæ ac periculosæ opinionis, iste

iste sibi vindicare potest, quam alii multo ante ei, ipso ultro fatente, præripuerunt. *Nullum*, inquit, *vidi, qui opinionem hanc propugnauerit in Europa, ante Nicolaum Villegagnonum, Antonium de Dominis, & Hieronymum Vecchiettum*. Hi sunt, quos sententiæ suæ auctores, duces, magistros habuit, quique vexilliferi ad invadendum omnium Patrum, Theologorum, Scriptorum Ecclesiasticorum, Chronologorum invictum agmen ei præiverunt; a quibus ego nominatim appellandis fortasse abstinuissem, si eorum ipse nomina reticuisset. Nihil dico de Villegagnono, quem ipse multis verbis collaudat. Antonius vero de Dominis, cujus ingenii fuerit, quam pravi, quam improbi, quas turbas exciverit, quomodo erga Ecclesiam Catholicam se gesserit nemo ignorat. Vecchiettus porro cujas sit, latere vos non arbitror, nec vero potest, Florentini. Nostis hominem, patriam, locum, familiam; indignus patria, loco, familia fuit; & plane dignus, qui perpetuo carceri addiceretur, & cujus liber *de Anno primitivo* Augustæ editus decreto publico flammis absumeretur. En fontes a me sæpius his in actionibus indicati, unde tanta novarum opinionum copia erupit, quæ recentem Criticam infecit.

XXIII. Quid igitur, si quid Heterodoxi erudite, si quid docte, si quid etiam vere protulerint, nobis vitio dabis, si nos illud ab ipsis mutuabimur? Multa ab iis certe & fuerunt erudite collecta, & acute excogitata, &

vere etiam enunciata? Quid ergo est, cur tantopere in nos inveharis, si quid ab Hæreticis excerptimus, quod in rem nostram derivaremus? Hoc Patres ipsi fecerunt, quos non puduit eosdem interdum adire, ex eorumque eruditione proficere. Ego vero hoc nunquam istis vitio nulla sine circumscriptione dedi, nec dabo. Scio, Augustinum in exponendis Scripturis regulas quasdam Tyconii Donatistæ nequaquam neglexisse. Non me latet, Cyrillum Alexandrinum declarasse, non omnia, quæ ab Hæreticis proficiscuntur, falsitatis atque erroris esse arguenda; laudibus etiam quasdam efferi posse, quorum erroribus faveamus. Non me fugit, Hieronymum Origenem aliquando laudasse; sed laudasse, ut discrete affirmat, *Interpretem, non Dogmatistam, ingenium, non fidem*. Hæc ego non ignoro. Sed tantum abfuit, ut Patres Hæreticorum suspectis aliquo modo de Fide Catholica opinionibus faverint, ut Hæreticos ipsos qua voce qua scriptis nunquam non fuerint infectati. Quod si interdum casu aliquo Hæreticorum astu veritatem simulantium decepti sunt, statim comperta fraude ab iis refugerunt, & a malo auctore acceptas opiniones sententiasque damnarunt. Illud vere & generatim dici potest, Hæreticorum Opera nobis maxime suspecta esse debere, qui, ut edocti sunt, qua teste, qua aperte Catholicam Religionem adoriuntur, & convellere quantum possunt conantur. Eruditioni quidem iudulgent, sed eruditionem ipsam pravarum erroribus opinionum per-

perdunt atque corrumpunt. Serunt inter flores innocuos tetra aconita, & nocentissimas immiscent cicutas, quibus exitiale ac pestiferum virus inconsultorum hominum animis importetur. Serunt triticum, sed zizania tritico confundunt, quibus sensim crescentibus triticum ipsum soffocetur. Quapropter cavendum maxime ab iis esse dixi jam, & iterum dico, nec finem dicendi faciam, & a suspectis eorum opinionibus refugiendum.

XVIV. Hoc ante me viderunt, ac providerunt viri gravissimi & doctissimi, quorum perscriptis auctoritatibus libenter subscribo. Vidit clarissimus Tillemontius Criticus in primis nobilis, qui *libertatem* quidvis a quovis non sine periculo mutuandi *infelicem* appellat. Vidit Natalis Alexander vir doctissimus, & celeberrimus item Criticus, qui diserte pronunciat, *In rebus, quæ ad Christianam spectant Religionem majorem adhibendam fidem esse Scriptoribus Ecclesiasticis, quam Ethnicis & profanis*; addam ego potiori jure & *Hereticis*, a quibus majus periculum imminet, & quorum pestifera lues difficilius vitatur, & facilius adhærescit. Vidit inter cæteros laudatissimus ille Meldensis Episcopus, quem unum ego hominem & ingenio summo, & eruditione multiplici, & doctrina singulari cum paucis amplissimi & florentissimi regni confero, multis antepono; qui, quam ego hactenus reprehendi licentiam atque intemperantiam, ipse quoque reprehendit his verbis; *Perniciosum*, inquit, *omnino recentium*

tium Criticorum inventum est, qui comites se Hæreticis præbere non dubitant, iisque multa adversus Ecclesiam commoda suppeditare non verentur. Vidit denique ante hos omnes Tertullianus cujus gravissima verba dignissima sunt, quæ hic afferantur, & quibus meæ huic actioni finis imponatur. Nobis, ait, etsi quærendum esset adhuc & semper, ubi tamen queri oportet? Apud Hæreticos? ubi omnia extranea, & adversaria nostræ veritati, ad quos vetamur accedere. Quis servus cibaria ab extraneo, ne dicam ab inimico Domini sui sperat? quis miles ab infœderatis, non dicam hostibus Regibus donativum ac stipendium captat; nisi plane desertor, & transfuga, & rebellis? Etiam anus illa intra tetrum suam drachmam requirebat; etiam pulsator ille vicini januam tundeat; etiam vidua illa non inimicum, licet durum Judicem, interpellabat. Nemo inde strui potest, unde destruitur; nemo ab eo illuminatur, a quo contenebratur. Quæramus ergo in nostro, & nostris, & de nostro.





DE PRAVO
ARTIS CRITICÆ
U S U

ACTIONIS II. LIBER VIII.



Ultā graviter ex hoc loco pro rerum, quas tractandas suscepī, dignitate atque præstantia a me superioribus actionibus dicta sunt, dolorique meo, quem sane magnum atque acerbum ex nimia intemperantiâ Criticorum in opinando licentia conceperam, parui; eique sum, quantum mihi quidem temperare potui, citra justam cujusque offensionem obsecutus. Nam cum ad eam causam accedere placuisset, quæ gravissima per se esset, & vero a me cum Religione maxime conjuncta existimaretur, non erat perinde agenda, quasi in eorum argumentorum genere versaretur oratio, in quibus, quid sentias, vel in utramvis partem disputes, non est magno opere la-

laborandum . Itaque in hac causa multa libere aperteque dicenda fuerunt ; multa ex intimo animi sensu depromenda ; conquerendum etiam dolenter interdum ; & , quod caput est , non tam providendum , ne nimis vehemens , quam ut ne omnino dissolutus viderer . Quod quidem consilium meum cum a multis sapientissimis hujus ornatissimæ civitatis viris laudatum esse non obscure cognoverim , non est cur paucorum , qui consilium hoc ipsum fortasse reprehendent , aut criminationes refellam , aut invidiam pertimescam . Equidem illud semper in omni actione vitæ a probro viro spectari oportere existimavi , quid agat , & quibus potissimum se probet ; sapientum judicium magni esse faciendum , stultorum contemnendum . Quamobrem si qui sunt , qui multo aliter sentiant , atque ipse actionibus his habendis declaravi , hos non impediam , quominus palam mihi atque aperte succenseant ; quorum ego certe sermonibus non movebor , ut vel unum siis verbum respondendum putem . Sciant interea , atque hoc non respondendi , sed commonendi tantum gratia dico , multo iniquissimam ab istis proponi conditionem , ut , qui sibi multa concedi velint , ne ipsas quidem nobis querimonias jure concessas arbitrentur . Quid ? Tu me prior infestis armis petere audebis ; ego scilicet omnes tuos ictus corpore excipiam ? nulla mei defendendi potestas fiet ? gemitus ipsi accepti vulneris testes & iusti doloris iudices interdicentur ? At contra est . Nam ,
aut

aut paribus armis & æquo jure dimicandum opinor esse , aut ab omni contentione super sedendum . Quanquam , fatebor equidem ingenue , Florentini , nec quidquam dissimulabo . Est , est inquam , cur isti se mihi iratos præbeant ; est , cur jure de me conquerantur . Etenim cum tot ac tanta adversus ipsos dixerim , cum eorum rationes argumentationesque refellendas susceperim , præcipuam tamen , qua utuntur , defensionem non modo non oppugnavi , quod factum oportuit , verum etiam , quod minime debuit , omnino prætermisi . Concedunt isti , se mu'ta in omni Historia molitos esse , multa correxisse , multa de medio penitus sustulisse , multa in falsitatis crimen suspicionemque vocasse . Fatentur , a se Patrum auctoritatem neglectam , antiquissimas Traditiones labefactatas , provinciarum ac populorum unanimem consensum repudiatum , vetulissimas opiniones sublatas ; contra vero quasdam in eorum locum suffectas , novas prorsus atque inauditas . Nihil horum negant , nihil dissimulant . Sed quam tandem rationem afferunt , qua tantam licentiam aliqua aliquo modo probabili excusatione defendant . Adeste animis , Florentini , & istorum defensionem accipite ; Se , quæ fecerint , unius veritatis amore fecisse dicunt . Hæc est horum hominum magnifica enim vero , & in speciem præclara defensio ; hæc ab istis prætenditur , hæc contra omnes adversariorum impetus , tanquam firmissimum ali-quod propugnaculum , opponitur . Quid agam hoc loco ,

co, Florentini? quo me vertam? aut quo postremæ actionis hujus meæ rationem conferam? Video enim, & jam nunc animo ac cogitatione perspicio, quantum momenti in una illa voce isti posituri sint, quamque se in omnem partem quamque licenter jactaturi. Commemorabunt veritatis dignitatem atque excellentiam; dicent, nihil esse, quod in ejus contentionem venire possit; non auctoritatem Patrum, non veterum testimonium, non consensum populorum; unam esse veritatem, quæ merito suo rebus omnibus anteposenda sit, unam a Critico spectari oportere, de una Criticos laborare. Addent, veritatis amore doctissimos quosque a præjudiciis vacuos atque liberos flagrasse semper, ejus inveniendæ gratia nullis pepercisse laboribus, eaque inventa tum demum existimasse se laborum suorum fructum esse amplissimum consecutos. Illos ipsos, qui a me toties objecti sunt, Ecclesiæ Patres de una veritate fuisse sollicitos, ad eamque conatus omnes suos cogitationesque contulisse; ac propterea multa, prout sese iis occasio obtulit, & veritas ita poscere visa fuit, tanquam falsa rejecisse, ac multorum etiam auctoritati, qui contra, atque ipsi sensissent, refragari non dubitasse. His aliisque similibus commemoratis, tum vero a vobis deprecabuntur, tum etiam suo jure contendent, ut, si quid paullo intemperantius factum, aut arrogantius dictum ab ipsis videatur, id non immoderatæ opinandi licentiæ, quod ego accuso,

fo, sed potius unius veritatis amori, quod ipsi defendunt, adscribendum putetis. Difficilis profecto locus, quo me ab istis adductum sentio, Florentini. Quis enim est, qui veritatem non plurimi faciendam? quis, qui non omni studio inquirendam putet? quis denique, qui persuasum non habeat, nihil esse docto præsertim homini in hac vita optandum veritate atque expetendum magis? Solusne igitur mortalium, in hoc amplissimo conventu tam averſus a vero hodierna die inveniar, ut hæc actio mea, quam contra istos nunc habiturus sum, non tam contra ipsos, quam contra veritatem instituta a me atque adornata esse videatur? Ita me Deus adjuvet, Florentini, ut ego non contra veritatem pro istis, sed contra istos pro veritate verba hodie facturus sum. Hoc animo in hunc locum ascendi, ad hoc paratus meditatufque veni, hoc enitar, ut, si quo modo possim, hanc illis defensionem eripiam. Itaque ad hanc arcem, in quam se contulerunt, quamque munitissimam atque inexpugnabilem putant, totis viribus oppugnandam aggrediar, quam si Deo adjuvante ab eorum defensione dejecero, plane non video, quo confugere possint, seque aut sui defendendi, aut belli redintegrandi causa recipere. Attendite igitur, Florentini, & hoc etiam diligentius, quam hætenus fecistis, quia in hac una actione præteritarum actionum omnium ratio vertitur, ut si ego nunc superior evadam, causa mihi adjudicetur; si contra in-

fe.

ferior, victores isti ab hoc judicio absolutique discedant.

II. Ac primo quidem, quid ego nunc causæ esse dicam, aut suspicer, cur isti de veritate tantopere laborent. Quid? an veritatem ita desertam ab omnibus arbitrantur, ut nemo sit, qui præter ipsos ejus sibi patrocinium suscipiendum putet? Si ita esset, facile paterer, istos adeo de veritate anxios esse atque sollicitos. Sed non est, cur hac de re vehementius angantur. Nunquam veritati fautores, nunquam patrocinatores, nunquam laudatores deerunt. Quare non est, cur nova veritatis præconia excogitent, cur veritatem magnificandam verbis, cur extollendam laudibus, cur defendendam suscipiant. Satis ipsa per se sine cujusquam eloquentiæ præsidio & ornatur & defenditur. Quid igitur est, cur isti tam assidui in veritatis appellatione sint? cur tam crebri in ejus laudibus exaggerandis? cur tam solliciti in dignitate vindicanda? perinde quasi veritas unice ad eos pertineret; cæteri vero ab eadem, sive celebranda, sive ornanda, sive quoquo modo defendenda prohiberentur. Male metuo, ne dum, quod omnibus commune est, sibi proprium facere ac vindicare student, non tam ab istis aliqua licentiæ suæ quæsitæ defensio sit, quam nova cavillandi occasio captata esse videatur. Quare tanto acrius in istos inquirendum esse censeo, quanto subtiliori nos artificio decipere conantur atque pervertere.

Non

cem deferre , & ut vindicaretur vehementius instare non dubitavit . Hoc modo comperta improbi veteratoris fraude merito supplicio delator plectitur , qui ea ipsa via certius in suspicionem incurrit , qua ab eadem longius sibi declinare videbatur .

IV. Nunc , si nos , ut acuti Judices cum delatoribus , qui nimis assidui sunt ac vehementes , gerere cum istis voluerimus , & in illa ipsa indicia , quæ suspicionem videntur amoliri , acrius inquirere atque subtilius , quis tandem nostrum poterit consilium reprehendere ? Nam , iterum quæro , quid sibi volunt illæ laudes , quibus dignitatem isti veritatis atque præstantiam amplificant , tam crebræ , tam repetitæ , tam magnificæ , tam superlatæ in re per se clara atque illustri . Suscipite igitur personam illius Judicis , de quo dixi , & vos ipsi utrum hæc innocentia indicia habenda sint , an nova potius ab istis prodita veritatis argumenta , considerate . Intemperantiæ crimen eluere quærunt , & in hoc ipso intemperantes inveniuntur . Suspicionem a se omnem amovere contendunt , & suspicionem ipsam acrius commovent . Veritatis patrocinatores & videri & haberi volunt , & non solum novo eam more vehementius oppugnant , verum etiam se perfidiosos in hoc ipso & prævaricatores ostendunt . Sed moliantur licet quæ velint omnia ; Magna semper veritatis vis exsistit , quæ celari omnino non potest ; serius , ocius erumpit ultro ; sponte sua illustratur ; nec se obtegi mendacio ,
nec

nec ulla artificii simulatione ad diuturnum tempus obnubi patitur.

V. Quanquam quid est? quod novo nos isti pervertere artificio nunc meditentur, perinde quasi integra res esset, nec multo ante jam discussa ac dijudicata. Nam quid aliud ego hactenus egi, in quo vires omnes meas, ingenium, contentionemque consumpsi, in quo meam probari fidem volui, nisi vos ut docerem, non modo desertam ab istis & oppugnatam, sed proditam ac perditam veritatem. Aspiciant Romanæ Ecclesiæ Fastos, & tum mentionem facere audeant veritatis. Revocent in memoriam supra allatas opiniones æquitati ac rationi inimicas, & tum, si possunt, in munitissimam se recipiant veritatis arcem, quam propriis ipsi manibus evertere ac disturbare non dubitarunt. Reco-
lant animo, quæ superioribus persecuti sumus actionibus universa, bonorum omnium recte de Catholica Religione sentientium unanimi suffragatione damnata, & tum ad tribunal confugiant veritatis, quæ tantum abest, ut eos tueatur atque defendat, ut potius persequatur atque condemnet. Si crebra innocentiae appellatio apud severum ac constantem Judicem ad probandam innocentiam valeret, tum ipsa quoque veritatis appellatio aliquo modo istis suffragaretur. Sed contra est; immo vero si quid valet, in contrariam partem valet, & suspicionem ipsa, quam commovet, uti acriorem Judicem in

re indaganda facit, ita comperta fraude severiorem efficit in vindicando.

VI. At enim multa per Criticos veritati importata sunt commoda. Audio. Quid igitur? Equidem quæ via nunc ac ratio defensionis tentetur, plane non video. Aliud est multa commoda importata esse veritati per Criticos, quod ego quoque affirmo; aliud hæc ipsa commoda per immoderatos Criticos esse invec̃ta, quod ego inficior ac pernego. Non quæritur hic, quæ commoda moderati ac sapientes Critici attulerint, sed quæ isti incommoda importarint, investigatur. Non quomodo illi se erga veritatem gesserint, in quæstionem adducitur; sed quod isti eandem oppugnarint ac perdiderint accusatur. Non est igitur, cur se in alienis opibus ac copiis ostentent, qui summa domestica premuntur inopia. Non est cur aliena innocentia absolvi quærant, qui propriis criminibus condemnantur. Si quid volunt efficere defensionem a se veritatem ostendant, quomodo tutata ab aliis fuerit, parcant dicere; commoda per ipsos invec̃ta commemorent, per alios allata prætermittant. Ego quidem huiusmodi commoda neque reperi, neque reperio; neque vero satis assequi possum, quomodo ex pessima radice potuerit unquam boni aliquid pullulare.

VII. At verisimile non est in tanta pervestigatione rerum, quantam institutam ab istis fuisse ostendimus,
 ni

nihil ab iisdem commodi allatum esse veritati. Non committam, Florentini, ut in hac causa, quam pro veritate suscepi, quidquam a me contra ipsam veritatem aut dictum, aut negatum, aut tantummodo dissimulatum argui possit. Itaque fatebor id, quod est; neque inficiabor, nonnulla ab istis, quæ re ipsa vera essent, comperta; nonnulla item, quæ falsa & commentitia; fuisse deprehensa. Fieri enim non potuit, quin in tanta molitione, qua totam Historiam permiscuerunt, aliquid tandem veri forte fortuna ipsis vel non cogitantibus, vel aliud quærentibus fuerit oblatum. Hoc ego istis concedo, sed illud hic præcipue, opinor, quærendum, quæ allata dicuntur commoda, utrum maiorem commodi, an incommodi rationem habere existimanda sint.

VIII. Et sane, tantine fuit, ut aliquid veri deprehenderetur, tantam perniciem, quantam superioribus actionibus ostendimus, toti inferre Ecclesiasticæ Historiæ, tantam importare vastitatem? Quis unquam nobile ædificium funditus evertendum curavit, ut nescio quid ad antiquitatis notitiam pertinens, abditum in fundamentis ac depressum erueret? Quis collem frugiferis arboribus constitum & pulcherrime convestitum, excisis oleis, eradicatis vitibus, extirpatis arboribus, effodiendum sibi unquam subvertendumque censuit, ut minimam auri particulam in ejus forte visceribus retrusam ac latitantem acquireret? Profecto qui hæc faceret, pessime sibi, pessime rationibus suis consulere

existimaretur. Si quis vero se in rem ipsam altius insinua-
re vellet, illud apud se non sine causa statueret,
eum, qui se ita gessisset, non alicujus qualiscumque
notitiæ studiosum, aut auri fuisse cupidum, sed unam
& perdendi ædificii & subvertendi collis captare occa-
sionem voluisse. Multa prius, quam tale aliquid aggre-
diaris, sollerter examinanda sunt, habenda lucri, ha-
benda ratio detrimenti; utrum utri præstet, videndum
atque adeo providendum. Tu mihi nescio quam spem
lucelli offers, & latitantem in prædio meo thesaurum
ostentas; ast ego lucro isti tuo, & ostentato thesauro
inhians prædium amitto. Tu spem ostendis, & mihi,
quæ non spe, sed re teneo, aufers, & incerto objecto
lucro de certa possessione deturbas. Quæ est ista ampli-
ficandæ rei domesticæ ratio? quam perversa! quam
præpostera! quæ me bonis omnibus evertit atque ina-
nem spoliatumque dimittit. Tuam tibi istam habe ra-
tionem, a qua importatum detrimentum omni lucro
compendioque præstat.

IX. Simile ego quiddam & factitari ab istis, & facti-
tatum esse arguo & confirmo. Nam si omnia pensitare
voluerimus, atque inter se conferre, quæ consecuta sunt
damna, longe omni præstare lucro reperiemus. Sunt enim
quædam veritates, quæ non sine maximo detrimento, quod
compensari nullo modo potest, enunciantur; ut etiam
si probetur, aliquam, cujusque modi illa sit, inventam
ab istis veritatem, non tamen continuo absolvi debeant
ju-

judicioque liberari. Immo vero ex hoc ipso novum crimen nascitur, novam hinc ego in istos instauro accusationem, & multo acriorem quam antea & vehementiorem. Usque adeo ea profligatæ ac perditæ causæ ratio est, ut defendi nullo modo possit; &, quidquid dixeris, non illam meliorem dicendo facias, sed deteriorem efficias.

X. Et sane quam tandem cumque veritatem inveniri contigerit, eane statim ab istis in ora hominum, in vulgi sermonem erit adducenda? Quo jure? qua lege? quo instituto nostris id Criticis concessum erit atque permissum? Evanescente jampridem memoria, oblivione hominum, obliteratione monumentorum jacebant in tenebris quædam sepulta sic, sperari ut posset, numquam fore, ut emergerent & publica luce donarentur. Quid? tu permagnum aliquid, qui tibi de una veritate laborandum esse putas, te præstitisse arbitrare, si ea non sine gravi hominum offensione & querela e tenebris in lucem proferenda, atque in vulgus efferenda curaveris? quæ damnare tenebris, si lucem aspicerent; quæ silentio premere, si ore hominum jactarentur; oblivioni, si nota essent, mandare oporteret, ea tu nescio quo e labitulo, ubi abscondebantur, expromes? tu situm, quo obsita erant, absterges? tu eorum evanescentem memoriam renovabis? tu evulgare? tu spargere? tu disseminare audebis? Et hoc studium veritatis erit? hoc susceptum veritatis patrocinium?

XI. At vera sunt. Quis negat? quis contradicit? Vera quidem; sed cum ingenti probro, sed cum insigni contumelia, sed gravi cum invidia, sed iusta cum hominum offensione conjuncta. Nihilne intererit inter hanc & illam veritatem, ut veritas omnis libere sit atque indiscriminatim evulganda? Velint isti nolint, aliquod & ingens illud quidem intersit discrimen necesse est. Multa, quandiu occulta sunt, tandiu magno studio tegenda; si forte eruperint, quantum fieri potest excusanda, extenuanda verbis; non, quod isti faciunt, amplificanda; *scandala* denique, quæ plerunque ex eorundem evulgatione & jactatione consequuntur, omnimodis antevertenda. Quo loco non possum non reprehendere morem illum, qui jam invaluit hæc, aut harum similes controversias cum populo communicandi. Nam quid attinet ea, quæ jactari inter eruditos sine offensione fortasse possent, siquidem latina lingua scriberentur, vernaculo sermone efferre, quo de iis infimi opifices doceantur, & ipsæ etiam mulierculæ disceptare possint; itaque pessimo exemplo ad hujusmodi disputationum genus traductæ a lana & colu avocentur? Quæ est ista ratio? quod consilium? quis huic rei propositus finis? nisi more turbulento multa moliri, quibus proposito aliquo bono, sive potius specie dumtaxat aliqua boni, certissima mala hominibus minime malis inferantur.

XII. Nam quid hic dicendum de quibusdam nomi-

minatim opinionibus arbitrabimur ? quas ego quidem hominem probum ac sapientem ajo & contendo vereri oportere . Sunt enim populares quædam piæ ac religiosæ persuasiones hominum animis altius infixæ , quæ tametsi ex errore vulgi interdum prognatæ sint , dici tamen non potest , quantum inde boni , nullo admixto malo , & vel ipso mali secluso periculo , percipiatur ; quas si sustuleris , incredibiliter animi hominum præsertim imperitorum commoventur . Hasne etiam isti corrigendas auferendasque existimabunt ? nullo proposito bono , & certissimo consequente damno , una impotenti atque effrænata incitati evulgandæ veritatis libidine . At rudis vulgi & imperitorum hominum , qui fere istiusmodi rebus offenduntur , habenda ratio non est . Itane vero ? præ sua cupiditate isti nihil pensi ducent aliis offendiculo esse ? Sit rude vulgus ; sint homines imperiti . Quid inde ? Immo vero hac ipsa de causa ipsis indulgendum est etiam magis , nec culpa nostra committendum , ut ullum in discrimen adducantur . At Critici agitur existimatio . Agatur licet . Quid ? communi periculo suam mihi Criticus privatam tutabitur existimationem ? Ego quidem parco ejus dignitati , parco cujusque existimationi ; nemini vim assero ; quominus his in rebus hoc aut illud credat , non impedio ; sed dico , parcendum etiam imperitis hominibus , parcendum rudi vulgo ; commune periculum negligendum nullo modo , nec inferius cu-

jus-

jusquam existimatione ac dignitate esse existimandum .

XIII. Erroribus igitur impune erit? impune sit , per me licet ; si sint omnino innoxii , & quod non raro accidit , etiam salutare . Sunt enim errores quidam , qui non modo non imperitum hominem , sed ne sapientem quidem virum dedecent . Audiatur Tullianus ille Cato , qui , cum multa pro animorum immortalitate egregie dideruiſſet , illa subtexit ; *Quod si in hoc erro , quod animos hominum immortales esse credam , lubenter erro , nec mihi hinc errorem , quo delector , dum vivo , extorquere volo .* Hæc ille , & graviter & sapienter . Non errabat ille quidem re ipsa , sed quem opinioni suæ errorem subesse posse suspicabatur , cum ipsum errorem ornare non dubitavit . Potest igitur aliquis error esse , cujus nos non pudeat , qui nos delectet , & sine ulla credulitatis nota delectet . Errare possumus , sed si error noster in re aut per se utili , aut certe innoxia versetur , non est , cur tantopere ab errandi periculo refugiamus , ut in hoc uno & dignitatem agi nostram & existimationem putemus .

XIV. Verum ne isti me tanquam & osorem veritatis , & errorum ac falsitatis patrocinatorem criminentur , volo ego etiam errores extirpari , volo profigari , tolli funditus volo ; sed eos præcipue ac vero ante omnes , & extirpari , & profigari , & tolli errores volo , qui certissimi errores sunt , de quibus nulla potest esse controversia , qui nos delectare non possunt , qui nullo

nullo modo nos decent , & quos Catholicus quisque veram professus Religionem odisse maxime debet atque abominari . Horum porro errorum parvane pullulat ubique sylva ? parumne crescit quotidie magis ad Catholicæ Religionis perniciem , & ad interitum animorum sempiternum ? Proveniunt novi Philosophi , qui ita appellari se volunt , non quia sapientiam amant , sed quia liberrimam opinandi licentiam sibi propemodum concessam putant . Cuduntur nova systemata , non ea quidem sive ad terræ motum conversionemque spectantia , sive ad aliud simile quiddam , quod parum refert , quemadmodum constituatur , sed ad ipsam labefactandam Religionem convellendamque pertinentia . Pestiferi nunc tota Europa disseminantur libelli , quibus id agitur , non ut jam Catholica solum , sed omnis omnino de medio Religio tollatur . Hi certe errores sunt , & quidem maxime noxii & capitales , in quibus extirpandis istorum probari maxime deberet industria , & veritatis amor enitere , si re ipsa & veritatem amarent , & errores averfarentur .

XV. Nam quid magis verum , quam quod Catholico *dogmate* continetur ? quid magis falsum , quam quod eidem adversatur ? Quis error reperietur ? qui sit cum his , qui Catholicæ veritati opponuntur , & exitiali indole , & damno , quod important , gravissimo & maximo comparandus . Quid ? Tu hos errores negliges ? tu eos impune serpere ? tu crescere ? tu diffundi in immensum

sum patieris ? nec tanto malo , quantum re ipsa pariunt , commovebere ? Interea vero mihi palabere ludi- bundus , & falsas quasdam vulgi opiniones minime no- xias , & nonnunquam , ut antea dixi , etiam salutare persequeris ? Ita ne vero ? Illis prætermiſſis , quæ sibi præcipuam boni Critici curam & diligentiam vindicare deberent , eo , quo minime necesse est , cura omnis at- que diligentia detorquebitur ? Pestifera lues invalescit , non moveris ; multi miserabiliter pereunt , illorum ja- ctura non afficeris ; damna gravissima consequuntur , his non tangeris ; Religio in discrimen adducitur , fe- des , dissimulas , tacet , non exurgis , non instas , non insequeris , non perseveras ; & falsas tantum imperitæ multitudinis persuasiones consecraris ? turbas excitas ? tricas seris ? Quid hoc est ? amore veritatis ? studium- ne communis boni ac salutis ? Consiliumne extirpan- dorum errorum ? An nova potius inventa & inuenta ratio , qua veris & certissimis erroribus impune sit , iidemque ad commune damnum atque perniciem libe- rius licentiusque grassentur .

XVI. Non ita profecto se se gesserunt duo sanctissimi ac sapientissimi viri , & in arte Critica facile principes , qui , ut vere amabant veritatem , & non simulate er- rores oderant , sic & illam defendendam , & hos ex- stirpandos esse duxerunt ; nihil ut sibi neque studii , neque curæ , neque contentionis reliqui fecerint , quod totum hoc in negotio non impenderint . Errores , qui illis tem-

temporibus, quibus hi floruerunt, longe lateque cum summa Catholicæ Religionis perniciæ, & maximo animorum damno diffundebantur, & ingenio, quo valebant, summo, & exquisita, qua præstabant, eruditione coarguendos refellendosque suscepunt. Diverſa quidem progressi sunt via, sed eodem cura omnis conversa laboreque collatus, ut singulari ac manifestæ supremi numinis providentiæ tribuendum sit, duos a Deo eodem tempore Ecclesiæ suæ datos atque oblatos viros, Robertum Bellarminum & Cæsarem Baronium, qui Catholicæ veritatis causam contra acerrimos adversarios conjunctis viribus defenderent ac tutarentur, & vero etiam de ejusdem hostibus insignem triumphum reportarent.

XVII. Cur igitur isti, qui se tantopere erroribus insensos & veritatis studiosos jactant, tantorum virorum præclara exempla non renovant? cur non eorum imitandam sibi proponunt industriam, laborem, assiduitatem? cur studium defendendæ veræ Religionis, certissimis & nocentissimis erroribus profligandis extirpandisque non æmulantur? Nunquam certe major offerri istis oportunitas poterit, si hæc negligatur, quæ nunc ab hominibus non tam Religioni, quam ipsi humanitati insensis atque inimicis offertur? Quanquam, quid est quod plura disputem? Non, non inquam hoc studium, mihi credite Florentini, non hic amor est veritatis; sed impotens quædam atque immoderata opinandi cupido, quæ modum nescit, quæ certis se circumſcribi limitibus non pa-

patitur , & effrenatæ cuidam licentiæ veritatis amorem improba simulatione prætendit .

XVIII. Sed noli agere cum istis , dicet fortasse quispiam , isto modo . Remitte parumper de tanta severitate . Si veritatem , quæ tandem cumque illa fuerit , re ipsa sibi investigandam proposuerint , illis impune sit . Ita faciam . Non amplius quæram , propugnarentne veritatem , an oppugnarint ; erexerint , an affligerint ; tutati sint , an perdiderint ; hæc aut illa veritas enunciantane ab ipsis fuerit , an silentio premenda ; utrum similiter certi errores extirpandi sint , an illis prope impunitas concedenda , non inquiram . Hæc omnia istis largiar , & condonabo . Quid vero ? si his etiam omnibus de mea accusatione præcisus , doceo ; quid ? si planum facio , istos , cum id serio agere videntur , ut veritatem quærant , non re ipsa veritatem quærere , sed simulatione veritatis eo rem omnem adducere conari , nihil ut amplius veri , nihil rati , nihil certi sit ? Eritne , cur adhuc quisquam dubitet , istos non veritatem re ipsa quærere , sed obtentu ac specie veritatis illudendi occasionem captare ?

XIX. Egregiæ , ut cætera , Lactantius Divin. Instit. lib. VII. cap. VIII. *Dum isti contradicendi studio insaniunt , dum sua etiam falsa defendunt , aliorum etiam vera subvertunt , non tantum elapsa illis veritas est , quam se quærere simulabant , sed ipsi eam potissimum suo vitio perdiderunt .* Sed tamen , si quemadmodum constituimus ,
ver-

veritatem aliquo modo quærerent, iis aliquo modo posset ignosci. Verum sic pro certo habetote; Istos obtentu veritatis, non veritatem quærere; sed, si quid quærunt, evidentiam quærere, quæ cum nonnisi rarissime & certis tantum in rebus haberi possit, veritatem minime quærere manifeste convincuntur. Non quia evidentia veritas non sit; sed quia hujusmodi est, ut, si eam unam in inquirendo consecrari velimus, de veritate ipsa, quandoquidem plerisque in rebus evidentiam assequi non possumus, necessario desperare cogamur. De rebus a nostra memoria remotis perinde disquisitionem instituunt, ac si de recentibus ageretur. Perinde testimonia postulant, & testes flagitant, ac si viverent, aut excitari ab inferis & possent & deberent. At communis persuasio atque auctoritas rem docet atque evincit, ut prudenter de ea dubitari non possit. Nihil minus invicti ac pugnaces resistunt; non moventur persuasione communi, non auctoritati acquiescunt. Nisi res evidenter demonstretur, placari nullo modo possunt ac persuaderi. Una ab istis extorquet assensum evidentia; huic uni dant manus; ab hac una vinci se ac convinci patiuntur. At his in rebus haberi evidentia non potest. Neque nos committere possumus, ut scientes ac volentes in errorem inducamur. At hic error non est, & prudenter res creditur; error fortasse suberit, sed ei non adscribendus, qui prudenter se gerat, & *moralis* quam dicunt *certitudini* acquiescat. Optandam quis neget in omnibus evidentiam?

tiam? Sed quando ne in iis quidem rebus, in quibus maxime expetenda (a) esset, eam habere non possumus, quid est, quamobrem *moralem* ultra *certitudinem* votis nostris progrediamur?

XX. Fateor ingenue, Florentini, quemadmodum in superioribus actionibus impotens illa opinandi licentia me vehementer excruciauit; ita me nunc nimia ista veritatis atque adeo evidentiz cupiditas multo sane vehementius angit

(a) Præclare omnino S. Augustinus in hanc sententiam *de Utilitate credendi* ad Honoratum eap. 12. „ Quæro enim, si quod nescitur credendum non est, quomodo serviant parentibus liberi, eosque mutua pietate diligant, dum parentes suos esse non credant? Non enim ratione ullo pacto sciri potest, sed interposita matris auctoritate de patre creditur: de ipsa vero matre plerunque nec matri, sed obstrictibus, nutricibus, famulis. Nam cui furari filius potest, aliusque supponi, nonne potest decepta decipere? Credimus tamen, & sine ulla dubitatione credimus, quod sciri non posse confitemur. Quis enim non videat, pietatem, nisi ita sit, sanctissimum generis humani vinculum superbissimo scelere violari? Nam quis vel insanus eum culpandum putet, qui eis officia debita impenderit, quos parentes esse crediderit, etiamsi non essent?

„ Quis contra non exterminandum judicaverit, qui veros sortasse parentes minime dilexerit, dum ne falsos diligat metuit? Multa possunt afferri, quibus ostendatur, nihil omnino humanæ societatis incolume remanere, si nihil credere statuerimus, quod non possumus tenere perceptum „. Hactenus Augustinus, qui de se ipso narrat, cum se adolescens in disciplinam quibusdam Magistris tradidisset, qui „ apertum & sincerum verum venditantes ineffabilia veritatis penetralia metiri se posse arbitrabantur „, in Manichæorum Hæresim incidit. Facile enim, eodem affirmante, evenit, ut in hæc corporalia progressi ac prolapsi, nihil aliud putemus esse, quam quod istis quinque notissimis nunciis corporis sentimus, quasque ab his plagas atque imagines acceperimus, eas omnino, etiam cum conabimur recedere a sensibus, volamus „.

angit atque conturbat. Quid enim tam verum, quam Fides Catholica? quid autem isti vero tam inimicum, quam evidentia? Quid certius tenere debemus, quam quod nobis credendum Ecclesia proponit? quid autem minus ausu temerario investigandum discutiendumque? Jam vero si nos immoderata ista veri cupiditate abripi sinemus, quo demum deduci possimus, & videre vos arbitror, & luctuosa nimis, ac pervulgata fatis multorum sapientum eruditissimorumque virorum exempla declarant; qui hac ipsa via, quam insliterunt, ut specie veritatis decepti evidentiam consecrarentur, sibi que res demonstrari vellent, in certissimos errores prolapsi sunt. Miseri enim vero ac plane miserandi, quod veritatem secuti, & multis in rebus consecuti, in re autem majoris momenti, & quam unam maxime debebant expectere, contempta Ecclesiæ Catholicæ auctoritate, quæ sola veritatis certissima Magistra est, non sunt assecuti. Quæramus igitur veritatem, sed eam consilio, ratione, moderatione adhibita quæramus; & ea, quam citra periculum acquirere possumus, veritate contenti simus. Res, quæ discutienda proponitur, veritati modum faciat; nec ultra, quam res ipsa patitur, & certa quædam præscriptio finit, progredi quærendo investigandoque velimus.

XXI. Hæc sunt, quæ de tota artis Criticæ ratione ex hoc loco dicenda existimavi; nec dubito, quin quibus benevolis Auditoribus usus sum, iisdem æquis Ju-

dicibus utar. Quid restat, nisi ut vos orem obtesterque, ut istorum coercere licentiam, & Religionis patrocini-
 nium, quæ hoc intemperantioris Criticæ genere sum-
 mum in discrimen adducitur, mecum una suscipere ve-
 litis. Observatum jam pridem ab eruditis & sollertibus
 viris fuit, eodem tempore & intemperans hoc Criticæ ge-
 nus, & Hæreses illas, quæ duobus ab hinc sæculis om-
 nem, non Ecclesiæ solum, sed totius etiam Europæ
 statum miserandum in modum conturbarunt, eodem, in-
 quam; tempore ad Religionis ac publicæ tranquillitatis
 exitium erupisse. Institutum tunc primum examen a-
 cerrimum in Patres fuit, in traditiones, in ritus, in Eccle-
 siæ disciplinam. Clamatum & vehementissime reclama-
 tum a totius Antiquitatis judicio; appellatum ad Con-
 cilia, quorum auctoritas respuebatur. Jactatæ fuerunt
 illæ voces in vulgus ac latissime disseminatæ; Eccle-
 siam Christi sponsam immaculatam contraxisse rugas,
 a pristina forma ac venustate defecisse; eam proinde in
 amissi decoris speciem restitui ac vindicari oportere.
 Omnia tunc inconditis hisce vocibus referta sunt; his fo-
 ra, theatra, porticus, compita, domus, tabernæ ipsæ per-
 sonabant. *Reformatio* non petita solum, sed conviciis et-
 iam efflagitata. Jam tantus tantarum rerum apparatus,
 tanta molitio, tot voces, clamores, vociferationes quorsum
 reciderint, scimus omnes, & quorsum illa ipsa tantopere
 efflagitata *reformatio* evaserit, non ignoramus. Excitatum
 fuit incendium, quod totam pene corripuit Europam,
 cu-

cujus nondum flammæ reslingæ sunt, neque fortasse, nisi pro sua bonitate errantium Fratrum, & a Catholica veritate dissidentium tandem aliquando Deus misereatur, in posterum omnino reslinguentur. Doluimus, & dolemus adhuc tot filios e Matris amantissimæ sinu avulsos & miserabiliter abstractos, tot nobilissimas nationes a communione Catholica segregatas, tot florentissimas Ecclesias prorsus everfas, damna denique innumeralia per luctuosissimam tot regnorum ac provinciarum a Romana Fide defectionem importata lugubri lamentatione prosequimur,

XXII. Conferte nunc, si placet, prisca illa tempora cum nostris. Non minus nunc, quam olim ad Criticæ tribunal citati Patres, Scriptores, Antiquitas tota. Omnia ad severissimum examen revocantur; infinitæ disquisitiones instituuntur; suspiciones de quaque re ac dubitationes sine numero commoventur. Receditur facile a veterum sententiis, & ad recentiorum placita non minus facile acceditur. Nova opinionum portenta proferuntur in lucem, & ea tanquam saniori Criticæ magis conformia & prædicantur & propugnantur. Nunc etiam, si unquam alias, in corruptos in mores vehementer declamatur, qui olim fortasse, quam nunc sunt, corruptiores exstiterunt. Charitas nunc maxime extollitur, & præclara de eadem præcepta traduntur; an vero præcepta cum factis concordent, vobis dijudicandum relinquo. Nunc sæculum hoc nostrum

nova luce illustratum jactatur, perinde quasi præterita sæcula in tenebris jacuissent; an vero tanta lux nostro huic sæculo re ipsa affulserit, hoc quoque judicio vestro constituendum permitto. Illud denique, quod conjici ex illo, quem jam descripsi rerum apparatu potuit, an conjici nunc etiam ex tanta intemperantia similiter possit, ego vero non dicam, nec tantam comparari, quam Deus avertat, perniciem ominabor. Timorem mihi unice reservabo, qui justa de causa susceptus salutaris est, qui instans malum avertit, quod improviso si adsit, statim opprimit, nec ullum consilio fere ac remedio locum relinquit.

XXIII. At enim hoc est nimiam in invidiam artem criticam adducere, & tanquam præteritorum atque instantium malorum originem criminari. Ego vero artem criticam nec criminor, nec criminatus sum, neque vero in invidiam adduxi; sed pravam tantum atque immoderatum ejusdem artis usum reprehendi. Pravus autem artis usus non ipsius artis vitium est, sed eorum, qui arte per summam nequitiam abutuntur. Sola virtus est, ut recte affirmat Aristoteles, qua male uti nemo potest. Cæterum quod de arte critica dixi, commune est omnibus artibus ac facultatibus, quæ per se bonæ sunt, & non culpa sua, sed suorum improbitate cultorum in invidiam sæpe adducuntur. Neque vero ab hoc numero artem hanc ipsam meam, quam profiteor, excipio. Multa, eaque gravissima incommoda per homi-

mines eloquentes rebus importata publicis quis nescit ? Illorum ipsorum bene multi , qui fatali illo paullo ante commemorato sæculo ab Ecclesia Catholica desciverunt , & pessimam illam causam adjuvarunt , & doctos Rhetores , & disertos Oratores , & egregios Poetas , & præstantes Grammaticos fuisse confiteor ; quod cum ingenue affirmo , non equidem puto , me arti meæ maledicere . Dico id, quod est , quod dissimulari non potest . Nemo igitur me quasi arti criticæ inimicum criminari meditetur , qui non artem criticam damnavi , sed prævum tantum atque immoderatum ejusdem artis usum condemnavi . Dico tamen , inter hanc & alias liberales artes hoc interesse discriminis, ut majus ab hac, quam a reliquis, & certius periculum immineat . Lubrica enim per se est , & nisi summa moderatione quis utatur , ea facile abutetur . Pro natura atque indole sua nescio quos cultoribus suis spiritus insinuat , quibus , nisi acriter obstitamus , facile abripimur , & de recto moderationis tramite deducimur . De reliquo Ars Critica bona est , utilis est , necessaria est ; addo etiam ad majorem insignioremque commendationem , salutaris est .

XXIV. Nec vero illud mihi vere obijci potest ; Me omnem dubitationem de medio sustulisse , & ineptam quandam ac stolidam credulitatem invexisse ; nisi forte quæ a me dicta sunt perversum in sensum detorqueantur . Non ego dubitationem omnem de medio sustuli , neque stolidam credulitatem invexi , qui istos non

eo nomine redarguerim , quod omnia non credant , sed quod pene nihil credant . Aliud est nihil credere , aliud nihil non credere . Fateor , in Historia præsertim , aliqua nonnunquam occurrere, quæ aut minus credibilia, aut aperte falsa , aut certe suspiciosa sunt . Si minus credibilia , repudientur , si aperte falsa, reiiciantur , si suspiciosa, examinentur . Nego, quodcunque a quo tandem cumque oblatum fuerit nullo discrimine arripiendum;nego,omnia omnibus vulgo esse credenda . Dico , explorandam esse Scriptorum fidem, excutiendam diligentiam, perpendas rationes,nihil denique non summa cura studioque ponderandum . Hoc diligentia ac sagacitate conari , prudentia ac iudicio consequi , boni Critici munus esse dico . Verum nihil ferme esse , quod istis credibile videatur , nullum afferri posse testimonium , quod non infringant , nullam prope auctorem inveniri , cuius fidem non elevent , nullam tantam auctorum ipsorum reperiri consensionem , cui repugnare non audeant , dixi , & iterum dico,hoc omnino non esse ferendum; quod qui dicit , non omnem dubitationem de medio tollit , sed certum in dubitando modum constituit . Dubitent isti per me licet , sed sciant , neque semper dubitare sapientes , neque solos dubitare . Dubitant etiam imperiti ; sed diverso valde modo hi atque illi dubitant . Sapientes nonnisi iusta de causa atque probabili ; contra stulti modo iniqua , modo levi , sæpe nulla .

XXV. Quid vero ? si isti non solum aliqua de re du-

dubitare velint, sed etiam de ea multo aliter, atque omnes existimarint, sentire? hocne iis per nos concessum erit atque permissum? Concessum quidem, si gravissima aliqua ac manifesta ratio contrarium suadeat atque adeo persuadeat. Hæc autem si desit, me auctore communem consensum nunquam non magni facient, neque facile ab eo recedent. Sin autem de vetusta traditione aliqua, pia præsertim ac religiosa; aut de aliqua a plerisque sanctis Patribus recepta opinione agatur, tunc multo cautius procedendum esse affirmo, & nisi ea vis adigat, cui oblucri non possimus, iis omnino adhærendum esse confirmo. Patres enim apud Catholicos eo jure sunt, & esse debent, ut si fere omnes in unam aliquam sententiam ierint, discessione facta, existimandus sit omnis omnino sublatus intercessionis locus. Hæc ego dixi, & nihil amplius dixi, & de loco super dixi, & palam dixi, & omnibus audientibus dixi. Hæc probare vobis conatus sum, quæ æquissima mihi videntur, & quæ nemo, qui recto judicio utatur, jure improbare possit ac reprehendere.

XXVI. Quapropter si quis forte mihi respondere velit, cui certe ego nihil neque excusandi, neque defendendi, neque refellendi causa, nec verbo; nec scripto reponam, præcidat illa, quæ ad rem non pertinent. Locos illos Rhetoricos generales atque communes, qui incircumscripte tractari solent, ne adeat, quos mihi æque, atque illi, ex longo artis, quam

profiteor usu, esse cognitos facile sibi persuadere poterit. Parcat dicere, me eam suscepisse causam, quæ agi sine invidia non poterat; exaggerasse calamitatem temporum; intemperantiam opinandi, Criticorum licentiam majorem, quam re ipsa sit, dicendo effecisse. Abstineat item ea colligere, quæ fortasse aut asperius, aut vehementius, aut minus vere dicta videri possunt, si avulsa a reliquis, quæ fere dictorum ac sententiarum aut asperitatem mitigant, aut vim emolliunt, aut veritatem adstruunt, proponantur. Multa, quæ quamque rem circumstant adjuncta, rem ipsam vel excusant, vel minuunt, vel augent, vel defendunt, a quibus si distra-ctum quid sit, juste reprehenditur. Hæc aliaque hujusmodi, quibus fere constat invidia, & imperitorum animi commoveri solent, amputet atque præcidat.

XXVII. Itaque si quid, quod ad infringendam accusationem pertineat, dicere quis velit, hæc dicat. Me impudenter esse mentitum, qui hanc vel illam opinionem huic vel illi auctori, cujus apud eum ne vestigium quidem ullum exstet, affinxerim; hujusmodi opinionum monstra a me temere fuisse excogitata, & unice calumniandi causa conficta; nemini ne in mentem quidem venisse ita opinari, ut ego criminatus sum; nunquam tantam temperantiam esse adhibitam in ferendo de rebus judicio, quanta nunc passim & vulgo ab omnibus Criticis adhibetur; nonnulla quidem in dubium fuisse adducta, sed non levibus, ut a me objectum fuit, rationibus, non vanis fu-

futilibusque indiciis , non inanibus conjecturis , sed gravissimis certissimisque de causis ; neglectam aliquando auctoritatem , sed ita , ut fieri aliter invictissimis cogentibus argumentis non potuerit ; de reliquo nunquam præstitam sanctis Patribus majorem , quam ætate hac nostra , observantiam ; nunquam consentientibus eorum sententiis minus refragatum ; nunquam majus delatum venerandæ Antiquitati obsequium ; nunquam majorem habitam Ecclesiæ judiciis reverentiam ; nunquam minus adductam in discrimen Religionem ; nunquam libellos minus exitiales tota Europæ disseminatos ; nunquam mores fuisse tam castos atque incorruptos ; nunquam generatim atque universe pietatem impensius cultam . Nullum ex opinandi licentia , siqua forte hoc tempore invaluerit , esse periculum , quod immineat ; nullum damnum , quod instet ; nihil metuendum rebus publicis , nihil privatis , nihil otio communi , nihil tranquillitati , nihil Ecclesiæ , nihil Catholicæ Religioni ; nihil formidandum , cui occurri debeat ; nihil triste , quod præcavendum sit , quod possit accidere ; vanos esse timores meos , inanem formidinem ; tristitia me esse ominatum , quorum ne minima quidem apparent initia ; me hostem sinxisse , quem ferirem , qui re ipsa nullus esset ; paucis , me inaniter declamasse , vocem , spiritum , contentionem sine causa profudisse . Hæc dicat ; quæ si dicet , tenebitur ; sin alia dicet , ea , quæ a me dicta sunt , non refutabit .



DE RECTO
ARTIS CRITICÆ
 U S U
 AD FLORENTINOS.

ORATIO SINGULARIS.



NAVIGAVIMUS tandem aliquando ,
 Florentini , atque e vadis utcumque
 emerſit , & ſcopulos præterveſta
 eſt Oratio . Nunc reliquus mihi cur-
 ſus multo facilior atque expeditior
 oſtenditur , quem Deo adjuvante con-
 ficiam , ſi pauca quædam de eo , quod tertium in par-
 titione poſui , dicam , & quam breviffime potero ,
 explicavero . Dicturus igitur de recto Artis Criticæ
 uſu non hic ego ſingula hujus artis præcepta expo-
 nenda ſuſcipiam , quod nimis longum eſſet , & for-
 taſſe ſupervacaneum ; ſed ita mihi met moderabor ,
 ut

ut & brevitati studeam, & nihil eorum, quæ hoc in argumento præcipue videntur esse animadvertenda, prætermittam. Quare, singularibus artis criticæ præceptis de oratione mea præcis, rem ab ipso capite ac fonte arcessam, unde & quid rectus artis criticæ usus postulet, patebit, & simul ostendetur, quid ejusdem artis cultores spectare maxime debeant, ut eum finem, qui a sapientissimis viris nobilissimæ atque utilissimæ arti constitutus est, ulla sine offensione consequantur. Ita fiet, ut & ego compendia quærens citius, quo contendo, perveniam, & Criticus, quid sequi, quid cavere debeat, certius uno prope obtutu atque exploratius intueatur. Utar etiam quietiore stylo, tum quia vehementiorem, quo hætenus usus sum, res ipsa non flagitat; tum etiam ut, si quid in hoc genere forte peccatum a me fuerit, hoc pacto, si quo modo possim, corrigam atque emendem. Quanquam peccati hujus culpam, si culpa hæc dicenda est, materies ipsa sustinet, quæ sine concitatione animi tractari non poterat; nec vero non eandem tum & voluntas juvandi alios in re gravissima maximique momenti, tum etiam studium defendendæ præsertim Catholicæ Religionis probabiliter excusat. Non igitur hic amplius vos conquestionibus querimoniisque fatigabo. Satis jam dolori meo parui; satis ægritudini obsecutus sum; satis, quæ volebam, ex intimo & sincero animi mei sensu deprompta vobiscum communicavi. Neque vero amplius in refellendis Ad-
ver-

versariis, in eorumque castiganda licentia immorabor. Omnia quieto, pacato, ac tranquillo animo agentur. Revertar ad ingenium meum, quod ab omni asperitate, quemadmodum a principio significavi, abhorret, & non nisi coactum ad vim, ad contentionem, ad simulates adducitur. Vos attendite diligenter, Florentini, & me contento cursu ad exitum properantem benevolentia vestra atque humanitate; qua semper me persecuti estis, postremo hac etiam vice prosequimini.

II. Artem Criticam utilem esse ac necessariam ii soli negare possunt, qui, quid ea sit, ignorant. Hæc ars nunquam non multum valuit; hæc in omni disciplinarum ac facultatum genere præcipue dominata est; semperque, quoad bonæ artes excoluntur atque vigeant, dominabitur. Hac arte sapientissimi quique viri plurimum usi sunt, eamque studiorum suorum comitem atque adjutricem esse voluerunt, quippe qui probe intelligerent nihil sine ea laude dignum vel conari se vel efficere posse. Quare qui artem criticam de medio tolleret, perinde faceret, ac si erranti in tenebris facem eriperet, aut in difficili scopulosoque mari deprehenso nauticum clavum subduceret, quibus præsidiiis ambo destituti, nec tutum ille tenere iter posset, nec iste declinare a scopulis, & feliciter enavigare. Quid enim ars critica est, nisi, ut eam jam inde ab initio definivimus, rectum de quaque re certumque iudicium, quo qui sapienter usi sunt, non solum vera a falsis fecerere,

nere, sed ea etiam, quæ in quaque re optima sunt, distinguere atque eligere potuerunt. Quapropter ego quidem arbitror rectum hoc, de quo dico, iudicium partem quandam esse prudentiæ, quæ sicuti virtutes omnes temperat atque dirigit, ita illud omnia recta studia gubernat ac moderatur. Quanquam hoc iudicium non tam partem prudentiæ, quam ipsam reor esse prudentiam; quod quidem, si ad rerum gerendarum rationem referatur, proprio prudentiæ nomine appelletur; si vero ad studia nostra moderanda dirigatur non prudentiæ, sed artis criticæ vocabulo indicetur. His de causis ars critica non recens quoddam inventum habenda est, sed longe antiquissima existimanda, & una cum ipsis liberalibus artibus nata atque adulta, & ad summum etiam culmen a veteribus illis ingeniosissimis viris doctissimisque provecta.

III. Et sane quotiescumque præclara Veterum opera in manus sumo, in eaque mentis obtutum intentius desigo, facere non possum, quin summam illis in arte critica præstantiam deferam atque concedam. Quis enim, exempli causa, Homeri libros cum legit, non admiratur tanti viri acerrimum in rebus omnibus subtilissimumque iudicium. Quod si Homeri libri, ut litterarum monumentis proditum est, nescio cujus ministerio indiguerunt, qui eos antea confusos ita, ut nunc habemus, digereret atque disponderet, unum de duobus necessario debet affirmari, aut Homero artem criticam de-

defuisse, quod minime in tantam sapientiam cadere posse existimo, aut ipsius libros, quod ego veritati magis puto consentaneum, in manus inepti alicujus venisse, qui, artis criticæ præsidio destitutus, exinium illud opus perverteret, & præpostera librorum dispositione confunderet. Quid vero alter ille ab Homero diverso in doctrinæ genere laudatissimus, & totius Græciæ judicio sapientissimus habitus Plato? Nonne qui Socraticos ejus libros legit, omnia non solum plena sapientiæ, sed etiam judicii, consilii, prudentiæ referta offendit? Quam leniter in disputationem delabatur! ut in eam non iruisse, sed incurrisse videatur; quam sollerter captat principia, ut non quæsitæ, sed sponte oblata appareant. Quid? cum inducto sermone, & re, de qua agendum est, constituta, sensim, & per quosdam veluti gradus eo, quo intendit, quam mollissime devenit, ac demum, quod docendum erat, quam planissime demonstrat. Hæc porro non solum sine maximo ingenio, sed etiam sine hac ipsa arte, de qua loquimur, effici profecto ac perfici non potuerunt.

IV Nam quid de Latinorum Oratorum principe dicam? viro tam ingenioso, tam acuto, tam acri, tam eloquenti. An eum artem criticam cum in omnibus studiis suis, tum in illa ipsa arte, in qua maxime excellit, defecisse existimabimus? Itaque quod blande in Judicum animos illabatur, quod eos omni, qua vult, ratione tractat ac flectit, judicium est; quod ex omni par-

parte causæ tectus ac septus adversariorum impetum sustinet, conatus eludit, judicium est; quod eos, ubi res poscit, minaciter terret, ferociter insectatur, invicte repellit, judicium est. Cum vero firmissimis præfidiis, causam communem suam, cum in causa hæret, nec se loco, quem omnium tutissimum insedit, dimoveri patitur, judicio profecto utitur; quod quidem si ei detraxeris, continuo laudem omnem, & illam ipsam oratoriam, qua unus omnibus maxime præcelluit, ademeris; si vero judicium dederis, necessario etiam summam artis criticæ scientiam concesseris. Quæ quidem scientia in primis concedenda est sapientissimis illis sanctissimisque Ecclesiæ Patribus; neque enim sine arte critica tot præclara ingenii & doctrinæ monumenta reliquissent. Teneamus igitur, artem criticam, uti omnibus rectissimis studiis maxime necessariam, ita ab omnibus doctissimis, quos Antiquitas suscepit, viris fuisse semper adhibitam. Hæc ipsa tanquam veritatis arbitra, & rerum omnium certissima disceptatrix semper assedit, semper affuit, eos nunquam destituit; omnia eorum optima studia nunquam non rexit ac temperavit.

V. Non defuerunt quidem ætate hac nostra, qui novam veluti quandam artem criticam coagmentandam susceperunt, qua docemur vera a falsis, in Historia præsertim, distinguere, & ad Historiam ipsam sine offensione perlustrandam erudimur. Quorum ego, et-
si

si alios juvandi studium summopere laudo; consilium tamen satis non assequor. Nam vera a falsis distinguere multo ante ipsos a Dialectica Antiquitas tota edocta fuit. Quod vero ad Historiæ cognitionem spectat, hoc quoque multo ante ab Historiæ ipsius conditoribus probe cognitum fuisse affirmare cogimur, & solleter animadversum. Etenim si veteres illi rerum gestarum Scriptores ista ipsa scientia, quam novam isti volunt, caruissent, ea profecto mandare litteris, quæ posteritas tota, si quædam excipias, vera haberet, non potuissent. Fac illos penitus hac, de qua dicimus, arte destitutos non expendisse, quæ scriberent, rumores vulgi in condendis annalibus fuisse consecratos, quæ tandem in iis residere posset auctoritas? qua sublata nihil certi in tota antiquitate reperiretur; nos vero in summa rerum omnium ignoratione versaremur. Non negarim tamen, aliquid habens aliquam rationem utilitatis istos præstitisse, qui in hac adornanda recenti, quam vocant, arte eo usi sunt artificio, ut, quæ a veteribus observata jam pridem fuerant, sparsa ac dissipata colligerent, ordine disponerent, atque iisdem novum quasi lumen afflarent. Qua in re laudanda cum iis convenio; ab iisdem autem in eo dissentio, quod multo vetustissimam artem recentem velint, quippe quæ ita antiquis fuit cognita, ut vel pueri ipsi Romæ *nasum*, uti falsus Poeta non insulse scriptum reliquit, *Rhinocerontis haberent*,

rent, quo non sagaciter solum obvia quæque ac proxima odorarentur, sed quam longissime etiam posita atque abdita assequerentur.

VI. Demonstrata artis criticæ & necessitate & vetustate, de recto ipsius usu nonnulla perstringam, & qua potissimum ratione illum obtinere possimus, breviter indicabo. Ac mihi quidem ante omnia videtur animis curam esse adhibendam, qua adhibita sanitas illa mentis consequatur, sine qua rectus hujus artis usus omnino est desperandus. Sunt in primis quidam ita animo comparati, ut Scepticorum more, nihil credant, nihil verum habeant, de omnibus ambigant, omnia in dubium revocent. Jam, si qui hujusmodi sunt si-
ve natura, si-ve consilio, si-ve, quod verius puto, pravæ vitio voluntatis, quid ego dicam? Nemo non videt hos homines ab hac arte omnino repellendos, atque ad Pyrrhonem illum suum amandandos, quem nacti sunt ducem ac magistrum, qui a Gymnosophistis & Magis edoctus pessimum invexit Philosophiæ genus. Ego quidem non agerem cum istis hoc modo, siquidem illi, quo laborant, morbo aliqua adhiberi medicina posset. Sed quod tandem tam efficax helleborum ab Anticyra peti poterit, unde remedium cerebris tam male affectis sufficiatur? Pestifera hæc opinionis lues, nihil nimirum esse certum, veritatem exploratam haberi nullam posse, pestifera, inquam, hæc lues ubi animum corripuit, ita omnem

fere rationem inficit atque corrumpit , ut nullus fere sit remedio locus . Quare istiusmodi homines relin-
quamus , nec ad artem criticam accedere patiamur ,
ad quam si semel accesserint , ea certe pessimum in mo-
dum abutentur .

VII. Scepticos consequuntur Academici , (a) qui ingenio quidem tam pravo non sunt , sed hi quoque eo ferme morbo implicantur , quo Sceptici . Nihil est enim , de quo in utramque partem nolint disputare , nulla non in re assensum sustinent , nihil negant , nihil affirmant . Hos autem homines si ad nostram artem admiserimus , quid tandem fiet ? Cui enim animo infedit , in eo solum ingenii vires contendere , ut quidquid in quaque re minus verum objicitur , inquirat , is arte hac nostra , quæ veri disceptatrix est , quæ propositis in utramque partem rationibus singula attente considerat , non minus sane , quam Scepticus , abutetur . Nulla enim res est , si illa excipias ,

(a) Cic. lib. 3. de Orat. „ Arcefil-
„ las primum , qui Polemonem au-
„ dierat , ex variis Platonis libris ,
„ sermonibusque Socraticis hoc ma-
„ xime arripuit , nihil esse certi
„ quod aut sensibus , aut animo per-
„ cipi possit „ . Idem lib. 2. cap. 29.
Quæst. Acad. „ Academicis nihil affir-
„ mant , & quasi desperata cognitio-
„ ne certi id sequi volunt , quod-
„ cumque verisimile videatur .

Idem lib. eod. „ Cum jam gra-
„ vissimæ Philosophorum disciplinæ
„ constitissent , tum exortus est ,
„ ut in optima Republica Tiberius
„ Graccus , qui otium perturbaret ,
„ sic Arcefilas , qui constitutam Phi-
„ losophiam everteret , & in eorum
„ auctoritate delitesceret , qui negas-
„ sent quicquam sciri aut percipi
„ posse „ .

pias, quæ prima a Philosophis principia idcirco dicuntur, quod per se nota sunt, & lumine ipso naturæ illustria, nulla, inquam, res est, cui nihil objici, nihil possit opponi. Omnia fere hujusmodi sunt, quæ uti antica conspici, ita etiam posita, ut ita dicam, spectari parte possunt. Multæ in quaque re occurrunt difficultates, multa se offerunt, quæ assensum cohibeant, multa prima specie atque obtentu falsa opponuntur. Jam qui in hæc sola ingenii aciem dirigat, quomodo veritatem, quod unum ars critica propositum habet, explicabit? Huc accedit, quod quæ videntur obstare veritati gravius interdum animum feriunt, quam eundem ipsa percellat veritas; quod animadvertere licet in iis, qui satis ingeniosi & acuti ad aliquid objiciendum, iidem in objecti refutatione percipienda tardi atque hebetes reperiuntur. Ego quidem non impedio, quo minus in utramque partem argumenta proferantur, & vero etiam investigentur; sed eatenus, quatenus eorum investigatio serviat veritati; si secus fiat, jam non veritas inquiritur, sed calumniandi occasio captatur. Quare qui cum Academicis nihil exploratum habent, qui in omnibus assensum cohibent, & sententiam interponere negant suam, non dubium, quin hi quoque ab arte nostra repellendi sint, & procul amandandi.

VIII. Succedunt his litigiosi, quos Cynicos libet appellare, qui ad id solum, ut lites ac jurgia serant,

facti, ac prope nati esse videantur. Atque hi quidem nihil de recto artis criticæ usu solliciti id unum habent propositum, ut omnia turbulentis seditionibus permisceant atque perturbent. Hosne ego homines ad hanc artem admittam, quibuscum quiete ac pacate ne vivere quidem licet? Nam quæ societas? qui usus? multo autem minus quæ familiaritas cum eo esse potest; qui omnia mea dicta excipiat, carpat, reprehendat; latret, mordeat; quicum perpetuæ lites, rixæ, contentiones; nulla pax, nullum fœdus, induciæ nullæ. Si quis hujusmodi ingenium a natura sortitus est, longe abeat, recedat procul, vitam fugæ solitudinique mandet, ubi secum ipse litiget atque contendat, quandoquidem litibus adeo contentionibusque delectatur. Sic agitur cum istis, & jure agitur, quibus ea justissima pœna irrogatur, ut vitam deserti ab omnibus atque ab humano consortio segregati in summa ægritudine ducant, qui omnium vitam infestam reddunt atque odiosam. Hos igitur homines publicæ quietis ac tranquillitatis inimicos, qui merito suo ab hominum consuetudine removentur, quomodo ego ad hanc artem possim admittere? quomodo accedere patiar? quæ cum per se litium ferax sit & contentionum, istis accedentibus eo negotium evadet, ut non jam rationibus res & argumentis, sed vi manuque geratur. Istis iterum edico, abeant procul, recedant; discant prius
emen-

emendare naturam, corrigere ingenium, & tum demum de arte critica cogitare incipiant, ad eamque aspirare meditentur.

IX. Litigiosos cerebrosi excipiunt ac pervicaces; qui quam semel malam animo arripuerunt opinionem, nullo modo adduci possunt, sibi ut illam eripi sinant. Frustra eos rationibus aggrediaris, frustra argumentis oppugnes, frustra de loco, quem infederunt, coneris depellere; fixi, immobiles in sententia perstant, & conatus omnes tuos una, qua sola pollent, obstinatione eludunt. Hos ego etiam homines a Criticorum numero excludo, atque mulierculis adenseo, quæ, ut inopes consilii ac sapientiæ, quominus perspicaces in cognoscendo, ita fere pervicaciores in retinendo sunt, quod semel arripuerunt. Objicitur his famæ & existimationis jactura, nec non inconstantia nota, quarum unam subire se arbitrantur, in alteram incurrere consilii mutatione formidant. Male id quidem iis objicitur, & non minus ab his perverse sentitur. Nam quid est, quod tantopere a mutanda sententia refugere debeamus? Errare hominis est, corrigere errorem sapientis. Neque vero a sapiente abhorret mutare consilium, quod sapienter sit, quotiescumque gravis id ratio postulat; neque tamen, cum justa de causa id fiat, existimatio amittitur, neque quidquam de propria dignitate perditur. Suam isti per me licet curent existimationem, quam ita caram habent, ut ve-

ritati ac rationi anteponendam ducant ; eos ego non interpellabo ; facile patiar , sentire , quod cupiunt , dummodo se Criticorum quæstionibus non immisceant , qui nisi dociles sint , nisi se rationibus persuaderi sinant , nisi ea libertate utantur , ut ad mutandam sententiam parati sint , nullus ejus , quam profitentur , artis utilis usus est , neque vero esse potest .

X. Reliqui sunt ii , qui veritatis nimium studiosi sunt & qui fortasse prioribus , quos hæcenus enumeravimus , aliquo modo perniciosiores existimari possunt . Sunt enim quædam vitia aperta ac manifesta , a quibus natura ipsa refugimus ; sunt vero alia tecta ac latentia , in quæ facile , nisi caveamus , incurrimus , & quæ obtentu virtutis & specie recti certius nos fallunt atque decipiunt . Rectus artis criticæ usus videtur postulare , ut veritatem unam Criticus propositam habeat , in hanc unam ingenium , studium , diligentiam , operam omnem contentionemque dirigat . Ad hoc enim potissimum hominibus ingenium a Deo Opt. Max. datum est , & acerrima illa cogitandi commentandique facultas impertita , ut ad veritatem investigandam cogitationes ipsi nostras commentationesque conferamus (a) . Hos ego homines ab arte critica , neque remo-

veo

(a) M. Tullius Cicero Offic. lib. I. „ crum putamus , labi autem , errare ,
 „ Omnes , *inquit* , trahimur , & ducimur ad cognitionis , & sapientiæ
 „ turpe ducimus . In hoc genere . . .
 „ cupiditatem , in qua excellere pul-

veo , neque vero removi unquam . Quid ergo est vitii , quod in iis reprehendo ? Dixi jam superiore actione , & dicam iterum . Memoriz proditum est, Scipionem Africanum , Cenfor cum esset , Centurionem nescio quem , qui in Paulli pugna non adfuerat, sed in castris subsederat ad eum finem (sic enim causabatur) ut castra ipsa custodiret , nihilo tamen minus & tribu movisse , & illis verbis notandum censuisse ; *Non amo nimium diligentes* ; similiter ego nimium veritatis cupidos neque amo neque probo .

XI. Nam quid tandem nimia ista atque impotens veritatis aviditas pariet ? nisi quod venaticis canibus usvenire solet , qui quo acriores in persequendo sunt , minusque propterea venatoris dicto audientes , eo facilius prædam de ore amittunt , atque inanes post longam incitatissimi cursus defatigationem revertuntur . Videas istos venaticorum more canum hac illac sine modo discurrere , seu potius furere , perinde quasi illos æstrum pupugerit . Interea prætervolat in hac tanta trepidatione veritas , & quam ob oculos interdum habent , eandem non raro incogitantes festinantesque prætereunt . Nimirum hoc impotens illa

G g 4

cu-

„ ne incognita pro cognitis habeamus , hæc temere assentiamus . . .
 „ Alterum est vitium , quod quidam
 „ nimis magnum studium , multam-
 „ que operam in res obscuras , atque

„ difficiles conferunt , easdemque non
 „ necessarias ; quibus vitiis declinat ,
 „ quod in rebus honestis , & cogni-
 „ tione dignis operæ , curæque pone-
 „ tur , id jure laudabitur .

cupiditas efficit , cui se totos agendos asportandosque permiserunt . Adsit veri inveniendi studium , sed moderatione temperetur ; ne nimium sit , ne impotens , ne effrænatum ; rationi locum det , eique pareat . Nulla in veritatis indagatione omittatur diligentia , sed modus adhibeatur . Observentur omnia attente , siquæ apparent veritatis notæ , acutius inspiciantur , si nullæ se produnt , sollertius investigentur , vestigia denique ipsa veritatis fere leviter impressa , & sæpe vix ac ne vix quidem adumbrata eo usque persequamur , donec , quo intendimus , perveniamus . Hac præscriptione adhibita veritas non elabetur , emerget siqua est , & quæsitâ invenietur .

XII. Sed non fortasse magis rectum artis criticæ usum impotens veritatis studium pervertit , quam evidentia cupiditas , de qua etiam aliquid postrema actione diximus . Triplex evidentia genus distinguunt Philosophi satis notum & pervulgatum ; nobis tertium , quod *moralem* evidentiam appellant , relinquunt , cui quidem error subesse omnino potest , cum una fere probabilitate contineatur ; sed hac ipsa probabilitate contentus esse Criticus debet , si aliquid in arte sua assequi vult . Si vero ad primum aut alterum evidentia genus evadere contendet , eo tendet , quo pervenire non potest . Neque vero movere nos illa cogitatio debet , quod tertio illi relicto nobis evidentia generi falsitas subesse possit , quandoquidem ne secundum quidem genus , quan-

quamquam dignitate prætet, ab eadem prorsus vacuum est atque immune. Minime me nunc, ut hoc exempli loco ponam, somniare certo scio, neque a vobis somniantibus, qui mihi tam benevolas atque attentas aures præbetis, audiri. Hæc tamen certa cognitio tam evidens non est, ut ei falsitas admisceri omnino nequeat; nihil enim tam manifeste repugnans ostenditur, ut non aliter, atque ego & vos sentimus, esse possit; hoc tamen neque me, neque vos sollicitat; quod si secus esset, ut ego jure riderer a vobis, sic vos a me æquo jure stultitiæ dementiæque condemnaremini. Jam vero si falsitate, quæ subesse alteri evidentiæ generi potest, angere nos nequaquam decet, quanto minus de tertio propter eandem causam laborandum erit. Unde etiam illud efficitur, quam præpostera ea ratio sit, ut, quod in rebus sensibus ipsis obnoxiiis evidentiæ genus assequi Physicus non potest, hoc Criticus in rebus arti suæ subiectis assequi se posse confidat.

XIII. Hactenus nominatim de quibusdam hominum generibus, non solum non idoneis, qui ad hanc artem admittantur; sed etiam hujusmodi, ut ab eadem omnino repellendi existimentur. Hoc autem si fiat, minuetur quidem numerus Criticorum; sed optimæ arti remotis minus idoneis atque exitiis consultius salubriusque providebitur. Nunc vero quid præterea dicam, de tot pravis animi permotionibus, quibus obsidemur, & rectus artis criticæ usus maxime pervertitur. Di-

itor-

forti nimirum atque abnormes cum simus, nihil facilius, quam ut si res a nobis metiri, & nostram ad normam exigere voluerimus, res ipsas fœdum in modum distorqueamus, sæpe enim nos de iudicio consilioque deducit, aut ira, aut odium, aut indignatio, aut invidia, aut ambitio, aut partium studium, aut cæteræ pestes, quibus non minus animus noster inficitur, quam rectus artis criticæ usus corrumpitur.

XIV. Hic vero, *Non mihi si lingua centum sint, oraque centum, Omnia morborum percurrere nomina possim*, quibus humanus animus obnoxius est; qui quidem morbi ipsos corporis morbos, quos prope innumerabiles esse volunt, non solum numero exæquant, sed etiam fortasse superant; hoc certe capitaliores sunt, quod gravius ab his, quam ab illis periculum imminet, nisi opportuna ac præsens medicina adhibeatur. Quare quo citius me ab his expediam, Criticum nostrum Ethicis in disciplinam dabo. Hoc Ethici curabunt, quibus illud oneris incumbit, ut male affectis humani animi partibus subveniant, laborantibusque succurrant. Illorum munus est singulos animi morbos recensere, distinguere, definire; suam singulis medicinam morbis adhibere; ulcera animi, quæ plurima intus latent, detegere, incidere, funditus amputare, &, quoad ejus fieri potest, animum ipsum integræ sanitati valetudinique restituere. His igitur ego Criticum nostrum tradam; hos audiat præceptores, his pareat, his se, quibus laborat, morbis

bis curandum permittat ; & tum demum cum vitiis omnibus bene perpurgatus fuerit ad nostram artem accedat.

XV. Restaret nunc ut iis hominibus remotis ab arte nostra , qui non solum exitiales , sed etiam minus idonei visi sunt , & præterea Critico nostro a pravis animi permotionibus , quæ rectum artis criticæ usum pervertunt , satis expedito , suis etiam Criticum ipsum instruendum virtutibus ornandumque susciperem . Verum non est , cur hac de re magnopere laboremus . Noxiis extirpatis herbis , quæ bonam sementem suffocant , satio quoque prospere succedit atque ex sententia . Facile , ut in solo bene subactò ac mollito se fruges efferunt ; ita in animo bene comparato non minus facile virtutes feliciterque proveniunt . Sed tamen ne hæc institutionis nostræ pars omnino a me præterita fuisse videatur , non ego quidem sic ad illam tractandam aggrediar , ut hujus , quam dixi , prudentiæ partes ac virtutes distinguam , & singulas singulis actibus accomodem . Nam prudentia , cum per omnes hominum actiones vagetur ac serpat , & usu fere atque observatione discatur , si ingenium nata sit ad recta quæque ac rationi consentanea comparatum , facile acquiritur ; qua acquisita per se sine tot præceptionibus actionum ipsarum temperatio quædam æquabilitasque consequitur ; sed tamen ne hæc pars omnino præterita a me sit , eam paucis expediam , atque omnia uno vocabulo comprehendam .

Ita-

XVI. Itaque in constituendo ornandoque optimo Critico sic me geram , quemadmodum in optimo Oratore perficiendo se vir sapientissimus & Orator (a) ipse eloquentissimus gessit . Tulit quondam mos in Romana Republica , ut in ea Orator plurimum posset, ac pene omnia unius Oratoris verterentur arbitrio . Hac de causa vir hic , de quo dico , sapientissimus non vulgo omnibus tantum munus , in quo vita civium , salus , fortunæ , imperii majestas , Reip. summa agebantur , committendum putavit . Multa per eloquentes homines importata civitatibus detrimenta meminerat , qui quam florentissimam a majoribus Rempublicam

ac-

(a) M. Tull. Cic. de Orat. lib. 2.
 n. 20. „ Quare ego tibi Oratorem sic
 „ jam instituam, si potuero, ut quid
 „ efficere possit ante perspiciam .
 „ Sit enim mihi tinctus litteris ; au-
 „ dierit aliquid , legerit , ista ipsa
 „ præcepta acceperit ; tentabo quid
 „ deceat , quid voce , quid viribus ,
 „ quid spiritu , quid lingua efficere
 „ possit . Si intelligam, posse ad sum-
 „ mos pervenire, non solum horta-
 „ bor , ut elaboret , sed etiam , si
 „ vir quoque mihi bonus videbitur,
 „ obsecrabo ; tantum ego in excel-
 „ lente Oratore , & eodem viro bo-
 „ no, pono esse ornamentum universæ
 „ civitati . Sin videbitur , cum om-
 „ nia summa fecerit , tamen ad me-
 „ diocres oratores esse venturus ; per-

„ mittam ipsi, quid velit ; molestus
 „ magnopere non ero . Sin plane
 „ abhorrebit , & erit absurdus ; ut
 „ se contineat , aut ad aliud studium
 „ transferat admonebo . Nam ne-
 „ que is , qui optime potest , dese-
 „ rendus ullo modo est a cohortatione
 „ nostra; neque is, qui aliquid potest,
 „ deterrendus; quod alterum, divinita-
 „ tis mihi cujusdam videtur ; alterum,
 „ vel non facere quod non optime
 „ possis , vel facere quod non peffi-
 „ me facias , humanitatis ; tertium
 „ vero illud , clamare contra quam
 „ deceat , & quam possis , hominis
 „ est , ut tu, Catule, de quodam de-
 „ clamatore dixisti , stultiæ sum-
 „ quamplurimos testes domesticæ præ-
 „ conio colligentis „

acceperant , eam eloquentia aut perdidierunt , aut certe summum in *discrimen* adduxerunt . Volebat ille quidem ejus , quam profitebatur , artis peritum esse Oratorem ; eum præterea requirebat , qui sapiens , doctus , eruditus , copiosus , disertus esset ; sed quod tutius tantis rebus sine periculo præficeretur , volebat virum esse *bonum* , hoc est probum , quo uno verbo reliquas animi virtutes , quæ in Oratore eminere maxime debebant , complecti sibi visus est . Tantum momenti in una bonitate vir sapientissimus ac prudentissimus ad bene gerendam Rempublicam inesse existimavit .

XVII. Jam vero quod olim in Romana Rep. Orator fuit , hoc nunc in Litteraria Criticum esse vere dici potest . Ejus est summum in unaquaque facultate exercere dominatum , ejus auctorum omnium scripta cognoscere , corrigere , reprehendere , ejus de unius cujusque nostrum ingenio , doctrina , eruditione judicare ; nihil denique est in omni arte libero digna , quod ejus non sub sit potestati . Hac tanta uni homini concessa potestate non videbor a recta ejusdem institutione aberrare , si non dissimili modo , atque ille in Oratore , ego me in Critico geram , & ad quam ille normam Oratorem direxit suum , ego quoque Criticum exigam nostrum . Volo igitur eum ingenio esse summo , summa doctrina , volo diligentem in perquirendo , volo sagacem in investigando , volo in meditando diuturnum , volo
in

in commentando acrem atque subtilem, volo eruditum, qui multa legerit, audierit, cognorit, volo ea præsertim, de quibus iudicium ferre debet, diu multumque ante perpenderit, quam sententiam jure suo interponat suam. Sed cum eum his omnibus instructum virtutibus atque ornatum habuero, non quiescam, non contentus ero. Itaque super omnia velim virum esse *bonum*, hoc est pium, honestum, probum, religiosum, cui tuto uniuscujusque nostrum dignitas, nomen, existimatio committi possit, qui scripta nostra, ea, qua par est, æquitate cognoscat, a quo doceri, erudiri, & ubi res poscat, corrigi etiam ac reprehendi non iniquo animo patiamur. Si talis erit, qualem dico esse oportere, ut ille Oratorem suum, sic ego Criticum nostrum, non hortabor solum, sed enixius obsecrabo, urgebo etiam, ut id munus ad commune totius Litterariæ Reipublicæ commodum Litteratorumque omnium utilitatem suscipiat. Quantum ille præsidii in *bono* Oratore collocandum putavit, tantum ego in *bono* Critico bonæ spei collocandum existimabo.

XVIII. Si vero eum multo aliter, atque ego requisivi, esse contigerit, non modo ad hanc artem non accedere patiar, sed etiam ab eadem, quam longissime potero, repellam. Omnia enim permiscebit, turbabit, confundet atque pervertet; dissensiones excitabit, lites fovebit, contentiones seret,
dis-

diffociabit animos, & in Litteraria Reipublica tanquam turbulentus aliquis civis ac seditiosus existet. Quo acriori ingenio præditus erit, quo majori doctrina excellet, eo perniciosior evadet & capitalior. Nequidquam huic homini artis criticæ præcepta observanda proponentur, frustra postulabitur æquitas, frustra moderatio efflagitabitur. Præceptis quantumvis optimis non parebit, repugnabit æquitati, moderationem aspernabitur, officii immemor, æqnitatis oblitus, modi nescius ne in ipsa quidem intemperantia modum aliquem adhibere sciet, nihil denique boni proficisci ab eo poterit, qui ipse non bonus, sed pessimus homo sit.

XIX. Da igitur mihi Criticum, qualem ego brevi hac oratione mea formandum fingendumque curavi, tum nihil præterea, quo utilis ac salutaris sit, neque ego, neque vero quisquam alius requiret. Da mihi hominem non Scepticum, non Academicum, non Cynicum, hoc est litigiosum, non cerebrosum, non nimis veri cupidum, non evidentiae appetentem; da mihi eundem, quantum quidem humana infirmitas patitur, rationis bene compotem; qui non invidia, non indignatione, non ira, non odio, non spe, non timore, non ambitione, non gratia, non partium studio moveatur; qui præterea acri ingenio, memoria firma, summa eruditione, eximia doctrina, singulari prudentia excellat; qui pacatus, pius, quietus,

tus, religiosus, moderatus, uno verbo, *bonus* sit, tum profecto mihi ac Litterariæ Reipublicæ, & vero etiam Catholicæ Religioni, cujus etiam res hoc in munere non parva agitur, utilem ac numeris omnibus absolutum Criticum dabis.

Hactenus Parthenius de tota Artis Criticæ Ratione differuit. Plura quidem dicendo persequi poterat, sed moderationem sibi in argumento locupletissimo adhibendam esse statuit. Qua ille moderatione in scribendo usus est, ego quoque in adscribendis adnotationibus usus sum. Utrum opere pretium fecerit, an fecus, judicent eruditi, & Tullianæ eloquentiæ studiosi. Certe illud constans est, ut unum Ciceronem exprimeret. Sed quamvis ingenue Auctor fateatur se a tanto exemplari quam longissime abesse; sic tamen ad illud imitatione videtur accessisse, ut optime spei adolescentibus exemplo suo ostenderit, quantum momenti in una le-

ctione ciceroniana ponendum sit, unde absolutissima rerum omnium tractandarum forma peti possit. Quædam menda irrepperunt, quæ facile Lector corriget, ut pag. 385. resciderunt pro resciderunt, p. 442. hinc errorem pro hunc; pagina vero 365. sic legatur; digna, quæ iterum & sapius audiantur. Restat ut Lectores benevolentiam & æquitatem Parthenio impertiant suam, qui ita sive in scribendo sive in agendo se gessit, ut omnium quos redarguit, tacitis nominibus eorum famæ exstimationique pepercerit. Recte Hieronymus adversus Rufinum; *Quando sine nomine contra visia scribitur, qui irascitur, accusator est sui.*

EXPLICIT
AD MAJOREM DEI
AC DEIPARÆ GLORIAM.





